

清名家詞

(九)




憶 詞



蓮  
華

江  
尚



陳 澧（嘉慶一五——光緒八）

字蘭甫。廣東番禺人。道光壬辰舉人。六應會試不第。  
官河源縣學訓導。少好爲詩。及長棄去。泛濫羣籍。凡  
天文地理樂律算術古文填詞及篆隸真行書無不  
研究。著有聲律通考切韻考漢書水道圖說等十餘  
種。存詞無多。迥異凡響。

8264  
v.9  
自序

余少日偶爲小詞。桂君星垣見之曰。此詩人之詞也。自是十餘年。不復作。或爲之。歲得一二闕而已。去歲黃君蓉石許君青皋邀爲填詞社。凡五會。而余僅成二詞。兩君謂余真詞人也。此三君皆工詞。而其言如此。蓋詞之體與詩異。詩尙雅健。詞則靡矣。方余學爲詩。故詞少婉約。今十餘年。不學詩久矣。或可以爲詞歟。然亦才分薄耳。昔之詩人工詞者。豈少耶。今年下第歸。行篋書少。鉛槧遂輟。江船雨夜。稍稍爲詞。以銷旅愁。時方以廣文待選。取杜詩語。題之曰。燈前細雨詞。并舊作都爲一卷。甲辰新秋。章貢舟中識。

謹案先京卿以大挑得教職。迨選任河源。到官兩月。卽告病歸。而粵賊起矣。既而賊踞金陵。以先世爲上元人。凡甲辰後所爲詞。雖無多篇。併前作。題曰憶江南館詞。以寄思念故鄉之意。晚年復手自刪定。茲將遺稿重寫。仍錄前序。並附注於後。壬子重陽。宗穎謹記。

797743

89030121



# 憶江南館詞

番禺陳 澧 蘭甫

風入松 八月三日集水明樓中閒紅綠二語最爲張韶臺所賞書爲樓上楹

帖又於中秋夜集以北曲風入松譜此詞授歌者頗協律云

夕陽城郭水邊樓。纖月挂樓頭。客來剛是黃昏後。儘安排、酒殘茶甌。花雨紅飛，硯几山痕綠到簾鉤。檀槽銀燭小屏幽。一曲盪清愁。潮生風熟人歸去。待明朝、更約盟鷗。看到月兒圓了，還來一醉中秋。

鳳凰臺上憶吹簫 越王臺春望癸卯二月越臺詞社作

芳樹啼鴉。野花團蝶。嫩晴剛引吟筇。訪故王臺榭，依約樵蹤。零落當年黃屋，都分付、蜚雨蠻風。添惆悵。望花城一片，海氣冥濛。青山向人似笑，笑淘盡潮聲，誰是英雄。只幾堆新壘，鳥散雲空。休說樓船下瀨，傷心見、斷鏃苔封。還依舊、攀枝亂開，萬點春紅。  
萬紅友詞律載此調李易安詞休休者回去也謂第二休字用韻非也易安此詞已

有欲說還休句不當重休字余此闕依易安詞填之而山字不用韻以止萬氏之誤

綠意 苔痕越臺詞社作

空庭雨積。漸染成淺黛。延緣牆隙。正是池塘春草生時。難辨兩般顏色。開門深掩無人到。已滿地、翠烟如織。又暗添、幾縷蝸涎。裊裊篆紋猶溼。應誤迴闌倚徧。怕行近滑入穿花雙屐。似淡還濃。漠漠平鋪。只道綠槐陰密。晚來幽恨知多少。訝看到、斜陽成碧。謝樹頭、吹落嫣紅。點點破伊岑寂。

一枝春 羊城人日例有花埭之游余以小病閉閣不出案頭水仙作花山農

復致緋桃數十枝紅豔欲醉頽然隱几口占小詞寫之

響竹喧餘笑題詩。此日心情都懶。薰爐燕几。換了酒旗歌板。瑤妃睡起。步羅襪。肯來相伴。還暗憶、門掩春山。幾樹豔如人面。村童折來紅綻。趁湘簾日映。銅瓶波暖。明脂靚粉。媚我破琴枯硯。晴川畫艦。怕游屐、麴塵撩亂。儘岑寂、聊慰今年。看花霧眼。

水龍吟 壬辰九月之望吾師程春海先生與吳石華學博登粵秀山看月同



賦此調都不似人間語真絕唱也今十五年兩先生皆化去余於此夜與許青皋桂皓庭登山徘徊往蹟淡月微雲增我悵悵卽次原韻

詞仙曾駐峯頭。鸞吟縹緲來天際。成連去後。冰絃彈折。百重雲水。碧月仍圓。蒼山不改。舊時烟翠。只長林墜葉。西風過處。都吹作。秋聲起。此夜三人對影。倚高寒。紅塵全洗。珠江滾滾。暗潮銷盡。十年前事。欲問青天。素娥卻似霧迷三里。賸出山迴望。鐙明佛屋。有閒僧睡。

前調 是月十九日皓庭招集學海堂爲補重陽之會醉後疊前韻

是誰前度登高。蒼苔屐齒留巖際。興來此日。也堪重詠。玉山藍水。菊有花時。蟬無聲後。漸疏林翠。正危闌縱目。夕陽紅處。有城郭。炊烟起。忽覺秋心浩渺。倚西風。螺杯新洗。憑高釀酒。而今只願。八荒無事。容我蹉跎。長騎款段。少游鄉里。便傾壺醉倒。山空人靜。學希夷睡。

齊天樂 辛丑春試報罷出都驛柳萬條惹人鞭鐙時鄉關烽火音書杳然困

頓輪蹄吟情久廢。偶倚橫竹，以盪愁魂。

盧溝橋外垂楊樹。依依送人千里。缺月平隄。殘陽古岸。逗得些些詩思。東風又起。捲飛絮如雲。亂隨流水。多少春光。恁教度盡客愁裏。高樓幾人倦倚。望天涯極目。應損眉翠。短笛魂銷。長亭淚澀。別後光陰彈指。歸期近矣。只依舊征衫。青青如此。且覓巢痕。學他雙燕子。

甘州 辛丑張韶臺和余盧溝詠柳之作自是唱酬遂多今歲同至揚州余往金陵韶臺先歸空江獨吟追憶前事慨然成詠

記盧溝烟柳和新詞。淒斷小銀箏。正風前畫角。夢中紅袖。一樣關情。此日天涯依舊。書劍共飄零。卻恐愁邊鬢。添了星星。憔悴江南倦客。更句留十日。酒夢纔醒。賸清絃獨撫。深夜伴孤檠。只如今。怕吟楊柳。甚年年。慣作別離聲。歸來好。南園烟水。料理鷗盟。

百字令 甲辰春首贛州舟中見新月同舟有誦老杜鄜州詩者感而賦此歸

時坐碧桃花下倚橫竹吹之當銷盡虛幌中幾許淚痕也

一年明月記今宵初向篷窗相見。千里碧雲堆暝色。漏出春痕如線。淺鬢含顰。長眉帶痕。似恨江天遠。照人羈旅。素娥應也腸斷。此際光溼雲鬢。碧桃花底。簾影玲瓏捲。一箇春星如豆小。斜趁迴廊低轉。欲拜還慵。遲眠又愛。無語釵梁倦。團圓猶待。幾回僊桂輪滿。

齊天樂 十八灘舟中夜雨

倦游諳盡江湖味。孤篷又眠秋雨。碎點飄鐙。繁聲落枕。鄉夢更無尋處。幽蛩不語。只斷葦荒蘆。亂垂烟渚。一夜瀟瀟。惱人最是繞隄樹。清吟此時正苦。漸寒生竹簟。秋意如許。古驛疏更。危灘急溜。併作天涯離緒。歸期又誤。望庾嶺模糊。溼雲無數。鏡裏明朝。定添霜幾縷。

滿庭芳 馬彬士孝廉春闈報罷歸途遇舊相識愁病不支相對於邑慨然有白傅琵琶之感屬填此闋以解閒愁

蓮葉陂塘。柳絲門巷。有客重繫游驄。桃花一樹。不似舊時紅。相見何如未見。漫贏得  
粉淚千重。添腸斷、愁枝病蕊。禁得幾春風。 恁恁來又去。棲鸞樹在。度鵲橋空。歎一  
樣天涯。飄泊還同。怕聽琵琶怨曲。撩春恨、堆上眉峯。相思夢、休隨粉蝶。再入百花叢。

浣谿紗 歸次贛州舟中作

千里晴江曲曲流。布帆無力滯歸舟。更遲幾日又新秋。岸柳學人腰樣瘦。草蟲說  
我夢中愁。情懷不似少年游。

鵲橋仙 七夕嶺北舟中戲作

銀河淺淺。雙星此會。只架橋兒一座。假饒隔了一重山。便烏鵲也飛難過。 閨中乞  
巧。鐙前兒女。笑語片時愁破。獨憐孤客在天涯。卻似那瓠瓜一箇。

摸魚兒 東坡江郊詩序云歸善縣治之北數百步抵江少西有磐石小潭可

以垂釣余訪得之題以此闋

繞城陰雁沙無際。水光搖漾千頃。蒼崖落地平於掌。溼翠倒涵天鏡。風乍定。看絕底

明漪曾照東坡影。林烟送暝。只七百年來。斜陽換盡。一片古苔冷。幽尋處。付與牧  
村樵徑。江郊詩句誰省。平生我亦烟波客。笠屐儻堪持贈。雲水性。便挈鷺提鷗。占取  
無人境。商量盡。向碎竹叢邊。荒蘆葉畔。添箇小漁艇。

甘州 惠州朝雲墓每歲清明傾城士女酌酒羅拜坡公詩云丹成逐我三山  
去不作巫陽雲雨仙余謂朝雲倘隨坡公仙去轉不如死葬豐湖耳

漸斜陽淡淡下平隄。塔影浸微瀾。問秋墳何處。荒亭葉瘦。廢碣苔斑。一片零鐘碎梵。  
飄出舊禪關。杳杳松林外。添做蕭寒。須信竹根長臥。勝丹成遠去。海上三山。只一  
坏香塚。占斷小林巒。似家鄉。水仙祠廟。有西湖。爲鏡照華鬢。休腸斷。玉妃烟雨。謫墮  
人間。

高陽臺 元日獨游豐湖湖邊有張氏園林叩門若無人者遂過黃塘寺啜茗  
而返憶去年此日游南昌螺墩不知明年此日又在何處也

新曙湖山。醞寒城郭。釣船猶閣圓沙。短策行吟。何曾負了韶華。虛亭四面春光入。愛

遙峯綠到檐牙。欠些些、幾縷垂楊。幾點桃花。去年今日螺墩醉，記石苔留墨，窗竹搖紗。底事年年清游，多在天涯。平生最識閒中味，覓山僧、同說烟霞。卻輸他、斜日關門，近水人家。

百字令 市橋有水松大數十圍雷折其榦近根數支猶活望之如小山旁一里許有陳將軍墓相傳爲東晉人南山先生與予來觀欲築亭於樹下先生賦詩予填詞和之

何年夸父把鄧林移作天南一柱。倒挂蒼龍纔見首，雨鬣風髯無數。神臂橫撐，霜皮直裂，隱隱聞雷斧。海鵬飛倦，一枝來宿深處。旁有高塚麒麟，行人指點，道是將軍樹。夜半翠濤天際響，時見雲旗來去。醜酒長歌，結茅小築，留得驚人句。題名崖石，與君同壽千古。

點絳脣 題畫送沈偉士之高州

一葉輕帆，送君去也。重回首。幾絲烟柳，搖得斜陽瘦。帘影苔痕，簫譜闌珊後。重陽

又登高時候。負了黃花酒。

念奴嬌 題扶醉士女圖

濛濛春月。更重重花影。深深庭院。似倦似愁。還似病。底事翠欹紅軟。醉惱杯深。歡嫌漏促。不許人偷換。潮痕滿頰。桃花未抵人面。鬢髻碧玉。闌邊雲香月淡。畫裏人曾見。添箇籠燈。明蕩漾。照徹鳳翹低顫。記也難真。說來若夢。付與閒鶯燕。春來春去。藤花亂落如霰。

點絳脣 爲林明之題守梅圖

釀雪光陰。嫩寒初透。重衾薄。窗前綠萼。一夜思量著。定有疏花。開到茅亭角。巡檐索。□□□□。只傍林家鶴。

水龍吟 紫蘭俞梧生屬賦

夕陽斜映湘山。湘娥窈窕。搖雲帔。國香標格。玉兒太瘦。紅兒怎比。倩影亭亭。溫湯出浴。霞杯微醉。是樊川俊賞。同心早訂。誰會得尊前意。最愛春芽茁處。較新蒲吐葦。

還膩。赤鱗狂舞。惹他嬌鳳。銜將仙佩。夢裏模糊。雲迴妙曲。醉來猶記。甚回文信杳。霍家釵上。有相思淚。

霓裳中序第一 夜來香

疏籬繞翠蔓。未到斜陽黃尚淺。螻蟻先知香滿。便葉底藤梢。也都尋徧。花籃唱晚。正摘來、清露初泫。教斜戴、搔頭碧玉。一色恐難辨。應伴。素馨成串。更末麗、銀絲亂顫。輕颺微度鏡檻。暗裏魂銷。人在深院。涼宵鬢影倦。到卸卻、金釵猶戀。判今夜、與伊同睡。移插枕函畔。

綠意 黃理崖獲異蜨大如掌淺碧色中有小紅暈素豔可喜詫爲未見倩工畫者爲圖屬題

羅浮鳳子。是甚時蘸了。西湖活水。俗謂淺碧色爲西湖水。荷背纔翻。竹粉初勻。顏色也都難似。何來小暈拋紅豆。訝點點、相思牢記。算百花、養得芳容。最是素蘭秋蕊。向晚晴天卵色。乍飛去愛趁涼颺遊戲。此蜨終日不動日暮乃飛。依約香羅。疊雪輕



衫行近綠陰叢裏。煩君小硯揩蕉白。爲寫出、風前雙翅。借畫眉、黛筆餘痕。染上研光銀紙。

水調歌頭 代鷗答稼軒

白鷗沒浩蕩。萬里孰能馴。海人從我游者。我自愛相親。堪笑鷗貪腐鼠。仰視鷓鴣曰。嚇不可與同羣。更有鵝與鴨。也解惱比鄰。歎飄飄誰似我。一閒身。舍南舍北春水。日日往來頻。遙望一行白鷺。都上青天飛去。各自有前因。但乞鏡湖住。此外盡浮雲。

前調 朱墨莊見予代鷗答稼軒詞而賞之因用稼軒盟鷗韻以柬墨莊

百年三萬日。幾日笑顏開。何須昵昵兒女。恩怨語低回。且學寓言莊叟。又似滑稽方朔。射覆待君猜。今日吾醉矣。明日抱琴來。笑古人成白骨。長蒼苔。只留幾卷樂府。助我飲千杯。聽到一彈三歎。試問誰爲此曲。慷慨有餘哀。省識斷腸處。休買白楊栽。

集外詞

百字令 夏日過七里瀧飛雨忽來涼沁肌骨推篷看山新黛如沐嵐影入水

扁舟如行綠。頗黎中臨流洗筆賦。成此闋。儻與樊榭老仙倚。笛歌之。當令衆山皆響也。

江流千里。是山痕寸寸。染成濃碧。兩岸畫眉聲不斷。催送蒲帆風急。疊石皴烟。明波蘸樹。小李將軍筆。飛來山雨。滿船涼翠吹入。便欲艤棹蘆花。漁翁借我一領閒簑笠。不爲鱸香兼酒美。只愛嵐光呼吸。野水投竿。高臺嘯月。何代無狂客。晚來新霽。一星雲外猶溼。

虞美人 題馬湘蘭畫蘭竹



風梢露葉亭亭立。翠墨看猶溼。小名題處是花名。一段瀟湘殘夢不曾醒。秦淮依舊波如鏡。不見巫雲影。畫屏指點認春痕。只有江南倦客最銷魂。

醉吟商 龍溪書院門外見羅浮山

漸坐到三更。月影正穿林杪。水邊吟嘯。此際無人到。一片白雲低罩。羅浮睡了。

漢南春柳詞

蓮影



龍啓瑞（嘉慶一九——咸豐八）

字翰臣。廣西臨桂人。道光二十一年一甲一名進士。授翰林院修撰。累遷至江西布政使。卒於官。切劘經義。尤長於音韻之學。著有古韻通說。其詩詞雜文。別爲經德堂集。近代以經師工填詞者。以啓瑞爲最著。

漢南春柳詞

臨桂龍啓瑞翰臣

臨江仙

長日恹恹春倦裏。翠蛾深鎖無聊。畫樓人靜晚香燒。刺桐明月下。閒坐學吹簫。千里關山嫌夢短。悶懷難度今宵。隔簾花影柳絲搖。曉鐘聲數點。依約到明朝。

水龍吟 重陽

曉來庭院陰陰。捲簾三徑黃花雨。驚寒送暖。畫堂無那。晚秋情緒。岳麓峯頭。西山寺外。舊游能賦。早雲衣夢冷。苔封石徑。天南北。空回顧。瞥見賓鴻飛過。悵天涯。故人何處。山筇野服。與誰潦倒。一樽香醕。只怕樓頭。登高望遠。相思同苦。又西風落葉。斜陽帆影。向瀟湘去。

湘春夜月 秋燕

占雕梁。翠泥痕染芳苔。幾日翦破春秋。羅幕不輕開。解道舊巢安穩。但海鄉儔侶。有

約同回。願歸期緩緩。金風玉露。芳訊頻催。良辰記否。梨花院落。楊柳樓臺。蹴倦輕紅。惟賸卻。一庭斜照。零落疏槐。檐邊絮語。更幾番。臨去徘徊。者一歲。算經營事了。東君雅意。明歲重來。

蝶戀花 秋海棠

萬朵春紅難位置。直待秋宵。點就妝兒媚。牆畔綠蘿陰滿地。和煙籠着佳人睡。忽被曉風吹特起。浪蝶遊蜂。有意相迴避。一捻脂痕嬌欲墜。隔窗不語人能醉。

綺羅香 燈

破寂敲棋。分曹射覆。隨處佳人相伴。纔到黃昏。已聽隔簾低喚。儘檐前。羅幙香遮。怕風裏。玉釵紅亂。最難堪。春雨樓頭。離人不睡。夢魂懶。多情來照獨宿。曾照春情被底。脂痕鮮粲。隱約疏鐘。只怯夜長膏斷。怎修到。醉月芳筵。卻便來。臥雲空觀。待明宵。喜綴金蟲。飽看光燄滿。

如夢令

寒食清明都過。微雨小窗花彈。慵起不勝春。人倚畫屏清坐。無那。無那。樓外柳隄煙鎖。

滿庭芳

燕入疏簾。鴉啼古樹。數峯相向斜陽。半林紅葉。依約染微霜。雲送征鴻自遠。河橋外、煙水微茫。登樓望。江城畫裏。孤鷺立寒塘。憑誰來領取。蘭陂薦爽。梧院添涼。看新月嬋娟。又上宮牆。人靜寒生半臂。隨花影、繞徧迴廊。休嫌淡。西風菊徑。留得晚來香。

賀新郎 送春

花外啼鶻苦。醉長亭、斜陽影裏。聽歌金縷。拋擲韶華成底事。休算豪吟醉舞。只賸了、池萍花雨。寶篆溫香煙絮絮。悄梁閒、燕子渾無語。誰放過、豔陽去。冶遊記得章臺樹。乍凝眸、紅稀綠暗。怕尋歸路。說與別離天不管。芳草萋萋無數。任春水、迢迢能渡。欲寄征鴻相思字。望天涯、日暮千山阻。何計好、絆君駐。

探春慢 時辰表

鐵軸輕旋。銅輪暗轉。寶鑰初弄樞紐。軋軋機聲。匆匆隙影。鎖盡綠槐春晝。伴畫簾紅燭。便抵了。數聲蓮漏。怎知寸晷風檐。比常加迅還又。也管歡娛時候。想醉月芳筵。香送纖手。星斗闌干。盃盤狼籍。著意杏衫牢扣。此事君修到。任常傍。個人襟袖。撥轉鍼芒。春宵容暫遲留。

永遇樂 爲江夏陳子宣題相鶴圖小照

者是神仙。御風吹送。破空毛羽。骨換何年。歸來華表。特向君家住。階前馴擾。差同騏驥。皮相遇之不顧。到秋宵。風淒露警。妙解高人能悟。翩翩難覩。樓中騎鶴。怎擬畫中丰度。黃絹年華。烏衣門巷。凡鳥何足數。家聲仍舊。衝風振鬪。送汝碧城珠樹。相天下。舒翹碩士。雲霄萬古。

江城子 綽約新嬌生眼底。侵尋舊事。上眉尖。問君別後。愁多少。得似春潮夜

夜添此蔡君謨絕句也。余甚愛之。因作此詞以擬其意。

平蕪如織柳如煙。漫情牽。豔陽天。便是無情。花鳥也堪憐。說向旁人都不省。憑采筆。



訴鸞箋。緘情和憾寄鷗邊。問嬋娟。聽啼鶻。別後天涯。明月幾回圓。記否棠梨花下語。須後會。續良緣。

洞仙歌 聽書聲

兒時燈火。記寒窗滋味。滾滾書聲瀉流水。愛朋儕、總角音響琅然。貪早臥。靜聽碧紗  
幙裏。舊文猶省記。竊祿今朝。忍共牀頭斷檠棄。故紙爛成堆。付與兒曹。休便忘。書  
生活計。要聽得、宵來一聲聲。又肯道更闌。礙人清睡。

滿庭芳 秋後移植桂花作

簾捲西風。樓過疏雨。院落還賸秋香。一株新綠。移植傍迴廊。誰乞靈根。月殿教偷斫。  
可是吳剛。嫦娥懶。清秋節序。結子滿銀潢。商量。還屈指。瓊樓送暑。玉宇招涼。看金  
粟枝枝。輝映斜陽。只怕無聲冷露。乘清夜。霑溼羅裳。芳華晚。年年此際。秋思動江鄉。

暗香 余與王少鶴農部同年里社論交金臺聯轡中間無日不相過從逮乙

巳少鶴有粵東之行執手臨岐以速相見爲慰既而留滯羊城音耗尙通比

余奉使出都不得其手書者年餘近聞其抱病浙西而家人遠隔都門旅中  
情況何能爲懷因以書速其北上并介此詞情之至者不假修飾也

倦游獨客。望楚山越水。音塵寥寂。瘦鶴入雲。算是飛空渺無迹。梅嶺看花已過。更打  
槳。西湖春色。便忘了。蛾綠窗前。愁損遠山碧。消息幾處見。問把酒玩花。可似疇昔。  
抱愁易老。多管潘郎鬢蕭瑟。爭奈沈疴旅館。誰肯伴。清寒吟魄。願及早歸也。有人護  
惜。

瑣窗寒 書中乾蝴蝶

樹底噙香。花閒抱蕊。一場春夢。游蹤那日。暫入小窗書籠。誤鑽來。牙籤玉函。認將滿  
砌香雲擁。乍風前展卷。須眉栩栩。尙疑飛動。無縫。書充棟。笑文字埋頭。泰山壓重。  
縑緗萬帙。暗裏靈根先種。願他生。還作蠹魚。神仙字食青玉甕。待修成。脈望朝飛。徑  
入華陽洞。

踏莎行

日暝山深。天低野曠。隔江數點漁燈上。南風吹送雨聲來。打篷聽得蕭蕭響。渚雁呼羣。江魚迎浪。柳條輕拂菱絲漾。湖心滿眼是蓮花。莫愁何處飛雙漿。

醜奴兒慢 不倒翁

蛾冠麗服。含笑當筵無語。脚跟子尋常原穩。忽被挪揄。故作頽唐。醉容憨態兩難摹。生來彊項。蹉跎任有。羞要人扶。瞥眼看來。依然崛起。滿座壺盧。向人處頻頻點首。大白應輸。狼籍盃盤。可曾餘瀝共霑濡。更闌人散。回看此老。風趣何如。

綺羅香 燈花

畫閣宜春。瓊筵送喜。乍結嫣紅一點。隔座移來。添到幾多光燄。障飛蛾。紗罩輕籠。妒明月。繡幃深掩。算生來不識春暉。照人還比萬花豔。西園曾記夜飲。怯殺尖風相射。釵頭輕颭。俊眼多情。時向玉蟲斜眄。問天涯。芳訊來遲。卜日下。旅人歸遠。祝花心。永作團圓。照將春燠暖。

高陽臺 吳越王妃每歲春必歸臨安王以書遺妃曰陌上花開可緩緩歸矣

吳人用其語爲歌東坡先生易爲絕句余作倚聲一闋以擬之云

雲擁朱輪。風迎繡幟。陌頭初轉韶華。約計歸期。東風已徧天涯。玉魂猶記相思路。放  
嬌紅、遠道偏賒。看郵亭、幾處鶯聲。幾樹桃花。江南本是無愁地。況錦袍夫婿。綵勝  
宮娃。無賴離愁。生來不識兒家。歸心莫被風塵誤。跨青驄、轡緩鞭斜。到歸來、花滿春  
城。香滿行車。

滿江紅

滿地江湖。流不盡、半天明月。凝眺久、征鴻蕭散。斷雲飄忽。庭院幾家同悵望。關山萬  
里難飛越。任思量、情緒比絲長。何時竭。鶯啼處。花枝發。鶻啼處。芳菲歇。問何人長  
住。廣寒宮闕。篋裏應憐紈扇掩。筵前空憶金尊凸。料今宵、獨倚水晶簾。寒生襪。

百字令

試畢武昌將赴荆臺舟行漢沔有感而作

漢南春滿。望連天草色。如雲黏徧。正是征帆重挂處。檣上雙雙飛燕。佳境如新。勞人  
易老。難倩游絲買。萬花開盡。惜花心事都倦。還去種柳荆臺。栽桃郢野。留作羣芳

殿錦障金鈴曾愛護。暗處何人窺見。莫學鶯兒背人偷語。看得韶光賤。東風休負。異時應解攀戀。

春從天上來。得姚子楨書知與少鶴相遇於吳中晤談甚樂而少鶴不肯以書見及豈有所見怪耶作此寄之

夢斷天涯。幸一紙書來。消息纔知。對牀談舊。燒燭評詩。竟夕說盡相思。恨錦鱗東下。忍教吝尺素相遺。問春前。定曾加餐飯。誰與扶持。吳門早逢仙眷。更風月維揚。病渴能醫。按徹紅牙。歌殘金縷。抱愁獨對花枝。想故人書斷。還認作。厚祿忘伊。盼歸朝。向章臺走馬。休誤清時。

水龍吟 舟夜聞笛

何人夜倚篷窗。一聲吹破空江冷。蒼涼短節。飄零愁緒。助成清境。新月初弦。微雲乍霽。更長人靜。算無心成弄。有心入聽。風前意。頻思省。暗憶天涯海角。有紛紛。斷篷飄梗。哀絲怨竹。幾人遙夜。共鳴淒哽。縱遇桓伊。奈何空喚。深情難領。暫徘徊佇立。卻

將心事付驚鴻影。

慶清朝 今年冬越南貢使道出武昌其副使王有光以彼國大臣詩集來獻且求刪訂余以試事有期未之暇略展開數卷而封還之其中有越國公綿審及潘僊詩筆之妙不減唐人如茶江春水印山雲畫屏圍枕看春山皆兩人集中佳句也乃錄其數十首并製此詞以寓輜軒采風之意因見我朝文教之遐敷焉

蠅楷書成烏絲界就。天南幾帙瓊瑤。茶江印水。殢人佳景偏饒。曾記畫屏圍枕。春山淡冶似南朝。風流甚。錦囊待賸。采筆能描。摹到盛唐韻遠。但宋元人後。比擬都超。知音絕久。今番采入星輶。一自淡雲句邈。使臣風雅總寥寥。同文遠。試登韎樂。聊佐咸韶。淡雲微雨小姑祠。康熙朝高麗使臣詩也。

綠意 戊巳之春余兩以試事泛舟漢沔時則柳陰而岸飛花如雪。倦念韶華。感茲行邁爲填此解用寄遐心。

濃陰繞住。祇泛槎不管。移櫂西去。昨見長條。今忽飛花。香塵傍曉如霧。年年澤畔來相送。任徧拂、畫船簫鼓。想暗中、綠鬢催人再過好春休誤。試問何人手種。漢南復漢北。青翠無數。罩水籠沙。和雨迷煙。掩映風前朝暮。流波可算多情甚。又卻送、舊愁千縷。望暝煙、遙接襄隄。認取往年攀處。

綺羅香 冷布

倩影煙籠。芳痕霧鎖。一縷傳將花氣。虛白生時。別具小齋幽致。纔引到、香徑風來。更遮斷、玉街塵起。最宜人、午夢初回。簾紋斜映澹如水。華堂朱戶。晝掩憑捲湘簾向晚。招涼無計。拂去新蠅。還惱聚蚊成市。應解道、几淨窗明。誰記省、價廉工細。待深宵、蟾影窺人。玉光應勝紙。

好事近 舟次寫懷用朱希真漁父詞韻五首

談笑說江湖。回首廿年時節。何處相逢依舊。只江頭明月。年年常戴使星行。楊柳與霏雪。一任滿腔離緒。把壯心磨滅。

前事豔題橋。定有舊人相識。經過酒坊茶市。憶當年陳迹。江頭輸卻老漁翁。泛宅是良策。斗大一舟如甕。恰一家容得。

還笑宦游人。宇宙皆爲吾宅。總向漢皋留佩。又樓中聽笛。客舟夜泊枕江亭。細響弄沙磧。薄醉倚窗危坐。受煙霞將息。

東望武昌城。夏口晚山凝碧。一自小周郎後。慨英名誰敵。清時不合產雄才。勝蹟但留得。早夜牧歌漁唱。寫江聲山色。

我本不羈人。合住使槎爲客。頗憶玉堂花蕊。向闌干欹側。碧城高處舊樓臺。下界未相識。何日馭風歸去。傍金鑾晨夕。

浣溪紗 贈王少鶴比部荔浦軍中

元日新晴爆竹聲。滿街紅錦爛如茵。野營風景近承平。芳草弄魂初著雨。小桃含笑暗窺人。一般天與可憐春。

又



別緒撩人不待秋。夢回南雁度城樓。春寒誰與換征裘。磨墨盾頭差得意。閉門花裏可知愁。那人曾悔覓封侯。

丁香結 題鄭靄人司馬小樓聽雨圖冊時君以軍務留粵

門掩梨花。夢迴春草。曾託舊游佳處。正小樓聽雨。怪玉指、冷怯銀缸添炷。曉風楊柳岸。人歸去、信鴻易阻。檐前花落。感觸到也。相思還苦。誰與寫妙侶幽情。畫裏知君雅素。庾子懷鄉。江郎悵別。謂余能賦。雲外吹破陣笛。景物今非故。釵蟲將喜送。留待歸來絮語。

浣溪紗 昔潘安仁有悼亡之作蓋在期年終制之後何義門氏謂古人大功

去琴瑟無居喪猶事吟詠者余以咸豐壬子八月一日有先室劉恭人之戚太恭人在堂不得不勉抑哀情用承色笑而情之所至有不能已於言者因作爲長短句廿餘章蓋亦長歌當哭之意若以義門古誼律之則非所敢云矣知者諒之

八九年前記畫眉。玉堂花底面如脂。南來塵土浣燕支。但道眼前終有憾。若論身後總難追。天生薄命可憐伊。

已值分離又是秋。恁教風雨撲簾鉤。枯懷無俚對衾裯。愁似鰥魚先有兆。形同孤雁已無儔。畫屏夜夜望牽牛。

海外徒聞更九州。世閒清福要雙修。仙方無術起彌留。人似黃花難比瘦。身如弱柳不禁秋。白頭占斷此生休。

卍字香殘寶篆溫。撥灰纖指尙留痕。個中心事轉難論。月下晚花低翠幕。雨餘芳草閉閒門。最難消受是黃昏。

落盡繁英慘不喧。廿年春夢了無痕。慰人空對掌珠存。只有長歌能當哭。更無芳草與招魂。西風吹老芷蘭根。

心怯空房不忍歸。夜涼禁得舊羅衣。銀釭無語麝蘭微。畫裏傳神都髣髴。夢中握手也歔歔。鏡臺猶在玉容非。

燕子歸來尙憶家。舊巢誰復掃。塵沙蛛絲。罨盡碧窗紗。翦勝朝衣拖地錦。描餘宮樣折枝花。香絨繚亂繡紋斜。

壓被春雲暈幾重。夢回驚醒曉天鐘。秋高人在碧蓮峯。種竹未逢三日雨。惜花偏值五更風。當時還算不怱怱。

祇恐潘郎鬢早皤。蕭然一室病維摩。從來易老是情多。蠻女憾深踏裏彩。吳兒聲咽懊儂歌。遺愁不去奈愁何。

菩薩蠻

綠窗月下鶯聲軟。羅帷斜掩春人倦。角枕繡鴛鴦。渠儂同一雙。而今真夢醒。雲去無留影。昨夜五更寒。覺來衾枕寬。

采桑子

楊花吹作浮萍了。縱覺無根。尙有春魂。碎卻芳心沒點痕。桃花終是無言好。開向朝暾。落到黃昏。不怨東風不受恩。

憶蘿月

夜涼無寐。往事從頭記。夢裏相逢難盡意。何況夢兒不至。清晨獨上香階。無人料理妝臺。惟有遠山眉翠。隔窗猶自飛來。

攤破浣溪紗

纔到斜陽怕倚樓。老松疏竹自鳴秋。便是不經風雨夜、也颼颼。滅燭寒生金鏡檻，隔花香拂玉簾鉤。遙想倩魂和月在、柳梢頭。

望江南雙調

春光老。場圃怕登臨。舊日小桃重結子，新栽菘竹未成陰。莫負故人心。思量苦。無計可追尋。昨種幾枝紅豆子，鎮無消息到而今。慚悔繡羅衾。

南鄉子

秋雨溼紅蓮。打散鴛鴦劇可憐。好景尋常都不省。偏偏。夜也涼時月也圓。追悔是當年。拋棄春光不值錢。想到同心無說處。難言。縱有花枝算獨眠。

春好不開簾。鎮日金鍼指上拈。只道等閒風月好。懨懨省識新愁。暗裏添。常見鎖眉尖。百計寬懷性轉嚴。直到春歸無一語。淹淹。好夢憑教向黑甜。

### 淒涼調

晚花院落。人何許。西風乍捲簾幕。隔窗俊眼。窺雲盼月。倩魂如昨。蓮房夢醒。正霜裏、香銷翠鑠。算當時、韶光舊約。強半竟拋卻。回首金臺路。勸買楊枝。廣栽紅藥。鳩媒誤我到如今。悔填烏鵲。此憾天長。使判了、春蠶自縛。恁思量、誰與記取。慰寂寞。

### 摸魚兒

正悲秋、嫩涼天氣。令人難領滋味。鴛帷又折連枝樹。牢落悶懷如醉。知那裏。綠盡也、泉臺隔住相思淚。深情漫寄。任伏枕沈吟。辜帷斜盼。沒個影兒至。風流夢。想像衣香黛翠。如今休更提起。榮華自是當年好。不負綺春花事。君可記。記昨歲秋來、綠竹黃花地。佳人瘦倚。正蕉萃堪憐。今朝誰料。無處問蕉萃。

解珮環 恭人歿之前夕瑞以守城微勞聞奉恩旨升用翰林院侍講學士恭

人時在彌留不能知也

韶華婉晚。正溫風淨掃。氛豁雲散。羽檄飛書。喜動眉梢。人語滿城歡徧。承恩偏是儒臣重。更超遷。頭銜新換。怎能知。雲雁飛來。卻變雲邊孤雁。猶記雙雙黻佩。賦鴛鴦。第祿與子偕宴。百八牟尼。觸手生香。一笑宮花輕顫。金鰲往事。渾成夢。憾春至。春人不見待。俸錢十萬將來。好爲營齋營奠。

沁園春 效俳體

遙想當年。瘦損憐伊。儘教命捱。念世閒兒女。女兒最苦。三生修到。休再輪迴。更莫癡情。先期相待。如廿五年猶不來。泉臺路。使芳卿皓首。其謂何哉。君云天早安排。料離合非人能主裁。願我癯君健。百年麥飯。男婚女嫁。料理應諧。我聽無言。君垂冷淚。噩夢今醒晨漏催。吾何願。願芳魂出世。蘭玉當階。

如夢令

簾外紛紛紅翠。風送幽香如醉。睡起更添慵。慵坐又還思睡。無味。無味。好個悶人天

氣。

醉太平

秋高夜涼。更深漏長。曉聞檐杵丁當。似驅車異鄉。明燈洞房。高軒畫堂。老仙騎鶴天閭。笑人閒太忙。

憶少年 約漢武秋風辭意

一天秋意。一林黃葉。一聲歸雁。佳人渺何許。悵芳華開晚。百丈樓船張飲醺。望汾河。素波如箭。流光送人老。把歡情偷減。

醉蓬萊 題畫麻姑

正瑤臺春曙。采藥仙山。歸來偏早。回首人間。換滄桑多少。清淺蓬萊。羽輪輕輦。任飛塵難到。翠帔霞牽。羅襦霧結。衆香繚繞。記否當年。蔡家初見。鬢髮如雲。玉容嬌好。碧宇深嚴。倩誰爲青鳥。潤臉呈花。圓姿替月。被畫工偷貌。珍重仙緣。莫隨俗士。自矜纖爪。

武陵春

舊約壺山山下路。芳草碧成叢。獨向林閒覓小紅。消息問東風。盼到春晴還又雨。時節太匆匆。解道桃花帶雨濃。遊興莫教慵。

念奴嬌

紅燈欲老。夜寒添梅萼。香銷繡帳。嚴閒展仙經。翫仙筆。不辭凍入手。纖纖此丙午冬夜。都門得句也。癸丑正月。余抱安仁之戚。已六閱月矣。遺挂猶留音塵。莫覲展舊藏。黃庭善本。得見是詞。悵然爲填此解。

春閨加夢。算繁華過眼。煙煤猶溼。粉漬行閒。纖指印。曾是舊時親捻。伴讀挑燈。繙經問字。回首增於邑。巾箱藏弄。古懷今思。重疊。遐憶綺閣當年。深嚴繡帳。梅韻幽香。哀。愛惜春宵。貪久坐。銷盡芸香。金鴨錦匣。空留花顏難駐。想像都無及。祇應仙字。伴人空老塵劫。

探芳信

耐春晝。正寫恨無琴。消愁乏酒。問江頭芳訊。嬌容尙依舊。李花開後。桃花好。紅淺春



應瘦甚分明。佳氣揚塵。暗香凝鬢。橋上雕鞍驟。任淥染衣香。翠侵眉岫。人老今年。花勝去年否。尋春應怕春光惱。欲去頻回首。最牽情、尙有雛鶯嫩柳。

### 江城子

小樓聽雨黯魂銷。怯寒宵。怨寒宵。盼到天明。依舊是無憀。昨夜夢回江上路。山隱隱。水迢迢。相思一徑綠雲饒。愛春朝。怕春朝。畫闌芍藥。一例淺紅嬌。舊約玉人今到否。青草路。赤闌橋。

### 瑤花慢 河東看桃

何人種得。平野芳洲。有桃根桃葉。無縫花天香世界。一片絳雲紅雪。遠山晴靄。但芳草、碧波相接。算幾番、春去春來。忙了許多蜂蝶。少年三五游驄。看帽影鞭絲。飛過如瞥。清游獨自。閒裏意、知道無人能說。韶光荏苒。要趁我、眼波如月。怕異時、綠葉成陰。那有花枝堪折。

### 江南好

江南好。風景畫難描。游客花開來盪槳。玉人月下教吹簫。相憶黯魂銷。  
江南好。士女面如脂。護到碧紗春晝冷。浣來薇露曉妝遲。生怕好風吹。  
江南好。最好是秦淮。風定蒲菰漁唱起。月明簫鼓畫船來。興盡不須回。  
江南好。最好是揚州。璧月照來元自滿。瓊花生就不知愁。歌舞幾時休。  
江南好。少小浪游蹤。桃葉渡頭團扇影。杏花村裏酒帘風。相遇莫匆匆。  
江南好。名蹟幾應存。陵闕蒼涼經暮雨。樓臺金碧炫朝暎。懷古待重論。  
江南好。形勝有誰同。鍾阜龍蟠山色外。石城虎踞浪聲中。成敗幾英雄。  
江南好。兵燹感而今。圖畫幾回供想像。江山何日快登臨。祇向夢中尋。

高陽臺 癸丑七夕

銅盒柔情。鍼樓絮語。碧城空話仙緣。如水秋光。泪痕溼透橋邊。人間早識分離苦。到  
清宵。重記纏綿。最難堪。獨處黃姑。惜別經年。當時枉說唐宮事。想環妃夜半。密約  
憑肩。笑指雙星。秋來一度堪憐。神仙也覺歡娛短。道此情。相憶淒然。儘看他。燈影斜

河星影橫天。

又 癸丑十月十四自壽

瘦減腰圍。星添鬢影。華年卅九初週。舊日弧辰。提戈驗取封侯。毛錐事業成何濟。鎮誤人、歲月空過。算今朝、菊盞茶鐺。也得風流。平生多少關情事。但軍書旁午。豪興都休。爛漫枌榆。聽殘村笛。山謳。泉明三徑荒猶未。便家山、儘許句留。待他時、料理承平。歸老漁舟。

又

寒雨欺春。輕陰妒日。韶華已過初三。饋歲前宵。猶餘筍橘盈籃。天公不識游人苦。趁肩輿、泥裏趲趲。看街頭、扶醉人歸。鄉語喃喃。當年豔說承平事。記燈棚花市。密約曾諳。瞥眼風煙。鶯聲啼徧江南。繁華過眼都成故。更何年、芳訊重探。但依然、草色波光。綠染春潭。

浣溪紗

漢南春柳詞

憑肩共讀相思字。一片高歌。一度微哦。不費絲桐也自和。人生只爲多情老。才說情多。便蹙雙蛾。欲學桓伊喚奈何。

春來幾日瀟瀟雨。開徧桃花。落盡梨花。陌上誰人響鈿車。綠窗別有關情處。不是天涯。卻是天涯。別夢依依謝女家。

瑣窗寒 贈內

翠帙香薰。紅薇露滴。黛痕添硯。蠅頭細寫。暫捻霜豪。人倦。問妝臺。流光易催。鏡中須惜春風面。趁眉嫵未老。挑燈紅袖。風流重見。清豔人爭羨。奈畫角江城。徵聲催變。啼紅怨綠。付與梁閒雙燕。望江湖。烽火暗驚。壯懷欲試孤劍短。漫匆匆。過了花時。好書看共遣。

減字木蘭花 爲陳幼舫茂才題羅杏初女史盆蘭小幀

亭亭新綠。記翦寒香。湘水曲。別樣丰姿。認取家風老畫師。素心人遠。寂歷秋郊。花事晚。準備東風。新茁庭階玉一叢。

浣溪紗 題黎孳白參軍高吟低唱圖

捧出留筵玉一枝。歌塵記拂縷金衣。相逢恰是簸錢時。碧玉華年空自誤。紫雲芳訊已嫌遲。春風圖畫只依稀。

摸魚子 瀟湘舟次寄內

憶紅窗、擁衾談藝。深宵同聽春雨。花前誰謂將離贈。瞥見秋來人去。湘浦路。望彩鳳孤飛。忍使芳華誤。相思正苦。歎百鍊剛柔。九迴腸斷。猶記嚮時語。東風杳。天上幽懷空賦。人間芳信無據。多情爭似無情好。分付啼鶻休訴。行且住。擬整頓漁蓑、繫艇湖邊樹。佳音記取。待梅訊江頭。團欒燈火。重與話離緒。

南鄉子 內子自衡陽書來有消瘦容光祇鏡知之句十月廿三日將抵衡垣  
此解卻寄

生小總情癡。舊日東風感鬢絲。不分鴛鴦成兩道。相思。消瘦容光祇鏡知。別夢轉依稀。千里關山到也遲。聞道衡陽無過雁。應疑。驗取今朝蟻子飛。

齊天樂

五年不踏瀟湘路。滄江釣臺誰主。翠滴煙莎。綠生雨籜。都是游蹤佳處。江山似故。歎小劫滄桑。浪聲東駐。皓月江頭。夜深來照挂帆去。天涯曾憶伴侶。幾人塵世外。盟共鷗鷺。羽檄飛書。戎韜籌筆。舊約煙霞都誤。漁樵寄語。問料理菡庵。恁時來住。看取山泉出山清幾許。

夜行船

不是莫愁湖上住。泛中流、與鷗容與。障竹孤村。隱蘆幽火。時有釣船來去。隔岸紅樓燈影聚。是天涯、酒腸詩趣。豪竹吹春。哀絲弄月。今夜玉人何處。

憶舊游 春草

怪天涯底事。滿目青青。千里平蕪。記送王孫去。又倡條冶葉。綠到江湖。寸心自含春意。蜂蝶未全孤。拌客子光陰。鞭絲帽影。閱盡榮枯。模糊舊游處。有露溼聽鶯。月落啼烏。踏徧青鞋路。問煙莎雨籜。風訊來無。故園未荒三徑。新翠繞吾廬。盼一碧連雲。

江鄉歷歷清夢蘇。

又 春柳

泛江潭去日。冷落堪憐。一桁秋絲。認取春來也。被東風入夜。吹展顰眉。水邊畫船簫鼓。風景憶當時。歎戰艦鳴鉦。招搖弄影。不是青旗。淒迷。試回首。記客舍分箋。候館尋詩。隱約河橋畔。有啼紅幽怨。飛入漣漪曉來。夢醒何處。煙滿大湖隄。倩綰住閒愁。春深翠陌人未知。

又 春燕

弄芳塘碧水。有約歸來。斜日花開。眷主人情重。倩珠簾翠幄。隔住春寒。玳梁並頭相語。韶景任闌珊。算百歲星霜。三春巷陌。萬里雲山。鄉關在何許。指一髮滄溟。瓊島瑤鬢。歎畫堂王謝。共尋常百姓。風月摧殘。待營舊巢安穩。煙外引雛還。任老卻鶯花。雙棲繡閣常是仙。

又 春鶯

認垂楊影外。一串珠喉。誰譜瑤笙。豔曲人難和。正新雛試語。刷羽輕盈。茜窗乍圓。幽夢嬌怯。未忺驚。待喚起晨妝。窺來午繡。說盡柔情。嚶鳴漫攜酒。翫鑑曲晴波。蓉館朱櫻。送得金衣醉。把紅腔細寫。偷入簾旌。舊時滿身花露。煙景起層城。早夢想觚稜。春風殿角聽數聲。

攤破浣溪紗

淺渚新黃。茁菜芽。曉風吹軟綠蒹葭。正是游春好時節。儘堪誇。閨苑有書多附鶴。清明無客不思家。集句咫尺斜陽芳草岸。是天涯。何處沾春覓杏花。翠帘低着柳枝丫。恰有漁郎來采艾。共村娃。兒女滿前催我老。風波少處是吾家。說起鄉園無限恨。數歸鴉。

解連環

麗韶飄瞥。更匆匆過也。禁煙時節。看布帆芳草晴波。祇花鼓錫簫。暫時拋撇。夢繞東關。臘幾樹梨雲飛雪。對垂楊影裏。渡口晚風。何處啼鴉。還添子規夜月。更江船遠



泊。笛韻吹裂。憶舊遊。清興連番。漫人倚玉樓。馬嘶金埒。景物依然。換新火。異鄉能說。但天涯。對花對酒。負他怨別。

浣溪紗

澗澹金波照大隄。隄邊楊柳細如絲。屢空時見露痕微。略有聲聞長笛靜。更無形影白鷗飛。江清人近覺天低。客路光陰燕子家。小橋經雨漲平沙。野田三日盡黃花。挑菜河濱人影聚。賣餠村市語聲譁。水鄉風物未應差。

陌上花 荆襄之間芋田瓜圃多插野木香爲籬落春來瓊英滿樹幽芬襲人

考之地志宜城西有木香村爲段成式別業今日猶存遺韻也

東風去日。珠樓翠陌。鬧紅開徧。百六春闌。猶有淡妝迎面。荒塍歷落。低枝亞。倩影怕人窺見。正清晨。破蕊。嬾黃輕點。露珠如線。乍肩輿夢醒。瞳矓曉色。撲鼻幽香無限。泪粉偷凝。似訴玉娥嬌怨。村娃插鬢。渾閒事。看得芳華都賤。試徘徊。覓取名園遺址。

素馨重眷。

蝶戀花

月下聲聲聽杜宇。纔過清明，便恐春歸去。門外垂楊煙外絮。天涯別有傷心處。怨  
綠啼紅渾懶賦。一縷遊絲，綰繫閒情住。曲曲屏山天欲曙。隔花催動流鶯語。

念奴嬌 登襄陽城望隆中懷古

城西眺遠，有羣山萬壑，彎環無際。千古英雄吟嘯處，想見誅茆遺址。大澤龍蛇，深巖  
虎豹，不盡蒼茫意。森然喬木，好風吹送青翠。遐想諸葛當年，滄江晚臥，還爲蒼生  
起。成敗三分多少事，天付斯人料理。管樂才豐，關張命嗇，遺憾今餘幾。成都桑影，異  
時空辦歸計。

玉漏遲 立秋

嫩涼生露井。曉衾慵戀，素羅須忍。銀燭宵長，微覺畫屏光冷。底事秋來較早，怕誤了，  
天涯鄉信。秋又暝。碧梧偷減，半牀清影。那無蕪菜鱸羹，歎故里西風，芋疇荒盡。旅

食經年。又過荷香瓜沁。不爲關河路遠。但鏡裏、星添雙鬢。更漏永。閒眠曙鐘先警。

瑞鶴仙 七夕

憑闌人靜悄。有畫燭生涼。翠屏光嫋。秋期夜深到。料雲車握手。玉顏應笑。仙緣暢好。且漫說、相逢草草。便一年、一度歡娛。也勝世閒諧老。難了。天長地久。此會緜緜。未  
知多少。華筵乞巧。兒女意。但相擾。問何人能解。金針偷度。補盡情天懊惱。步中庭、靈  
鵲西風。待他向曉。

卜算子

山向眼前橫。水向天涯去。行到山窮水盡頭。都有人行處。朝色送人來。暮色留人  
駐。暮暮朝朝馬上看。磨盡英雄路。

阮郎歸

去年花發牡丹時。春深人未知。今年花發牡丹時。春歸人未歸。吟思苦。夢魂迷。撩  
人花一枝。風前裁減舊腰支。翠裙金縷衣。

陌上花 野菊

關河望遠。家園何處。又過重九。歷落黃花。開徧野田荒阜。雖然不比東籬采。也有暗香盈袖。看秋容點綴。征人馬上。爲他回首。正西風滿眼。紅梨丹柿。景物深秋時候。院落誰家。記否捲簾人瘦。倦游莫負登高會。賴有野萸村酒。看枝頭一例金錢開盡。傲霜猶有。

臨江仙

藍浦雁來秋已老。相思題徧羅襟。夜涼人在小樓心。繡幃慵啓處。愁見月華臨。銀燭畫屏偎玉暖。誰家一刻千金。窗前默坐數花陰。幾時捱過也。鐘鼓韻沈沈。

高陽臺 七夕立秋

荷粉飄香。槐英碾屑。長安雨洗新秋。薄暝催花。夜涼先到鍼樓。神仙也被多情累。報金風。芳訊綢繆。儘教他。訴盡微波。銀漢西流。素娥生怕佳期誤。便嬋娟弄影。庭宇添幽。絮語屏間。有人猶待牽牛。銀盤水拍春蔥膩。盼秋光。早上簾鉤。願雙星。乞與人閒。掃盡離愁。

冰

運筆



冰  
融

調

承齡（嘉慶一九——同治四）

姓裕瑚魯氏。字子久。滿洲鑲黃旗人。道光進士。官至貴州布政使。有大小雅堂集。

冰蠶詞

吉林承齡尊生

雙雙燕 白燕

玉釵股上。共么鳳輕搖。舊時曾見。鉛華淨洗。漫問漢家宮殿。催得柳明花暗。掠飛絮。風前零亂。留他月影雕梁。屬付晶簾休卷。芳院梨雲片片。正蝶粉初乾。莫拋雙翦。傷春人老。憔悴雪香煙暖。翻妒愁痕太淺。想一縷紅絲猶罨。樓中縱有春風也。恐鬢華早換。

摸魚兒 汎舟積水潭看荷花同宗室蓮舫奕泝金蘭舟秉彝

半陰晴。鬧紅時節。陂塘初霽。宵雨瓜皮艇子。沙棠楫。一葉載將鷗鷺。回首處。慕廿載。江南舊夢重延佇。吟箋漫與。祇兩岸疏蟬。幾聲清磬。雙槳采菱路。繁華歇。緘恨亭。亭不語。凌波當日誰賦。憐他並蒂低窺鏡。倚檻有人會妒。明時兩岸皆冶游之所。花影莫待屬取。明霞十里涼雲護。扁舟且住。怕一片秋心。鯉魚風起。香冷暗吹去。

淒涼犯 斷雲銜月涼露滴秋遠笛淒清別有懷抱砌下候蟲和響始說西風  
消息也徘徊不寐爰譜此解

遙情暗按。高樓外，誰家玉笛淒咽。數聲宛轉，含思爲甚，不教按徹。餘音未歇。應是年  
年恨別。蕩癡雲、千萬葉。冷浸半庭月。猶記清谿路，一桁丁簾，夜深曾撼。綠楊十里，  
想而今，等閒吹折。多少吟懷，倩籬畔、秋蟲替說。怨涼颿，早遣愁人感翠箠。

滿庭芳 過萬柳堂懷程彥華時客淮浦

風急天高，煙寒秋老，選勝更與凭闌。無多垂柳，春色已堪憐。那更疏鴉點點，輕換了，  
落葉哀蟬。荒蘆白，猶疑絮影，晴雪舞尊前。畫圖工點染，何人省識，過眼雲煙。壁上  
有元萬柳堂摹本甚斑駁賦別冷落吟箋。一樣茶囊酒盞，空望斷，烏帽青衫。金城路，  
裁詩寄遠，休說北征年。

浣溪沙 幼時夜讀畢每課小詩爲丁丈仙坡所賞寒宵把卷情事宛然先生

歸道山已十年矣



夜讀還如上學時。西州門外草萋萋。秋墳莫唱鮑家詩。紙閣燈紅人影瘦。蘆簾霜  
白雁聲低。舊句十年彈指水流遲。

### 臨江仙

往事零星難記省。思量常是經年。酒濃香殢困人天。綠雲斜壓。一枕夢初圓。芳徑  
畫屏都未改。祇應閒了秋千。微波重與致纏綿。驀然驚斷。歸燕蹴箏絃。

### 陌上花 畫蝶佩蘅寶釵屬題

青陵怨魄年年還舞。廿番芳信。偶倚東風。那管晝長花困。錦叢儘許秦宮活。猶自棲  
香難穩。又天涯綠徧。恁生禁得。燕捎鶯趁。露濃春有暈。蠻箋揚就。幾許六朝金粉。  
草色裙腰。誤認過牆雙影。是誰小撲輕羅扇。惹起落紅成陣。望羅浮路杳。漆園尋夢  
者回應準。

### 鳳凰臺上憶吹簫 慈雲寺後尋明宮人斜故址

鈴語前朝。香消淨土。上陽取次春闌。便白楊吹雨。碧玉成煙。寂寞梨花寒食。休更問、

天上人間。知多少。承平舊事。寵亞貂蟬。明初設女官後乃廢。年年半弓草色。隨松柏西陵。一例荒寒。甚臂紗紅冷。風月依然。不似吳公臺畔。興亡付。賸粉零鉛。鐘魚歇。芳魂夜歸。猶想姍姍。

桂枝香 蟹

津門夜黑。認遠火星寒。疏籬雲織。試聽爬沙聲響。噓珠沫溼。西風不是無腸斷。被年年。西風愁絕。初肥霜信。未虧月影。一匡秋碧。笑新詩。有人換得。正胭脂斑老。菊天留客。漫問尖團舊譜。傳家曾識。吳橙香好。懷佳約。擣紅薑。玉指輕擘。看燈時節。江鄉風味。舉杯重憶。

露華 豆花同金蘭舟賦時有歸思故調之

槿籬草草。莫隨他菊蕙。同怨西風。紫雲一簇。無人知道秋濃。脈脈暗香吹遠。妒曉妝。無限春紅。渾未稱。釵梁綽約。鬢角玲瓏。空階乍鳴涼雨。又月色疏疏。啼徧寒蟲。低棚話晚。淡煙點破。牆東。棖觸田園歸思。盼碧天。應有飛鴻。雙菼小。蛾眉誤卻鏡中。

水龍吟 坐雨憶前年此日阻風大觀亭

辟塵漫障輕羅。新涼斗覺炎氛掃。斜侵亂灑。煙綃密織。迸珠爭跳。霧合風離。雲垂海立。都成飄渺。看高荷大芋。娟娟翠溼。齊喧送秋聲到。十載湖山凭眺。倚江樓。故人懷抱。一幀潑墨。遠峯無數。模糊偏好。莫唱瀟瀟。吳娘不是。舊時風調。把瓊簫吹裂。淡金明滅。半帆殘照。

浣谿沙

不斷香塵走鈿車。望中柳色是誰家。晝長無事按紅牙。水氣涼浮前夜雨。牆陰春護一分花。晚風吹綠上窗紗。

湘春夜月 爲蘭舟賦

隔窗紗。恁知人在天涯。別日嫩柳搓絲。應是解藏鴉。一樣燕簾鶯戶。把亂紅吹徧。定向誰家。但綠章乞取。輕寒勒住。前度桃花。紅牆銀漢。恁恁又是。清淺浮槎。錦鯉殷勤。偏暗遞。故園春信。催送年華。丁香結就。笑雨風依舊。天斜。認瘦影。怕歸來萬一。春

山翠減。團扇羞遮。

采桑子

永豐坊裏尋常見。瘦削腰肢。雙燕來時。一翦東風萬柳絲。  
江南花事憑人說。開到荼蘼。莫綰相思。如水春愁總不知。

憶舊游 送春

恁燕子。鶯兒。恁舞倦。便勸春歸。荏苒隨流水。算榆錢買得。能住多時。落花乍低。還起如訂隔年期。縱說道東風。年年依舊。老了楊枝。  
徘徊認蹤跡。是碧汎萍圓。紅沁苔肥。打疊和愁送。奈天涯夢遠。黏著游絲。綠陰近來。門巷蜂蝶。不會知。但目極斜陽。芳園客去。簾晝垂。

蘭陵王 朱藤

暮煙靄。簷際胭脂的皪。春歸去。吹盡斷紅。百結流雲鎖空碧。尋芳繞砌石。誰識。真珠絡索。年時地。蜂子倦飛。猶抱長條想薌澤。  
花閒數歡迹。記綠拂濤箋。酒醉瑤席。尊

前倚笑偷攀摘。愁燕挂釵墜。蝶翻裙溼。衣香幾疊。篩月色。尙催聽箏笛。岑寂。感今昔。但弱蔓重牽。輕夢休覓。環谿罨畫。應相憶。怕就裏憔悴。許郎吟筆。斜風搖漾。影顛裏。似暗惜。

百字令

相思何處。悄隔闌。喚醒雙雙蝴蝶。翠幕金屏深幾許。不問絮泥花雪。簇錦韶華。游仙好夢。頓覺心情別。笑春依舊。去年今日時節。濛濛聽雨樓臺。碧雲乍展。推上初三月。玉笛吹殘銀燭冷。驀地窺人紅怯。百合香濃。五更酒渴。贏得愁千結。海棠開了。那堪重與攀折。

瑣窗寒 消夏分詠得冷布

佇月檐低。攤書几淨。綠陰庭宇。疏櫺半拓。界斷軟紅塵土。映玲瓏。榴花乍開。折枝一任鴛鴦妒。問冷清清地。有誰憐惜。翦雲裁霧。銷暑吟聲住。只乳鴿偷窺。見人又去。秋風且緩。莫便油窗花戶。最難禁。無限晚涼。篆煙暗逗千萬縷。轉愁他。水檻晶簾。陣

陣黃梅雨。

相見歡

裁箋擬託飛鴻。去無蹤。目斷遠山盡處亂霞紅。雲鬢裏。香蘭笑。記初逢。又是窺人涼月挂疏桐。

長亭怨慢 寄馬仲眉

已孤負、新豐才調。鬢影銷磨。幾人懷抱。嶽色河聲，中年游倦，理歸棹。滿城簫鼓，誰聽取、蘇門嘯。萬里共姮娥。問隔卻、浮雲多少。休道。解貂裘換酒，第一謝家山好。盈盈弱水，恁拋得、碧城瑤島。但寄語、引鳳驂鸞，莫輕誤。簪花人老。儘醉徧秦淮。何似長安春早。

水調歌頭 送馬梅尉

征雁去何許。爲我一徘徊。江南多少歸思，中道羽毛摧。料得沙明水淨，又恐草衰木落，秋色正西來。舉酒共斟酌。何事在天涯。翩然去。明月裏，莫飛回。空山黃鶴無侶。

起舞影嵒。待把瑤琴三疊。送汝長風千里。天遠碧雲開。辛苦稻梁願。斥鷃任相猜。  
蝶戀花

日日江樓還獨凭。潮去潮來。舊恨難重省。百折千回流不盡。斜陽一桁珠簾影。海  
燕歸時花徑暝。月色銀黃。照見雙棲穩。一霎春寒催酒醒。春來料理傷春病。

憶舊游 和彥華見懷

望南飛鶴影。出塞行雲。曾共徘徊。錦字寄迴文。怕鴛鴦織就。不是新裁。琵琶待譜春  
怨。人在白登臺。祇兩地飄零。關前雪擁。陌上花開。重來向燕市。便擊筑悲歌。誰與  
銜杯。忽忽中年近。縱東山絲竹。難遣愁懷。一麾欲去江海。荒徑問蒿萊。但落葉蕭疏。  
高齋又聽秋雁回。

一萼紅 唐花

認芳叢。已十分開後。蝶夢尙惺忪。燕市翻新。馬塍懷舊。錯疑翦綵深宮。甚碧玉、年時  
未嫁。對娉婷、羞殺舞裙紅。白石苔皴。黃鸝斗小。點綴偏工。聞道安排金屋。早屏山

恨淺。鑪火嫌濃。九陌塵沙。六街冰雪。那知春在簾櫳。算一例、成陰桃李。恁繁華、不待  
廿番風。寂寞西湖千樹。休怨樓東。

洞仙歌

凍雪離合。帶歸鴉點點。送盡斜陽碧天遠。又燈紅酒熟。香擘吳橙。祇不似、昨夜桂堂  
會見。宵長長幾許。廿五更聲。都爲愁人續淒怨。巴蜀雪初消。流到天涯。誰量取、春  
痕深淺。儘翠袖、單寒倚西風。怕手把、芙蓉歲華空晚。

金縷曲 蠟淚

莫翦燈花穗。地啼痕、無情有恨。畫堂秋思。待把碧紗深深護。又被斜風喚起。更不管、  
玉釵顛顛。斗轉參橫人將去。暗相和、銀箭翻濤水。點點是、別時淚。華筵似夢從頭  
記。記春江、徵歌說劍。六朝遊戲。十萬驪龍珠齊吐。分照花天酒地。賸狼藉、堆階紅膩。  
結客歸來黃金盡。燕香心、伴我修眉史。誰忍賦、短檠葉。

齊天樂 臘鼓



恩恩不許年光住。重聽六么催到。利市環錢。團團作鏡。響徹霜風寒峭。比鄰乍鬧。正貼燕黏雞。稱伊嬌小。白雨跳珠。綺筵根觸舊懷抱。花奴消息最早。問燈圓月滿。開徧多少。說與王孫。天涯從此。又換一番芳草。社公賽了。想柘館祈蠶。篆煙猶裊。暖入錫簫。畫樓春夢好。

水龍吟 蠟梅

綺窗一樣橫斜。誤人月色黃昏近。排珠編貝。曉風潛遞。蠟丸芳潤。磬口輕圓。檀心半吐。天然丰韻。是深宮睡醒。勻塗山額。愁污了。閒脂粉。瘦綠肥紅都盡。伴荒寒。淚痕濃暈。南枝漏洩。輸他管領。隴頭春信。孤負流年。蜜犀斜壓。舊時鴉鬢。算停辛。佇苦。雙雙金翼。抱香無分。

疏影 殘雪

天花碎繖。問翦水鏤冰。誰解攀折。萬點花魂。分付迴風。也作亂紅飄撇。拌教詠絮無消息。奈畫角。一聲吹徹。卻怪他。催送春來。恁又暮寒騷屑。銷得斜陽幾度。灞橋更

極目。煙樹明滅。祇有蛾眉。深淺窺人。讓出遠山層疊。香泥不分隨鴻爪。但夢憶、參差雲葉。算幾宵、月滿瓊樓。已是試燈時節。

蝶戀花 二首

玉龍十二耕瑤島。海上芙蓉。化作相思草。一氣雙煙何日了。春人日爲情顛倒。決絕吟成偏不早。萬斛離情。無處安排好。金彈拋殘花徑悄。綠窗翻被鶯聲惱。桂棟蘭堂荷作柱。簾幕深深。不識天涯路。惟有匏瓜情獨苦。無端淚共銀河注。葉葉征帆來又去。燈火三更。照見西泠樹。如此風波君莫渡。琵琶抵死留人住。

菩薩蠻 四首

碧城十二籠煙霧。瑤天飄渺乘鸞去。清怨託琴絲。相思知爲誰。越羅春水色。密約湔裙日。消息到東風。簷花自在紅。雙雙錦綬銜金鳳。流蘇香暖搖殘夢。蝴蝶抱花枝。夜深風定遲。重簾低翠地。鴛牒分明記。四月熟梅天。畫樓聽雨眠。

子規啼雨催人醉。白波倒卷離人淚。莫惜百分空。問君何日同。宿雲低鳥翼。潮長春流急。帆影盡遙天。斜陽千萬山。迴腸日夜車輪轉。天涯不抵屏山遠。留得去年書。一雙紅鯉魚。中央周四角。密字真珠絡。軋軋九張機。春蠶多少絲。

減蘭 題韻蘭女史畫桃花

飄零露井。爲誰留住東風影。滴粉搓酥。認得紅潮欲暈初。玄都觀裏。菜花開後春如洗。前度劉郎。一度看花一斷腸。

百字令 全小汀少司寇視學粵東歸出藥洲秋月圖屬題

故園修竹。恭勤師齋名記屋梁落月。三年相憶。塞上歸來還嶺嶠。不改玉壺寒色。靈曜波激。洲有九曜石寶匳冰淨。使院留標格。昌華南漢宮名懷古。舊游時觸胸臆。余丁酉曾至粵。應笑藥鼎銷沈。劉郎何處。重酌秋風客。本劉銀離宮賸有驪龍珠四照。映澈珊瑚千尺。紅豆花開。謂惠天牧碧蓮香遠。後爲周子提刑署韻事誰能匹。斗

杓高揭。海天翹首今夕。

慶清朝 登薊州獨樂寺閣

傑閣憑虛。初梳選勝。塵途不負清游。騎鯨客去。人傳醉墨仍留。閣榜爲太白書。料得莊嚴法相。搏沙一笑。閱千秋。何須問。漁陽劫火。遼海泡漚。試向薊門極目。見五雲飛處。遠樹春浮。山僧解事。雁堂曾識龍旂。聞道百靈雜沓。半天風雨。謁珠邱。闌干外。翠微萬疊。遙拱神州。

金縷曲 壬子二月之官安順與文蓮溪觀察同日出都過德州留飲景星橋

觀察署齋賦此留別至荏平蓮溪亦分道赴浙西矣

廿載憑誰說。最難忘、三條燭盡。相逢時節。海上神山迴風阻。轉覺雲泥親切。又早送、潞河舟楫。人似秋鴻來有信。東坡句。算年年、觴詠何曾歇。河□□。幾回折。分符已幸棠陰接。尊甫夢九太守曾官安順。更無端。京華舊雨。鷗盟重結。春夜沈沈檐花落。那管征塵積雪。又五鼓。統如催發。惜別今宵拌一醉。甚天涯更作天涯別。但萬里共

明月。

南歌子 題旅舍壁

錦子鴛鴦牒。香泥燕子家。客中清怨託琵琶。猶記迴燈一笑鬢堆鴉。畫壁迷陳迹，銜杯感夢華。劉郎今日又天涯。無奈東風依舊換楊花。

八聲甘州 送張半塘孝廉歸遵義省親

鎮春山、萬疊抱孤城。不斷杜鵑啼。又瀟瀟暮雨，綠陰如海。淨洗花枝。那怪登高臨遠，別曲訴琴絲。馬首眼明處，青到峨眉。漫語慈恩舊事，已等閒辜負，三五年時。算畫檐曾識，雙燕故飛飛。悵千秋、錦袍烏帽，謫仙人、應爲說相思。重懷古，翦西窗燭，好寄新詩。

南鄉子 五首

心許處，不分明。暗傳消息遞蘆笙。綠草鋪茵花覆雪，驚蝴蝶。故故窺人巖際月。山路滑，晚煙低。牛毛雨細子規啼。一笑相逢佯借問，雙紅暈。笠子敲風花壓鬢。

坡上去送郎行。蹋歌聲應竹枝聲。歲歲年年坡對面。長相見。不似人心朝暮變。黃平  
有相見坡

寒食節。凍花天。春寒謂之凍花。五更風雨鎮相憐。曉日忽收三里霧。難留住。比似無  
晴天更苦。

芳草綠。鷓鴣啼。陌頭開徧送春歸。刺梨一名送春歸。惟黔有之。說與看花人且住。歧  
亭路。欲送春歸春不去。

邁坡塘

怪憎騰惱人。春恨秋來重。又留住。繡簾寒暖都難定。天氣一般無據。腸斷處。渾未信。  
紅牆遮斷銀河路。星期細數。祇幾度銷磨。鶯花鴻雪。潘鬢已如許。思量徧。鏡裏容  
華自誤。年時飛燕曾妒。當鑪莫更誇顏色。不是遠山眉嫵。歌且舞。正眼底。倡條冶葉  
嬌風露。雙鱗寄與。問碧海青天。鞭鸞答鳳。何日賦歸去。

洞仙歌

沈秋帆司馬西序屬題趙方山贊府鈔畫筍便面

芳塵撲面。是誰移寒翠。坐我瀟湘水雲裏。祇青霄引領。晚節擔當。渾不管。雨雨風風情事。平安才問訊。頭角鬢鬢。又報春雷蟄龍起。說與畫樓人。取次闌邊。認碧海。珊瑚斜倚。再放筆。淋漓掃生綃。卻天半。爭看女牀鸞尾。

### 江城子

四年離緒已深諳。曉風尖。聽郵籤。幾聲霜角。回首夢城南。滿載閒愁千萬斛。渾未見。帶征驂。平林如水逗銀蟾。乍開窗。兩頭纖。衣上涼痕。誤認隔珠簾。香霧暗塵都淨洗。終不似。月初三。

### 水龍吟 水車

幾回聽水聽風。客游遮莫車輪轉。關河冷落。數聲鴉軋。人家近遠。一道驅煙。亂流翻月。爲誰催趲。問何如且住。抽刀斷水。難祝取。迴腸緩。夢裏輕雷乍輾。又樹杪。曉雲飛卷。梯田打疊。待伊甘雨。平分翠筧。休學勞薪馬蹄方後。去程纔倦。只當日抱甕原非空獨立。谿山晚。

八聲甘州 太和周春甫繼煦別駕舊有桐陰山館小照轉題失去復得仇十

洲畫景物相合遂以代圖屬題

認圖中山館是耶非。碧梧拂虛堂。恰江天空闊。風帆婀娜。山色低昂。況復素心晨夕。近局赴壺觴。快閣渺何處。歸思先償。頗怪當年畫史。爲誰營邱壑。留伴疏狂。只青谿幾曲。欲問轉茫茫。莽天涯。猿啼鶴怨。儘容他。清簟送斜陽。費洲外。待攜漁笛。同譜滄浪。

綠意 蕉心和趙鐵筠太守崇慶

衍波密摺。正澤蘭泣露。緘愁休說。持比朱旛。宛轉風前。無那衆芳銷歇。相思莫共花爭發。已到了。綠陰時節。可能翠袖牽蘿。綰住碧雲重疊。煙際參差弄影。綺窗外。早又霓旌斜掣。老矣傭書。重擘吟箋。應訝鬢絲騷屑。丁香春瘦。秋蓮苦。問小小。同心誰結。儻綠章。鑒取殷勤。願拂玉階炎熱。

疏影 博爾濟吉特芝岑觀察葆亨以其昆季書畫彙裝爲鄂跗孔懷圖屬題



重攀寶樹。憶封胡。過末。多少游侶。漫檢縑緗。黃鶴難招。令兄岳斗南方。伯殉難。武昌  
西窗更話淒楚。無情慣是蘆溝月。做弄得、離蹤如許。祇夢回、牆角青燈。曾照對牀風  
雨。珠履行看接迹。珠履雁行來。沈雲卿同儔。舍人早朝句。那年霄漢裏。圖畫須補。  
忽觸飄零。雁影參差。我亦天涯羈羽。家山喬木。禁搖落。況詠到、江關辭賦。但祝他、尺  
五春雲。好護舊時韋杜。

虞美人 題梅花帳額

含章莫喚春雲醒。箇是東風影。銀屏一枕小游仙。收拾萬重香雪散諸天。風離雨  
合羅浮路。翠羽深深護。更攜玉笛大江隈。待看雲中丹頂鶴飛迴。



思 洞

益

運 齋

堂



周壽昌（嘉慶一九——光緒一〇）

字應甫。一字苻農。號自菴。湖南長沙人。道光二十五年進士。由編修累遷至內閣學士。兼禮部侍郎銜。嘗疏劾賽尙阿。並條陳剿賊事宜。一時服其敢言。晚年殫心著述。於兩漢三國五代諸史補證尤多。著有思益堂集。

思益堂詞

長沙周壽昌自菴

卜算子 閏三月餞春

何處見春來。又送春歸去。芳草多情不放歸。綠斷來時路。  
展得一春期。便擬春長住。不是聲聲布穀催。險怪鶻啼誤。

生查子 舟中餞春

春至帶愁來。春去愁難去。愁過一春期。莫覓春歸處。  
風暖繫行舟。強欲留春住。合與載將愁。篷背三更雨。

又 和明人吳魯于韻

墨積字成豬。野蕩塵飛馬。隔牖琴絃儘費猜。誰是知音者。  
宋庫雁翎刀。漢殿螭頭瓦。文武兼資左右宜。客定何居也。

又

得失證雞蟲。稱謂隨牛馬。莊語難諧。怕客嗔。連道三聲者。擊汰扇張帆。避雨衣憑瓦。一把茅剛蓋著頭。笑指夫夫也。

南鄉子

春影暗簾櫳。鐵馬敲簷逗遠鐘。隔著茜紗窗子望。朦朧。月照山茶分外紅。曾記倚欄東。如雪花光照玉容。怎地封姨來沒信。恁恁。瘦盡梨花一夜風。

清平樂 卽景

緒風絲雨。苦促征帆去。一帶晚煙縈野樹。重被溼雲留住。洲邊竹屋參差。停船小步些時。三兩漁舟泊處。灘前立箇鷓鴣。

四字令

波寒似冰。鐙殘似螢。江村野柝無憑。是三更四更。推衾夢醒。敲篷雨零。瀟瀟滴到天明。更風聲浪聲。

又

空江浪驚。淒風樹鳴。夢兒作也難成。況殘宵酒醒。荒雞恨聲。寒砧怨情。雁兒不肯南征。使南飛怎生。

釵頭鳳

瓊臺夢。瑤琴弄。春寒雲鎖鴛衾重。歡無價。愁難卸。一帆風信。五更殘夜。乍乍。乍。離懷惡。歡情薄。南飛有雁書誰託。東風緊。桃花引。鶯盟常記。鷗蹤難準。忍忍。忍。

鷓鴣天 有寄兼調汪稚生

千樹桃花水滿潭。故人芳訊話江南。牆頭柳絮鶯聲苦。檻外梨雲蝶夢酣。啼竹素，鎖瑤函。近來心緒託瞿曇。春風吉語傳歸棹。同玩西樓月十三。

又

胡蝶翻飛嬾戀枝。狂風肆虐影離披。祇憑掃紫飄紅勢。那計支霜受雪時。雲作繭，雨如絲。惜春特地願開遲。昨來病起登樓望。有夢尋君君未知。

金縷曲 和李舜卿孝廉七夕有懷原韻

天上愁難寄。正涼宵、秋絲對吐。青蟲雨墜。宋玉多情腸。慣斷。況是葉凋花悴。誰信道、離程星遞。巧到雙星。猶惜別。問癡儂。乞巧真何計。笑前夜。蛛絲織。分明咫尺紅牆地。怎便算、今生隔世。千秋萬歲。輸與天台塵世裏。賺得阮劉佳婿。恰休任、蒹葭拋棄。昨夜綠華親降我。聽北風、裙帶溫言細。渾不灑。神仙淚。俗傳七夕雨。爲別淚雨。

又 寄瞿石芸妹婿

此別剛重九。恨怱怱、帆飛風利。不曾攜手。因病得閒懷。玉局眠食。近來安否。似瘦柏、經霜逾久。弱妹左芬。如念我。道大雷、書問時時有。頑仙骨。健奔走。奇才輩。出何容。某。問千秋。煙霞鐘鼎。兩途誰取。便許雲霄振衣上。不過吹竽覆瓿。奈知遇、兩朝恩厚。拌擬倉皇從牧圉。任糜身、刀俎心無負。迂拙念。爲君剖。

又 寄小樓

對榻剛三歲。歎飢來、驅人作客。遠攜姜被。者番去。征衣誰手線。痛墮瀧岡雙淚。覓升斗。原非無計。俛首庸奴。從乞活。便多牛。足穀豪鄉里。奈噓蹴。餓夫恥。倉皇戎馬吾



其已。但誅茅。蓋頭一把。有人料平理。念負天恩。代耕久。屢世科名青紫。卽何忍。時艱身避。擊楫枕戈。肝膽熱。笑新亭。對泣真無志。一腔血。誓天地。

又 題黎齋崖詩卷

已是怱怱別。忽攜來。新詩一卷。朗吟冰雪。國有顏淵。慚未識。一讀一呼。奇絕。喜標格。項斯曾說。才子千秋。關福命。料尋常。鐘鼎君何屑。珠玉落九天。徹。漢江東下。濤飛血。羨早歲。扁舟弔古。嘯風呼月。莫漫沈沙。尋折戟。都是新磨金鐵。聽一片。寒潮嗚咽。好句驚人。懷謝朓。似浣花。諸將酬忠烈。春寄我。幾時節。

又 題陳竹珊且高歌圖

淚灑新亭雨。問蒼茫。天荒地老。寄愁何處。除卻美人花。月夜。都是寂寥塵土。幸點筆。歌裁金縷。一笛玉鬢。能醉客。更喃喃。訴盡鸚哥語。山影缺。亂紅補。呼童洗硯波。凝霧繞危橋。清泉白石。游魚三數。拌取高歌。憑解恨。轉怕歌長調苦。儘快意。星初月午。試唱曉風楊柳曲。使絲絲。怎綰勞人住。浮大白。爲君舞。

又 舟中亡室金夫人生日

生已三年別。更傷心、一年又到。九泉終訣。教子奉姑三十載。費盡絲心縷血。況頻歲、長安信絕。動說早朝虛負了。究何曾、一日香衾疊。思往事、恨嗚咽。趨朝我又關山越。最憐卿、生辰縣稅。正逢今月。五十人生原不夭。恨此一年猶缺。歎兒女、痛親腸割。營奠營齋終莫補。算百年、易盡期同穴。聊酌汝、寸香爇。

又 書弔郭烈婦詞後

萬事寒杯酒。儘平時、星盟月誓。死生厮守。斗頓西風悲朝露。驚得鶯啼燕語。早準備、巢移院柳。回憶涼秋銀河下。願雙棲、賭盡牙根呪。泡影滅、成烏有。莫傷兒女情難久。古今來、幾多養士。黃金量斗。轉盼宮車捐賓客。不記言還在口。問珠履、三千去否。一箇英雄湛身死。覺衆人、國士徒勞剖。那止爲、主恩厚。

又 題友人詞後

情恨難窮寫。祇吾生、傷離弔逝。筆猶無暇。那有春花開百歲。更得月圓千夜。總一例、

雲銷水瀉。苦爲閒情添悵。恐啼鶻倒惹黃鸝罵。相思淚。莫輕灑。蘇辛豪蕩姜張雅。儘輸他。柳周輕雋。但供游冶。悔到伯時圖駿骨。也怕多生化馬。歎黃九。豔詞爭詫。選出明珠千萬顆。好穿來。成串都無價。莫謂世無知者。

又

忽聽風聲惡。一重重。頽雲似墨。障天成幕。老屋編茅那便捲。牢把藤纏蔓縛。怎漏到。牀牀雨落。亟趁晴時乘屋看。防參差瓦縫微殘破。休祇怯。風來虐。當空紅日天光燦。待須臾。重霾淨掃。萬峯青削。便有輕煙和薄霧。不設炎威蕩卻。莫新霽。又耽游樂。移石徙薪非早計。好閒時。布置臨時作。天陰未。思量著。

又 慰徐叔鴻悼亡

雲散花飛去。任東風。春深春淺。總難留住。靜夜鰓魚撐睡眼。苦被啼鶻聲誤。悵一歲。因緣太遽。想到沈綿悲委蛻。算生天。解脫翻成悟。緣與業。風中絮。黃門我昔同哀。遇。止數年。大弦一絕。么弦雙腐。枉對青山盟曠日。畢竟白頭空賦。漫追憶。劉郎前度。

往日模糊將夢覓。到而今、夢也無根據。人天恨、共誰語。

又 叔鴻用前調并次韻因卽前韻和之

春慣將愁去。甚因由、歡情樂事。不隨春住。祇聽東風吹落葉。翻怪秋魂吟誤。看一霎、曇花飄遽。推倒菩提堦卻鏡。笑非臺、非樹何時悟。尋無蹟、雪和絮。花飛茵溷隨遭。遇。儘分明。石鑽易透。水流難腐。稽首空王祈解脫。短命因緣休賦。更乞與、慈航輕度。了徹真如皆幻影。是多生、成佛生天據。漫提起、悲涼語。

又 都城北極樂寺之後。爲畏吾村。明茶陵相國李文正公墓也。前屋三楹卽祠堂。吾湖廣之宦於京者。每歲清明節。爲文正祭掃畢。修禊事於寺。寺有海棠數株。花開其時。同鄉釀飲賞花爲樂。因可不廢祀事。比年來。予以病塞。未得與聞。今歲花較繁。游亦盛。適案頭有去歲叔鴻紀游詞一闋。因用其調。并依原韻和之。卽寄示叔鴻。時癸未上巳後十日。

樽廢憐拳曲。看青黃、已成溝斷。遇春猶綠。老我不材真似此。枯坐竹間矮屋。忽觸目、

吟箋珠玉。笑倚海棠舒倦眼。院中海棠樹兩株。花開頗盛。歎世間、名利爭蠻觸。水中  
月。儘人掬。羨君頻歲芳蹤續。勝故里、坊題濯錦。峯登雲麓。相業詩名餘片土。弔古  
徒傷杜牧。待澆徧、墳前芳醪。芳醪見溫飛卿詩。祇此粉榆同社飲。願年年、重補清游  
足。拌罰醕。準金谷。

高陽臺 卽席分詠燭淚

顆顆圓圓。絲絲密密。替人訴盡離憂。一寸紅冰。凝寒不待涼秋。丹心爇透何曾冷。越  
心煎。越是長流。夜深不照著花啼。不管花愁。銅盤堆出珊瑚豔。訝靈芸唾結。飛燕  
華留。雙炷偷彈。搖風頻閃星眸。歡場獨抱無言恨。便成灰。泫也難休。筓痕收。翦向西  
窗。滴碎更籌。

又 叔鴻九日飲龍樹寺以一詞見示燈下和之并次其韻

疏蓼吟紅。殘蘆颭碧。南窪波淨秋塘。緒雨絲風。釀成一片重陽。高樓盡被詞人占。歎  
鄉心。空望湖湘。儘風涼。落帽憑吹。嬾送鴻翔。輸君乘興看山好。更茱萸徧插。觸起

詩狂。記踏衡峯。舊有衡嶽登高圖。脚跟雲氣飄揚。丹楓霜醉黃花瘦。悔浮名、誤卻耕桑。且傾觴、待和前詩、舊稿都亡。

燭影搖紅 舟中重九

前歲重陽。瀟湘望斷長安月。去年愁裏又重陽。淚灑么弦絕。今更重陽時節。莽天涯、從新賦別。日高天遠。萬里孤鴻。扁舟一葉。笑倒淵明。醉來那管言辭拙。菊花堆出萬黃金。不許腰輕折。多謝登高遠躡。怎如看、怒濤飛雪。風風雨雨。不盡長江。大聲嗚咽。

又 白秋海棠

土軟塵香。消他縞袂翩來倚。相思有淚寄西風。淨把燕支洗。約伴青娥素姊。鬪嬋娟、月中霜裏。李花縞夜。梨蕊眠雲。讓渠清綺。玉砌銀臺。貯嬌宛轉相料。平理肌膚冰雪。世間無。姑射仙差。儼素面朝天自喜。笑肥環、朝醒未起。綠章夜奏。乞借秋光。輕陰

江城子

流光織影日如梭。儘婆娑。浪消磨。何處江峯。照鏡作青螺。不信東風吹水逝。吹得皺。眼中波。含顰匿笑斂雙蛾。憶如何。恨如何。倦倚琵琶。和睡揜輕羅。枕上淚痕階上雨。都比似。落花多。

浣溪紗

綠水生煙漾碧津。柳絲如雪蕩芳塵。和風攔路逐游人。燕子飛來波有影。梨花落盡月無痕。倩他留住一分春。

又

何處簫聲向晚天。吹來角調不成圓。鞭絲帽影記當年。殘日浴波紅帶暈。遠山含雨綠生煙。馬蹄閒踏玉河邊。

又

送客燕橋酒思闌。橋邊楊柳耐人攀。到今追憶此情難。積水潭邊行藥去。夕陽寺

裏看花還。肯教容易放春閒。

又 題葉更端雪裏桃花卷子

羣玉山頭擁絳綃。亂紅如雨凍痕消。替他姑射寫風標。崔護叩門從訪舊。子猷乘夜漫停橈。春風吹夢段家橋。

又 卽事

老去尋歡強作豪。東鄰雲月故招邀。笙歌亭院可憐宵。醒看酒狂生客厭。靜聽曲怨惹魂銷。闌風夢雨助無聊。

鵲橋仙

風絲絲樣。雨絲絲樣。釀出愁人天氣。年時小別尙牽腸。況死別、一番滋味。信兒沒準。夢兒沒準。拌著夜長無寐。今生已是沒商量。更說甚、生生世世。

羅敷媚

名花得意休輕種。儘費思量。枉費思量。越是飄零越有香。玉璫絨札空勞寄。說不



淒涼。那不淒涼。怕看珍珠字幾行。

喝火令

綠軟苔梳鬢。紅酣豆點脣。一簾風雨盪春魂。待把桃花作釀。和醉曠將春。酒重愁無力。衫輕淚有痕。一春情緒費溫存。便到燈時。無奈得清晨。便到清晨時候。怎地得黃昏。

菩薩蠻 新歲舟中望山

瑟瑟臘鼓催年罷。江波碧瀉春如畫。春到已多時。梅花知不知。山色隨江掩。盡被東風染。染得綠生生。一層深一層。

又

玉樓塵黯春無主。樓頭紫燕雙雙語。莫自倚樓西。有人樓上啼。啼殘春欲去。偏向愁邊住。愁合逐春休。春歸愁更留。

又

千絲萬緒愁難了。梨花無語東風悄。花發怨春遲。鵲啼春怎知。銷愁惟有醉。量淺杯空對。髮白說因愁。沙鷗先白頭。

又

檢書向夕親燒燭。燒殘寸蠟看難足。倦倚小屏山。薄羅驚夜寒。今年忘卻暑。暑少緣多雨。風急晚颼颼。攪成心上秋。

百字令 武昌城樓望江

怒濤翻雪。恨廿年兵燹。浪淘金鐵。烈士心肝忠義骨。激蕩層波都熱。痛淚添瀾。悲聲助漲。忍注團瓢咽。臨流試汲。此中多少冤血。最恨千古高樓。狼煙一炷。盡逐飛灰滅。騎鶴仙人應怕返。便返怎尋城闕。晉代碑沈。辛家店廢。遺礎埋秋月。扁舟買醉。江頭舊恨休說。

浪淘沙 旅次和壁閒韻

湘樹隔千重。別緒怱怱。一鞭疲馬走西風。再蹋瀛洲尋舊侶。莫訴飄蓬。半載阻煙

烽。積恨盈胸。風淒雨晦客窗中。階下鈴聲車上鐸。徹夜丁東。

又

鄉夢昨宵重。睡起怱怱。孤村留客雨兼風。不信雙輪催得去。人似飛蓬。指日靖殘烽。浩氣橫胸。洗兵快聽雨聲中。只待龍驤飛捷報。高唱江東。

沁園春

題莊木生書隱圖遺照爲其子二溟學博

古有漆園。吏隱儒仙。君其裔歟。聞織簾老去。羣經徧寫。琅環勝處。福地曾居。三篋搜遺。百篇訂誤。無限門前問字車。非同調。便劉公耽餓。肯售班書。翛然一夢蘧蘧。恨我欲尋君夢已虛。幸賢郎妙筆。才同蘇邁。名山勝業。集訂江湖。拜紀緣空。交羣誼古。颯爽風儀挹畫圖。君休矣。歎莘莘學子。誰辨焉烏。

又

題李小寶西山招隱募資圖

措大生涯。問舍求田。佳哉是鄉。想挈家陽羨。坡仙客舍。誅茅錦里。杜老山堂。種竹三分。買鄰百萬。此願非奢料許償。千秋後。算君家盤谷。重築何妨。非村非市排場。喚

識字耕農卻也當。笑俗猶未免。犢禪小阮。風原自古。馬糞諸王。因屋樹成。買山隱就。只許名流助辦裝。君行矣。使西山南浦。儘穀徜徉。

南浦 和姪壻王益吾編修悼亡原韻

飛絮滿天涯。倏春風。吹散變成鶻血。無力化萍圓。零星影。都任雪消痕滅。初三下九。庭前娛戲。悲誰說。王昌佳壻。方春帖泥金。黏牆愁裂。傷心曲唱姑恩。恨作婦難終。呼耶遙別。老淚十年前。離帆話。已是人天長訣。何如寄寄。猶消阿伯文千葉。李義山有祭姪女寄寄文自稱阿伯新蟬怕聽。防葉落秋風。哀音啼徹。

南歌子 獨酌梅花下有憶

木落霜清後。雲寒月上初。玉梅花下試提壺。知道梅花。得似箇人無。鶴守三更夢。鴉含一寸鋤。種花不惜費工夫。記得去年。開到第三株。

又 雨中望西山有感

寄信遲青鳥。開籠羨白鷗。無聊看雨獨憑闌。可惜闌干圍住。不教還。雨憶瀟湘聽。

雲憐嶽麓閒。西山鎖恨似重關。山外青山，何處更無山。

又 鐙花

珊結紅舒燄。珠垂紫映霞。看書卻恨影微遮。笑被老妻闌住，莫挑他。卜吉雛孫笑，占歡小婢譁。不知何喜要渠誇。夜夜鐙前，夜夜祝生花。

柳梢青

愁送春歸。花飛蝶懶，絮落魚肥。多謝東風，作去寒分暖，勒住春回。留春且作徘徊。對白髮、青山一杯。欲訪荆高，重尋劉石，同醉燕臺。

行香子

年少虛名。楚國狂生。滿胸懷、策古籌今。千磨萬折，負此豪情。仗劍摩挲，詩排遣，酒溫存。老矣無能。鬚鬢霜侵。任人呼、牛馬皆鷹。偶然陶寫，古墨零星。是畫藍田，書青李，帖黃庭。

又 悼春爲益吾作

鴉髻初勻。風味天真。鬪嬌憨、淺笑輕顰。簸錢堂下，奉帚殷勤。記茗初煎，香初炷，酒初溫。王昌嫁與碧玉歌新。傍書台、滌筆籤芸。奈何薄命，委翳飄塵。枉借春陰，泣春雨，夢春雲。

江南好

憑闌倦。繞砌覆濃莎。打出紅緋拴燕子。拋將綠豆賺鸚哥。含笑捲春羅。

又

天末望。游跡滯關河。卜遠自嫌釵股誤。寄書生恐字痕磨。歸信幾番譌。

明月逐人來

題董硯樵觀察古榆老屋校韻圖

紙窗竹屋。疏簾清簟。吟聲靜、獨驅鉛槧。老榆影裏，古韻重披檢。不管綠陰濃淡。誰料重歌隴水鳴騶舞劍。應曾記、寒宵月暗。尋君款戶，坐久談無厭。剔起紅燈雙燄。

燕春臺

題梅月美人障子爲曹薌溪侍御

雪冷驕春。風寒留豔。一枝特放奇香。薄袖輕裳。鬪將姑射新妝。清宵月轉回廊。湧冰

輪獨倚寒窗。捲簾人悄。微酣生暈。無限思量。西山花隱。東閣詩狂。壽陽點額。江嬪  
回腸。橫斜影動。春來甚處池塘。著意尋芳。借丹青留得春長。語徐黃。添寫花外鶴。引  
和雛凰。爲蕪溪徵蘭之祝

### 過秦樓

海樣春光。雲般花事。和風麗日遲遲。忽燕嘲鶯謔。慣倚著林鴉。噪哢爭奇。聒耳那禁  
煩擾。獨微行野寺尋詩。又池塘青草。蛙聲閣閣。不管公私。正春游已倦歸尋。款段  
鷓鴣。勸飲小住經時。歎心情懶慢。便繁華滿眼。未肯輕窺。何事苦干卿。縱狂風抵死  
來吹。向東皇笑叩。古井無瀾。可動些兒。

### 醉花陰

暖日烘雲天氣好。淺黛籠煙草。風雨過清明。花似年年春比年年老。垂簾不放餘  
香裊。開徧荼蘼了。正喜綠陰成。芍藥翻階。偏弄紅蕤早。

### 又 玉河春望

策騎河邊初放溜。風暖吹冰皺。染柳更薰梅。百樣生新。祇有春如舊。西山遙望峯  
尖瘦。綠鎖林梢秀。風定晚來天。波溼殘紅。浸得斜陽透。

齊天樂 小對竹軒坐雨

如年長日連番雨。蕭蕭變成秋影。鵲慮巢傾。蝶憐粉溼。不止爲花愁損。西風更緊。望  
荒磧沙沈。遠山烟暝。何必江深。開軒叢竹翠雲冷。閒門正少客過。況泥洳轍阻。誰  
尋幽徑。永憶江湖。慣淹歲月。聽雨聽風難準。前宵夢醒。儼篷背聲繁。船唇柝警。獨泛  
瀟湘。篠烟棲客艇。

江城梅花引 苦雨夜坐

虛檐過雨響泉流。屋如舟。冷如秋。連日危欄獨倚望雲浮。月又不來天似墨。空階滴  
一聲聲。都是愁。新愁舊愁愁未休。到眉頭。到心頭。強欲推愁。愁不去。雨更勾留。翦  
燭攤書兀坐數更籌。閒事關心呼小婢。明早看。嫩芭蕉。打破不。

八聲甘州 弔郭子美提督之妾烈姬趙氏



歎將軍樹折。莽悲風橫吹。燕和鶯。獨吳娃二九。故家天水。哀絕無聲。已是珠殘玉碎。鳩飲一杯傾。直逐英魂去。不爲閒情。比較墜身金谷。尙催花逼柳。斷送奇英。恁甘心赴義。烈骨倍晶瑩。漫等他。白楊作柱。才成灰。紅粉燕樓平。更休問。死期同穴。皜日曾盟。聞烈婦素有殉死之誓。

念奴嬌

張蕙甫比部李叔和舍人江亭招飲

郊園過雨。覓江淹遺構。正堪銷夏。老輩林亭留片石。何必琳宮珠廈。小轂行舟。叢蘆捲浪。絕勝風帆挂。西山新霽。染將晴翠如畫。觸念衡嶽湘流。故鄉遊歷處。倍應清暇。祇此尋常幾茅屋。點綴盡成幽雅。酒罷狂歌。夕陽留客。未肯催西下。吟鞭徐返。軟紅又逐歸馬。

幔捲綢

編亡弟筱樓詩草屬姪堵王益吾祭酒訂正

雁浦淒霜。鴿原泣月。已矣重泉閉。值露曉窗清。雨夜鐙殘。遺稿編繙。吟魂待慰。想到千秋。虛名飯顆。寂寞終無味。便贖我梧桐。半死棠華。孤放何爲。生生世世。談休易。

空作來因計。更不忍搜他。殘章斷句幾多。墨跡塗污細碎。縱傍池塘。賦成春草。夢也難成睡。怕更吟看。付與微雲。秦七佳婿。

虞美人

蕭蕭白髮空搔首。薄量難勝酒。但看人醉儘銷憂。況是月華如水、碧天流。海風吹霧漫天厚。那及天長久。聽他漆室語啾啾。難道杞人醉也、不知愁。

如夢令 雨中蕉

幾葉新添濃翠。半捲芳心如醉。涼雨滴聲聲。便到夜深難寐。休睡。休睡。打得愁人心碎。

又 雨中竹

滿院風篁攪睡。添著雨聲繁碎。溼葉亞枝低。扶住莫教沈醉。五月十三日爲竹醉日醒未。醒未雨也助些甜味。

又 夾竹桃

紅雨綠雲相近。勁節也含風韻。打棹入仙源。難道主人休問。誰信。誰信。崔護錯來廝認。

水調歌頭 夏夜月有序

昔坡老因王夫人有春月令人歡喜秋月令人愁怨之語。遂召趙德麟輩來飲。且作詩詞賞之。予笑謂予婦張夫人亦能爲夏冬兩月作韻語否。夫人謂夏月令人豪健。冬月令人清淨。予喜其語不俗。亦作兩闋成之。

何月能無月。情味判良宵。春歡秋怨。不應暑夜獨無聊。頗似摩訶池上。睡起清涼無汗。光徹碧天遙。妙語觸吟興。夏月令人豪。揮白羽。撫綠綺。酌香醪。斗牛多少。間氣長劍吼青霄。祇此冰輪騰上。驚起魚龍難睡。海漲定潛消。清影掃炎熱。世界盡瓊瑤。

又 冬夜月

看雪已奇絕。得月倍光晶。冰凝霰潔。六街塵淨。夜無聲。惜此圓蟾清影。無計拏舟訪戴。仍向竹樓凭。靜夜莫嫌冷。冬月令人清。燒石炭。吹玉笛。瀉銀瓶。梅花消息先透。

香影印窗明。照得心如止水。更取姮娥相證。拋卻世間名。階下有癩鶴。伴賞到三更。

惜餘春慢 落花

芍藥開餘。荼蘼放了。盡把韶華催逼。將離且住。欲墮還飛。片片落紅狼藉。卻喜飄墜玉溝。蹴傍舞筵。尚供吟筆。縱無情。想到半拋藩溷也應憐惜。歎自昔。悲葬西施。吳宮春去。一例夢中幽泣。鸞腸浪費。鳳背空煎。儘穀燕忙鶯急。怪怎東風太狂。特地吹開。吹殘何意。快呼童。淨掃階除。莫被玉人知得。

青玉案 雨中鄉思用賀方回韻

太平車子催征路。日送著、行人去。莫信衡峯無雁度。洞庭秋月。瀟湘春樹。都是關情處。涼風消暑斜陽暮。排悶詩無快心句。作意遣愁愁不許。鴿原新恨。蠶叢離緒。一片芭蕉雨。

又 自題松涼夏健人行看子

十年未見圖中我。舊寫小照已十年。太瘦今成飯顆。七十光陰如轉磨。癡肥非慣。儒

酸頻過。任笑蕉衫破。科頭據石看雲坐。消夏閒吟續清課。絕勝風涼窗北臥。撫松  
饒健。聽泉留和。莫被緇塵涴。

水龍吟 月夜聞遠笛

誰家涼夜橫吹。一聲似徹霜天曉。玉關別恨。銀階幽怨。全穿樹杪。葉起蟬吟。枝驚鴉  
睡。月窺雲早。料闌干獨凭。朱唇吹徹。怕斷送。青春老。恰值雨停風小。恍串珠、穿來  
旋繞。連綿遞送。隔牆誰撼。倚樓遠裊。斷竹音清。落梅腔遠。餘音難了。漫自憐聽不分  
明。恰更比分明好。

憶少年 編日札成戲題其後

無憑棋局。無情霜鬢。無聊煙墨。看囊更何有。祇殘編盈尺。寂寞聲名嗟萬一。老學  
彖中風日。誰將放翁。畫著漁家蓑笠。

河傳 中秋看月有憶

拜月。低說。常圓莫缺。雲外香飄。昔年今夜。曾向卅六灣頭。一船隨月流。洞庭東去

秋光大。耽晚臥。不放良宵過。那堪蘆雪飛下。幾個歸鴻。唳長空。

滿江紅 六月十六日先太夫人忌辰述哀

廿載松楸歎寒食。總成虛設。每悵望、蘆塘風露。月湖霜雪。六月月中尤自恨。椎心飲泣。憑誰說。拌淚珠。化作水南流。濤聲咽。鶴髮短。年將耄。狐首願。著休揲。算鶻啼春暮也。無多血。春草根。隨心寸斷。征衣線。繞腸千結。願百年。長似夢。依親無離別。

古調笑 小對竹軒坐月

綠竹。綠竹。門對此君眠足。日斜睡起朦朧。又聽林梢晚風。風晚。風晚。莫把濃陰吹散。

又

竹影。竹影。得月破他煙冥。煙消月似秋涼。翠葉移來紙窗。窗紙。窗紙。添寫幾行人字。

采桑子 書搗塵詞集後有序

亡友李舜卿孝廉。洽絕代清才。駢散文古今體詩無不工。尤能懸臂內。擬作小楷。以其餘技填詞。沈麗獨絕。詞名搗塵集。大半散佚。今聞其嗣子石仙秀

才長檀搜訪得十餘首刊之書以誌慰。

碧衫酣嘯長安市。好夢如煙。別淚如泉。惹得春人作意憐。小紅久絕新詞唱。麝盡香煎。蠟盡膏然。有個佳兒集代編。

又

詞場少悔虛名賺。玉好生煙。珠好沈淵。謗已隨名滿日邊。老來祇喜攤書坐。衰不求仙。狂不逃禪。一卷殘叢手自編。

春光好 柳絮

飄月曉。蕩春柔。趁烟浮。飛過小橋飛更上。畫橋頭。銜來雙燕啁啾。繞高樓。逐扁舟。不怨東風吹作雪。怨東流。

望江南 小對竹軒雜述十首

閒吟望。獨坐倚簾櫳。蟲子打窗隨急雨。燕兒尋壘避狂風。喜放夕陽紅。閒階種碧綠。任低迷。夜合花開迎日早。夏枯草長送春歸。風雨莫頻催。

修竹外。平楚望銷凝。楊柳眉添新樣翠。芭蕉心透內層青。著眼最分明。  
東風嬾。紅雨未全飛。紫蝶熟來招伴舞。黃鸝嬌慣趁人啼。無夢到遼西。  
花須折。花落折嫌遲。勺樂貽將憐遠別。文無種出喚當歸。莫信鷓鴣啼。  
連朝雨。長夏暑全清。甲子疑年勞算歲。丙丁畫帖學祈晴。昨夜月猶明。  
擁書坐。風味笑儒酸。枵腹僅能分蠹飽。堅心媿不敵蠅鑽。急索解人難。  
挑鐙讀。舊學費商量。年邁已無才可退。日知猶幸月無亡。時排纂日札。夜起更推詳。  
清闕鎖。謝客意非慳。讀書妄歧南北派。勘碑盲揣宋唐刊。寒具儘供餐。  
觀空好。幻妄掃諸緣。且食蛤蜊拋許事。不籠鸚鵡省多言。林臥學焦先。

又 述恨二首

哀遲恨。廿載別松楸。露冷月湖愁望夕。霜清蘆浦忍逢秋。哀夢五更頭。  
緣業惡。骨肉受凋殘。黃口三兒先黑壤。白頭一弟又青山。老淚可能乾。

踏莎行 苦雨



雲暗沈山。風寒攪樹。叢篁低夏和煙語。丙丁帖子畫成空。蕉窗又聽連宵雨。銷暑  
何人占晴無據。未秋已自含秋緒。江流常笑北來無。分明屋似臨江住。

摸魚兒

陳編修汝翼病死次日其妾吳氏殉之時癸未七月廿二日

惜怱怱樓頭燕子。秋來留便難住。成灰紅粉猶生歎。況作高樓墜葉。秋最苦。見多少  
西風敗草無青處。問天莫語。任同穴杳冥。鳩觴和血。九地覓歸路。斷腸事。爭肯徘徊  
自誤。儂心未許人覲。聞未殉節前人多疑之。祇傷君獻凌雲賦。畢竟虛名何補。君  
可悟。君不見嚴徐。東馬皆塵土。百年同此。尙有個清娛。夜臺寂寞。隨著子長去。

瑞鶴仙

春暮飲於嵩雲草堂因悼故人李藻舟京尹宜春宇侍郎毛煦初尙

書前年皆觴讌此地邀同看花也

驀嵩高雲護。幸片石移將。帝城煙樹。忠祠額新署。今改題岳忠武祠無復草堂額。借  
繁花把怎。春光留住。鄉心漫訴。我亦悵。衡雲湘水。知東風。綠到誰邊。三十六灣春暮。  
最惜河山眼底。桑海尊前。年光難據。黃鑪如故。早荒草根蟠宿墓。記往時讌賞。看

花不去。爭歎落紅無數。怎知今、紅落仍肥。故人何處。

唐多令 雨後南下窪看蘆洲水漲邈然有江湖閒意

一碧蕩蘆洲。晴沙得雨流。趁西風、作去弄新秋。絕似湘江波色冷。祇少個、釣魚舟。  
雨霽夕陽收。鐘聲撼寺樓。望西山、雲氣仍浮。準約重陽來載酒。籬外菊、試開不。

酷相思

如海春光添晝漏。看簾外、花如繡。儘惆悵、此情參莫透。花開也、愁難受。花飛也、愁難受。  
行人到處鵲啼否。錯過歸期後。渾不顧、鏡中人影瘦。恨樓外、青青柳。望樓外、青青柳。

鳳凰臺上憶吹簫 維揚張厚菴前爲予寫小照成徐壽蘅見之謂太瘦絕不

相似因重寫之仍屬姜穎生補景以近九日取采菊東籬下詩意卽填此闕

於上

革帶朝移。山肩宵聳。自憐老骨槎枒。況西風簾捲。人比黃花。縱使毫添頰上。恁風格、

肥滿難加。憑揮灑。春姿回我秋興吟賒。天涯故鄉重九。諒茱萸插徧。誰盼歸鴉。幸秋英未落。點綴烟霞。料理就荒松菊。何日泛湘上輕舫。攜僮去。東籬寄興。休讓陶家。





龍

二

麟

種

山

房

運



詞



王錫振（嘉慶二〇——光緒二）

又名拯。字少鶴。號定甫。廣西馬平人。道光二十一年  
進士。授戶部主事。官至通政使。嘗佐王大臣辦巡防  
事。作團練條議十則。爲時所稱。與同鄉朱琦龍啓瑞  
游處講習。並負時望。著有龍壁山房集。

序

余與王子定甫爲同年生。一星終矣。初聞馨逸。未數晨夕。中更別離。益感邈曠。歲在壬子。君旋自戎幕。鍵戶掃軌。沈鱗羈羽。影響斯合。僦居相望。還往梭織。蔬殮檠酒。率窮懽妍。所爲詩歌。獲飫汁瀝。爰出倚聲。授余倚撫。芳意悅魄。古愁蕩魂。銖黍不忒。情旨畢鬯。方諸兩宋。洵可高揖清真。平視聖與。牧之序昌谷詩曰。雲煙繇聯。不足爲態。又曰。春之盎盎。水之迢迢。以語君詞。詎云多讓。定甫復言詞雖小技。壯夫所嗤。而當指物索神。造意搜狀。劖肝鉅腎。其傷實多。自苦何爲。將矢不作。余曰唯唯。鄙生亦云。不惟吾子。百年甃甃。生也有涯。而以感怨刺懟。劖刻造化。旣違和平。更促年壽。屏置弗事。亦延命之一訣也。雖然。余與定甫解后相依。跡若蛩駘。幽室華燭。殘杯冷炙。當其落木擊牖。斜月移幌。結心沈冥。時或歎詫。悲愉顛倒。拉雜無端。他日者。雨絕雲乖。故人入夢。追維此樂。窈窕在目。發之音聲。必有不自禁者。定甫之詞。其能已於是耶。平湖張金鏞序於宣武城南寓廬。

自序

茂陵秋雨詞者。大都山人病餘之所作也。始自潘岳悼亡之歲。泊乎王粲從軍之年。往往牀空竹簟。藥裹金瘡。哀動長言。感存微旨。其閒中年惡疾。遠道沈痾。皋橋賃廡。伯鸞則永噫而歌。樵涇負薪。翁子乃同聲以唱。其創益甚。所作實多。夫詞雖小文。道由依永。情文繚繞。家風既愧碧山。聲譜荒唐。工匠大慚紅友。爰事刪夷。都爲斯集。寓香草美人之旨。敢冀騷人。聆鈞天廣樂之音。猶疑夢嚙。嗚虜。倦遊老矣。依然渴疾難消。薄宦無繆。惟是幽憂長抱。則相如自比。原非有託於其他。使去病當年。敢望何如之借問乎。咸豐己未新秋。龍壁山人自序。

自跋

庚申之秋。會刻龍壁山房詞草二卷。自維倚聲一事。本強作解人。聊以宣幽導鬱。不自愛重。遂亦不甚檢點。聲譜荒唐。而音韻尤非素習也。中年以往。精力漸疲。文辭潦倒。亦頗知自悔艾。乃以灤陽再役。比辛酉秋。重有悼亡之戚。往往情不自禁。獨絃哀



歌雖聲文幼眇之間。依然鹵莽從事。而用律用韻。時較前刻稍知謹慎。抑不知果能免咎戾否。惜冉冉老矣。卽此文章最小技。而戒棄一再。不能屏絕。迄又靡所成就。爲憶嚮所酬和。若夢玉海門。死喪離別。罔可就正。爰自蒐檢。復爲兩卷。付之手民。仍附庚申所刻之後。聊誌年來不憊心蹟云爾。同治三年甲子秋八月。茂陵秋雨詞人自記。





龍壁山房詞

馬平王錫振定甫

茂陵秋雨詞

菩薩蠻

西風料峭寒螿咽。錦屏花放胭脂溼。悄影暮珊珊。碧雲天際看。孤吟還獨處。誰問牽牛渚。何處玉簾櫳。夜階涼露重。

綺羅香 雨夜

梵歇松寮。雲迷竹徑。蕭槭晚涼天氣。點滴空階。兜惹亂愁閒思。紈綺夢、玉悴金迷。鐘鼎願、劍磨書滯。漸頭顱、三十依然。寒螿孤咽未心死。遺篝那覓香暖。短夢驚迴餘陣。還吟窗紙。客館行舟。僂指幾番醒醉。攜襖被、畫省歸來。又短檠、僧窗獨自。更蕭蕭、落葉長安。攪人心暗碎。

臨江仙 病起

城上寒鴉偏早起。愁人枕畔先驚。依依紅日上窗櫺。怕持鸞鏡。對影照分明。茗椀藥鑪須自理。支離病骨堪撐。夜來幽思特牽縈。打窗殘葉。和夢一聲聲。

唐多令

秋蝶 用夢窗譜

胡粉溼羅衣。秋來殘夢迷。被西風、彫盡綠芳菲。便守花魂愁不去。問誰與、戀空枝。寂寂度香幃。翩翩何處飛。怕西園、月冷霜淒。惆悵一生香絮影。更休說、紫和緋。

南浦

秋燕

東風滿徑。憶春朝、濃睡穩雕樑。夢底海雲如霧。歸思幾回商。不道西風凋晰。早蕭條、吹遍鬱金堂。剩月明華屋。風寒藻井。銀燭夜蒼涼。不盡天涯蕭槭。認紅襟、淚點溼雙雙。爲問彩絲誰繫。簾影闌空房。多少玉鉤銀蒜。只難拋。零落舊巢香。盼江雲翦翦。幾時歸去。覓漁艖。

望海潮

秋海棠

靈根一縷。天然嬌娜。誰令生向秋風。楊柳檻前。豆花棚底。偏來開傍寒蛩。脈脈斷腸。

紅。便向人不語。暗底愁工。薄命生憎。倩誰分付晚煙籠。夜涼魂夢惺忪。又銀燈重剔。照見孤叢。不道那時。淚痕點點。至今長在花容。寂寞更誰同。正黃昏時節。月上牆東。霜影迷離。繡簾寒透一重重。

湘春夜月 花影

夜朦朧。天邊新月如弓。捲起一桁簾波。流影入芳叢。者是玉京魂魄。被西風吹落。拂地煙濃。算紅銷翠蝕。芳情不斷。只在虛空。畫樓西畔。金鑪香燼。露冷霜重。步履廊迴。驀憶得。欄杆慵倚。雙鬢蓬鬆。重門掩靜。又誰教。短夢惺忪。收不起。待明蟾落盡。心頭眼底。依舊無蹤。

臨江仙 題友人落葉感秋卷子

庭階一夜瀟瀟雨。秋來容易今年。西風吹瘦嫩涼天。畫屏籠月。流影散秋煙。長簾空牀人寂寞。此聲知在誰邊。玉簫我亦恨纏綿。禪龕獨自。搔鬢髮。移。

思佳客 元夕出遊二解

油壁香車驟裏輕。天街風撲暗塵生。市樓一簇金盤燄，便礙紗籠側帽行。前墮珥，後遺簪。燭圍燈樹幾家屏。魚龍雜遝街如墨，不覺當頭有月明。  
鬼殿神宮角抵華。沿街絲竹鬧紛拏。風前鏡吹翻新曲，月底簫聲出舊家。燈影暗，暮圍遮。踏歌聲亂笑鄰娃。歸來獨對寒檠坐，寂寞青蟲自吐花。

河傳

春盡。愁病。小窗閒。楊柳恹恹晝眠。露桃向人愁不鮮。潛潛淚痕誰處濺。枕上迷離蝴蝶影。飛不定。薄劣春寒忍。正模糊。花外呼提壺。杏花村裏沽。

沁園春 三神菴展張宜人殯宮作

秋到長安。斷雨零風。愁人自醒。慘琳宮門掩。葳蕤玉鎖。瑤京路隔。縹緲雲軒。黻佩商量。齋鹽論略。寂寞生涯涕淚并。年華影。奈朱絃錦瑟。一半塵扃。禪關我亦伶俜。漸帶索衣寬也自驚。念青山歸骨。何時負汝。白頭進饁。夢底從卿。隔院棠梨。連街魚鼓。不信人天有萬層。余所居地藏菴與三神菴間一橫街旛竿靜。待燭灰香冷。環珮來

經。

菩薩蠻 崇效寺花看三年矣今春不及一遊悵然有作

禪房一夜風和雨。嬌紅定是飛無數。玉勒錦障泥。幾時曾路迷。年年花下酒。偏是

今春負。寂寞佛前燈。落花深閉門。

湘春夜月 病臥吳門和懺綺堂題畫芍藥原韻

豔春杯。草橋幾度花開。偃蹇一片腥紅。鶯燕總相猜。多少玉盤金帶。趁東風得意。舞上瑤臺。剩雲綃冉冉。畫屏深護。寂寞春來。芳華負了。那番攜贈。月抱星懷。落拓江湖。誰喚醒。揚州一夢。芳草天涯。銀燈的爍。墜盤龍。重整宮釵。春好在。漫鉛華忍棄。杜陵憔悴。傍砌沿階。

新雁過妝樓 姚子楨大令見過話都門舊遊

九陌塵香。花工早。東風紺宇迴廊。鳳城偏近。車鐸對語瑯瑤。到眼不知行樂事。七年夢惹水雲鄉。最難忘。酒樓畫壁。醉墨淋浪。招搖青春伴侶。正錦衣玉貌。暗妒紅妝。

鬢青瘦損。誰念舊日清狂。江干漫勞駐馬。怕重說、瑤京歸路長。相思影、更漢南燕北。雲樹蒼茫。謂翰臣湖北萍江京師

摸魚兒

聽瀟瀟、一窗癡雨。江南春又將半。夜來還是廉纖嫩。拚到落紅如霰。春不管。只夢底春人、自惹愁零亂。年華暗換。是幾度傷春。幾番病酒。空賦玉階怨。羅衾夢往事難乾。淚眼。鏡盟釵約誰見。游驄踏倦天涯路。忍聽鷓鴣催喚。風影暗。恨冷落瑤笙。誤了西園宴。林鶯黯淡。剛曉色啼開。海棠枝上。簾幙又催晚。

霓裳中序第一 夢遊華首臺作舊入羅浮曾宿處也

松風捲翠縷。嫋嫋浮山西垞路。多少靈旗颺舉。對掌合金仙。鬢欹玉女。霓衣曼舞。灑一天、晴雨飛霧。青巒頂、排雲鶴鶴。寂歷嘯空語。延佇。海山虛駐。有四百、瑤峯孰主。鸞車虎瑟來去。剩黯淡龍衣。癡迷蝶羽。鼎沈丹轉誤。問日出、雞鳴甚處。春歸也。煙霞愁失。幔影漾飛絮。



三姝媚 內兄夢玉司馬顏其癖曰蒨舫漫題此調

湖山深窈處。醉青衫沈沈。淚痕無數。竹裏閒來。問種花心事。好春能駐。四壁香清。風影颺。一簾飛絮。第四橋邊。還續姜仙舊時題句。何事扁舟容與。儘玉手調羹。滑匙凝筍。深樹啼鶯。怕海棠開謝。夜寒燒炬。司馬近詞有海棠開謝也。又啼鶯句數點遙峯。又商略。黃昏微雨。倦旅他年。獨憶鱸鄉夢苦。

絳都春 梅雨用日湖漁唱譜

庭陰罨靄。把好春斷送。露恠煙憔。點滴未閒。夢雲依舊。惜飄搖。簾衣潤重鑪香裊。暮來還更瀟瀟。小窗幾日。殘英落盡。濃綠生條。何處凭高望遠。悵螺峯半隱。帶水空迢。呢語弄晴。衝泥歸燕。又新巢。吳歛淚。暗胭脂老。玉華愁漬紅綃。柳眉深鎖。斜陽夢斷四橋。

南鄉子 和人感舊二首

啞軋斷銀牀。井檻桐雲冑夕涼。憶得西風纔識面。微妝。樺燭屏風背影長。玉杵爛

玄霜。咫尺藍橋那易忘。早識塵緣渾未了。郎當。忍負秋波一鬢光。  
嘶騎漫悠悠。草綠湖南獨自愁。惆悵阮郎歸去日。孤舟。腸斷春風燕子樓。  
萬事付東流。瘞玉埋香一段秋。贏得鷓鴣聲裏怨。休休。不爲傷心也白頭。

瑞鶴仙 櫻桃

絳珠垂碧綫。訝香粉飄殘。一林紅豔。芳脣綻朱淺。問風流白傅。玉窗猶見。巾衫淚染。  
又野老筠籠遞款。早繁陰、催遍天涯。誤了禁林開宴。宮苑玲瓏珊影。錯落瑛盤。筍  
園新薦。雕鞍驟晚。衣袖底、露痕濺。悵流鶯無賴。輕黃偷澹。誰把襟塵替浣。奈當時、日  
午猗闌。翠屏夢遠。

又 枇杷

金鈴銜翠葆。認玉額初圓。蕊冠猶小。西園醉來少。漸梅黃落盡。櫻廚過了。風香露飽。  
想川路。時新送早。嬾相如、賦筆重拈。試問渴懷能療。閒惱。重門深閉。雪盡花初。那  
時情抱。春痕暗老。愁重理。四絃悄。判芳華又是。枝頭摘盡。依舊丸書未到。問何年、湖

上青山。蠡舟夢好。洞庭山出者佳。

浣溪沙 讀白石詞此調慨然有觸於予懷者

衰草寒沙路入雲。山陽歸櫂不堪尋。更無人採白湖菱。菰雨恨迷千驛夢。霜花愁憶十年燈。幾時斗酒爲招魂。明發見老姊斗酒爲招魂白石詩句

虞美人 用白石韻

祝融峯頂蒼厓石。天外人孤立。兜羅綿裏玉蓮花。花上露房雲矮不曾遮。高臺夜半星能摘。溼透穿雲屐。而今幽夢悵誰尋。點點雲花愁著夢中人。

霓裳中序第一

尋聲苦恨極。賦別江郎愁賺得。銷盡傷春氣力。奈嬾鬢漸彫。故衣偏索。筠簾翠隙。誤幾番天際歸客。寒窗底。穉歸啼老。夢月炤寒色。寥寂。藥鑪塵壁。篆一縷斜煙似織。襟痕難浣舊跡。又慘綠沈天。怨紅飛陌。晚來風雨息。盼遠景雲羅颺碧。纏綿意。那堪長對瘦影玉奩側。

湘月 洞庭瀟湘往來最熟讀白石詞依韻寫懷

洞庭青草。算南來北去。幾度風景。一點君山。最縹緲。忍得平生高興。篷底烹魚。船頭打鼓。暝入衣裳冷。飄然萬頃。玉壺光滿金鏡。一路九面看衡。湘雲楚水。蕩蕭蕭寒。野竹叢深。望不斷。多少江頭幽勝。抱樹猿啼。眠沙鷺起。冷落秋鴻信。扁舟仍在。舊時月色能省。

疏影 舟中用草窗韻

菰蒲亂葉。正四橋水滿。雙槳催發。病目揩餘。棹擊空明。愁見煙飛雲滅。閒時臥舫吹簫客。剩瘦影、花前寒蝶。怕鬢痕、蘸落濃青。一桁柳絲堪折。行盡東南佳勝。又平湖窈窕。千頃如雪。想得扁舟。散髮飄然。姚冶幾多風月。封侯未準身先老。但暗惱、雲衣重疊。問洞庭、結屋誰家。買斷玉峯幽絕。

一萼紅 盤門用草窗蓬萊閣韻

小篷幽。向寒闌晚泊。風雨暫時休。病翼蠲殘。旅情鷗老。到眼城闕悠悠。倚沙岸、誰家

楊柳替行人，聊繫木蘭舟。亂絮黏天，飛花捲地，頓惹清愁。誰向姑蘇臺畔，認烏啼花落，夢影南州。香徑雲封，劍池風黯，幾處明月高樓。奈賀老琴聲倦也，恁江山寥落，負清游。欲問吳娘舊曲，銷得沈憂。

玉漏遲 詠夜合花索子楨和

露痕侵曉簟。濃滋暗縷，麝薰微釀。籠碧枝頭，一搦雪膚偷展。半坼冰蓮樣小，又恰被、都梁香染。簾漫卷。芳情怕引，倚妝人倦。幾番院宇昏黃，泥枕畔新涼，素綃輕斂。水閣雲窗，曾記那回初見。微雨空堂醉醒，又落月、殘燈人遠。幽夢淺。愁吟病來，渾嬾。

金縷曲 立秋日雷雨後作

悵望秋來久。訝秋來、破空雷雨，晚檐偏驟。洗出明河光似練，影著簾衣疏透。漸幾點、螢燈穿牖。脰管高樓清歌夜，泥新涼，不放銀壺漏。誰爲我，拭金斗。小窗病枕牢相守。悵芳華，頓成憔悴。望秋蒲柳，長盼秋來蘇病骨，掛壁青萍疑繡。又卻是，秋來偏憊。閒數桐階清陰徧。莽西風，一葉先彫瘦。蟲語亂，恨鴛鴦。

又 子楨見示立秋之作亦用此調復次其韻

浙瀝微商轉。鎮黃昏、檐花落處。濺珠拋霰。換得西風來人世。一枕梨雲飄散。正的歷、明星斜漢。掛起銀鈎。梧桐梢月。盪紅樓、十二簾波展。雲影薄、夜深捲。庾郎未病先愁。嬾耐經年。衾紋篔角。素塵頻浣。露白葭蒼心猶在。問許筇枝秋健。便忍棄、焦琴紈扇。斟酌橋西風流地。近蒼苔、落葉生公院。攜榼去、玉尊滿。

西子妝

楊補凡簪花圖幀往年得之京師病餘檢視行篋猶未損覽漫題此

調

曲水潺湲。鳳臺蕭瑟。過眼流光如箭。曉妝人倚露華鮮。問娉婷、那時誰見。鸞綃自展。祇當日、眉痕全嬾。認徽容、感舊情如夢。思量都倦。芳懷斂。零落殘縑。拂拭輕塵掩。晚天疏雨。過簾櫳。掛西風、夕陽庭院。愁深夢淺。問抵得、桃花人面。剩淒迷、省識春風未遠。

倦尋芳

邵位西員外書來卻寄

晚秋天氣。羈旅心情。愁病誰遣。朔雁聲中。拋引舊情如綫。被西風吹斷也。蘆花蓼葉。汀洲遠。最無聊。是摧殘錦羽。夜寒霜岸。 驀迴首。東華春。燕桃李無言。九陌塵淺。彈指光陰。禁得水流雲散。人世歡場。須暫得。風流何況西園宴。問猶能待竹裏。夜燈重翦。

高陽臺 夢玉屬題褚氏冊子

紫曲門闌。桃花巷陌。芳蹤暗記眉樓。夢雨行雲。憐他花底親籌。郎官幾日游驄暇。儘匆匆。趙瑟秦謳。惱殘春。剗地東風。鶯燕都愁。 西臺痛哭人何在。枉金張舊籍。暗數清遊。衫袖郎當。不知舞錯伊州。沈沙折戟。渾閒事。鎖荒臺。玉貌疑休。剩迴文。一卷天花。小字銀鈎。

又 聞袁鑾身同年罷歸有作

綺陌尋花。銅街訪月。舊遊歡笑年年。燕舞鶯歌。春風浩蕩無邊。長生一曲傷心豔。又霓裳。破了驚絃。歎華清。幾日歡娛。愁說開元。 貂裘多少金龜客。正鷄鳴酒醒。帶笏

朝天。馬滑霜濃。香衢踏碎連錢。灞陵不放將軍夜。問封侯、那得前緣。算幾人、頭白天涯。此恨綿綿。

臺城路 吳門歲除

羅衾紙帳。慙慙底。天涯又逢除歲。臘意舒梅。春聲爆竹。芳思那堪憔悴。玉窗恨對。膽翠。腕青絲。劇憐香綺。惆悵年時。金盆盧筵夜深醉。襟痕幾許清淚。就槐安夢好。都是愁寄。薄宦倦游。中年沈疾。太覺寂寥情味。鄰雞未睡。問一枕殘鐘。忍能拋棄。市火星寒。曙鴉聲漸起。

露華 書子楨木蘭詩後用蘋洲漁笛譜

玉峯珮影。似霓裳舞困。雲護煙蟠。夢華膩管。孤吟漫倚瑤簪。寂寞後庭歌罷。歎蓬山、仙闕清寒。衣袂冷。東風幾樹。零落江南。閒尋畫堂深處。醉花底紅牙。猶溼青衫。錦筵易散。從教蝶趁蜂探。最是斷槎愁繫。問洞庭、風訊誰諳。春又晚。斜陽二十四闌。

瑣窗寒 春雪



璠樹攢苞。湘梅帶萼。峭寒猶凝。迴風帶雨。蕩出素瓊。纖影灑貂裘。冰紋旋消。者番忘卻。詩魂沁。問翠眉丹靨。後庭誰按。曲闌催暝。人靜。軒窗近。對一桁簾陰。絮痕吹冷。瑤華便好。那管露桃煙杏。怪春工、芳意自翻。嬌紅膩綠都未醒。漫匆匆、喚起梨雲。玉壺殘夢穩。

又 春雨

細草青回。遙峯黛掩。滿庭愁翳。柔絲蕩緩。惱亂栗留聲裏。護雲屏、輕籠篆煙。玉鑪溼透。沈香穗。漸綺窗人悄。一釭挑盡。夜燈紅蕊。芳事誰料理。奈露井宵寒。慣啼妝淚。朝眠穉柳。漸染帶顰新翠。倦東風、吹去又來。遠天漠漠。渾是水。算明朝、深巷人家。指賣花聲裏。

又 春寒

小閣雲深。重衾玉暝。曉窗殊戀。殘篝倦倚。贏得夢微香淺。步芳園、濃妝定稀。近來冷卻看花眼。料衝泥未忍。杏梁深處。並巢雙燕。池泮。冰漸亂。悄一點猩紅。露華偷展。

桐花暗老。那忍鳳翎棲嬾。奈晚來、宿酒漸消。鷓鴣又怯風似翦。憶錦袍、簾外人歸。把殿頭歌按。

又 春陰

斷雨憎寒。流颺怨暝。那知春老。欄杆怕倚。長是困眠昏曉。恨東風、蕭條似秋。暮天暗約行雲悄。正百花時節。小簾朱戶。夢迴清窈。閒惱。花枝小。算踏青期近。海棠過了。藏鴉細柳。門掩一庭芳草。又匆匆、城闕禁煙。故園寒食晴更少。待勾留、鏡裏朱顏。試探花年少。

高陽臺

閨人撮余枕上小詩成冊戲題時病方少閒也

錦字閒拋。玉臺頻檢。愁看彩筆痕蕪。象管銀箋。餘情猶撥鐺鑪。庾郎那復凌雲氣。恨蕭蕭、澀透寒竽。黯湘毫、幾度花時。夢底全枯。茂陵準擬成遺草。笑寒香一卷。能敵仙逋。未了塵緣。誰將金簡求書。樓中判走橫簫曲。甚臨邛、著得相如。辦青山、種秫生涯。何處衡廬。

滿江紅 寄內兄孟餘通守東河兼懷山陰陳翼子丈

郡郭蕭條。迴首處、小簾深竹。閒載酒、亂峯如繡。太行南麓。花雨晝攜東閣宴。茶煙夜  
翦西窗燭。悵幾年、鴻雁影參差。天南北。愁病裏、真銷肉。車馬外、猶羈足。歎故溪門  
掩。劇憐幽獨。行客那禁啼鳥喚。春醒未醒。垂楊綠。料黃塵、烏帽也。棲遲。河流曲。

龍山會 和夢玉兄遊靈巖訪畢氏園詞次韻

鏡裏雕蓬鬢。掛壁邛枝。不道江南恨。樓陰吹絮冷。青山外、聞說湖波天近。鴛響湖空  
廊。試會踏、宮花殘徑。耐消磨、顰蛾黛淺。數峯春盡。橋莊一樣風流。換了雲衣。猶被  
當時姓。鶯聲催夢醒。樽前意、休問林間誰隱。燈火話蒼涼。泛一舸、高懷須忍。漫重約、  
插花醉滿。帽檐欹影。

百字令 子楨奉檄雲間寄懷

江鄉春遠。話芳華、惟有林鶯知得。出谷聲聲遙應和。鎮日翠簾輕覓。小雨慳晴。斜陽  
妬暝。直恁多牽率。玉鉤輕下。晚來還又岑寂。聞道窈窕東巖。巫峯深處。猶有行雲

遊。仙侶停舟聊問訊。閒對檣竿風色。明月灣頭。桃花洞口。好是曾相識。陸郎無賴。卻尋黃耳消息。

祝英臺近

和稚香居士柘湖感遇之作

眼波渾眉暈。垂柳暗煙縷。鎮日閒眠。漠漠甚情緒。無端燕子歸來。雕檐昵語。又颺起。翠櫺輕絮。斷腸句。縹緲一片驚鴻。迎風屢迴顧。厭說相思。還是怨嬌嫵。也知人遠波空。恨他啼鳥。偏只道。不如歸去。

江城梅花引

題譚華盦詞卷

數聲琴筑思悠揚。是高陽。是河陽。驀憶看花韋曲。鬪紅妝。多少雨斜風。又細。春漸杳。舊歌聞。空斷腸。斷腸。斷腸。料難忘。檢瑤觴。新酒香。醉也醉也。醉不到。年少疏狂。剩得落英飛絮共淒涼。玉樹飄搖鶯夢懶。休說興。綺樓人。愁萬方。

鳳凰臺上憶吹簫

稚香偕舊荆溪尹黃君苴鄉攜酒樂招客假宴息園邀僕

出會猶病未能也小窗獨坐聞園中按歌聲戲拈此闕將呈諸子

小閣通晴。虛簾度暝。輕塵簌簌飛梁。想花園促坐。鏡曲傳觴。試問梁園賓客。桐絲引、  
會解升陽。閒欹枕。十年舊事。暗憶宮牆。悠揚。數聲水調。偏暮雨金城。猶隔吳娘。忍  
夢醒瑤闕。人散珠航。贏得茶煙禪榻。揚州恨、斷羽零商。乘鸞影。樓中幾時。怕老蕭郎。

琵琶仙

聽顧老竹菴琵琶。是日作霓裳羽衣秋江送別楚漢將軍令諸闕

雲外關河漫提起。舊日霓裳宮闕。偏是遼海琴心。山空鳥飛滅。迴撥處。江蘆浦荻。又  
聽到。別船嬌咽。暮地煙塵。連天鼓角。風雨推激。問何事。枯木寒絲。恨猶作沙場響  
金鐵。多少古今悲慨。付尋常風月。閒罷手。池亭自碧。笑長康。獨坐癡絕。喚醒竹裏幽  
眠。病來摩詰。

燭影搖紅

自題薰籠美人便面稚香夢玉同作

倦倚薰籠。料他彩被春情懶。爲誰孤坐。判深宵。祇覺雙蛾淺。暮憶闌干謝館。近清明、  
楊花滿院。紫簫吹黯。杏子枝頭。月痕如綫。繡鴨重溫。十年舊事和天遠。丹青贏得  
幾回看。不似春風面。底事藤陰夢短。惱相思。愁紅也變。玉紈金篋。枉自秋來。淚珠凝

點。

高陽臺 七月十三日作丁戊之間臥病越城是日鄉中迎賽朱太守祠最盛

俗傳爲漢太守朱翁子也昔日石道人作越中神曲獨未及此故詞及之

覆水缸頭樵風涇畔。兩年愁臥西風。落日荒祠聽殘儺鼓。蓼蓼十年遲我懷中綬。恨消磨、兒女英雄。剩桐鄉、報賽年年。猶說鄰翁。神絃待補家山曲。笑行歌浪跡重滯。吳東寂寞。皋橋空聞夜雨。鳴春微生一病都成嬾。畏新來、瘦骨支筇。最逍遙、社酒寒燈。惟有龐公。

醉蓬萊 山塘泛舟

拂斜簪塵滿。綠玉新扶。畫橈輕放。勝約頻番。試冶橋芳港。洗眼雲嵐。西風吹醒。問夕陽無恙。瘦塔含煙。殘蟬訴暝。漸驚蕭爽。羅綺叢邊。管絃聲裏。似我重來。夢華凝想。十里迴塘。又夜燈齊上。幾處高樓。幾回明月。付幾人閒悵。長記歸舟。水光蟾影。燕泥

門巷。

一萼紅 夢玉兄將有都下之行載酒出遊歸自錫山出示此調洵是江南斷腸句也繼聲同韻兼呈稚香

綺窗閒。正搖花雙玉。歸袖未香闌。宿雨關河。扁舟琴鶴。誰識猿臂輕鞍。定何處、烏絲醉墨。移翠燭、看了又重看。鸚鵡衣單。蟾蜍珮冷。愁說龍山。聞道離歌將唱。趁畫樓明月。綠酒紅衫。杜牧重來。蕭娘應待。祇恐風雪清寒。最寥落、梅邊夜笛。又馬蹄催我向長安。寄語燕歌舊侶。休負花前。

長亭怨慢 同龔海牀夜飲江上

黯前度、扁舟東下。憶經年、翠樽重把。小舫商琶。故衫殘粉、又清夜。玉山摧也。聽亂雨疏篷打。一醉儘無聊。算抵得、巴山閒話。休訝。十年燕市裏。嬾說杜郎聲價。荆高勝侶。定多少。五陵衣馬。算幾日、載酒江湖。祇薄倖、青樓名掛。笑眼底餘春。猶有數枝紅姹。

又 惠山別子楨

恨牢落。石尤輕絆。惟有多情。故人猶戀。倦旅殊鄉。阻風中酒。事何限。泉香酒醞。問底事。金杯淺。樓閣指仙山。又縹緲。路迴峯轉。悵遠。好雲窗霧閣。賺得玉池清。燕。東方醉也。任滄海。揚塵都遍。望不極。莽蒼關河。總依舊。伯勞飛燕。到紫陌重逢。愁說楊枝清怨。

八聲甘州 吳門登舟何君伯凝遺一劍子楨送瓶菊贈行適夢玉兄寄京口詞卽次其韻

掛雲帆。歲晚愧江湖。重檢故衫痕。但鬢怯新霜。情依舊。雨慘結臨分。萬里湖船閒泊。客裏送青春。寂寞荒池畔。多少羈魂。載得江南秋色。待黃金裝匣。碧玉簪巾。奈天涯。涯羽檄。風雨昨宵聞。時聞粵警怕鄉園。塵飛五畝。倚崆峒。何日息雙輪。纏綿意。踏歌聲遠。落葉關門。

拜星月慢 北來行汝上假秣寒墟間適夢玉兄自都下南歸相值逆旅中遽爾別去殘臘抵京忽忽一月餘矣玉兄抵吳中郵遞此詞不勝繾綣之懷次



韻奉答

邸舍凝暝。朝衫驟暖。畫省餘香頻爇。冷月荒藤。過燒燈時節。時余僦居廠廟西街漁洋山人藤花故屋恨一紙撩起。江南舊怨底事。夢底揚州輕撇。寄得梅花。問春風能說。記村廬。草草雙鞍歇。拂塵箋冷。訝燕郊雪。一霎門外天涯。想白雲高格。悵西園。獨與青山別。花風外。騎鶴歸仙闕。料夜深。畫燭窗閒。有愁心千疊。

點絳脣 燈下讀張海門同年夢鴛碎語黯然有作

綺陌花時。軟紅重踏。鞭絲緩。與君吟斷。鬢影今生短。憑仗東風。吹得春魂轉。缸花颭。一簾青滿。其覺芳春遠。

菩薩蠻 滎澤渡河出都門遠千里憶自丙午春正渡柳堰時於今五年矣

河聲捲入東風疾。津亭楊柳千絲碧。相見幾多時。少年輕別離。柳花還似雪。此度傷心別。愁上白雲槎。征人先憶家。

浪淘沙 題家書後

秋氣驟生潮。雨虐風饕。晚來寒意特蕭騷。何況蠻雲天似墨。殷地蘆簫。獨自檢征袍。衣帶量消。金錢休卜可憐宵。一樣飛鴻期不到。夢也無聊。

清平樂 桂林七夕

羅幃夢底。有個人同倚。夜色天街涼似水。芳草碧雲千里。軍門樺燭清秋。關山猿鳥新愁。底事浮槎遠別。勝他枉渚牽牛。

菩薩蠻 湖上夜歸

玉驄繫在垂楊樹。綠窗坐對紅燈語。纔欲展雙眉。風流合自持。霜街愁馬滑。虎帳圍金甲。歸去臥秋風。相思咫尺同。

攤破浣溪沙

秋雨秋風塞草新。亂峯秋色暮連營。滿地蘆笳吹欲徧。不堪聽。雕羽夜鳴還在鞞。錦條霜重未離鷹。何日沙場真獵得。海東青。

瑞鷓鴣 過茶亭堡

那日蕭郎獨去時。一春新雨發棠梨。河山渺渺人空返。生死悠悠路豈知。眼底浮雲成過客。天涯落日望歸期。休言駟馬憐行道。嫁女征夫只別離。

鷓鴣天

陽朔舟中重九憶去年此日自吳門舟達武林又十四年前與亡友

彭子穆同舟過此不勝今昔之懷

小別江鄉恨玉卮。去年曾負菊花期。那堪萬里鳴鉦路。又到千山落木時。人去遠。鶴歸遲。碧蓮城郭是耶非。壽陽峯底今宵月。惟有寒光照鐵衣。

相見歡

陳子珍孝廉歸自秦中過桂林肩輿見訪陽朔軍次猶記戊申歲莫

臥病越城子珍過杭聞之拏舟來視三年重見情見乎詞

少年騎馬青樓醉。同遊贏得十年殘夢在揚州。垂死別。迎寒節。越溪頭。長記隔江爲我放輕舟。

城頭一角秋營話。宵深不道相逢猶是夢中身。嶺畔缺。梅花月。伴三星。歸向君王何處覓卿卿。

浪淘沙 夢玉詞人吳中萬里來賦從戎霜天持令將越紫荆山寨而行殊自

壯也

小築對靈巖。日日遊驂。扁舟來泊嶺雲邊。犵鳥獐花秋色裏。回首江南。羽檄走諸蠻。匹馬閒關。黃沙白骨有荒煙。醉入千山藤峽暮。何處飛鳶。

長亭怨 盼家書作

黯一片亂山斜照。過盡征鴻。數聲雲杪。急景蒼黃。遠書珍重。幾時到。歲華殘了。漸瘦減當時抱。翠袖倚天寒。向日暮。賣珠能療。堪笑對蓬蘆抱膝。慷慨幾番吟嘯。醉來磨盾。漫幾日。鬢青催老。算猶有。射虎英名。問雪裏歸期能早。恨無賴。西風吹雨。嫵姚塵纛。

金縷曲 陽朔宜梅世罕知者日出步山家籬落間一株始作花也病腳數旬

甫起而花盡矣春來逝將去此慨然有作

倦眼揩如醉。驀相逢。碧蓮村落。縞衣仙袂。不道江城雲似墨。猶有衝寒山意。放幾度。

桃花雲鬢。纔向百花頭上著。慰天涯。多少相思淚。且莫問。調羹事。愁邊枉折新豐臂。最無聊。金槍學裏。瘦筇難倚。眼底鉛華輕一瞬。瞞卻東風人世。只我與東君憔悴。求馬心情還惜別。算玉關。何日逢歸騎。歌此曲。問雙翠。

清平樂 小除日過馬嶺

奇峯萬旆。擁出貔貅隊。一片青山橫淺黛。人到莫耶關外。金門臘鼓鼕鼕。玉荷愁對花紅。欲問天涯歸騎。畫旗搖曳東風。

臺城路 荔江行館歲除小病幸蘇虛谷梁德如兩君皆在慰征夫勞瘁也

平泉公子傷心路。東風草芽新怒。羽檄頻飛。駟車空駕。那有獻花嬌嫵。天涯歲暮。恨病癩相如。渴懷新瘉。點燭深帷。夜寒清角奈何許。春來斷鴻歸處。只鴛鴦井畔。石鱗如故。萬里旌旂。十年書劍。贏得袴衣塵土。故人自許。對慷慨尊前。刃光丸雨。猶幸相逢。與君饒吹譜。德如月前寓書陽朔有刃光丸雨之句

瑞鶴仙 夜過德如所居姚氏樓作

小樓深夜雨。對茗鼎香鑪。暫拋塵土。相逢問何許。數舊情空記。斷歌零舞。錦鞍繡袴。恨怱怱。玉顏非故。聽紉如。戍鼓聲中能幾歲華如羽。休誤。牙旌畫捲。鐵甲宵征。捷書先赴。危欄試撫。雲黯黯。混江浦。問前軍可有。一池鵝雁。咫尺天山飛度。待朝來。北渚鴻歸。數行寄與。

又 聞雁再拈前韻

短篷江上雨。記那日菰蒲。繫情鄉土。羈懷亂如許。又荒雞伴夜。劍花愁舞。輕裝短袴。想萬里。雲羅猶故。怕淒涼。滿目沙蟲。驚入碧窗歸羽。疑誤。牆深薜荔。水漫芙蓉。錦緘能赴。桐絲恨撫。人渺渺。斷洲浦。問銜蘆幾箇。玉關歸去。眼底上林春度。忍驚回。夢蝶寒莊。夜闌訴與。

又 榻谷題畫梅花句云夢入羅浮杳靄間。縞衣仙珮影珊珊。兩山風雨迷歸

路。拚與梅花度歲寒。殆有寓也。戲疊前韻寫此詩意。詞中故人謂亡友龔孝

先二十年前客遊於此者也。

淚珠花上雨。話舊日揚州。故人黃土。花前最心許。又羅浮夢底。雪衣嬌舞。冰紈玉袴。惱師雄、酒鑪傷故。醉東風、珮影珊珊。零落翠禽霜羽。休誤。鴛鴦石畔。翡翠檐深。夢魂輕赴。鄰箏暗撫。春水綠。又南浦。料幾番東閣。逡巡索遍。儘把歲寒同度。待何時、笑乞君王。兩山賜與。

惜餘春慢 二月十五日清明行荔浦道中作

舊壘荒餘。新村燹後。拂面輕颺寒峭。山花嬾豔。澗草憐幽。試問東君曾曉。迴首星幕森沈。風雨夜來。夢魂驚覺。恁蕭蕭數騎。天涯顛顛。幾時歸好。誰知又、楊柳攀餘刺。桐開徧。宮燭禁煙分早。二分蕭瑟。百六淒涼。一半青春過了。遙憶畫堂炷香。流入淚痕。蕭關能到。恨紅羊無賴。今夕碧燐多少。

漁家傲 范希文軍中嘗作此調永安城外布屋夜寒絕似在矮屋中光景書

此排悶書生寒態詎能萬一窮塞主耶

濁酒微斟歸夢淺。圍棋一局文三變。醉倚軍符堆葉亂。風幕捲。寒星短炬飄紅燄。

宛似風檐操寸管。廿年前事。曹騰倦。一樣泥金人盼遠。春又晚。歸期枉說櫻桃宴。

金縷曲 重至壽陽山下

畏見春山笑。甚重來、碧城惟有漫天芳草。可惜軍門元夕宴。幾度玉樽空倒。又一枕、烏啼春曉。滿地落紅飛蜀魄。怕天陰、雨溼頻呼嘯。雲外影。度飛鳥。緋衣坦腹人空老。忍思量、玉門無恙。錦鞍歸好。惆悵風前聞唳鶴。腸斷秭歸春杳。算猶有、丸書題報。擔酒牽羊何日事。歎勞人、寂寞關山道。拚一醉。醉江島。

摸魚兒

發桂林別虛谷子石作憶自丙午假歸失一故人龔孝先此行又失子穆兩君皆有南州徐孺子風感慨係之矣

耐無聊。笑人猿鶴。玉驄何事來去。匆匆訪里尋鄰後。啼到流鶯四五。風送雨。漫記得。狐鳴篝火當時路。故人恨。算陌上銅駝。草間猶在。寂寞伴坏土。門前柳。栗里人煙佳處。異時相約衡宇。浣花茆屋依然在。猶賴軍門嚴武。花外路。任滿地。蛩螿秋色。寒煙語。長鑱最苦。只西燕東勞。子規聲裏。脈脈愴情緒。



又別樹湖作

倚雕闌。平湖激豔。明宵相憶何處。湖波一霎。雙雙影。還被浣紗人妒。風又雨。問那夕。驚魂睡穩。鴛衾否。後期謾語。祇翠扇香留。羅巾淚漬。都入斷腸句。重來恨。眼底楊花倦舞。一鞭翻惹愁絮。可堪戎馬關山客。來對綺窗朱戶。沙岸路。被幾度。流鶯喚得青驄駐。錦城去去。記楊柳梢頭。出門殘月。相送玉階步。

清平樂

雨出桂林郭。門軍門向老病中。遣一裨牙持柬送行。慨然有作。

夜來微雨。陌上如龍去。緩策平明成獨旅。腸斷楚山歸處。寒山猶有青林。蕭條倦馬微吟。爲語洛陽親友。玉壺一片冰心。

瑞鶴仙

鶴老人好。擘窠書偶成。飛白鵝字見貽。比從星沙言別。至鹿角泊舟。

檢篋得之賦。此自嘲。蓋相從粵楚崎嶇。忽已兩年矣。用舊詞韻。

晚涼殘照影。問泛浦眠沙。幾番霜信。芳筵翠樽冷。甚嬌黃愁掩。墨雲成陣。花翻絮隕。笑淮池。天寒未忍。悵離離。綻羽雕翎。任爾玉纖能整。迴付。灕山夜火。嶽麓秋煙。那

堪愁泳。江天暮景。羞鴛侶。雁程永。算年來。攜得山陰道上。不負斷毫呵盾。問誰家。燕  
領飛來。封侯夢準。

金瓊子 秋茗

繡幄塵清。藥鼎煙消。睡餘無力。坐悶雨長廊。文園恨。依舊病來蕭瑟。泛瓊古。銚清泉。  
有仙風盈腋。閒階煮殘葉。一甌珠露。晚涼邀客。粉擘舊奩拆。記春火。勻焙遠渚白。  
沈沈玉缸醉擲。夜醒處。惱亂瘦粲繁蟀。霜氣暗漬雲腴。破孤眠岑寂。歸裝晚。桑苧翠  
緘。雲鴻休隔。

粉蝶兒慢 秋蛾

網脫蛛糊。衣偷蝶褪。底事簾陰撲遍。玉銷兼粉瘦。又金風淒黯。夢影迷離繡。停針試  
剔銀荷花顫。夜蟾低。向碧紗。奈早香塵棲暗。繾綣釵兒鬪。嬾。誤輕盈。幾箇眉痕愁  
斂。野蟲青對死。問涼絲抽斷。漫想嬉遊元夕鬧。到處錦筵飛轉。忍伶俜。對霜華。一窩  
紅燄。

聲聲慢 荷花生日小集寓齋次錢萍江同年韻

蝸邊樹老。竹裏門深。天街一雨新涼。翠葉金枝。沾酒試滌凝妝。峇嶢華峯天半。許人間、蝶趁蜂忙。閒笑我有。筩杯一尺。輕酌銀漿。寂寞芙蓉巷陌。怕西風、吹水容易秋房。玉貌相如。珍重傅粉年光。華嚴大千世界。忍紅衾、醉擁春長。待夢醒、問蓬山、能醉幾場。

金縷曲 送顧子山同年出守郢中

繭栗梢頭雨。正匆匆、餞春時節。東風如虎。有客陽關催疊唱。別我一麾西去。奈柳色、今年非故。黃鶴磯頭梅花弄。莽旌旗、亂捲蚩尤霧。雲黯黯、落江滸。拂衣醉起花枝舞。笑書生、探囊猶有。驚天奇句。上馬提戈能殺賊。下馬能書露布。待萬里、雪山飛度。何況飄零風中籜。好金鏡、細琢紅箋譜。歸教與、秦娘嫵。

百字令 直廬對雨

閣門晝靜。漸水雲斜罨。午蜩噤樹。浙浙騷騷還颯颯。一霎涼颼吹雨。柳外鐘沈。槐邊

天暗。苒苒金莖暮。西風無賴。驚人愁鬢如許。卻憶紫陌城南。老傭閒睡。足爲花起舞。我亦身閒官事了。一榻小窗慵度。翠管香寒。玉箏塵澀。寂寞樊川句。青春髀鳩。幾人叱犢村隴。

臺城路 題陶島香侍郎丈紅豆樹館詞

湖山金粉消魂地。瑤情可憐芳樹。璠實緘愁。花身凝豔。贏得相思如許。琴絃慢撫。問垂柳門前。舊家庭宇。芳草年年。江南猶有斷腸句。紅牙幾人暗譜。料重來上國。綺筵非故。寶馬文珂。青春素髮。逝水東風無數。勝流似雨。訪零落貞元。那時宮羽。猶幸相逢。一樽同笑語。

水龍吟 金梁夢月詞人寄示鴻雪詞鈔意極珍重因錄瘦春詞草卻寄媵以

此調金梁詞殆張伯羽後一人而已

素琴絃上秋風斷。無人處尋煙語。鈞天何在。銷沈片玉。幾人閒譜。冰雪天寒。雁鴻聲緊。斷腸愁句。正金門歸晚。雲箋飛下。遙空色黯如許。猶憶鸞驂導客。對山城戟門。

花午。錦袍明月。清尊華燭。替傳騷楚。多病相如。天涯老矣。茂陵秋雨。趁蘋洲無恙。春來玉笛。聽相思度。

瑞鶴仙 題梅神館集

雪花吹絮影。錯當時便猜。謝庭高韻。吳江怕楓冷。又平沙漁火。幾多幽勝。新篇似錦。抵多少。玉臺香茗。好風流。人似秦嘉。朱戶綠窗同詠。閒靚。宣文講幄。紛悅朝來。珮聲低問。鷗波自永。迴首處。惜萊隱。料重逢此度。文鴛祕笥。定有龍韜蛇陣。笑春來。澹月良宵。詩懷漫省。

探春慢 拱辰樓作

斷碧三間。輕紅一角。朝暉暮靄頻曳。玉鏡平臨。金門斜直。人道五雲天際。窈窕西山色。憶曾鬪。仙蛾濃睡。而今不似當時。小窗孤擁愁髻。欲問虹橋甚事。換妒雨煙昏。七峯零翠。人影闌干。歌塵簾隙。飛鳥也知含睇。試極東南望。便錦字。瑤函空寄。灞岸歸來。淩雲蕭瑟還倚。

長亭怨慢 寒夜水芝仙館小飲戲拈

問何事，酒痕襟澹。灞岸歸來，故衫重澣。金地瓊筵，商歌零羽，幾時換。朔風淒撼，屏背  
隱，燭花短。一醉破愁慳。繫門外，五花霜糝。銷黯。又咸陽市裏，殘夜博盧人散。金鼇  
背穩，驀鄰笛，一聲腸斷。恁聯翩，駿馬貂裘，祇錯聽，玉人羌管。看並羽雕梁，許約青春  
閒伴。

金縷曲 勒少仲同年出守南邕京師人海同調甚稀子山萍梗而外獨少仲

最沈潛其深美者將與海門比肩過從未幾忽復外轉臨岐悵惘情見乎詞  
百萬長安市。怪相逢、十年蹤跡，斷歌零徵。綺陌穠花青瑣月，同是秋江鴻戲。問幾個、  
元龍豪氣。湖海英雄兒女淚，黯青衫，各有傷心事。歌幾曲，慢聲寄。劍鏗山色吾鄉  
里。莽煙塵，看君五馬，嫖姚馳騎。詞筆春風都漸老，好拭劍華秋水。要補勒，珠厓奇字。  
待我軍門歸揖客，是順陽，開府驂鸞地。疏影弄，一塵倚。

多事遼西夢未成。萬年枝上打黃鶯。禁煙時節是清明。  
愁惹斷鴻過遠塞。悶看新火變寒林。錯將玉玦付卿卿。  
稽首慈雲大士前。西風紫竹化輕煙。人生何處火中蓮。  
精衛石銜空赴海。魯陽戈撥怎迴天。傷心初見是當年。  
浩蕩軍容出塞時。君家兄弟好男兒。雜花春甸走龍旂。  
翡翠簾閒吟別字。枇杷花底算歸期。灞橋楊柳亂如絲。  
誰爲緘情委逝波。愁心一夜漲江沱。江南江北恨如何。  
無計九書題白雁。幾回觥酒換紅螺。黃金拋盡得愁多。  
曾見瑤池會上來。玉顏青鳥總疑猜。綠窗朱戶似蓬萊。  
迴首嬌嬈還半面。驚心歡喜是盈懷。十年前事劫餘灰。  
一局彈棋屢變遷。郎君風致最翩翩。搔頭傅粉對邯鄲。  
驪裏春蠶迎賽鼓。襪襪晚鶴載歸船。不應遺恨失金鈿。

剗地酸風亂落花。青煙白骨漫天涯。碧桃花裏住兒家。  
一葉估帆天際遠。數行官旆水濱斜。浮梁小別又綱茶。

昨日東風今日雨。海棠開謝又荼蘼。子規啼了鷓鴣啼。  
漠漠江城遮望眼。離離煙

市雜征蹄。關山牢落厭金鞮。  
秋老木犀飛暗雨。夜昏銀

怕聽鶻聲度畫橋。垂楊垂柳一千條。水風吹面最魂消。  
漢落驚潮。烏衣門巷月兒高。

猶有蕭晨唄語親。梵王高掌執金輪。瓣香虔爇禱羣真。  
海月尙懸珠有淚。花天曾

踏玉無塵。幾時相見證蘭因。

夜夜青檠綴玉蟲。珍珠如露月如弓。夢回憔悴感秋蓬。  
鈿合金釵長寂寞。唾華瓊

字轉朦朧。秋江開遍碧芙蓉。

消息寒梅問綺窗。新詞年少屬何郎。誰知東閣易斜陽。  
聽水聽風愁驛路。飛花飛

絮滿江鄉。華年禁得幾迴腸。



催雪 壽陽師命題借園寒趣圖卷

五畝行來。三徑自開。鄰樹綠楊疏倚。問晚景黃花。過時能記。喚醒觚稜夢早。又暖日東窗烘猶醉。雲衣一片。茆龍換著。雀羅門第。愁寄恨無地。剩錦字題鴻。玉漿斟蠟。歎故國梅花。歲寒如此。還倚調羹素手。待挽得東風來人世。好去訪。芋火寒山。添個嬾殘圖裏。

暗香 灤陽歲晚行眺酒仙祠下有作

亂峯翠匝。笑幾人潦倒。相逢攜鉢。霰影四遮。雪窖冰廬氣蕭颯。便擬沙場醉臥。渾忘卻。東風鳴甲。甚歲晚。絕塞人家。簫鼓也迎臘。閒踏馬蹄怯。歎去國路遙。夜月殘闔。玉簫恨擻。迴首中原黯如霧。多少飛蓬淚眊。待準備。花時蠻榼。怕恁日。春去也。綠陰夢壓。

疏影

江樓跨鶴。算那回草草。揮手雲壑。會記花時。宋玉牆東。春來好景如昨。湖山金粉都

拋盡漫記憶。江南江北。好重尋。墩墅風流。剩有舊時屏箔。誰念長楊往事。關河幾  
萬里。天淨塵幕。流水匆匆。四十華年。慘澹瓊犀簾角。窮荒蛤贏樽前在。倩玉手、駝酥  
更酌。判雁飛、不到天涯。祇是夕陽紅薄。

念奴嬌

京廬病起爲陳抱潛題姬人馬繪寒檠侍藥圖

茂陵憔悴。漫藥奩。誰檢飛龍骨出。關塞秋風爲客意。併作劉郎蕭槭。翠管書方。玉甌  
量水。衫袖瓊華積。江沱人健。問郎何事修得。我亦腰瘦東陽。帶圍渾減盡。鳳樓孤  
側。風柳無端零落恨。愁向永豐坊陌。微雨蘇端。閒雲杜牧。往事還相憶。弱弓輕彈。看  
君精悍猶昔。

金縷曲

辛酉七夕與陳蘭谷大令話別密雲官舍並調縣齋主人

自別龍城柳。卅年間、荷衣竹馬。那堪回首。同學爲郎多不賤。難得西風持酒。驀簾外、  
塞山青透。休復天涯零落恨。老鄉園、燐碧隨風久。烏帽影、耐相守。關門笑我輪蹄  
又。枉經番、烽懸滄海。自憐身手。京陌緇塵猶識面。爲問容顏如舊。祇愁對、洛陽親友。

銀燭畫屏明夕宴。判與君、勞燕俱傷憊。歸調與、四絃婦。

滿江紅 重經古北口

極北層陰。荒徼外、萬峯如簇。盤馬處、千迴百折。到門一束。雁翅城開山勢遠。羊腸路繞河流曲。正西風、浩蕩及關來。殘碣綠。愁拊髀。翻消肉。思昂首。徒蒿目。任秦亭漢障。笑人錄錄。破廟虛迎無敵將。沈沙錯認長平鏃。爲書生、邊塞要新詞。勞驚服。

百字令 灤橋

萬峯如繡。怪白狼河外、天幕重展。一折黃流濺浪處。誰識山川平遠。馬踏層冰。舟橫斷葦。我已津梁倦。鼉身飛跨。一鞭又刷霜岸。猶是舊日王庭。荔陽檀石後。幾回龍戰。東澗西瀍。曾作室。來往神州冠弁。照影思渾。濯纓疑濁。極目羲輪轉。浮蹤何事。百年愁憶鄉縣。

浪淘沙

客臘酒仙祠。下曾有暗香疏影之作。今秋再至灤陽行館。適當其麓。病弗克登。復拈此調。不自知其詞之悲也。

荷鍤記前遊。雪滿林邱。一聲長嘯碧雲頭。真箇天涯歸未得。何地理憂。萬事付東流。車馬悠悠。醉魂容易塞垣收。怕向山樓重極目。兩黛新愁。

雙荷葉

傷心別。銀笙弄斷秋霄月。秋霄月。緱山會照。玉鸞煙滅。機中錦字芳塵斲。瑤情自  
捻青珊瑚。青珊瑚。秦川緘恨。那堪重疊。

聲聲慢 松濤

瑤宮露冷。畫棟煙悽。靈濤一片驚聞。晚雨吟風。何處暗攝胥魂。中峯舊時鸞鳳。待重  
來。咽斷黃昏。似逝水付并刀快翦。那覓愁痕。迴首十年前事。看扶桑日出。膏沐青  
原。翠鬣霜彫。憔悴夢底行雲。瑤峯幾人跨鶴。負秋期。月落崑崙。華表處。怕歸來。清唳  
夜分。

又 秋聲

頽垣叫蟀。亂螿啼螢。朝朝暮暮堪憐。晚日秋花。疏影暗約愁邊。西風塞垣草短。恨驕

嘶。駿馬空韉。問夢底。有胡笳一曲。澹月初筵。獨向高樓百尺。聽遼空。雁語欲斷。還連窗竹。鳴秋何事。二女悽然。庭鳥夜寒未睡。忍危柯。抱月雛眠。歸去引。拂瑤琴。知在那絃。

又 行館小病

提鈴弔月。疊鼓催霜。涼宵短夢難憑。紫塞秋來。惆悵病骨先驚。華年鬢青瘦損。澹相知。惟有孤燈。問照我。徧天涯。賺得往事何成。細數風流舊恨。祇琅函。遞與燕雁飄零。布屋蕭然。何限夜雨荒程。相如茂陵倦也。薦長楊。底用空名。消夜永。待烏啼。猶自未明。

齊天樂 爲人題八駿圖

海山天外神仙路。迢迢玉鞭輕指。隅目青熒。肉鬣塊磊。駿尾朔風捎起。房精漫擬。只一鏡清波。渥洼飛水。萬里西遊。六龍誰挽翠華逝。憂來空歎撫髀也。羣空冀北。流盼生喜。九折羊腸。十年汗血。都付駑駘鞭弭。清高顧視。奈伏櫪悲鳴。壯心難已。會見

瑤池。東方寒貝齒。

水龍吟 行館游龍兩株秋來作花楚楚可憐爲拈此調

問花何事傷心。怨紅迸落珍珠淚。離披蕊葉。淒迷風露。錦筵宜醉。二美明妝。九疑橫黛。不堪愁寄。是湘靈遺魄。幾時化作。窮塞落雲仙珮。憔悴金門玉砌。掩荒寒。一階秋旒。涼蟪怪蟀。亂蛩殘蝶。惱人心碎。恨煞斜陽。黃昏幾陣。黯隨流水。好素娥青女。簾前並影。照銜煙穗。

百字令 雨中過青石梁

亂峯屏列。過金城玉塞。天設重限。石磴盤盤。天半路。飛鳥也應愁眇。斷石橫蹊。崩崖夾道。滑澆青泥坂。關山如此。浪遊何事乘桴。一笑暑雨祁寒。我來頻繭足。歸馬先倦。細草寒花。秋雨急。蹋石又鳴秋澗。絕頂天低。大荒雲塞。矯首蒼梧遠。解鞍地底。天門落日愁晚。

高陽臺 悼海門

窗雨談詩。林風命酒。年時蚴蟻雲龍。一別銅駝。十年誰伴孤蹤。隨陽幾度南湘雁。問征輶。何處相逢。又怎知。反旄歸艗。夢冷吳東。玉堂修史人空老。看五陵衣馬。誰氏雍容。賦就長楊。西華駱馬龍鍾。文章羈旅成何用。病相如。枉說臨邛。錦鯨詞。欲爲招魂。倚曲愁工。

又 悼萍缸

東閣評花。西溪問雨。俊遊人正華年。玉貌清郎。誰知香案神仙。東風第一螭頭筆。月鉤斜。勅使頻宣。恨匆匆。一闕皇華。跨鶴誰邊。攬旌曼舞。天長醉。倚明燈似雪。濁酒如泉。酩酊宮袍。飛紅欲繡平原。人間多少傷心事。記留髡。夢語惺然。祇從來。兒女英雄。若個華顛。

蝶戀花 二調

門外垂楊霜後縷。踠地柔條。繫得斜陽住。料峭黃昏風又雨。淒涼幾箇拳鴉樹。玉笛聲中秋思苦。馬勒青絲。祇在雲山處。癡絕盈盈樓上女。樓高可見天涯路。

十里沙隄風景暮。缺月東南。黯黯雲峯吐。誰倚紅牆窗待曙。明星的的爬沙路。蒼莽關河還急羽。愁著征衫。夜夜閒砧杵。環珮風尖吹細語。被風裙帶愁沾露。

摸魚兒 夜宿孫河距都門僅卅餘里展轉更闌不能成寐賦此調未成而林

鴉已起矣

莽浮生、百年錄錄。何人不歎駒影。秦顛越蹶當時事。成敗總須天定。歸騎引。恨望裏、金明尚隔桑榆景。閒情漫省。甚野店寒篝。村林片月。竟夕自孤醒。東華陌。廿載朝衫一領。羸驂短策塵冷。白頭祇有鴻妻在。何處青山堪隱。霜夜永。嗟漸老。年華似水。禁孱病。殘魂夢哽。待重整歸裝。倭遲僕馬。咫尺竹間徑。

青山溼遍 辛酉八月歸自灤陽適遘施淑人喪曩見納蘭容若此調嘗爲金

梁外史所譜竊亦效顰不知兩君情況視我何如也

菱花破也。依然噩夢。潦草霜晨。不道西風倦羽。驀歸來。並影鸞分。感黔婁。身世總難論。祇青山。有約偕歸處。待白頭。長對如賓。禁得孤生暮景。重傷弱草輕塵。癡絕石



麟空禱。靈萱佩影。愁帶三春。那識江潭搖落。又淒涼。殢萼含蕢。賃東華。百故恨長貧。算從頭。十六年間事。到今宵。一一悽神。斷送瑤華倩影。支離未了殘魂。

酒泉子 二調

恨也如何。直到淚枯腸斷。研銀箋。裁錦段。獨絃歌。世間能得浮生幾。情味愁夢底。待歸艫。還匹騎。臥煙蘿。傅粉搔頭。愁對大家巾履。戲明珠。拾翠羽。恨悠悠。山麋野鶴孤情性。鏡裏還隻影。強羈棲。時破晒。祇宜休。

瑣窗寒

瘦骨筇支。酸腸酒入。夢回孤付。勞薪未已。依舊露朝煙暝。驀歸來。空牀簟鋪。玉山篆滅。盤荷凝。到夜闌猶是一星殘月。佩聲誰問。愁詠相憐並。記恤緯天寒。典衣宵冷。離絃乍合。那識素琴摧軫。斷蕭條。蒙莊夢稀。紫紅那覓香絮影。恨無聊。重檢衫痕。強將清淚忍。

青玉案

人生賃廡居何易。又幾度、天長醉。最是酸風聞鶴唳。一天飛絮，粟留聲裏。誰與扁舟  
艤。羅陰老屋清如水。緋佩空霑淚痕紫。爨珠人去矣。花翻紅藥，螭頭春旆。獨  
自憐匏繫。

曲遊春 獨詣長椿寺作

紺宇春歸早。漸闌黎鐘罷。流梵初歇。玉座青蓮。閱滄桑多少。煙生雲滅。門外花風掣。  
過冉冉、香車油翠。對清寒、翠堵無言。唯有糝金塵甃。孤咽。愁庚怨鵲。是空際離魂。  
枝上啼血。一卷金經。慘當時教誦。繡籠衣雪。泛盞泉華潔。又灑著、野棠花發。曾是倩  
影瑤階。圓山萬疊。

玉京秋 七夕月色劇佳感而有作

秋幾日。西風頓驚爽。半規斜出。碧空乍洗。銀雲偏寂。長憶愁娥素影。照雙星、應爲良  
夕。橋陰直。絳河閒訊。彩鸞歸得。枉事天錢營籍。舊情在、重尋片石。一葉涼颼。三生

零露流光催急。斷鼻橫參。恨只恨。添入銅龍殘滴。倦棲翼。休問誰家怨笛。

玉蝴蝶 將移永光寺街屋

寂寞餞春歸了。天涯行腳，何處吾家。三宿桑陰，彈指十載京華。恨牽蘿、天寒倚竹。愁弄玉、月冷鳴笳。惱庭花。依然開謝，雨細風斜。停車。流鶯勸客，匆匆袂被，且住爲佳。澹月疏筠，可憐人影在窗紗。洞房秋，空遺蕙早，仙徑晚，嬾覓胡麻。耐消他。隔牆鐘鼓，朝暮閒搗。

卜算子慢 內姪施敏先自越中來

明湖鏡掩，滄海帆移，悵絕暮雲凝眊。儷句人來，黯澹壽梅枯蘚。誰挽者匆匆，錦瑟年華換。最慘記、臨分絮語，依然長日心眼。夢繞春庭月，是幾度飛花，一行歸雁。袖底巾箱，祇恐彥龍衣短。殘硯好經心，休被京塵冒。縱未有、官絀贈與，忍西華寒霰。

掃花遊 悼觀音院雙鶴廿年前後皆不知何往也

倦棲毳羽，記圓苑初遊。翠峯同住。夜寒嘯侶。驀胎瓊獨自，絳霄輕舉。廿載重來，僂指

光陰斷黍。恨誰據。又化影玉池。依舊雲路。人世空寄廡。歎兩度傷春。百年愁暮。露瓶散雨。枉蘭苕俛仰。夢圓珠樹。宛翼馴雛。那及汀鷗渚。鷺黯絃柱。問三山、此情誰苦。

玲瓏四犯 羅杏村老人畫梅莊圖便面爲施淑人作也

怕檢金箱。一搦雪膚痕。息壤空在。九九圖成。好是杜陵風概。何處五畝偕耕。祇想像、玉林瑤界。又怎知、姑射仙影。飄渺露華愁喟。那時落月橫參夜。話寒香、葦簾疏靡。草廬脩竹。翻遺我、枉說青山買。獨自翠羽夢回。付萬事、西風塵外。判故溪歸去。孤篷短笛。泛家雲瀨。

徵招 移居斜街

鳳城西下銀灣水。十年燕鴻來往。倦羽乍羈栖。又孤雲愁傍。飛蓬憐鞅掌。笑蝸角、何心鳩爽。磊落琴尊。等閒衾枕。依然流宕。一水隔盈盈。堪回首、花陰舊巢無恙。逆旅總塵輕。是誰家門巷。孤絃安畫舫。抵多少、淺斟低唱。斷牆角。一種山薑。暫夢回書幌。

惜紅衣 紫薇

絳縷迎薰。珠房綻曉。捲簾長日。倦倚重檐。盈盈乍冠幘。欄杆夢影。憑護取。仙宮裙褶。消息。憔悴沈郎。奈珊珊無力。何人紫禁。獨對黃昏。匆匆暗迴憶。薰絃試譜。好待鳳翎。只恐月鉤輕掛。難照玉池清魄。問碧天無恙。一桁彩雲扶得。

石州慢

冒辟疆姬人吳湄蘭菱花硯往年得之吳中爲施淑人奩中物硯背

銘廿五字製鏤絕工尾署甲戌春叩叩作叩叩湄蘭小字也

豔絕媧雲。當日雉皋。春影妝閣。冰奩巧樣新裁。翠管雙鉤。纔學險麋恨積。認取水繪風流。南朝多少。傷心魄。一片玉華寒。又尋常陵壑。流落桃根江畔。梅影奩中。那回梳掠。恨老蘭因。冉冉歲華飛電。銅臺夢冷。一例瘞草銘花。同心漫擬孤生託。滄海月明時。剩脂痕殘角。

瑤花

觀長椿寺明崇禎年劉太后像昔見金梁外史詞有高陽臺詠寺藏明

田妃畫像一闕自註李太后像並藏寺中不知何指蓋沿國初諸老說也李太后像當時所稱九蓮菩薩乃在城西慈壽寺中而田妃像詢之寺僧並不

知所在矣

瑤齋滿月。玉卮飛雲。被苔衣重疊。秋風禕翟。還記取。猶有方雷簪帙。天容慘澹。灑淚  
雨。六宮嬪妾。歎滄桑。一炷金鑪。付與梵宮塵褐。九蓮縹緲。曾傳想。雨徒靈湫。花隱  
層闈。揚州夢短。更何處。零落蘭簪啼靨。春來麥飯。指舊隴。茶山空說。桂林城外。茶山  
寺明。李太后勅建。恨夜深。蓮炬歸來。誰話水天殘偈。

芳草 太常仙蝶曩嘗聞之未見也年來兩遷禮寺賦此爲玉奴問

最無聊。輕塵枉著。瑤情隔斷靈蹤。那回圖畫裏。瘦腰纖搦。縹緲認春容。玉珂前度客。  
鎖齋時。駱馬龍鍾。笑吏隱蒙莊。夢緣底事匆匆。朦朧曙星寒月。玉皇前案。一朵雲  
紅。好春閒負了。御鑪煙惹袖。浥舊香重。羨他花裏活。逐雙飛。人在筠籠。問倩影。青陵  
恨侶。會託仙峯。

留客住 寓齋小有種蒔時雨旣足藤竹夜涼偶拈此調

瓜廬小。是何人。當時蝸隱。稱我一枝聊託。碧梧青篠。莫問寒天袖薄。翠倚何處。忍負

銅街風軟。玉宇雲輕。匆匆冷吟閒嘯。舊情杳。儘燕徒巢空。月迷窗窈。巾墊歸來。獨  
自簾衣塵掃。等是浮生逆旅。暫時鴻爪。邈迤題句人去也。又春雨杏花好景誰道。

花犯 自題畫梅

黯相思。冰姿玉骨。寒山澹猶倚。夢華能幾。歎縹緲仙塵。空付流水。世間百歲輕彈指。  
清歌憐翠尾。漫記取。漉珠炊雪。風流圖畫裏。誰知對花更無聊。千葩縱萬蕊。東風  
如醉。歸去好。誰同住。洞天十二。孤村曉。酒鑪墮月。嬾更覓。調羹嘗鼎味。祇貌得。一枝  
香影。酸心愁弄子。近得王元章畫梅十二巨幀故有洞天句

高陽臺 讀雪波夾竹桃詞有感是前數年館余永光寺街寓廬作也

瑣碧舒煙。銀緋弄日。一枝斜在欄杆。夢憶天台。匡牀小枕平安。屏風六曲深杯豔。典  
金釵。不怕清寒。黯當時。醉客留題。猶在冰紈。元都觀裏花千樹。問劉郎前度。倦眼  
會看。淚盡東風。淒涼重倚修鸞。零苞剩粉傷心事。衰啼紅。濺雨斑斑。判青春。獨對花  
時。幾箇檀欒。

尾犯 自題填詞圖

病客最悽魂。洲苑夢回。儷影春閣。寄得清愁。祇殘宮零角。傷謝韻、天迷絮舞。枉芬才、雲沈雁落。最纏綿處。剔盡銀燈。黯黯缸花薄。家山輕破了。恨墮影、柳翠渾薄。那識相如。問遺書猶昨。念何事、秦簫恨短。重而今、冰絃怨託。再生何世。祇恐吹玉參差錯。

倒犯

歎瘦盡、腰圍帶寬。佩金慵掉。涼宵夢好。秋穹弱。亂雲誰掃。樓陰轉愛、花竹參差。簾階悄。是竹外、塵飄寂寞。何人到。怕清眠、爲驚覺。街鼓未闌。感幌信信。花間愁月照。短檠鎖對影。露華薄。迴颺峭。念漫跡、催歸早。泥銀屏、低聲爲客道。道馬滑霜濃。莫怨垂鞭倒。玉壺輕滴了。

淡黃柳

金枝翠盞。夢繞青瑚玦。一桁玲瓏霏似雪。祇是迷花旋竹。妒影翻愁玉階月。恁騷屑。餘春忍攀折。舊情在、臂痕鬢。怕西風、只在橫波瞥。笛裏關山。爲誰腸斷。枉作錫簫



恨咽。

漁家傲 題倪海槎詩卷

一卷新詩冰雪沁。詩情縹緲禪心印。門外軟紅飛不定。幽夢醒。銅瓶水活花枝韻。畫省餘香消燕寢。卅年前事流光迅。多少繁華如泡影。閒伏枕。與君俱是維摩病。

定風波 喜聞金陵大捷

捲飛埃。一騎紅旌。天街好語都準。半壁危搯。十年草竊。浩劫如流瞬。卷詩書。置車艇。有約青春伴。須趁。歸興也。毛錐擲了。角巾閒整。斷金破粉。恁江山。六代猶餘燼。歎英雄。幾個。潢池到處。事往憐孤憤。笑書生。未華鬢。叱咤蒼頭肘金印。佳運。疾風殘籟。昇平重論。

淒涼犯 長椿寺作時施淑人喪已三年余亦將戒歸矣

露槐徑踏。西風悄。琳宮梵語愁答。歲華展轉。秋空懍冽。一林烏匝。香花黥黯。聽淒絕。圓鈴恨。嗒。歸來好。綃衣繡褶。月冷夢雲闔。閒脫朝衫了。記否當時。病吟塵榻。舊盟

未改指南阡。魏城新塔。丙舍松陰。待一路、濃青更插。辦歸艫、還自倦影伴翠髮。

氏州第一 蔣蕉林樞部贈陳曼生製坡笠壺索賦此調

塵渴依然。客病未已。孤懷潦倒誰省。雁侶情高。彝尊貌古。恰稱泉甘試茗。別樣官哥。巧製出。壺盧新詠。範擬天穹。圖傳海角。玉華痕浸。笑我枯禪閒自領。誦單偈。落花風定。昨夜微醒。疏簾淡月。感舊絨遺。蠹腋涼生。幽夢醒。漫贏得。魂清骨冷。欲報瓊瑤。悵吟搔。潘郎鬢影。

浣溪沙 十調

百尺秦樓衛水濱。玉簫金管總回春。一灣芳草謝池芬。西月只圓三五夜。東風纔動兩三旬。匆匆嘶騎不堪聞。

準擬西風整鹿車。越臺秦望幾踟躇。茂陵秋雨病相如。車轆間關翻累汝。枕函塵夢獨悽予。傷心休問路挪揄。

一舸將迎十四橋。雁蘆銜影尾頻脩。藥鑪茗鼎共飄搖。遺草那回拚待訪。散花誰

意轉無瘳。吳閭皋廡最魂消。

風月餘生黯若何。嚴裝遠道足蹉跎。夢回京邑淚痕多。

林下幾人愁詠絮。竹間長

日困牽蘿。故衫愁著紫雲珂。

巷柳園花費主持。常將香雪和瓊卮。春光猶在小桃枝。

無賴暮江風浪惡。多情良

夜月華滋。寒窗擁髻斷腸時。

悔別湘南萬里遊。肯將寒夢覓封侯。歸裝還落錦機頭。

鏡檻荒雞常獨夜。書帷急

羽慣窮秋。黛螺耽得幾多愁。

十載兵戈莽未涯。舊山新隴盡氛埃。春秋形影對徘徊。

怕觸棠梨鶯夢苦。每聞鶩

鳩雁行哀。爲君何意復營齋。

家具雞栖屢挈將。定巢寒燕影雙雙。海王村畔幾斜陽。

衣帶舊痕憐骨董。畫圖新

製愛瀟湘。繡簾人靜暗啼螿。

心字香焚夜叩天。象牀蘭夢祝清圓。楮痕銷玉恨如煙。

坼蕊殘苞重已矣。敗蒲衰

柳更悽然。那堪迴首又當年。

一昔秋風計未差。幾番清淚溼盤緺。灞陵誰更髻椎丫。

往事蕭條緘畫篋。新來黯

淡對金花。孤窗蒲管結禪跏。

留客住

客秋寓齋曾賦此調。春夏以來小庭風物彌覺灑然。輒復拈此以寄

慨云

宣南路。恁年光、飄搖何意。只有盤花旋竹。舊情堪溯。不道番風信息。廿四都過。政爾  
盃停婪尾。曲罷遨頭。聊當面城閒賦。漫誰妒。是窸窣筠風。璫瑋梧雨。娥月悽魂。夜  
久蘿煙青罅。底事鄰雞慣喚。昂參三五。冉冉殘夢殊未了。剩門外翠蛾宛轉窺戶。

金縷曲

題宗滌甫丈萬松陰裏一團瓢圖卷

那得團瓢處。歎人生、抗塵走俗。勞勞塵土。惆悵雲門新燹後。舊日青松宜補。幸猶有、  
龍身如故。太白樓前乘障久。問先生、拋得淇園竹。羨翼鑠。鞍猶據。王劉千載傳祠  
宇。感鯁生、佻離鄉井。僑生羈旅。一笑朝衫輕脫了。擬築灘山新隴。待晚與、蒼髯爲伍。

奇節何人真磊砢。莽乾坤。大廈須爲柱。歸試覓。瓢間樹。

又 得姊氏粵中書

寂寞烏衣巷。訊春來。秣歸村落。東風無恙。迢遞南雲舒雁字。偏著孤絃悽惘。爲念我、  
長頭虛長。廿載重來滄海月。恨明珠。有淚還空掌。金馬宅。翳蠓網。羅襟酒污徒嗟  
往。忍青春。高禰祠宇。故山輕忘。爭奈燕梁秋似客。休問誰家簾幌。更老至。江湖宜放。  
三徑儻猶松菊在。歎浮花。浪蕊何心賞。歸去也。白湖舫。

瘦春詞

高陽臺

陳抱潛書來問疾賦此代柬兼懷蘇虛谷桂林

丹鳳城南。棗花寺裏。年來清夢迢迢。殘月蘆溝。曉風吹軟虹腰。茂陵病久相如老。攬  
經年。雙鬢飄蕭。臙春來。片影遙峯。臥冷吳舸。山陽有客愁聞笛。說白雲黃鶴。幾處  
魂銷。風雪河關。淚痕濃著青袍。遨頭不恨遲芳宴。恨天涯。落莫裘貂。怕重逢。攜酒聽  
鶯。楚魄難招。京師傳余噩耗。抱潛書來云爾。

珍珠簾 春影用金梁夢月詞韻

春來做出迷離景。問魂銷、幾度相思猶凝。窈窕弄花枝。颺畫簾波冷。豔是行雲濃作絮。總到處、飄搖無定。仙境。指紅樓一角。玉人遙凭。何處似識輕盈。蘸清池綠水。遙峯鬢靚。對面倚青鸞。恨綺腸愁映。燕掠鶯捎。渾不準。問覓得、風前偷並。風靜。好曲欄遮住。暮天垂暝。

金縷曲 小窗臥雨孤檠愁伴感物興懷玉田生所謂不自知其詞之何以然也

夜雨聞菰葉。問幾時、芙蓉前度。水花開徹。滿目香閨兒女恨。暗底繁華銷歇。念去日、東風飄瞥。打起黃鶯遼西夢。是禁烟、寒食清明節。思往事、淚盈睫。游絲落絮愁孤撇。凭高樓、平林漠漠。數聲啼鴉。水面琵琶翻別調。聒亂銀瓶漿裂。盼不盡、估帆烟滅。江北江南魂銷斷。更驚心、橋畔鶻聲接。商船怨、最嗚咽。摻亂同心結。更那堪、黃河遠上。寄書重絕。玉釧珠釵閒拋盡。背影孤眠長怯。楊柳外、

疏星殘月。早是春光愁銷黯。又銀屏、暗落瓊枝屑。堪重理、鬢雲疊。并刀恨斷珊瑚玦。檢迴文、纏綿錦字。幾番空切。羌笛春風何須怨。枉作枝頭啼血。只銷盡、當時眉纈。暗雨青檠寒宵伴。忍舊愁、新恨從頭說。金碗粟、爛如雪。

踏沙行

寄題海棠祠祠在藤州海棠橋往年泊舟其下

畫壁雲荒。披厓蘚露。林花落盡春無主。青天南北正茫茫。夢中省識曾題句。玉佩愁停。金鑲恨誤。十年根觸藤州路。小橋深處亂啼鶯。扁舟衝入添花雨。

東風第一枝

子楨寄贈畫梅便面

象管垂珠。玉毫粲雪。一規圓魄疑暈。乍從驛騎傳來。恰好夢幃喚醒。瑤階春早。渾憶得、娉婷芳影。問舊時、月色誰憐。猶是那番清興。耐幾日、峭寒俊忍。悵獨自、病腰瘦損。天涯誰數東風。二十四番換盡。蘭街走馬。又紫陌、紅香飛鬢。到恁時、笛裏重逢。怕老江南春信。

浣溪沙

路入吳楓第幾橋。垂楊垂柳一千條。等閒消受試今宵。山寺曉鐘偏到枕。水鄉殘月又歸潮。夜深何處玉人簫。

淚落吳娘苦恨多。曉寒無奈峭風何。瀟瀟還唱懊儂歌。樓外遠山沈潑黛。檻前新水漲橫波。華年禁得幾蹉跎。

摸魚兒 秋江行旅圖和夢玉兄韻

趁西風渡江一舸。秋程金雁頻數。新詞低唱江南樂。行入玉峯深處。楓葉暮。似酒面、紅潮不怕青山妒。曲終幾度。向鏡角瀾迴。青簾並影。好景落飛鷺。江亭月。水面琵琶調苦。絃聲零落洲步。五湖乘得扁舟興。絕勝夕陽簫鼓。歸忍誤。須不是茂陵、客賣相如賦。離懷暗訴。問冷落關河。過帆多少。寂寂載愁去。

聲聲慢 翰臣奉諱南歸頃自武昌寄書感懷賦此

羅幃臥冷。藥鼎香銷。幾人問訊江湖。胥浦春潮。迢遞一紙湘魚。天涯者番恨雨。灑江鄉、溼遍菰蒲。懷往事。儘花明紫曲。月暗銅鋪。渺渺仙皋珮玉。悵磯頭黃鵠。雲唳烟



呼。淚枕歸醒。猶念落月琴孤。邈迤舊鄉。禁火對青山。何處棲廬。殘夢裏。向南村。還戀故居。

鳳簫吟 春來沈疴漸有瘥意計自越城臥困以來將三年矣枕上偶作瑣窗寒諸闋大都搔首問天懺悔自陳之意子楨夢玉各有和章復拈此解

懊春容。驕花困柳。一般總是東風。玉簫輕擻破。闌干豔雪。簌簌已飄紅。判將芳事晚。趁斜陽、歸去青驄。恨繫老垂楊。幾番夢雨樓東。愁儂。閒階鋪蘚。滿園飛絮。抵甚春工。新烟懷故國。畫梁歸燕到。幾處簾櫳。素琴彈不斷。賸雲邊、流響飛鴻。問覓得、湔裳水曲。閒日游蹤。

楚宮春 牡丹用草窗韻

腴紅膩白。漫開徧東風。萬花深谷。曉露漸晞。小檻盈盈春足。何處雲衣霞佩。醉擁出、傾城香國。翠袖還扶。訝繡屏、猶有寒輕。晚烟吹冷。庭綠底事游驄。南北銷豔綺。長記相逢韋曲。試問漢宮。猶有藏嬌金屋。詞筆清平暗老。祇痛惜、襟寒酒宿。霧影重重。

暫夢迴。獨對凝妝。懶說芳華羣玉。

水龍吟 送春

夢迴卻怨東風。春來總是愁時節。柘枝青老。牡丹開過。又聽鶉鴉。帶粉悽香。鏡塵凝黛。問春能說。漫簫聲吹遠。東門南浦。飛花路亂如雪。枉作垂楊恨結。綰年年、幾多離別。閒情須付。半簾斜照。一階殘莢。後日相逢。天涯何許。舊愁應怯。判綠陰似水。闌干獨自。對花前月。

浣溪沙

一枕新涼斷雨聞。蒲香猶殢睡魂醺。醉來翻污石榴裙。歌板錯迷襄夢影。舞衫纔著楚腰身。自憐鴉髻亂湘雲。

小閣寒香沁木樨。靖江城闕暮雲西。滿階榕葉亂鶯啼。涼月不知貪鶴夢。野風何事妒鷓棲。夜深吹雨遍江隄。

黯淡金花夜氣消。玉樓深處流紅綃。泥人殘醉墮香翹。波底豔魂疑睡蝶。水邊寒

淚惜啼鮫。海山風定夜歸潮。

幾日春醒困不支。田田蓮葉送春時。迴塘雙槳漫輕攜。

香老漸憐蘋影暗。路深時

覺茜花迷。再來還約看紅衣。

隔浦聞歌記采蓮。采蓮花好阿誰邊。亂紅遙指白鷗前。

日暮暫迴金勒轡。柳陰閒

繫木蘭船。被風吹去宿花閒。

偏是藍橋夢未真。暗香零粉可憐春。小樓鐘鼓易黃昏。

滿地落花孤館暮。斷腸芳

草幾回新。那會輕忘綠羅裙。

漸覺微寒宿酒餘。燭花霜影暗流蘇。一枝紅豔惱雙蕖。

金鼎斷香全錯莫。綺窗殘

月半模糊。曉檐聲亂又啼烏。

病骨秋來怯自驚。夜窗風竹撼縱橫。教人殘夢不分明。

門外一江烟月淡。去時雙

槳浪花平。燒金篆玉幾多情。

曲游春 子楨游自支硎歸出示此調屬和次韻

探盡江南好。索擔頭蠻榼。多少春釀。草長鶯飛。攬芳情都載。翠波蘭漿。輦路通幽爽。曠幾許、湖山勝賞。料也應、瘦袷風前。愁我碧紗閒帳。靜響。寒鐘青嶂。儘冷落禪棲。花月誰掌。玉轉雲橈。又清樽暮雨。豔歌燈舫。隔院聞雛唱。問那有、夢魂輕往。漸老文室維摩。柳棉夾巷。

瑞龍吟 聞笛用清真韻

湘花路。提起萬感蒼茫。嶺雲燕樹。瑤臺縹渺人家。數聲脆管。傷春倦處。澹猶佇。還省妙年三五。綺窗瓊戶。偷來羽調宮牆。酒邊扇底。鸞皇試語。誰道關河游歷。繞梁悽澀。天魔愁舞。應歎玉顏盧郎。幽弄非故。殘經破管。惟有相思句。華筵好。梅英散亂。沈沈江步。怕向陽關去。垂楊暗積。長條短緒。都是傷心縷。歸雁早。汀洲黃蘆秋雨。斷魂漫攬。夜寒偎絮。

木蘭花慢 雨中沈悶忽憶五年前虛谷贈句有云中。年假寒憐兒女舊學衰。

頽重友生感歎之餘爲填此解

怕衰容攬鏡。問底事、戀東湖。幾敗壁蝸涎。寒窗蚓曲。荏苒朝晡。踟躕。病腰瘦損。笑盤餐、長忍對江鱸。破礎門邊暮雨。雲山咫尺蓬壺。何須問訊雙魚。鴻外影。螽餘書。悵千里關河。百年身世。臥穩筇孤。嗚嗚。仰天擊缶。有高文。能傲敬通無。那得塵清丈室。祇園坐老團蒲。

高陽臺

題子湘大令湖亭雅集圖用玉田西湖感春詞韻

柳暗荷深。山重水複。幾時親櫂湖船。冷渡西興。雙魚畏說經年。梅花雪滿高峯路。臥孤篷、聽雨誰憐。對悠然、一卷丹青。夢老茶烟。余戊冬自越入吳。攜累輿疾過杭西湖。不得一游。平生未到也。

湖亭日日笙簫宴。問何來裙屐。如此山川。江夏無雙。風流賸落吟邊。傷心休話南朝事。試亭陰、枕簟清眠。掛重簾、調起歌鶯。放了愁鶻。

金縷曲 落緯

練影明蘿屋。過黃昏、晚蛸吟罷。玉蟾新沐。浙瀝涼颺金井畔。一杼鳴聲淒促。似獨繭、抽來盈軸。多恐秦川機中婦。化淒涼、片羽驚秋綠。愁自語。斷還續。疏檠漸喜清宵。

讀。但消磨、雅箋邠疏。歲華虛速。風雨寒雞無限思。苦憶西堂葵菽。判底事、勞勞輕逐。上國王孫來歸未。問繡牀、夢嬾何由足。鐘漏隱、隔花竹。

木蘭花慢 自題畫冊四解

對羅池片影。風詠好。水邊樓。賸玉珮新詞。青山舊迹。不赴春流。迴眸。萬花鬧裏。問幾年、閒夢熟簾鉤。漫惜柑黃荔紫。多應鶴怨猿愁。悠悠。嵐翠帶江浮。長日伴清謳。倚寂寞園林。須星照夜。娥月明秋。綢繆。半窗燈火。到更闌、烏鵲繞城頭。縱爾荷衣未損。幾時天際歸舟。右江亭讀書冊亭在柳州柳刺史故蹟也

繞湖杉數頃。榕葉闇。古城闌。正寂歷柴桑。庭開旋馬。帳隱橫經。沈沈。後堂醉飲。對春風、閒話子雲亭。腸斷當年絲竹。高樓夜雨曾聽。車停。素卷汗猶青。今古幾沈冥。歎塵裏緇冠。江頭老屋。夢想能憑。飄零。浪游祇倦。問天涯、寥落幾晨星。長憶故山修竹。寒關燈火熒熒。右湖莊問字冊畫中一老人爲榕湖講師永福呂先生潢彞所從得歸方文法者也

笑王孫潦倒。吳市隱。一簫寒。幾寄廡愁春。登樓嬾賦。寂寞雲山。朱絃。漫移錦瑟。甚匆  
匆。才減令狐箋。欲問空巖象迹。春來雪滿巖關。杯殘。綠水正開簾。深樹早聞鶻。算  
杜老溪莊。庾公樓觀。渾是悽憐。纏綿。舊巢未冷。有呢喃。燕子語梁閒。漸老東風詞筆。  
無多笛裏梅邊。右客館備書冊

掛樵峯墜月。芳樹裏。臥橫參。向磴曲厓陰。雲青水白。一枕沈酣。闌干。恨啼翠羽。惹羅  
襟。清淚落苔斑。喚醒城頭畫角。滄波恨與漫漫。愁看。燈火正檀爍。花萼最爛熳。奈  
露漬空梁。雲虧素魄。枉自摧殘。關山。怨鴻斷影。問江城。吹笛幾時還。歸去竹籬茅舍。  
丰標那惜清寒。右仙城夢月冊

花犯 小窗海棠鳳仙作花戲拈

篠牆陰。嬋娟鬪晚。盈盈粲羅綺。倦眸初洗。怪絳縷銀綃。都是秋意。斷腸舊夢隨流水。  
芳痕賸。摻指。祇自惜。玉山輕碎。翾飛愁更起。誰知對花最相思。鄉園放數畝。斜陽  
誰醉。簾外雨連宵。又替妝紅翠。檀欒影。晚烟淡月。渾似我。容華羞對比。待幾日。滿籬

黃健牽蘿書帶裏。旁有天竹一叢故作檀欒句。

青玉案 病餘久未作詩汪筱珊同年日攜六朝烟雨畫卷索句率用卷中位

西詩韻作二絕句復綴此詞時方擬杪秋作杭越游也

平生未踏沙堤路。祇夢底移舟去。行到孤山孤絕處。白波青巘。露荷風絮。擬共逋仙住。小窗睡覺聞秋雨。漠漠寒烟引輕素。咫尺雲鄉休恨阻。虹橋一帶。鶯湖百里。試覓閒鷗鷺。

摸魚兒 題子湘大令所藏侯朝宗秋江釣艇圖影

問誰能陸離長劍。江邊來作漁父。水花開到黃蘆岸。遮莫瓜州前渡。烟外浦。計猶有清平文雅臺邊樹。長鬚繫艣。試一曲琵琶。郎君玉貌。曾解斷腸否。東林幟底事江南重舉。十年滄海非故。傷心那獨揚州夢。扇底桃花紅污。風又雨。甚不著蓑衣。博浪椎空誤。飄零片羽。笑我亦雕蟲。壯年虛悔。遺恨渺千古。圖爲朝宗社友。閩人曾鯨嶽。頑乙亥年作扁舟幅巾而倚一劍一歎服虬髯撥擢者疑卽朝宗家義僕也



采

香

詞

運



杜文瀾（嘉慶二〇——光緒七）

字小舫。浙江秀水人。入貲爲縣丞。從總督裕公平湖  
南李沅發之亂。時江淮間軍務孔亟。諸大吏皆資其  
贊畫。靡役不從。以功晉布政使銜。歷署蘇藩。蘇臬。蘇  
松太道。常鎮通海道。工詞。嘗勘正萬氏詞律之譌。有  
校勘記行世。

敘

余自涉江還北。旅客東亭。時聞鄉父老言杜公愛民。埒古良吏。亭育海澤。守令兼權。惠和之風。徧於甄落。心竊躋焉。時公縣符受代。日月已踰。專理禹筮。上輸軍府。而甘棠謠誦。斐然勿替。征南流愛。其復見於今與。比以防寇。責在土團。大府檄公督厲。其事。戈鍛是植。鹽田爲陸。邏夜警旦。舉州赴節。非公道感。莫可同聲。文化戎昭。端厓可睹矣。夫士大夫垂聲奮烈。將以功名傳之無窮。或往往糝視翰能。芻賤煙墨。以爲文章之事。無當實用。然而登高賦詩。乃無慚大夫。彈琴詠歌。故有通元化。弘農坐嘯。隨郡清言。仕優則學。無妨並邁。公以簿領之暇。敦悅詩書。天情流煥。時命豪牘。閱意眇旨之論。見志觀變之言。野會川沖。紛其造述。而風流豔發。擿病捶聲。運神鋒於鼻端。析纖芒於棘刺。大不遺細。音不害情。莊生言鳴而當律。孟堅謂有惻隱。古詩之義。其公之詞乎。夫倚撫句韻。刻鏤芳華。號彼壯夫。或詆小道。然堯章歌曲。隱黍離之感。同甫平生。抗中興之疏。詞士深約。義概存焉。騷雅以還。信未可以靡靡訾矣。又況歐范

采香詞 敘

諸公比物荃蓀非無麗語。宅心鐘鼎。卓建大猷。往烈未泯。公其接迹。海內作者。或以  
余爲知言否也。咸豐辛酉年夏五月中旬。甘泉李肇增拜撰。

采香詞

秀水杜文瀾小舫

東風第一枝 菜花

麥隴殘寒。桑陰碎雨。釀成一片花意。買春誰散金錢。媚晚競鋪繡綺。遺鈿漫拾。俏不上。玉人釵尾。但滿村、亂蝶蛉蜩。暗逐鳳鞦香細。圍古寺、翠煙似洗。沿敗井、舊愁又起。最憐小徑三叉。占了夕陽半里。臺心抽老。怕悄換、鄉園滋味。趁那角、野店青旗。獨倚破籬閒醉。

長亭怨慢

竟偷被、東風吹暮。綺院銷香。畫橋颺絮。燕子歸來。一襟幽怨向誰語。落花蛛網。偏不放、春魂去。後約問薔薇。早拍徧、闌干無數。空誤甚年華似水。卻把舊愁留住。新寒未減。尙負手、玉階尋句。待檢點、小扇輕衫。笑呼酒、煙蘿深處。奈樹外斜陽。還惹殘鶯啼苦。

梅子黃時雨

閣住離思。任門掩。晝陰苔砌慵掃。奈畫上斜陽。又添愁稿。知否江南三月暮。玉驄嘶斷迷芳草。孤懷悄。杜宇幾聲。猶道歸好。侵曉。醪醖開了。甚尋香倦後。翻被花惱。只燕子知人。天涯懷抱。雞塞夢回聞戍角。小屏山裏春沙杳。簾波裏一谿越梅吹老。

高陽臺 平山感舊

髡柳鮎青。癡苔褪碧。醉翁仙魄誰招。瘦了斜陽。隔江山色蕭條。孤城一片霜笳起。問玉人。那處吹簫。便遊蹤。不是重來。也怕魂銷。闌干況是當年倚。喚冶紅深翠。曾款輕橈。斷夢惺忪。可憐明月今宵。湖光似恨鷗鄉冷。趁東風。卷起春潮。更禁他。殘鳩聲聲。啼過紅橋。

木蘭花慢 西湖春感

放漁竿一去。幻塵海。渺愁余。算柳浪鶯閒。鷗波人遠。負卻西湖。音書又沈舊雁。問東風。還到故鄉無。萍梗空驚歲晚。梅花自惜山孤。林逋合占幽居。飛槩伴瘦筇扶。甚

古樹苔荒。遙峯翠減。不喚提壺。歸途待從畫裏。怕春寒催老。夜啼烏。留得疏窗岫影。六橋煙雨模胡。

臺城路 秦淮秋柳

江南一夜香波冷。樓臺畫成秋意。舊院藏鶯。長橋繫馬。攀折遊蹤難記。飄零燕子。認六代斜陽。倦魂醒未。怨笛誰家。後庭歌罷更顛顛。桃根桃葉易老。渡頭空照影。羞鬢眉翠。舞扇句雲。華燈背雨。都換傷春滋味。闌干傍水。問丁字簾前。細腰誰倚。無那西風。亂鴉啼又起。

綺羅香 黃葉

影瘦團霜。聲寒戰野。暮色先歸高樹。橘柚烟晴。掩映近山官路。正遼空、一雁來時。帶幾點、亂雅棲處。念蒼茫、權檣深村。故人家在隔江住。天涯詩境漸老。還對蕭騷短髮。孤吟秋句。破寺逢僧。笑指病顏如許。怕深宮、嘶斷涼蟬。又添了、夕陽無數。賸閒庭、簾卷西風。倚闌愁夜雨。

渡江雲 夢遊焦山

天風吹廣袖。松寮乍倚，奇氣頓蟠胸。似曾相識處，偏不分明。山色有無中。清遊屢倦。算者番健撇枯筇。但怪得、銘忘瘞鶴，絕壁亂苔封。 怱怱。沙鷗臥雪，陣雁啼霜，伴吟肩獨聳。飛盡了、嵐光煙翠，海鏡涵空。長歌待喚魚龍聽，又怒潮、驚起疏鐘。殘醉醒。一江淡月孤篷。

鷓鴣天

倚徧闌干日又曛。一重蕉影上簾昏。啼鶯到晚猶依樹，飛絮如煙肯化塵。 香欲燼，酒愁溫。落花還學遠遊人。宵來雨是春歸路，不比刀環夢未真。

探春

曼陀羅室牡丹廿餘春。殘花少蓓蕾如豆。市中購新花六本，作此妥之。

翠幄陰遲。畫闌煙瘦。東風愁負鶯燕。芳徑鉏香，筠籃擔露，入市韶光偏賤。誰借藏嬌屋。早分與、莓苔一半。信知倦蝶癡蜂，暗笑弄花人懶。 何事尹邢避面。任袖滯殘寒，眉黛慵展。巾紫凝妝，鞞紅酣酒，羞問舊情深淺。惟有嬋娟月，尙飛近、移春庭院。待上



瑤臺又怕瓊簫寫怨。

卜算子 殘月

花影漾簾波。夜久春痕薄。試問姮娥瘦幾分。只有闌干覺。陌上玉驄嘶。喚起雙棲鵲。楊柳梢頭掛曉星。又下西樓角。

探芳信 江村送別

正秋暮。又雁引離心。蛩驚倦旅。趁半山銜日。帆影渡江去。一行疏柳青旗瘦。魂已銷無處。更何堪。野火叢祠。亂鴉淒語。無計挽君住。但遙指鷗沙。教尋歸路。還怕歸來。雙鬢漸非故。鯉魚風大。寒潮闊。落葉空題句。慰相思。祇有西窗夜雨。

一萼紅 櫻桃

倚朱檐。漸垂纓似豆。鶯鶯正偷含。珠唾脂勻。珊瑚網碎。深夜圓映冰蟾。倩纖指、樓陰細摘。誤驚認、紅染玉蔥尖。檀口香銷。青衣夢杳。歌老何戡。因念長安人遠。伴飛花清宴。瘦筍同拈。路熟斜街。盤分紫禁。何日遙寄筠籃。料還記、鮪魚乍上。數鄉味、低唱

望江南。祇怕流光易去。兜騰春衫。

月下笛 舟泊茱萸灣

流水荒灣。孤篷又倚。旅魂淒斷。紅舷扣緩。玉鉤芳思催變。題糕人去鷗盟冷。倩誰問、隄陰舊館。嘆孤城寂寞。瓊簫歌罷。野笳驚換。橋畔秋聲戰。似小隊弓刀。陣雲零亂。團鴉噪晚。柳絲凋翠。誰綰。西風十里揚州路。聽嗚咽。寒潮弄遠。怕青鬢對吳鉤。一夜霜華浸滿。

清平樂 春夜聽雨

小樓燈倦。愁聽檐聲濺。隔巷桃花紅太賤。瘦盡東風誰怨。鈿車空訂歸期。錦鴛暗溼香泥。明日疏簾休卷。春寒燕子來稀。

謁金門 春晚

芳意滿。一架紫藤陰亂。陌上柳花吹不轉。玉關人更遠。寒盡畫簾長卷。進日頻停鍼線。燕翦翦春愁未翦。寄情雙翠管。

水龍吟 舟夜聞笛

幾番吹月梅邊。一雙瘦鶴支烟冷。江城又晚。飛花漸寂。今宵倦艇。宿鷺驚沙。潛蚪舞壑。斷腸誰聽。趁荒洲渺靄。聲來甚處。偏只有。羈魂醒。長恨芙蓉分鏡。徧珠樓更無人憑。寒潮暗長。絲楊盡老。鰓魚自警。前路山陽。舊遊黃鶴。那堪愁併。賸蒼波一片。稀星薄霧。伴孤鴻影。

風入松 聽國工彈弦索

絲絲疏雨泣梧桐。寒玉碎玲瓏。千秋難解相思索。被繁弦。散入春風。夜月窺人半醉。離懷著酒初濃。廿年心事逐雲空。燈影亂愁中。當時祇厭清歌永。到追尋。又惜怱怱。恰似江南客老。落花時節相逢。

八聲甘州 淮陰晚渡

尙依稀認得舊沙鷗。三年路重經。問隄邊瘦柳。春風底事。減卻流鶯。十里愁蕪悽碧。旗影淡孤城。誰倚山陽笛。併入鷓聲。空賸平橋戍角。共歸潮暗咽。似恨言兵。墜營

門白日過客阻揚舲。更休上江樓呼酒。怕夜深野哭不堪聽。還飄泊、任王孫老。匣劍哀鳴。

蹋莎行 普應寺感舊

萬井烟枯。一林香寂。佛樓苦贖淒涼色。衝人蝙蝠忽驚飛。遊蹤重破蒼苔碧。玉翠嬉春。瑤臺倚笛。豪華回首都陳迹。黃昏燕子語空寮。落花風起檐鈴急。

聲聲慢 袁江感懷贈江佩之

江淹老去。杜牧重來。尊前相對嗟歎。畫裏金城。滄桑一霎模糊。飢鷹啄殘戰血。泣寒沙、燐火青蕪。頻悵惘似蘇臺舞罷。太息句吳。恨指隄邊髡柳。問征人別後。還有春無。昔日笙歌。付與鬼唱嗚嗚。休怨鷓鴣聲苦。倚純鉤。猶繫珊瑚。君不見。抱枯枝。啼殺夜烏。

憶舊遊 與蔣鹿潭話黃鶴舊遊

記波涵紫堞。霧冪丹梯。頻展吟眸。念爾南冠久。問江城玉笛。曾聽吹否。去塵頓如黃

鶴萍跡話浮漚。自戰鼓西來。楚歌不競。望斷空樓。前遊漫回首。使十里春風。何處揚州。燐火迷荒岸。任彫鏤金粉。都付滄流。素絲暗尋霜色。詞客病工愁。怕賦冷晴川。萋萋草碧鸚鵡洲。

玉漏遲 舊院有十二娘戲作此解貽之

信風吹已半。三三徑裏。盼花重轉。館認琅玕。閒把玉簫雙按。修到揚州月樣。又添了。十分清豔。釵鳳軟。珠簾卷盡。畫闌敲徧。別後素手調箏。想暗減朱弦。一絲幽怨。鎮日相思。三笑四愁頻換。鱗素空煩六六。怕人去。紅樓春倦。凝望眼。巫山斷雲飛遠。

山花子 送別

紫陌飛雲糝玉塵。半墀幽草畫殘春。只向檠香燈暈裏。度黃昏。屈曲谿山屏上路。模糊煙樹畫中村。誰把相思千點淚。寄歸人。

三姝媚 贈蔣鹿潭

空憐歸去好。聽千山啼鶻。淚痕多少。注酒瓶空。算袖中還贖。散花新稿。逝水年華。判

斷送斜陽芳草。顛顛誰知。紅豆愁拋。玉龍悲嘯。誰勸春明頻到。更氣壓雲虹。意輕風鳥。典卻貂裘。墮蒼茫塵海。菱衣秋老。愛作詞人待。繡出餐霞幽抱。還怕黃梁邀夢。炊香未了。

更漏子 春晚

棟風殘。梅雨逗。枝上老紅吹瘦。寒欲盡。夜無聊。倚闌吹洞簫。芳思歇。怨胡蝶。惆悵餞春時節。春有信。去仍還。征人長玉關。

采桑子

閒尋紅豆開金盒。怕數相思。又鎖葳蕤。的的春愁玉指知。年來休問江南路。瘦了瓊枝。空憶芳時。淚灑東風感鬢絲。

好事近 泊露筋祠

環佩冷歸雲。門外野風如昨。一片亂鴉聲裏。正短帆初落。當年花柳賽靈旗。春波盪樓角。寒破半湖霜月。賸村醪孤酌。

探春 蝦

草屨穿煙，筠筵澗月。水村風景如畫。枉嘆無腸，空憐比目，葑苕微陰堪藉。閉了垂綸手，伴蟹火、一星深夜。只愁網起桃花，數枝萍蒂縈惹。長憶撈秋澗底，對舊雨杯盤，宵半情話。露溼鬢簾，雲扶蠶杖，鄉味依依茅舍。鮭菜荒生計，孤俊約、扁舟同下。聽罷啼鶻，蠡湖重醉新鮮。

祝英臺近 芍藥爲風雨所損

帶圍消，巾角墊。扶病伴春住。忍說將離，簾外況風雨。最憐婪尾杯殘，鶯聲啼後，尙澆酒、石闌深處。竹西路。長思小圃尋香，攜手訂花譜。花已飄零，蓬鬢近何許。不知廿四橋邊，行雲冷落，更誰脫、宮衣相顧。

淒涼犯 己未除夕

淒涼斷角。吹殘戍，愔愔復送今夕。舊詩未檢，新桃漫寫，暗愁空積。梅花自逸。又偷洩、東風信息。奈天寒、鈴蟬翠袖，鶴外共岑寂。還憶潯江上，劍倚珠燈，醉傾春碧。弓衣

換否。悵年華。瘦腰知得。猛聽荒雞。定驚起。江湖倦客。念家山。鐵甲未解。淚滿臆。

瑤華 題丁保齋十三樓吹笛圖卽次其自題韻

花邊絮夢。柳外徵愁。又飄零寒食。層樓在否。空記有。小燕歸來相識。舊時月冷。恐湘竹。都含淒碧。自夜窗開瘦梅枝。斷了玉人消息。孤雲閒寄天涯。問落拓征衫。歸計何日。煙蕪徑晚。算此恨。杜宇那曾知得。闌干重倚。忍回看。隔江山色。聽壁閒寶鈿宵鳴。付與醉歌狂擲。

減字木蘭花 題畫

珠簾十里。露重楊絲扶不起。花月如煙。弦索聲中憶往年。東風甚處。燕子歸時春已暮。爭似江湖。夜夜猶過廿四橋。

南鄉子

簾影隔枇杷。學繡屏邊面半遮。忽唾殘絨羞暈頰。紅霞。一扣連環印碧紗。聚散恨。搏沙。別語分明記未差。道是莫隨飛絮去。天涯。化了浮萍又著花。



眉嫵 詠扁豆花次丁保齋韻

認參差茅屋。宛轉疏籬。村小畫秋意。喚酒邀鄰話。斜陽淡、低棚同認晴翠。嬾蟾瀉水。漸數叢香霧。鏡碎。恁重看、瓠葉蕭疏處。自橫臥煙際。黃竹依牆扶起。似舊藤零落。芳架垂紫。休問相思約。江南路、西風都換花事。露華暗洗。待夜涼、羅袖新試。怕霜印柴門。蛩語斷夢難記。

憶舊遊 題鮑問梅西湖感舊圖

暈生綃一碧。樹影湖光。者是西泠烽火連三月。怪圖中絲柳都減春情。故鄉幾回飛夢。隨雁度南屏。甚蹋雪橋荒。棲雲徑冷。愁說重經。飄零共千里。況鮑老傷心。剛賦蕪城。對酒商歸計。問孤山何日。蠟屐同登。瘦梅定應相識。遣鶴隔煙迎。怕戍角吹寒。沙邊誤卻鷗鷺盟。

西子妝 爲友人量珠賀

潤柳舒顰晴花款笑。可是偎香天氣。露桃枝隔畫橋紅。謝東風、替傳芳意。仙姝第幾。

早排就珍珠名字。度新詞、伴吹簫低唱。華燈雙麗。眉痕翠。添了春山。識得春愁未。玉郎魂已不禁銷。更禁持、小蠻腰細。鴛幃並倚。問知否、青梅滋味。甚朝朝、都待啼鴛喚起。

無悶 鹿潭病牯譜此以代七發

長劍當年敲碎唾壺。豪氣都無千古。便黯淡青衫。壯懷如故。酒醒偏憐短髮。漸鏡裏、霜痕驚秋絮。家山何在。杜鵑喚徹。不如歸去。遲暮。尙羈旅。又賃廡人孤。病愁爭主。漫證破情禪。藥鑪椽杵。我有新篋。遲爾且醉聽檀槽歌金縷。更莫詠、卻瘧花卿舊日草堂詩句。

菩薩蠻

疏簾雨過濛濛月。啼螿滿徑愁黃葉。斜倚曲闌干。玉釵生暮寒。清砧催隔院。心共飛鴻遠。歸信總無憑。空帷怨夜燈。

秋宵吟 落葉

蠡湖波。去雁渺。瘦出千山霜。隋支笳處。認樹頂巢孤。萬鴉團噪。響荒原。墮夕照。便似分離。淒調疏林外。漸暗減秋聲。畫成愁稿。我已飄零。更念到。征車路杳。破窗蛛網。廢苑螢燈。寂寞淚花罩。幽恨知多少。待付流紅。苔徑漫掃。又牆陰。送過西風。蛩語啾啾亂敗草。

換巢鸞鳳

題周存伯橫河移居圖

同是浮家。問通明甚事。慣向天涯。鱸鄉閒舊笠。龍井戀新椽。橫河橋影綠陰遮。瘦楊幾株。柴門晚鴉。孤山近。儘供養。半牀書畫。重話空淚灑。吹動野笳。村影寒桑柘。賃廡幽情。買鄰豪語。都付頽垣零瓦。休對斜陽說傷心。去巢秋燕飄零也。鴛鴦湖。認歸舟。離思難寫。

四字令

宵寒醉禁。愁多夢任。銀釭不會傷心。照空牀翠衾。霜欺素襟。塵埋玉琴。幽蛩可是知音。傍孤桐細吟。

謁金門

殘漏苦。燈影伴愁無語。檐外雲陰窗欲曙。雁程歸尙阻。漫道愁如秋雨。歷亂萬絲千縷。雨到天涯還解住。憶君無盡處。

雙調江城子

涼颼似剪撲疏闌。卻冰紈。怯衣單。葉葉芭蕉。都作雨聲寒。別夢待尋江上路。屏一尺。萬重山。橋西新溜碧潺潺。下蘆灘。路彎環。過盡檣烏。不是舊征船。莫怪歸人歸未得。流水去。甚時還。

菩薩蠻 落花聲

金鈴響歇香魂弱。春歸只有莓苔覺。睡蝶幾曾驚。東風吹地輕。似聞春太息。長在闌干側。臨去尙清狂。和蜂敲紙窗。

柳梢青 飛絮影

已誤前身夢中尋。夢化了春魂。院落斜陽。池塘淡月。難繫愁根。東風不墮香塵。蕩

萬點相思淚痕。飄泊何心。虛空欲碎。誰管離人。

齊天樂 蟬蛻

已判身世斜陽外。虛空又留塵影。幻相猶存。凡胎易換。寂寞枯僧禪定。西風夢醒。問抱樹何心。鬢凋青鏡。尚有螳螂。夜深偷上翠梧等。前緣還戀瘦柳。嬾涼斜曳處。無限淒哽。翳葉辭柯。焦桐寫韻。藥裏誰療詩病。清霜自警。算羽化疑仙。舊愁都屏。冷眼冰蠶。怨絲拋未肯。

桂枝香 賦桂用周草窗韻

濃枝孕綠。乍崖樹早涼。偷送奇馥。影逐冰輪。漸滿翠峯卅六。中庭露白。棲鴉冷。逗西風。珠淚難掬。絳雲飛盡。嬌娥怨起。暗魂銷足。漫憶延秋舊屋。散半畝香塵。吹碎黃玉。雙泛椀甌。釵朵看攢金粟。而今羞問天涯月。伴青瓷。空畫涼燭。小山人老。靈波殿遠。信沈幽谷。

一枝春 梅雨悶人次草窗酒邊聞歌韻

樹轉晴光。逗纖雲、又著絲絲殘雨。芳辰細數。誤了聽鶯佳緒。文園病起。漸消瘦、柳嫵花嬌。幽徑裏、風約簾波。賸得篆煙濃聚。紋紗網蟲牽處。怪兜紅掛綠。都成情縷。閒熏麝鼎。潤緩舊時琴譜。梅陰倦枕。怕香夢、暗招春妒。空自倚、邀月東闌。笑和燕語。

蘭陵王 哭和雨亭將軍師

大星落。淒斷千營戍角。金陵路、曾說頻年。聚米量沙。運宵幄。巖疆寄鎖鑰。誰覺前籌借錯。長城壞、風雨黯天。鴉陣層層亂巢幕。功名儷褒鄂。記皖岫揚鞭。湘岸橫槩。無端月冷南飛鵲。看海上潮怒。子胥攜手。忠魂幽渺。甚處託。盼歸夢京洛。才薄薦慚。鶚念夜草軍符。磨盾如昨。銘勳待拜麒麟閣。奈玉帳秋偃。令威歸鶴。西州沈痛感舊淚。袖暗濯。

金縷曲 題褚二梅北征草和顧顧山

帽影緇塵撲。記年時、天街試馬。玉鞭香簇。幾度銷凝旗亭字。醉聽春風舊曲。又灞岸、垂楊吹綠。昔日長條都攀盡。展吟箋。怕認鶯花熟。誰更寫。夢華錄。君居洛下東頭。

屋。寄閒情、裁雲翦月。脆絲豪竹。不惜黃金空拋去。換酒鸚裘未足。算贖得、珍珠一掬。千里烽煙家何在。唱新詞、還替劉蕡哭。窗雨暗。話銀燭。

霜葉飛 重九登西岐山用周清真韻

亂煙低草尋秋路。殘蟬聲斷林表。畫谿彎處石橋斜。指唄關幽悄。看一綫、潮青破曉。孤筇閒倚羣峯小。待換酒人還。試共插、茱萸弄影。夕霽紅照。波外又掠征鴻。湖陰漠漠片雲詩。被催到。半天鈴語警新霜。更暗添淒抱。笑海角、遊蹤倦了。柴桑思譜歸來調。但細與、黃花約。明歲東籬醉朋休少。

柳梢青

雨晝風宵。怱怱時節。容易花朝。移樹流鶯。過牆胡蝶。春被鄰邀。垂楊禁得愁銷。漸折盡、長亭翠條。望徧征帆。知人心苦。只有江湖。

漢宮春 金螺青得班固玉印繪思古圖

文麗卿雲。問蘭臺吏去。誰補遺編。空存舊摹印玉。零落人間。苔花鏽碧。認當時、秦篆

斑斕。應自有山靈護野。夜深光燭星躔。遙想赤符際運。映高文典冊。芝檢朱妍。還看籀紅押尾。銘勒燕然。模胡劫火。暗傷心。流落誰邊。惟付與金題錦贖。共尋蛩駝前緣。

法曲獻僊音 庚申長至

陰測花甄。暖霏葭律。霜曉記聽鯨鼓。糝雪貂裘。畫灰貌鼎。天涯暗驚時序。正不寢。疑金鑰。敲窗又風雨。玉關阻。念迢迢。翠華西狩。春信遠。生意漸酥穹戶。凍草徧銅墀。拜宮雲。僊仗何許。歲逼青陽。淨纖塵。日麗瓊宇。盼鸞旂歸擁。一路梅花香護。

采桑子

西風著意吹殘雪。寒上征衣。凍草淒迷。滿路春秋怨馬蹄。谿梅不趁離筵折。冷蕊香遲。別後相思。知寄江南第幾枝。

鵲橋僊 七夕

鳳梭停。銀潢靜。僊輶直下雲表。耿離愁。經年慣。桂香吹老。蛛絲空網舊恨。賸曝衣花



裏判無睡。正怕看牽牛。畫屏涼早。猶記晚妝試了。倚鍼樓、拍肩歡笑。曾共指斷橋。鵲應填好。芳盟尙在吟抱。奈頓添淒悄。卷簾驚見。斜河催曉。

壺中天 海陵道中

野蘆吹雪。被西風、攪入煙波深處。隔岸微茫。鴉弄暝。團破一川涼霧。浪挾帆飛。燈搖燐碧。暗灑橫塘雨。篷窗休揜。袷衣新試吳絮。因念故里天寒。荒橋水長。目斷鴛湖路。甚日歸來還一笑。長伴漁汀鷗鷺。老樹蕭蕭。頽陰黯黯。近市聞人語。殘更數徧。擁衾空賦愁句。

解語花 橄欖

芳鹽墜碧。破籠藏珠。霜老吟青子。嬾寒侵齒。含顰處。舌本暗回春味。瓶笙沸水。聽小語。龍團新試。留臍核。然近銀釭。幾瓣飛蘭蕊。猶記吳門夜市。逗紅燈一點。幽唱初起。瘦梅香裏。分螺盒。凍綠暗侵蔥指。天涯歲尾。空惆悵。素巾鉛淚。知甚時。重贈檀奴。消玉尊殘醉。

采桑子慢 橘

晴霜乍飽。千樹丹丸爭染。記曾共香橙冰筍。載滿筠籃。思遠西風。洞庭秋色又紅酣。鯨波迷路。吳帆未整。望斷江南。楚夢易醒。踰淮誰惜。齒馥空含。更休說、朱樓剖玉。並蒂分甘。陽羨亭孤。賦歸愁慰老坡饑。殘棋消劫。相逢舊叟。重證仙凡。

木蘭花慢 送竈

聽千街響竹。趁宵半。送神歸。正白馬迎初。黃羊薦後。風漾靈旗。瓊卮漫教醉倒。怕醺醺。夜奏綠章遲。知否天關萬里。九門虎豹環司。芳時綵燕絲雞。中婦豔。少兒嬉。笑因熱何人。踞觚憑我。媚奧奚爲。休辭歲盤草草。供梅花。聊當贈行詞。好問和羹心事。炊香到處春回。

菩薩蠻 冬日卽景

棲鴉點點如殘葉。林容寂寂天疑雪。煙外曉鐘疏。山寒僧夢孤。西風吹短策。酒束詩腸窄。招鶴問梅花。今年春瘦些。

長亭怨慢 悼顧鶯娘爲鹿潭作

最淒絕。枇杷門戶。幾陣輕陰。落花辭樹。月暗西樓。夜鶻啼血。竟何處。玉眸遲暝。知未盡。牽衣語。唱慣鮑家詩。忍更向、秋墳聽取。細數。自香癩。燕後。只共豔辰百五。春心費盡。算換得、雨酸風楚。當時若、休見雲英。瘦不到、腰圍如許。待翦斷垂楊。還怕愁生霜縷。

醉落魄 冬夜卽意

鐘疏漏疊。熏籠火燼餘灰熱。遙天雲凍飛鴻咽。窗外西風。殘夢墮黃葉。瓶梅瀉水香魂結。一枝瘦影燈淒絕。錚錚冰柱敲檐鐵。睡鶴知寒。起舞弄孤月。

更漏子

漏迢迢。風瑟瑟。淚點漬成秋迹。銀漢近。玉門遙。歸期金鳳翹。滯新蛩。回去雁。殘醉墮梧庭院。紅燭地。翠尊孤。霜寒驅夢無。

天香 卍字香

窗眼噓雲。闌腰印月。雛鬟夜靜重炷。篆蛻盤蝸。薰圓睡鴨。綵繫荀郎吟緒。春融四角。渾不倩、流蘇深護。剛似儂心宛轉。連環萬絲千縷。溫灰半星微度。畫秋蛇、似鉤愁譜。一寸繡腸顛倒。佛龕低訴。漫說情田未補。怕隔斷、相思舊時路。織向鴛機。回文更苦。

水龍吟 白蘋

楚江吟思悠悠。浪花溼濺珍珠淚。清香引擢。浮根縈漿。空明見底。采采秋心。儘人拋擲。自成顛頓。任湔裙去後。鷗鄉夢冷。斜陽淡。西風起。羞更假紅倚翠。映滄波、何曾梳洗。相思漸老。菱歌又遠。漁竿醉倚。青鳥銜巾。文魚漾縠。舊愁休記。但低垂素靨。盈盈一水。伴鴛鴦睡。

摸魚兒 菱

占蒹鄉。綠瑩柔玉。一繩界斷秋水。瓜皮艇小穿波穩。采采溼衣空翠。涼影碎。聽隔浦清歌。驚破鴛鴦睡。堆盤更美。笑瘦削鞋尖。斜敲巾角。閒供雪瓷醉。任多刺。清勝蓮

房芡米。折腰情味如此。靈池漫道浮根弱。紅紫未黏泥滓。懷故里。記趁曉南湖、船聚人喧市。西風又起。悵桂權歸遲。菰塘路冷。夢繞碧雲裏。

齊天樂 絡緯

井闌啼碎金梧影。聲聲絹愁難斷。竹簟邀涼。瓜藤架月。煙外不勝清怨。纔聽又遠。認幽澗哀弦。被風吹轉。那得成絲。翠籠空飽豆花瓣。篝燈誰寄永巷。弄鴛梭軋軋。殘夜相伴。露溼侵籬。星寒映杼。應恨回文零亂。舉帷意嬾。況無婦驚秋。宋郎悽惋。自譜相思。淚痕凝翠管。

桂枝香 車螯

珠宮孕魄。趁怒潮乍歸。玉墮沙磧。蜚雨鯉風。瓜艇破帆如織。流涎不數江瑤柱。笑廚娘、纖手難擘。篠筐漁市。霜鋒奏響。乳膏香溢。舊曾聽、吳兒嘆息。道便解烹鮮。還住江北。蜆白蚶紅。偏占早春芳席。揚州路杳秋蔬冷。幾思量、膩脂瓊液。暗留文殼。燕支戲和鏡臺狼藉。

鶯啼序

春蠶乍驚夢醒。繡冰絲未斷。繡屏事、私刻琅玕。兔豪重訴幽怨。暗塵鎖、秦箏怕倚。哀  
弦一一啼霜雁。碎虛空、秋去無痕。絮雲輕散。記唱銅鞮。柳陰橫櫂。趁樊川漲暖。破  
苔徑、紫曲樓深。隔簾曾似識面。問芳年、晴梢荳蔻。頰潮暈、餘霞紅濺。小廊腰、蟾影窺  
盟。一輪剛半。蟬梳髮膩。麝篆心縈。尙相逢恨晚。鶯鶯啄、落花無力。酒醒人去。玦繫  
紅巾。驟分釵燕。瑤窗夜靜。青禽韻歇。驕驄猶認當時路。奈枇杷、門閉蓬山遠。連環易  
缺。單衣枉漬幽香。唾碧點滴珠串。梅陰孕綠。老葉沈溝。悵杜郎遇淺。古今恨、難填  
衛海。獨立斜陽。數徧棲禽。鬢花愁換。黃衫縱在。玉簫何處。垂楊空裏千萬縷。怕煙條、  
羞續他生願。淒涼燈外檀槽。醉拍偷停。翠尊淚滿。

四字令

霞紋睡顫。雲情醉懷。蛛絲飛墜。瑤釵對東風細猜。簾輕自開。鶯歸未來。隔窗小玉  
音乖。誤花陰鳳鞋。

紅情 海棠

東風生色。正錦幃障暖。猩紅雲密。我見猶憐。乞借微陰護傾國。一笑釵橫鬢。新睡起。娉婷無力。但玉肌、懶近熏鑪。遺恨在芳澤。狼藉破苔碧。看細雨釀寒。卷簾煙滴。畫闌漫拍。金谷春深酒懷窄。還怕輕妝未整。呼絳蠟。重尋蘭夕。悄未許、冰雪裏野梅聘得。

綠意 筍

西冷舊麓。記曉寒徑裏。冰苔曾劇。分與櫻廚。剝似蕉心。幾度醉拈香玉。驚雷忽破鄉關夢。又瘦認、襪羅雙曲。算好春、易過頭番。竟日畫闌憑獨。無那湖陰翠減。問誰更采筆。重題脩竹。回首東風。花暗禪房。燕子初來天竺。判教領盡煙霞味。怕一寸、詞腸猶俗。願少留、伴我清尊。莫放小庭幽綠。

陌上花

辛酉上巳同人修禊於蓮谿。迫事未赴。丁保齋示以詩譜。此書後

棠梨謝了。啼鶻無賴。又催春暮。一院襟香。迤邐倦鷗吹聚。破禪也帶看花眼。偏被柳

絲牽住。問青鞋甚事。年年芳徑。俊遊都誤。傍闌干向晚。飛來燕子。似笑韶華虛度。百感回腸。曲水算知愁緒。夢魂尙倚山陰榭。換了冷煙疏雨。恐他時再證浮杯佳約。鬢添霜縷。

好事近 癸丑冬與黃子湘同從軍於邗上重逢話別賦此贈之

帳拂曉星寒。倚劍共吟晴雪。多少新亭殘淚。又唾壺敲缺。琵琶弦上小滄桑。青衫怨秋月。霜外雞聲初起。任孤帆催別。

琵琶仙 賦琵琶

休撥鷓鴣弦。可知是、賀老風流銷歇。門巷猶憶。枇杷泠泠韻。淒絕。人去後、關山雁遠。賸環佩、夜歸荒月。古驛沙寒。幽閨漏永。都是嗚咽。漫重念、孤泊空江。恐司馬青衫淚。花疊。無限少年心事。對華燈低說。楓影外、千呼萬喚。替秋風、管領離別。怎又聽徹梁州。鬢絲添雪。

憶舊遊 竹抱軒消夏初集詠夕陽



正高城霽雨。獨客登樓。怕近黃昏。暮色明千樹。帶歸鴉數點。紅到柴門。醉顏更教長駐。天影散霞紋。趁暗柳涼蟬。深簾晚燕。重倒金尊。征人在何處。傍疏林策馬。頻問前村。渺渺煙波闊。賸亂帆半葉。掛上離痕。舊遊記尋湖畔。芳草嬾晴熏。自路隔雷峯。悠悠望絕東去雲。

南歌子

十樣蛾爭鬢。雙心麝細燒。無端風急石城橋。爲問莫愁艇子。倩誰招。舊影迷珠箔。新聲黯玉簫。相思猶是鬪纖腰。只怕行人。愁見柳千條。

小重山令 與保齋話揚州湖上舊遊

十載虹橋買醉時。攜尊梅樹下。說相思。三生杜牧恨來遲。紅樓外。鶯老綠楊枝。愁弄玉參差。銷魂春去也。鬢絲絲。惜花心事已全非。西風怨。惟有白鷗知。

慶清朝 消夏第二集詠秋露

桂冷千山。葭蒼一水。西風咽斷蟬聲。羅紈夜潤。招涼黏溼。疏螢明月不堪贈與。披衣

愁惹故鄉情。還驚起、蕉陰睡鶴。獨唳空庭。更念漢宮舊事，賜近臣消渴。醉滛金莖。烟淒蔓草，銅僊清夢遲醒。翠盤又傾碎玉，藕花香杳，淚珠零。休分付、一枝湘管，寫怨秋屏。

萬年歡 卽席示李冰署郭堯卿兼寄周瀟碧淮陰用史梅谿韻

海畔閒鷗趁蕭齋夜涼。同賦團雪。又是疏簾吹雨，蕙枝香發。漫訴瓊簫舊怨。怕酒醒、垂楊淒絕。而今便、不夢揚州暗愁消瘦詩骨。尊前壯心易歇。聽山陽倦笛，何事輕別客裏登樓。都換故鄉雲物。多少西園俊侶，待共覓、梭鞋青襪。問恁日、願曲人歸。畫欄重醉秋月。

空 詞

青  
運 彰  
圖

館



邊浴禮

字夔友。號袖石。直隸任丘人。道光二十四年進士。官至河南布政使。博聞宏覽。於書無所不讀。時以才子目之。所爲詞清和諧婉。有南宋人風味。著有健修堂集。

序

邊君袖石問詞法於陶彙齋先生。得不傳之祕。在天雄幕中。所作甚多。近游洛州。出以相示。宮商要眇。分刊脗合。並皆佳妙。體物尤色色工絕。類樂府補題中語。蓋詞以南宋爲正宗。北宋諸公。猶不免有粗豪處。稼軒龍洲後村。流派原本東坡居士。但別有寄託。未可以一例視也。金風亭長句云。我旣愛姜史。君亦厭辛劉。願與高賢共勉之。戊戌九秋。樵李沈濤識於廣平郡齋。



空青館詞

任邱邊浴禮袖石

燕京八景詞

木蘭花慢 瓊島春陰

上林韶景麗。仙籞曉。聚彤雲。繞瑤筍千株。錦苔潤浥。螺黛濃皴。嶙峋。數峯孕秀。儘籠  
煙。織暝畫難真。合殿罨。罨遠映。瓦鴛青。混魚鱗。尋春繡陌無塵。綠壁沼。過雕輪。望  
嵐翠空濛。花光蘸水。柳影隨人。經旬雨晴未定。想峭寒。吹滿鳳城闔。祇有海棠幾樹。  
護將紅雪繽紛。

又 居庸疊翠

望蒼然疊巘。朝絳闕。竦千層。任北翥西連。巖關鎖鑰。直拱神京。新晴碧尖削出。似嶽  
蓮。翠葭勢孤撐。秀映銀泉列笏。奧分鐵壁開屏。雲扃策杖攀登。沙塞紫。海門青。儘  
引睇憑虛。蜚狐倒馬。無此峻嶒。承平漸忘險阻。抱雄心。誰是棄繻生。安得孟陽健筆。

摩崖試勒新銘。

又 盧溝曉月

渾河東逝急。鼇背竦。駕飛梁。正畫角吹殘。珠杓半隱。曉色蒼蒼。微茫。碧空似水。掛當頭。斜月一梳涼。瓊暈澹搖岸影。晶輝皎射波光。嚴裝。倦旅攜將。歸夢短。客途長。渡渺渺虹腰。泥痕映雪。板跡迷霜。郎當馱鈴韻遠。祇素娥、無語笑人忙。茅店雞聲歇了。遠林紅上朝陽。

又 太液秋風

渺晴漪萬頃。空與水。共澄鮮。乍一夜商聲。井梧葉墮。秋信遙傳。蜿蜒。石鯨橫臥。滿波心。鱗甲動蒼烟。歎雪涼招雁浴。鎔銀靜擁鷗眠。洄沿。錦纜低牽。疏雨夕。晚霞天。挹爽籟泠泠。絲飄翠荇。粉墜紅蓮。年年水嬉肆過。看中流。簫鼓汎樓船。咫尺影娥近接。桂輪清門嬋娟。

又 金臺夕照



荒陂經督亢。關樹冷。塞雲孤。問百尺高臺。昭王去後。駿骨存無。空餘半規落照。映蒼烟。喬木兩三株。驛埃丹青黯淡。寺樓金碧模糊。踟躕。弔古停車。尋往迹。總蕭疏。祇一綫桑乾。崩濤濺雪。淘盡雄圖。城隅角聲送暝。漸黃昏。林際欲棲鳥。隱隱。斷霞魚尾。暮沙蕃馬平蕪。

又 薊門烟樹

望黃沙。泱泱環雉堞。暮烟浮。正霞染丹楓。霜雕錦榭。林麓清幽。誰留。薊門故址。被苔花埋沒。幾經秋。莫問慕容銅馬。茸茸綠草平疇。金溝積水交流。波色冷。葉聲稠。賸野店青帘。僧藍白塔。招客閒遊。凝眸。碧雲暮合。送斷鴻。天末去悠悠。祇有洗妝豔迹。春風依舊高樓。

又 西山積雪

恰天花散罷。裘袂冷。朔風嚴。指丹鳳城西。危岑疊嶂。齊擢瑤尖。巉巖。玉龍蛻骨。訝碧空。高倚劍鋒銛。匝匝銀封石齒。鬢髮粉綴松髯。珠龕脊隱蒼巖。飛瀑凍。水晶簾。想

澗曲梅開。峯坳蘚滑。策蹇愁探。巡檐幾番拄笏。聳山肩。粟起暮寒添。待掃瓊英試茗。竹爐雲液回甘。

又 玉泉趵突

澄湖瀦裂帛。靈液滿。注巖椒。傍石竇奔濛。烟霏霧結。雪歎雲歎。周遭練痕曳白。是驪龍爭把頷珠拋。聽去聞根頓靜。琅琅琴筑笙璈。涼飈吹度林梢。麩茗盃。漱詩瓢。伴翠澗松聲。幽溪竹籟。一味清寥。滔滔出山何事。算東華塵土洗難消。且續滄浪妙詠。濯纓小憩僧寮。

高陽臺

柳髮霜髡。苔衣雨坼。夕陽紅上孤城。風翦雲羅。昨宵偷放新晴。秋光不管人腸斷。斷腸人。翻愛秋清。小銀塘。彫了殘荷。荒了枯萍。僧樓半角蒼烟織。記香迷稚蝶。絮攪雛鶯。一夜涼颼。陰陰換作蟲聲。臨流悄向沙鷗說。算蕭騷。誰更如卿。悵歸途。楓葉蘆花。無限飄零。

八聲甘州

背銀燈。敲折玉搔頭。舊曲記都訛。望娟娟一水芙蓉老盡。秋滿關河。幾度夜深尋夢。涼意透衾窩。起寫相思句。帕展輕羅。欲把閒情抹去。奈金壺墨澹。不敵愁多。儘判花問柳。歲月總消磨。憑寄語、青樓俊侶。向何人、席上注橫波。應否念、樊川小杜。絲鬢婆娑。

洞仙歌 秋曉

曉天一碧。映鷗沙無際。捲地西風響叢葦。正林楓葉冷。籬豆花疏。柴門外、亂糝丹黃紫翠。雁奴三五輩。結隊衝烟。渺渺銜蘆渡秋水。船尾老漁翁。半掩蓑針。還偎著鷺絲同睡。漸隔渚、僧樓澹紅牆。有鴉點零星。木魚驚起。

滿庭芳 詠長平箭頭

蛟脊磨穿。狼牙敲折。焦銅徑寸離奇。土花紅繡。腥血冷淒淒。想見銛鋒貫札。沙場上、巧詫由基。秋宵黑。摩挲舊物。忽憶銳頭兒。當時秦趙壘。金戈雨驟。鐵馬風馳。笑杜

郵伏劍。鳥啄殘屍。欲弔長平坑卒。興亡恨。此日誰知。休拋卻。千年戰鬼。重見惹悲啼。

西江月 聞歌

霜掣一繩白雁。烟埋十里丹楓。歌喉隔巷裊秋空。拂拂梁塵飛動。往日詩顛酒惱。而今竹嬾絲慵。檀槽脆度菊花風。寬盡沈郎帶孔。

徵招 接友人札追感舊游有作

吳霜糝透樊川鬢。維揚舊游如昨。攜手向旗亭。戀萸纖一握。音書傳別後。惱春夢。無端驚覺。扇底香消。箏邊歌斷。鏡中花落。梁燕縱多情。銜泥到。難認那人簾幕。儘力鑄相思。聚黃金成錯。朱樓高百尺。問誰覓。葳蕤仙鑰。更雕籠鸚鵡。聲聲把。渠儂調謔。

唐多令

銀鑰響紅閨。文犀鎮翠帷。猛回頭。前事都非。記得玉人顛頰甚。扶病起。送郎歸。柳帶綠垂垂。燕雛相對飛。倚闌干。愁蹙雙眉。薄命桃花春不管。禁幾度。曉風吹。

一翦梅

小小蘭房夜不扃。燈下調笙。膝上握箏。歌喉一串玉瓏玲。徐度銀屏。冷迸秋星。一別青樓萬恨生。烏帽飄零。紅粉鈴螿。舊游回首欠分明。春去無情。花落無聲。

洞仙歌 芭蕉

東風著力。拓仙家寶扇。五尺生綃妙裁翦。愛清陰密鎖。黛色濃抽。紅窗小。卍字紗櫺遮暗。含情誰似爾。露壓烟啼。歲歲芳心背人卷。無計避秋宵。涼雨聲聲。敲徧了小亭空館。儘畧得、南洲美人名。也翠袖天寒。淚花凝茜。

九秋詞 和沈匏廬太守韻

霜葉飛 秋林

明霞半繞疏林隙。空山都是斜照。綠杉蒼榭一株株。早被西風掃。漸幾葉、江楓醉了。嬌紅不比春花少。甚秋色、年年算祇有、長安渭水。搖落偏早。好去隴首亭皋。搯筇背錦。朋同事幽討。寒鴉對語訴飄零。愁滿秦川道。任彳亍、憑高凝眺。暮煙涼浸參軍帽。怕從今、減清陰、不庇哀蟬。夜深吟悄。

憶舊游 秋寺

記潭空。暝雨。堂古留雲。曾咒龍歸。梵宇西風急。看雕甍紺瓦。都帶清暉。諸天妙香吹散。寒翠徑松迷。對塔影亭亭。暮煙如水。涼透僧衣。人稀。曳芒屨。踏半廊殘葉。消盡塵機。一杵疏鐘響。恁發儂深省。偏在招提。零落瞿曇真相。苔色繡珠眉。賸蟲語空階。青熒燈火獨掩扉。

瑣窗寒 秋煙

絮雨分晴。羅雲迷爽。碧空微黯。一痕飄動。知是那家樓館。正衰陽、絲絲弄秋。暮愁互滿。霜蕪苑。更江楓霞抹。洲蘆雪積。溟濛遮徧。橫斷疏林半。恁墟里依依。不分真面。偶然拉破。識是社前歸燕。暈斜陽、長亭短亭。模糊水墨鴉陣遠。望天涯、暝色消凝。惹起征人怨。

聲聲慢 秋砧

苔深畫檻。葉墜瑤階。碧空皓月剛圓。入耳悲涼。誰家玉杵驚寒。淒音乍沈還急。正霜

飛雲母簾前。憑擣就。流黃成匹。錦字迴環。知否塞垣迢遞。仗餘酸空外。爲報平安。欲寄征袍。龍沙戍客誰憐。西風半城愁聽。恍經過。嬖女祠邊。聲更遠。料瓊閨生怕夜眠。

玉漏遲 秋杪

高城涼月滿。樓笳罷奏。寺鐘停轉。擊戩何人。繁響十分悲婉。秋冷銅街似水。認隔巷一燈紅遠。風刮顫。喚醒倦客。驚嗥寒犬。可是警夜森嚴。有虎旅傳來。柳營桃館。曙色關門。何限旅愁鄉怨。莫誤郎當征鐸。總一樣。長途聽慣。歸夢短。蝦蟆六更敲斷。

疏影 秋燈

秋陰織暝。卷畫屏六扇。暮色清冷。薄炷冰荷。纖手移來。紅奩閃睽生暈。忍涼坐待金蟲結。怕簾隙。峭風吹恁。怨天涯。歸信難憑。夜夜守殘孤影。小膽空房易怯。竟牀擁翠被。尙留餘燼。錦帳幽歡。羅箔星期。夢裏幾回追省。蘭膏流賸。相思淚。便挑也。何會挑盡。漸粉蛾。飛散無蹤。空拔玉釵相等。

綺羅香 秋衾

華羽綾織。神絲錦膩。幅幅製先秋節。擣麝濃熏。剩喜舊香難滅。記陳宮、寶鴨溫餘。有蜀沼、文鴛眠歇。幾多時、風雨淒清。象牀獨擁到今夕。新寒料峭。依戀。憶否合歡芳會。繡池層疊。翠館參橫。盼斷宵征人迹。儘玉樓、凍合頻偎。任紅浪、翻來慵揭。倚蚊幃、夢醒巫峯。墜歡誰共說。

翠樓吟 秋蟬

翠柳霞明。青蕪雨過。夕陽黯澹收盡。一絲疏欲斷。早勾起、離亭新恨。商飈潛引。想綃翼嘶殘。瓊綉啼損。林逾靜。暗中催動。漢宮秋信。孤影自顧。翛然念居高聲遠。賞音誰認。露華能幾許。恁抱得、枯枝偏緊。泠泠清韻。倩玉軫冰絃。譜成幽迴。霜飛冷。仙蟲社散。漸雕塵鬢。

月華清 秋蟲

露冷瓊疏。煙迷鈿砌。秋聲直恁淒苦。乍咽還啼。似把舊愁頻訴。警節序、纔譜幽詩。助



歎息如傳歐賦。幽緒甚。曩來多在綺樓朱戶。翠幌疏燈搖暮。想哀怨難禁。夜深風雨。半榻新涼。惆悵夢初回處。儘傷心。候館離宮。記傾耳。豆棚瓜圃。凝佇。憶深閨人起。暗尋機杼。

一萼紅 落梅

惹魂消。一聲聲翠羽。啼過段家橋。籬角春濃。樓心日暖。何來晴雪飄飄。想心戀、孤山逋客。曳縞袂、追入碧天遙。緜蒂零星。難填恨髓。已種愁苗。長憶苔柯竹外。逞半酣粉靨。特恁丰標。笛怨華年。波沈瘦影。仙雲飛去難招。算只賸、玉鱗香徑。黃昏月、冷浸碎瓊瑤。誰更拾他嬌。妬。皺上冰綃。

南鄉子

纔見又分離。小立風前淚濺衣。記得去年曾握手。誰知。重唱陽關一曲詞。強笑捧金卮。別後音書到恐遲。千里夕陽千里月。相思。多在燈昏被冷時。

金縷曲

更欲投何處。謝東風、飄然吹送。天涯愁旅。京國緇塵空染袂。重裊吟鞭南去。把蕩子、頭銜新署。酒冷香消旗亭夜。指檀槽、誰唱黃河句。絃未絕。淚如雨。梨花寒食中原路。記瓊閨、纖腰佞並。手提金縷。楊柳樓臺青黛暈。斜日遠山無數。渾不似、那人眉嫵。春入琴心聲聲慢。只釵盟鏡約成孤負。空目斷。茂陵女。

風蝶令

黯黯雲如墨。垂垂雨似繩。殘春天氣思瞢騰。那更薄羅、衾展半牀冰。夢斷高樓笛。寒欺小閣燈。魚絨香護鶴文綾。早爲蕭郎、傳恨到東京。

國香慢 春蘭

密葉低叢。裊翠羅裙帶。嬌嫋輕鬆。江空楚魂初返。淺笑東風。移傍杏紗櫺側。瑣窗小、暗麝潛通。芳心裁一寸。何事人前。加倍薦紅。故鄉春正好。記瑤葦露孕。縹蒂酥融。盈盈啼眼。良夜端正窺儂。老去逢仙張碩。相思苦、歸夢惺忪。都梁渺何許。絃罷離騷。早理烟篷。

尾犯 春筍

烟村籬背。努玳尖幾束。輕雷扶起。芳根不用銜蟬引。漸鄰牆添翠。芒鞋蹴折。孕曉露、清如水。憶家山、十畝芳塍。料應春韭同味。雅稱廚娘纖指。香苞重疊剝碎。愛筠衣削玉。鬆不黏唇。滑難勝齒。燕子年光。櫻桃街巷。夢魂都脆。拉園丁、癡咒喃喃。暖風休展鳳尾。

鵲踏枝

訪故明周邸宮址

岸草汀蘋風簸蕩。柳髮千絲。黃入誰家巷。古礎方花平似掌。落紅如雨深深葬。凝碧池空停畫舫。春水生時。燕子頻來往。寶瑟銀箏都絕響。憲王樂府無人唱。

高陽臺

桂魄籠烟。蒲牢警夜。市樓夜火星星。倦擁香衾。薄寒侵透吳綾。故鄉有夢休輕作。算今宵、猶是初程。鎮無繆。曲壓檀槽。酒點銀瓶。年年春色催離別。悵鶯邊惹恨。雁底傷情。怕折垂楊。舊愁都在長亭。清明遮莫來朝是。徧天涯、芳草青青。更堪他、飛絮飛

花隨路飄零。

玲瓏四犯 竹簾

庭院深深訝一翦涼波。當戶扶起。織恨穿愁。巧樣天然丁字。楚夢遠隔黃陵。恁湘女、  
淚痕猶漬。倚雕櫺。欲捲還慵。香在博山鑪裏。碧闌干影空於水。裊蝦鬚。月尖風碎。  
玳釘銀押都依舊。只覺心情不是。甚日重看梳頭。鈎徧眞珠十二。聽曲瓊搖漾。聲陡  
觸。鸞釵墜。

瑣窗寒 紗窗

冰璽鑄紅。網絲界碧。紋紗新補。篩煙罩月。隔斷纖塵來路。背朱櫺。嫩涼襲衣。柔颺減  
盡些兒暑。愛廊腰花放。看時微暈。一層香霧。深護消魂處。記斂息偷窺。凭肩私語。  
驚鳥啼徹。曙色催人歸去。賸金荷。無燄剔殘。暗蟲亂打。渾似雨。想瓊閨。妝罷沈吟。同  
此相思苦。

綺羅香 羅帳

蕙葉銷金。蓮華盛繡。斗帳偏宜長夏。八尺宮羅貼壁。冷光新研。延月白、霧縠空搖。映燈紅、水紋低瀉。控流蘇、烟縷垂垂。文犀銜角玉鈎掛。桃笙斜展，睡覺最愛枕函茉莉。暗香霏麝。分付柔飈，不許吹開微罅。悵久隔、幽夢行雲。盼重訴、合歡情話。記當日、暖撒芙蓉。男錢相對灑。

玉漏遲 藤枕

斑珠鬢寸翦。方花織就。錦紋深淺。當暑橫陳。溫玉臂支初換。永晝北窗臥處。有紗帽、隱囊相伴。涼思滿。潔俚綃幕。滑依冰簟。舊日妝閣同欵。憶虎魄光凝。鬱金油染。嬌困萱騰。低墜翠鬢一半。別後紅蕤空設。有誰拭雪肌香汗。推又戀。清宵夢回人遠。

月華清 螢燈

屏角風柔。廊腰露溼。一星流過芳徑。薄翦蟬紗。小立桐陰潛等。覩瑣碎、紈扇兜回。驚閃爍、玉纖籠定。無影。喜冰紋六幅。罩來幽靚。好是香閨夜永。掛茉莉梢頭。折枝扶襯。碧燄玲瓏。誤卻粉蛾飛近。窺淺夢、燭暗銀牀。添涼思、月沈金井。微燼待來宵攜照。

柳昏花暝。

齊天樂 蓮蓬

曉涼雨過紅衣卸。漣瀦綠雲低護。鬢褪宮黃，笠翻羅翠，捧出芳苞無數。波心拗取。愛鴨觜船輕，載來吳女。入手欹斜，覆盂濃瀉早秋露。蒼洲記會蘸影，照微彎象鼻，珠顆懸乳。多子牽情，空房惹恨，欲擘又還凝佇。芳心最苦。恁竟體柔絲，裊成千縷。尙憶風亭碧筩消嫩暑。

長亭怨慢 秋荷

漸狼藉、銀塘風露。翠蓋欹斜，臥波無數。澤國寒輕，故衣零落，倩誰補。曉煙低護。遮不了、雙棲鷺。祇目斷殘陽，正三十六陂秋暮。前度記芳醪滿勸，折取碧筩消暑。鬧紅人散，悵愁滿、葦汀菱溆。最無奈、酒醒烏篷，儘聽徧、半湖涼雨。賸香飯新炊，包著雕胡歸去。

八聲甘州

清暉書院面城枕河，荷塘十餘畝，紅香冶麗。擅一郡之勝，頃因歲

旱塘涸亭臺未改游屐漸稀余以戊戌九秋挈桐鄉勞介甫南樂段筠坡同  
來訪之天空沙闊四顧蕭然黃蘆有聲髡柳餘碧因填此調以酬寂寞並誌  
游蹤

渺空蒼望極悄無人。高樓與雲平。正煙霾斂盡。殘陽倒射。紺瓦朱甍。曲徑霜蕪暈綠。  
溼葉糝漁汀。便有江湖思。畫舫低橫。一自淩波珮解。悵重尋勝引。難賦紅情。任泉  
枯石瘦。臺榭鎖幽清。賸愁人。衰楊幾樹。裊長堤。吹老舊秋聲。西風緊。一繩涼雁。瞥過  
荒城。

### 齊天樂

碧雲界破殘陽影。敲春數聽疏雨。塘澀冰漸。隄迴草夢。人在畫樓凝佇。垂楊自舞。望  
千里蘅皋。舊愁來處。寶帚塵封。倚闌空索綵桃句。年華頓成過羽。甚東風薄倖。離  
恨吹聚。麝帕香盟。鸞釵密約。禁得幾番孤負。星郵路阻。盼不到天涯。洞簫庭戶。綠漲  
烟深。斷魂雙燕語。

疏影 水仙花

湘皋春曉。訝宓妃出浴。步下瑤島。襪窄凌波。靨淺含烟。霓裳舞罷猶裊。鉛霜密護宮羅蕊。總不惹、蝶嘖蜂惱。占汀洲、雪汜沙昏。依約采珠人到。環珮空歸夜月。飛瓊照瘦影。幽恨同抱。欲喚冰魂。江路清寒。蹙山亭亭風貌。朱絃十五聲危咽。忍重譜、怨琴淒調。賸翠裙、幾褶娉婷。目斷水空天渺。

玉漏遲

短亭攀稚柳。宮腰一捻。碧絲千綰。香絮茸茸。都是相思搓就。忍憶鶯邊訴別。幾折贈、萸苗纖手。分攜久。薄寒天氣。中春時候。底事飄泊江潭。對此樹依依。繫情偏又。顚淚凝珠。滴滿翠尊瓊酎。天遠秦樓甚處。料靜夜、難乾蛾袖。催人瘦。歸鴉數聲低咒。

聲聲慢

桐鄉勞介甫暨淑配沈芷香女史俱工爲詞。余來洛州。出所撰桐陰

詞相示。紅閨雅製。亦得時窺一二。大都丁當清逸。一掃閨襜。冶習介甫詞引

商刻。羽尤有碧山玉田之風。雨窗獨坐。循諷不已。爲題此詞。介甫常僑居揚



州故詞中及之

鸞綃寫韻。象管圍香。秦臺攜手飛瓊。一寸琴心。都付銀字雙聲。江南俊游天遠。悵竹西、歌吹誰聽。留滯處、只微雲句好。畫徧旗亭。難得春燈同翦。任籌花鬥酒。慰我飄零。清致翛然。賣洲笛譜翻成。珊瑚幾回擊碎。怕龍吟、喚起豪情。訂後約、坐桐陰、同話舊盟。

浪淘沙

題沈巖莊寸草春暉圖

芳草色芊緜。綠暈湘烟。春暉暎夢北堂前。寫到紅心裁一寸。清淚如鉛。往事倍淒然。霜萎庭萱。蓼莪詩廢十多年。任爾卷施都拔盡。此恨難湔。

高陽臺

帖屋星黃。窺窗月縞。畫廊十二悒悒。闔了銅籠雲譙。虬點初沈。柔飈一翦涼於水。比秋光、先到園林。洗桐梢、重露無聲。滴上羅襟。闌干刻徧相思字。悵碧璫緘札。屢誤佳音。冷雨疏槐。空傷節序侵尋。哀蟬啼到三更住。怕撩人、清怨難禁。夢紅閨、香減銀

奩。塵。網。瑤。琴。

清平樂

征鴻過去。拋下愁無數。靜夜水沈香一縷。聽盡亂蛩疏雨。舊家庭院紅樓。畫簾不捲。深秋如此淒涼天氣。可會籠上瓊篝。

月華清

歌郎蕊仙醒香主人侍史也曇華猛謝倩影空留主人繪清宵憶月  
圖用誌悲悼石頭居士讀而傷之爲綴此詞

雪魄難圓。冰魂易缺。名花彫盡風雨。碧海青天。此恨怎生分付。墮塵劫。些少年華。翻豔曲。幾多愁譜。歸去。悵彩雲飛散。總無尋處。小像櫻桃一樹。儘熏徹沈檀。不關淒楚。憔悴潘郎。吟斷鬢絲幾縷。鴛牒在。淚凝紅冰。麝骨冷。冢平黃土。題句。只墜歡如夢。那堪重訴。

望江南

憶津門舊游十五首

津門憶。最憶是河豚。玉盃光寒凝乳汁。瑤肪味膩沁牙齦。苦苣嚼同心。

津門憶。芍藥最關情。金縷囊。香棗鬢。玉盤盂。插古銅瓶。首夏賣花聲。  
津門憶。纖手摘櫻桃。黃篋籃兒紅豆滾。赤瑛盤子蠟珠拋。脣樣十分嬌。  
津門憶。消夏百梅湯。桂蕊香浮蕉葉淺。冰絲冷滌蔗梢糖。銅盞響丁當。  
津門憶。香玉搯繽紛。穿個繡球圓似月。掛來紗帳爛如銀。夜擁薛靈芸。  
津門憶。茉莉綻芳苞。不耐檀郎熏綠茗。潛呼小玉裹紅綃。暗麝滿裙腰。  
津門憶。新到橘千頭。剡殼點燈紅奪錦。帶瓢壓餅簸成毬。剖出洞庭秋。  
津門憶。飽喫內黃侯。蜀國風情薑細糝。菊花天氣酒新篘。那管有監州。  
津門憶。鱗族鱠銀絲。網罩水晶人樣子。筐傾筆玉溫尖兒。白小味輸伊。  
津門憶。仙卉傲殘冬。舊譜有名呼雅蒜。孤芳無子類慈蔥。波濺玉玲瓏。  
津門憶。憶煞水西莊。樓影動搖新綠水。柳絲斜搭淡紅牆。僧語雜興亡。  
津門憶。小巷枕官河。漆研板扉青悄悄。烟皺瓦屋翠羅羅。門內麗人多。  
津門憶。二月門風箏。斑竹擘分蝴蝶翅。彩繩高曳鳳皇翎。徹夜響棖棖。

津門憶。記在帶河門。是處畫船縈錦纜。誰家飛轎逐黃塵。海氣一天渾。  
津門憶。風景似揚州。老去樊川春夢破。鬢絲零落不禁秋。辜負少年游。

賀新涼 題陳侍御慶覃悼亡冊

畫省彈蕉手。有蛾眉、朝衣捧著。代聽清漏。生小芙蓉江上住。盛鬢豐容娟秀。稱才子、  
金閨嘉耦。底事曇華纔一現。甚是風吹損靈和柳。華嚴劫。刹那驟。粉郎一慟成消  
瘦。玉鴉叉、展來遺挂。碧紗窗牖。留下斷腸花幾幅。露葉風枝僞憊。都化作、相思紅豆。  
成佛生天無是處。盼韋簫、膠合來生又。淚謾滴。豸袍透。

齊天樂 題戚小蓉齏菜根圖

芳畦幾稜秋容淡。嘉蔬綠縈籬背。小摘含香。微烹帶汁。紫甲紅丁相配。輕鬆叩齒。便  
不數江湖藕。鮮菱脆。鹽豉休加。味含風露自然美。知君託意高潔。笑人間肉食。一  
例堪鄙。鱸瓮封餘。鱸鄉夢遠。添奉北堂甘旨。柴扉穩閉。話老圃心情。英雄身世。小立  
攬鉏。豆棚斜照裏。

疏影 畫芙蓉

蔦紅一翦。向楚江深處。描出清怨。弱不禁愁。嬌欲含顰。西風壓幘吹晚。涼波浸影。渾無語。暈半頰。脂痕濃澹。算汀洲。無數秋芳。不似此花幽豔。長憶峯來木末。含悽弔正則。騷賦吟徧。霞外銀塘。夢裏仙城。香霧冥冥人遠。年華遮莫。傷遲暮。尙拒得青霜無限。剩文鴛。宛頸相偎。暎上畫屏雙扇。

沁園春 答陸費芝卿

路指樊輿。城郭依然。重訪舊游。笑半肩行李。塵欺短劍。一天風雪。冷逼重裘。阮籍途窮。張儀舌敝。刺字消磨何處投。旗亭句。儘雙鬢低唱。難撥羈愁。雲間小陸風流。肯臥我。元龍百尺樓。喜燈前擊鉢。箋分蜀郡。花間洗罽。酒進涼州。僕病疏狂。君懷磊落。語不驚人死不休。生平事。試交尋爰灌。兒命融修。

芳草

翦難分。嬌煙凝翠。望中盡是離愁。暖風南浦外。香蕪繇邈。綠過汀洲。尋春春更遠。但

黏天芳意悠悠。試緩步。裙腰六幅。熨帖溫柔。耽游。雕鞍錦埒。王孫老。未說歸休。西園蝴蝶亂。玉人攜手。地弓印應留。韶華容易改。悵紅心。知爲誰抽。暗悵詞。柳絲漸少。莫去登樓。

壺中天

煙深波渺。悵海天斷夢。飛向何處。起拓烏篷。然絳蠟一穗。濃吹香霧。過雁驚寒。歸漁唱暝。不抵清吟苦。鸞綃砑損。悲春自摺新譜。已是聽水聽風。淒涼百種。更瀟瀟夜雨。飄泊江湖。恁草草換得鬢絲如許。燕子簾櫳。柳絲池館。俊約成孤負。回腸九折。暗潮嗚咽東去。

齊天樂

春流碧玉微茫裏。扁舟繫來疏柳。綃幘圍香。羅襟搵翠。記得臨歧攜手。離腸暗逗。分萬斛相思。各天消受。犀押簾空。靚妝還似別時否。丁沽弭棹重問。紅芳歌吹遠。樂事難又。巷冷銅駝。箏閒金雁。何限傷今感舊。年華水溜。只老去劉郎。不禁傷憊。試問

歡場夢中誰最久。

木蘭花慢

天涯芳序早。裁上巳。又清明。正薄暖餘寒。池臺黛淺。樓觀烟輕。牽情柳絲萬軸。織宮黃、嬌靚護啼鶯。翠榭連村。貫酒玉簫隔巷吹飭。消凝。十里旗亭。鳴弱艫。趁歸程。念油壁車閒。秋千索散。冷落香盟。杯行莫辭到手。只清愁、祓了又還生。倦倚東風小立。醉魂怯聽瑤箏。

西子妝慢

花韻霏紅。茶煙攔翠。寂歷綠陰庭宇。枝頭小鳥帶酸啼。問濃春、爲誰歸去。東風斷後。頓拋下、天涯愁緒。更撩人、是鄰牆楊柳。亂吹晴絮。緘新恨、鳳紙裁香。題徧消魂語。錦袍烏帽事英游。甚年華、易成遲暮。留鶯縮燕。總難忘、舊盟鷗鷺。待何時、羅帳燈昏聽雨。

雙雙燕 用史梅溪韻

杏梢粉墜。糝一味春愁。畫泥香冷。烏衣舞舊。怯伴曉鶯飛並。自別風簾露井。便栖也。何曾栖定。幾回覓徧巢痕。塵鎖茜紗窗影。花徑苔紋綠潤。忍忘了盧家玉容嬌俊。海天寥阻。微雨織成新暝。何處雕梁睡穩。好盼到社前歸信。省他十二朱樓。鎮日澹妝人凭。

慶清朝慢

友人齋中見白芍藥花清麗可念惜其行將落也有觸於懷爰綴

此詞

瓊蕾無塵。仙葩有韻。生來秀骨玲瓏。綃衣表潔。一枝獨占珍叢。可惜素心難託。嗟遲暮。殿卻春風。真孤負。蛾眉色澹。獼髓香濃。倘使移栽畫省。怕翻階靚影。妒煞薰紅。芳時過了。凝酥掃地全空。狼藉玉盤新樣。再無清賞似坡翁。銀屏角。年年開謝。知爲誰容。

齊天樂

題楊伯夔刺史所集蠶紙詞

詞壇韻事消磨久。老成半彫風雨。閣冷茶烟。樓空琴畫。誰指贛洲遺譜。良工心苦。把



碎錦零紈。拾來無數。別有深情。弁陽佳製共千古。蠶眠字題矮紙。香名拈獮祭粉。贖新暑。花外瓊簫。尊前銀字。不數西泠南渡。玉臺親序。是悱惻溫磨。賞音人語。珍重琅函。雉頭傳片羽。

風蝶令 題華竹庫鳳山得佩圖佩爲象牙所雕面刻宋賈昌朝玉樓春詞一

闕有子明小印週圍約五寸有奇製作精妙蓋北宋故物流轉於南渡後者  
竹庫得於西湖鳳凰山下索賦

仙佩脂同滑。香詞錦不如。子明小印刻連珠。不省何年。拋擲向西湖。玉馬朝周遠。紅羊換劫餘。六陵風雨冷青蕪。誰記舊京。當日賈姑姑。賈姑姑事見東都事略昌朝本傳

百字令 游永寧寺

綠陰多處。喜華鬢法界。房開青豆。花外風飄疏磬語。早有瞿曇招手。髮蔓藤垂。芳筠篠嫩。鋪地苔茵厚。石牀小憩。妙香吹下晴晝。迎面一桁遙山。曉來雨過。展放修眉

皺。此地蒼寒宜散髮。撲去紅塵盈斗。馴鴿飛還。定猿眠熟。雲氣涼吹袖。諸天金碧。佳游彷彿靈鷲。

洞仙歌

闌風薦爽。攪半空疏雨。點點聲聲灑窗戶。看波涼簾押。潤裏琴絲。縹暈閃。一朵釭花微吐。離心澆欲碎。如此深宵。不省淋浪甚時住。天遠雁書沈。數盡蓮籌。比往日。江湖淒苦。纔夢到天涯。猛驚回。憶紅燭歌樓。舊曾聽處。

水龍吟

題金亞伯廉訪大江汎月圖

水天一色空濛。大江日夜東流去。鯨波不動。鱗雲乍散。兔華新吐。倒影凌虛。冰輪浴彩。練光搖霧。看朱旗畫舸。文星過處。聲伊軋。聞柔艣。招手金焦對語。倚篷窗。錦袍凝佇。濤崩雪捲。瓜洲燈火。秣陵煙樹。對此茫茫。料應祇憶。瓊樓玉宇。試攜將鐵笛。臨風三弄。喚魚龍舞。

摸魚子

又題辛夷花館圖

占先春。緋桃穠李。公門舊種無數。耽幽別。拓閒池館。移種平泉嘉樹。苞乍吐。正文杏  
飄香。隔葉黃鸝語。倚欄凝佇。愛粉嫩含毫。脂溫脫穎。豔奪綉川塢。薇階靜。彩筆濃  
沾仙露。綠章封事親署。西京異卉傳新雉。繙取元亨遺賦。臨澗戶。看一品宮袍。匝  
彤雲護。清吟漫與。算不比年時。杜陵野客。開落怨芳序。甘泉賦列新雉於林薄師古  
注新雉卽辛夷也

齊天樂 贈鍾崧生

十年沾上春風夢。樊川醉魂醒未。錦瑟幽悰。金荃妙筆。肯被微官羈縻。相逢笑指。恁  
吹老緇塵。鬢絲霜脆。泥瓜重尋。蓬萊清淺舊游地。黔陽解裝隔歲。詩瓢和藥裏。輕  
擲流水。瘴雨飄黃。蠻花織茜。不洗騷人愁髓。蕭寒滋味。怕客榻孤眠。綺懷勾起。自譜  
香詞。碧窗銀燭底。

又 訪遼后洗妝樓故址

薊門淺草殘陽路。脂香粉痕猶賸。倭鬢盤鴉。鬢鬆貼翠。過雨山鬢微整。遺墟暗省。記

花簇瓊梳。柳圍珠鏡。一桁晶簾。開妝低鞞。綠雲影。千年玉容誰在。御溝波寫怨。曾照嬌靚。述律宮荒。觀音院圯。鵲淚苔花紅凝。繁華夢醒。祇塔火宵熒。戍煙秋冷。魚尾霞收。月眉窺夕暝。

木蘭花慢

贈陸費端卿

朱弦絙錦瑟。彈古調。與誰聽。笑蕙帶荷衣。緇塵未浣。重話漂零。芳年夢中催換。怕霜林、鷓鴣怨秋鳴。花外香詞銀字。酒邊法曲瑤笙。陸郎彩筆多情。比屋締鷗盟。愛芳草吟餘。梅花賦就。別樣幽清。心憐故人騷屑。渺江關、愁損庾蘭成。借爾衍波箋紙。曉寒同贈飛瓊。

齊天樂

題謝信齋瓦當文拓本用楊伯夔刺史韻

茂陵烟蝕昆吾玉。文鴛淚珠凝片。薄堠栽雲。圓規儷月。小比合歡團扇。液池波暗。悵玉葉清陽。洗餘蒼蘚。桑海千年。椒風吹老史游篆。華棖杏梁高揭。神君悲化去。仙夢難讖。秋冷芝房。霜彫桂榭。值得劉郎腸斷。西京路遠。愛櫛櫛銀鱗百朋新換。古色

摩挲魏臺銅雀伴。

疏影 紅梅

苔枝半亞。認春前雪後。紅雨飄灑。猩色屏深。一信東風。開到夕陽庭榭。藐姑天賦。餐霞貌。渾不記。粉嬌香姹。比石家、金谷珊瑚。幺鳳綠毛低掛。記否唐宮韻事。飛來脂暈小。添倍姚冶。花譜圖成。合吮丹毫。皴上血羅裙袂。還教移種。玄都去。便減了。天桃聲價。伴逋翁、卯酒溫餘。隔座玉顏微赭。

又 蠟梅

孤山春淺。傍疏籬六枳。破臘開徧。枝北枝南。照影橫斜。宮羅薄縠誰翦。檀心半坼。嬌無語。費幾日。夕陽薰染。似靚妝。塗額人歸。悄立嫩寒庭院。別有天然丰致。黃絕入道久。縞袂初換。誤認春前。江路垂垂。綴樹蠶脾如蛩。盈盈金屋。安排好。莫輕被。朔風吹卷。祇月明。夢醒羅浮。惆悵寄書人遠。

金明池 本意

城柳啼鴉。汀沙宿雁。鳳艚龍旗何處。想當日、雕青惡少。草草把、河山付與。儘生平、志在燕雲。便募取、十萬黃頭禁旅。看鐵甲呼風。金笳激浪。池面魚龍爭怒。世上英雄本無主。恁好個家居。有人偷據。陳橋變、將軍袍換。韓通死、忠魂血污。算古來、青史茫茫。只寡婦孤兒。興亡難數。賸碧甃煙昏。荒灣月白。依舊寒波東去。

蝶戀花

倦柳風梳顛頰影。慘綠霜蕪。堤背行來永。渺渺銀塘波十頃。殢人一片江南景。舵尾漁翁眠未醒。曉露疏星。涼綴絲竿頂。昨夜商聲搖不定。亂荷殘雨鷗心冷。

賣花聲

對月

皎月掛晶丸。桂影誰看。畫羅衣薄倚闌干。不信瓊樓高迴地。有此荒寒。仙夢散迷漫。笛韻悲酸。人天小謫總無端。收取閒愁千萬斛。交與離鸞。

清平樂

五張六角。往事思量著。翠燭一星風刮落。記在那家簾箔。曉鴉啼散行雲。怱怱羅

袂輕分。難忘碧紗幮底。夜深手拍秋蚊。

金縷曲

漂泊何時了。恁年年、衣沾塵土。髮摧蓬葆。琴劍依人成底事。羞煞青袍似草。算白計、還家最好。學圃學農都不慣。笑還家、依舊愁難掃。空打出、閒居稿。西風消息蟬知道。咽軒庭、琴絲一縷。碧窗秋曉。檻外疏桐飛似翦。一夜秋聲聽飽。都併入、愁人懷抱。莫上高樓頻望遠。斷魂天、涼雁歸飛渺。離別恨、倩誰表。

八聲甘州 答金改之

灑東風、別淚溼征衫。北遊掛煙帆。似靈均初放。楚吟騷屑。愁滿江潭。一路沙虛月冷。風水換郵籤。對訴飄零感。檣燕呢喃。說與依人滋味。便侯鯖飽喫。難療清饑。且籌花鬪酒。翠管戲分拈。望揚州、夕烽傳警。暗關情、十里舊珠簾。尊前意寫烏絲句。分付何裁。

高陽臺

粉萼飄瓊。碧簫吹玉。故鄉回首天涯。千里英遊。片帆鷗外春沙。孤尊醉倚悲歧路。悔  
虛名、輕誤才華。謾憑高、滿眼秋陰。滿耳邊笳。征鴻過盡書難寄。裊半襟涼思。樓月  
西斜。料得深閨。寶釵剔碎燈花。百年幾許團圓日。甚詞人、偏愛離家。暗消凝。霧閣雲  
窗。窈窕紋紗。

絳都春 雁來紅

芳叢旖旎。映畫檻六曲。平添秋意。落葉打窗。昨夜高齋西風起。羅帷燈暗聞清唳。早  
涼雁、一繩飛至。曉來看取。圍階翠帶。染成霞綺。絕似啼鵲弔月。灑枝上點點。淚痕  
新漬。箏柱聲中。篩得空庭斜陽碎。相思欲向天涯寄。待摺做。桃花箋紙。配他蓼穗莢  
房。豔妝休洗。

瑤華 白秋海棠

苔垣翠疊。栽徧秋芳。讓此花幽潔。金鈿寶粟。算未抵。玉骨亭亭清絕。蛾眉淡掃。渾忘  
了。胭脂勻頰。抱素心一點。誰知付與。病蛩淒蝶。珍叢移種瓊閨。有萬斛相思。閒共



花說鉛華淨洗。珠露冷，粉淚斑斑盈睫。天寒袖薄，問誰解，柔腸千結。怕新霜點上冰  
綃，瘦卻個人肌雪。

摸魚子 秋蘋

憶春前采芳南澗。蘭舟一棹容與。水風淺掠江樓暝。吹老翠鈿無數。波濺處。恁經慣。  
揉藍翦綠疏疏雨。秋心淒苦。賸冷落斜陽。那回曾照。五出白花吐。凭欄望。葉葉零  
煙碎露。斷腸楚客凝佇。香名縱許珍珠換。多恐美人遲暮。牽遠緒。算身世漂流。此恨  
和誰語。柳詩慵賦。但涼冑尊絲。瘦圍荷鏡。愁對越溪女。

花犯 木芙蓉

夕波寒。秋江遠涉。逶迤撥蘭棹。木蓮花好。漸粉怨珠啼。煙際開早。靚妝不逐霜華老。  
紅深兼翠窈。鎮寂寞。玉容微醉。霞裾風暗嫋。年時對花結同心。冥冥踏紺霧。仙城  
雲杪。歡夢短。嗟往事。花應知道。憐嬌姹。欲舉又住。空悵望。瑤姬芳訊渺。但護取。練塘  
深處。眠香雙鴨小。

石州慢 初寒

薄暝搖窗。涼吹暗喧。梧葉吹落。瓦溝霜色微明。陡覺寒生羅幕。纔眠又起。厭聽唧唧陰蟲。哀音啼徧闌干角。瘦影一燈紅。伴愁人蕭索。芳約。麝囊粉褪。鸞靶香黯。不成拋卻。傷別傷秋。此恨年年輕著。瓊篝籠未。料得似水鴛衾。夜深好夢頻擔閣。顛願怯添衣。漸纖腰如削。

齊天樂 塔鈴

空心悟徹西來意。年年舌存無恙。寶柱凌虛。金繩絢彩。搖曳四禪天上。輕圓簸蕩。正雲斂瓊觚。霧晴珠網。夕照紅邊。一聲聲自答清響。祇林夜深人悄。風絲飄替。戾到耳偏爽。花護唐宮。雨淋蜀道。無此梵音淒亮。檐牙月朗。伴幾杵疏鐘。做成惆悵。塵夢驚回。佛燈殘穗晃。

又 瓶笙

雪窗殘夢初回處。清音送來嬌婉。竹竈煙飄。花瓷水沸。活火一篝紅暖。銀簧乍展。裊

空際遊絲。連環不斷。禪榻悵悵。夜深誰與奏鵝管。松風颯然欲作。訝雲和曲譜。宮徵移換。似訴如啼。將調又住。吹徹小樓幽怨。仙經靜檢。記酒渴香消。舊曾聽慣。倚枕呼僮。試湯斟蟹眼。

百字令

秋晚友人招飲夜半始歸獨坐成此舉似改之

年華似水。問能消幾許。天涯芳事。草草逢君同失路。敝到貂裘如此。斷柳枯蟬。寒花病蝶。愁滿斜陽底。舊遊回首。僧樓寺寺閒倚。縱使鸞扇招香。蝶裙圍玉。難遣尊前意。醉擊珊瑚吟古調。怨入湘娥山鬼。秋老關河。夜涼風雨。飛夢空迢遞。青鞋辦就。甚時商略歸計。

點絳脣

題畫

鷗雨空濛。茫茫遠樹青如薺。畫船斜艤。漁笛風吹起。潮落潮生。不管人間事。烏篷底。楚天新霽。夢與秋無際。

洞仙歌 六首

吳中小部有佳人絕代。秋水芙蓉出塵壚。喜芳名九畹。譜入騷經。渾不比空谷尋常。蕭艾。蛾眉矜淡掃。宮樣妝梳。妒煞唇朱與腰綵。小立試輕軀。步上香茵。儼飛燕。受風情態。悵底處。惹人劇消魂。是翠玉簾前。猛迴嬌睞。

蘭閨麗質。惹春情挑逗。遲日尋芳後園走。鎮牡丹謝了。開到荼蘼。早又是鶯老花殘時候。巫雲飛入夢。雌蝶雄蜂。隨意梅邊締珍耦。分散太恩恩。一縷離魂。便做到。粉倂香憇。算有日。雲房續幽歡。認畫裏真真。可還依舊。

參橫斗轉。盼仙郎不至。青豆房空鎮無侶。正月痕涼沁。瓊色袈裟。凝眄久。十二畫欄頻倚。瑋琤風動竹。驀地檀來。側注橫波雜驚喜。一笑卸頭眠。百種嬌嗔。儘消向。蕙花帷裏。最惱是。雲階曉鐘鳴。又半捲香衾。把人催起。

魚波滑笏。載湖船三板。最愛兜娘踏搖慣。看綠蛇堆髻。紺蝶飄裙。掩映著。血色訶梨新豔。喉珠拋嚙嚙。脆煞吳音。唱到瓊窗五更轉。廣座悄無言。風水聲中。墜一朵。嬌雲天半。縱喚到。無情木腸兒。聽暮雨瀟瀟。也應魂斷。

尊前軟語。問櫻桃年紀。瓜字初分正嬌穉。愛天然生就。鎖骨玲瓏。偎人處。無限蘭情水意。調鸚揎小袖。一握春纖。芳澤溫磨暗中遞。隱謎故相嘲。薄怒佯嗔。燈影射。頰渦紅膩。任並坐。殷勤勸香醪。便百罰深杯。也拚嘗試。

旗亭貰酒。數狂朋俊侶。金雁箏邊客三五。只相如病渴。減盡風情。驀勾起。年少冶遊心緒。名花容易老。分付東君。露葉煙苗好調護。一幀合歡綾。小像圖成。儘熏徹。水沈香炷。待後日。重逢話相思。認傅粉何郎。舊時眉嫵。

國香慢 效張玉田贈沈梅嬌體

空谷幽芳。是鄉親蘇小。同住錢塘。春宵背燈初見。綰髻塗妝。風裊留仙裙褶。偎人處。笑語生香。羅帷悄同夢。清淺銀灣。不隔紅牆。相逢重話舊。甚花顛玉頰。減盡容光。墜歡天遠。提起祇益淒涼。惆悵樊川老去。縷金衣。孤負秋娘。含情解瑤佩。幾點啼痕。彈向斜陽。

祝英臺近

舊知名。新展覲。情話共分割。虬箭聲沈。絳蠟爇殘候。可憐媚上眉心。慙生笑。盛還作意。千攔百就。枕酥手。一宵淺夢濃香。回環儘消受。鴛錦猶溫。無奈別離驟。惱人油壁車輕。載春歸去。猛唱斷。曉風楊柳。

憶舊遊

歲暮送改之赴衡水

正珍叢款蝶。稗柳呼鶯。遊賞青春。風雪年華暮。甚乍成芳會。先引離尊。錦香背花偷擲。無夢戀行雲。賸一點柔情。酒波搖蕩。隨上雕輪。臨分。寫深怨。對金屑檀槽。暗惱輕鬢。試綰鴛鴦結。怕豔歌十索。添倍消魂。玉樓馬嘶人遠。誰與拂征塵。但密約重來。枇杷樹底同叩門。

齊天樂

細梅催轉東風信。天涯錦箋傳到。鶴嬾飛遲。鷗寒別苦。回首嚴城霜曉。吟鞭獨裊。算作計輸君。賦歸不早。朔雪征途。飄零共惜鬢絲老。他鄉樂事最少。況尊前根觸。俊遊懷抱。搓絮池臺。笑桃門巷。空憶翠鈿嬌小。燒燈近了。寫花市香詞。譜成愁稿。攜手

何時待將離恨掃。

翠樓吟

倦客心情。中年氣味。花叢漸嬾回顧。春風門巷小。記桃臉、初相逢處。橫波偷注。正燭  
燄飄香。爐熏吹霧。添嬌嫋。瘦瓊依約。襪羅微步。念汝。粉色天然。儘畫樓獨占。翠蔭  
紅嫵。昔遊重數。徧悔前日。尋芳多誤。琴心箏語。蕩酒力三分。詩愁千縷。留歡住。隔簾  
端正。玉蟾窺戶。

百字令

自題聽雁聽風雨小照

朝來擘鏡。歎華年似水。平頭三十。豈有文章驚海內。歲歲他鄉橐筆。紅豆新詞。金荃  
小令。畫徧旗亭壁。疏狂自笑。虛名此日非急。最憶一雁飄然。長安索米。寒透雙飛  
翼。身世輸贏。棋換劫。難保鬢絲如漆。風雨刁騷。關河牢落。今夕知何夕。故山歸好。草  
堂費問誰給。

齊天樂

碧梧池館驚秋早。深秋異鄉孤旅。燈炮簾空。香消簟冷。窗外西風吹雨。哀箏幾柱。有涼雁濛濛。裂雲飛度。滿地江湖平沙。一曲向誰譜。年來此聲聽慣。恁離心攪碎。別樣淒楚。紅燭歌樓。青衫酒暈。夢裏舊遊何處。更籌暗數。惹多少天涯。對牀情緒。繫足書輕。寄愁交迅羽。

洞仙歌 題金改之詞後

江東詞客。愛揚州煙月。花底怱怱悔輕別。算滄海過了。又渡桑乾。愁寂歷。蕙帶荷衣衝雪。復翁仙去後。減字偷聲。一瓣心香向誰爇。翦燭話飄零。俊語消魂。怕提起。舊家時節。祇夢裏。曉寒賦初成。比夜雨梧桐。一般淒絕。

滿庭芳

槽鳳翻飛。箏鸞豔舞。粉塵吹滿雕梁。綠么弄罷。鬧掃理新妝。隔座氍毹紅暖。屏風小。護玉籠香。流連慣。深杯到手。忘卻在他鄉。歡場容易散。春隨影逝。夢比雲涼。賸十斛閒愁。貯滿柔腸。有日維揚重到。更誰識。杜牧疏狂。虬波滴。燭花微燼。鉛淚膩銅黃。



聲聲慢

冰簪斂豔。霧鬢凝妝。湘波澗浥春嬌。楚楚瓊姿。載來酒舫歌橈。風塵託根未穩。抱香心、名冠離騷。問誰解、把金鈴護取。紫蒂緗苗。回首吳宮草暗。悵舊山何處。空谷迢遙。眉黛輕顰。分明怨意難消。尊前謾悲身世。怕經秋、玉悴花憔。試延佇、倩瑤徽、彈破寂寥。

一枝春 淡芭菰

異品分來。貯筠筒、尙帶鯨洋雲氣。芬馥漱嚙。擣麝熏薇難比。香消酒渴。愛吸徧、易京滋味。看鼻端、噓出雙煙。曷趁繡簾風細。相思舊名空記。悵情絲恨縷。漸成灰矣。尊前泥勸。怎忘玉人纖指。紅潮登頰。數風韻、檳榔同醉。且支柱、雁塞冰霜。錦囊穩繫。

風蝶令

促坐眉通語。微醺臉上潮。下簾自把鳳笙調。生怕仙雲一朵見風消。小巷春泥滑。重城夜漏遙。懽期無準又今宵。惆悵踏花歸去馬蹄驕。

戀繡衾

紅樓西角月乍生。照愁人，孤倚繡屏。待展卻，香衾臥。奈新寒，欺夢不成。銀塘波凍芙蓉老。畫簾低，風響曲瓊。正無說，相思處。隔鄰牆，誰弄玉箏。

蝶戀花

題潘星齋鸚鵡簾櫳圖卷

宛轉蝦鬚垂繡戶。花影搖春。春影搖香霧。大好靈禽栖託處。神仙眷屬中間住。豈爲籠寒晨白訴。碧草西風。夢繞芳洲路。誰在瑣窗教絮語。瓊閨鏤雪詞新譜。

長亭怨慢

送陸費端卿之蘇州

纔吟徧，鳳城秋色。糝袂塵沙，又催離別。夕照金臺，西風高柳，爲君折。玉簫聲咽。留不住，雕鞍錦勒。馬首梅開，正驛路，霜濃時節。淒切。對孤尊酒熱。倚醉更歌新闋。茸裘臥雪，忍拋下，故人蕭瑟。拚今宵，夢逐征輪，好同看，吳門煙月。待寄慰相思，莫惜瑤箋千疊。

八聲甘州

夏日游蓮亭荷花之盛過於往日計予不到此間已三年矣撫今

追昔醉歌此調呈匏翁

繞虹梁、欹棹溯空明。芳會憶年時。自詞仙去後。花零粉怨。鷺老秋絲。難得觀蓮佳節。選勝酒重攜。卅六陂塘遠。波濺胭脂。坐有歐蘇賢守。對風裳水佩。勸酌瓊卮。問紅妝無語。應笑我來遲。暗惆悵、佳人天末。采幽香。誰與寄相思。新愁滿。譜江南弄。唱過邪溪。

賀新涼 得湯子厚書賦此奉答

滿紙淒涼恨。是良朋、三千里外。傳來芳訊。落珮倒冠歸故里。病骨峻嶒殊甚。詎料得、鴻妻先殞。烽火連天。江水黑。痛恩恩。淺土藐孤櫬。牛衣破。愴同殉。安仁淚向寒宵。搵暗消魂。文成歎逝。血痕酸沁。我爲君言宜作達。看取高堂霜鬢。莫謾把、吟軀愁損。哀樂中年。腸易斷。遺悲懷。試效亡何飲。榮枯事。等朝菌。

齊天樂

不多征路千餘里。年年往來都慣。野飯霜衣。城笳埃火。數盡郵籤長短。東風送暖。漸

草長雲昏。絮飛波軟。倦旅翛然。淒涼大似北歸雁。垂楊舊會繫馬。嫩黃搖曳處。離思消暗。紫曲分花。青簾過酒。夢裏愁深歡淺。鄉園目斷。賸撲帽塵香。玉鞭低結。雨洗疏蕪。翠塍斜照遠。

摸魚子 答改之

賦閒情。釵微釧逐。墨痕香濺。紈素鳳城小聚。還分散。抖擻半襟塵土。鞭裊處。趁翠溼歸輪。一角西山雨。旗亭醉舞。甚大好他鄉。莫觴佳會。天意不輕許。瓊筵側。鎮日移宮換羽。豔歌偏惱芳緒。萍蹤漂轉成秋蒂。淒絕燕來鴻去。留夢住。最難忘。碧紗攷燭聯牀語。花晨酒暮。待手採連蜃。因風寄贈。招隱慰孤旅。

風入松

相逢不改舊疏狂。笑語生香。華燈紅照相思字。是年時。彩筆題牆。縹緲行雲楚岫。輕盈飛燕昭陽。珠喉一串韻飄揚。綠酒親量。玉容半醉嬌無力。偎人處。竟體芬芳。說道今宵休去。小樓殘月昏黃。

高陽臺

豔影驚鴻。香絲裊麝。十分春滿窗紗。道罷勝常。嬌鸚隔座呼茶。尊前低說韶年紀。正盈盈、碧玉分瓜。惹消魂、帶雨嫣然。一樹梨花。胭脂巷窄重來訪。悵金鋪鎖合。粉墜枇杷。眉月空彎。照人何處天涯。相思海樣量難盡。賸夜深、孤嚼紅霞。殢閒愁、雨井煙垣。飛絮天斜。

三姝媚 絳雲樓石印

青琅玕一寸。是曾經焚餘。劫灰殘燼。鐵綫銀鈎。裏綠綈千卷。朮泥香沁。紅豆花前。自什襲、團窠鴛錦。鏤雪鐫雲。押倩藤蕪。玉纖脂暈。零落南朝金粉。嘆縹帙煙飛。畫樓難問。柳老章臺。甚連環珠篆。不隨同殉。著手摩挲。謾棖觸、滄桑幽恨。配取河東妝鏡。清光未墜。

摸魚子

擁花驄、蘭塘梅約。垂鞭閒覓芳豔。珠燈半燄扶殘醉。吟袖夜深同綰。街鼓統。還戀著、

碧紗。攷燭。歌塵暗。瓊卮恨淺。任苗底。箏邊酒痕。醜醜紺翠一衿染。嬉春會。幾度雲  
搖雨散。玳梁巢燕都換。明漪帖帖風鬢。似否玉嬌香軟。愁目斷。望千里滄波。秋與  
人俱遠。疏麻寫怨。想冶習游情。也應寥落。抱影閒空館。

又 題潘順之西湖送春卷子

問年年。送春歸去。春歸知在何處。絮塵吹滿江南岸。片片落紅無主。縈綺緒。甚一夜  
東風蕩起愁千縷。湘絃慢鼓。賸廢水空煙。鉛華淨洗。冷漲半湖雨。銀樓角。粉鳩含  
悽低訴。傷春人倚朱戶。兩堤芳草茸茸碧。多少瘞香荃土。鶯燕誤。算怎不雙飛。攔住  
春歸路。韶光悶數。向濃綠陰中。銘花誅蝶。自搯斷腸譜。

祝英臺近 題鄭州店壁

卸蒲帆。停桂檝。行李一車載。帽影鞭絲。紅樹夕陽外。到來帘字飄揚。三家店小。喜濁  
酒。半壺先買。解裝再。往事十七年前。光陰水流快。去燕來鴻。詞客鬢顏改。劇憐聖  
壁重新。呼燈覓徧。已無復。舊題詩在。

踏莎行

香霧籠嬌。錦霞圍豔。翠羅屏角初相見。紫蘭芽小不禁風。當時猶被春拘管。夢短  
愁長。情深歡淺。俊游回首空腸斷。江南江北枉相思。綠陰青子年華晚。

高陽臺 送改之出都

刻燭邀紅。呼樽款翠。酒痕濃染鸚裘。牽惹閒情。浮雲西北高樓。舊時金縷當筵唱。怪  
朝來。忽帶新愁。暗消魂。匹馬輕裝。別路殘秋。西風不管分離苦。攪空林亂葉。吹滿  
宮溝。如此關山。可憐孤負清遊。對牀聽雨前期在。賦河梁。休怨漂流。譜妍詞。彩翰香  
凝。題徧庚郵。

鵲橋仙 顧二娘手製硯

犀紋抱月。龍香滴露。出匣滑難留手。愛他柔膩紫雲身。曾挨近、鳳翹丹味。蘭閨巧  
製。文房雅玩。往事流傳人口。傾城名士盡蒼涼。賸鵲眼、盈盈依舊。

臨江仙

梅萼開時郎馬去。相思直到而今。碧雲千里雁書沈。淚淹宮錦字。香減畫羅襟。鴉  
鳩隔花啼不住。年光轉眼驚心。玉釵墮後嬾重尋。紫蘭香徑外。秋草沒鞋深。

瑤華 茉莉帳

琉璃質軟。新搯瑤英。綴象牀璀璨。勻穿巧絡垂麗。不數辟塵綃幔。月痕涼浸。似掛  
起蛟房珠串。稱小憐。玉體橫陳。襲衣花氣難辨。夜深睡蝶。曹騰任暗麝濃熏。無此  
芳豔。隙風吹過鉛粉墮。四角流蘇飄顛。青鬢素靨。祇是那。夢回人遠。且消受。散雪團  
雲。妒煞芙蓉香暖。

綠意 芭蕉簾

冰紋葉葉。傍闌干。已字。纖手親折。淨拭蛛絲。展代龍鬚。芳痕一片重疊。桃笙蘄竹。渾  
拋卻。愛貼體。香茵清絕。配亭亭。帳底青奴。冷抱半牀秋色。憶否空階夜寂。雨聲暗  
滴瀝。欹枕聽徹。清不沾塵。涼欲成煙。消盡幾多炎熱。夢雲縹緲。歸何處。認尺五。綠天  
幽潔。揭犀帷。捲付雙鬢。掩映翠羅裙褶。



銷寒四詠

繡停鍼 補裘

檢舊繡。訝手拂金箱。峭寒如水。百衲蒙茸。彈落暗塵。付與玉纖重理。斷絲零毳。是客路。冰霜磨碎。試抽獨繭香絨。夜窗背燈縫起。征衣待遠寄。歎綫腳鍼頭。淚痕濃漬。紫鳳天吳。顛倒坼紋。謾共翠雲爭麗。濁醪休貰。算軟美。未輸驪子。麝篝熏透。篆煙更燒心字。

瑣寒窗 糊窗

梵字鐫紅。冰紋界茜。舊穿羅洞。鮮森刮隙。生怯曉來寒重。研雲藍。四圍貼平。畫樞不放些兒縫。任橫斜黏著。半盂瓊液。玉蔥高捧。方空銀光湧。稱竹屋悒悒。護人幽夢。蛛塵掃盡。梅影亞枝浮動。鎖金猊。溫香一絲。夜深翦燭誰與共。更安排。雲母玲瓏。照見霜華凍。

玉漏遲 圍鑪

蠶窗。繡幔。辟邪。蹲近。鏤金。牀畔。促膝團圓。笑語畫屏春滿。臥褥芙蓉密繞。簇活火，  
一椀紅暖。攘皓腕。試香溫酒。霎時傳徧。撥灰分付嬌鬟。莫彩袖低垂。玉梅偷撚。擁  
對牙籠。鳳餅幾麩重揀。試拈曉寒詞譜。任簾外朔風如翦。人意嬾。薑芽夜深齊斂。

石州慢 炙硯

鈿匣慵開。瑤玦罷研。鵲眼凝碧。連朝雪意風威。凍折米家山脊。金星黯黯。自籠七寶  
香篝。隔灰烘活松花色。春透旋渦痕。似池波新滌。回憶琳腴墜缺。青鐵磨穿。歲華  
虛擲。暖到冰心。賸喜石交如昔。蘭閨寫韻。省他檀口微呵。瓠犀自齧。媿毫筆待淺畫  
蛾眉。點端溪雲液。

臺城路 題戴蘭卿曉風殘月圖卷

大隄垂柳蕭疏甚。娟娟碧絲猶裊。傍岸維舟。移篷就樹。淒瑟津亭秋曉。酸風乍攪。作  
水樣新寒。頓欺烏帽。煙影微茫。墮林殘月一梳皎。長條幾回欲折。露蟬聲斷續。都  
帶商調。中酒心情。懷人滋味。銷賸離魂多少。迴腸暗惱。算游徧江湖。不如歸好。底事

勾留歲華空自老。

長亭怨慢 甲辰初入翰林改之亦於秋早入都應京兆試置酒話舊並讀近

作諸詞填此調奉贈

記攜手。好春剛半。雨屋深燈。對牀分翦。碧樹驚秋。黃金臺下。又相見。杏衫香澣。禁幾  
度。京塵染。促席引清尊。試與較。別愁深淺。淒黯。理鸞箋象管。翠譜織成。騷怨。鶯憐  
蝶眷。悵回首。繡叢天遠。算此日。身到蓬山。早絲鬢。江湖吟減。賸絕竹哀絲。分付當筵  
腸斷。

霜葉飛 題勞介甫霜林覓句圖

詩情繚繞秋深處。伊誰蠟屐尋到。冷楓紅舞滿空山。片片霜花飽。襯石徑。苔痕翠老。  
斷霞零落無人掃。聽寸碧遙岑。被一夜。西風吹下。素籟多少。知有逸客飄然。搯筇  
背錦。獨自行入幽窈。清吟字字作商聲。譜出伊涼調。又棖觸。鄉愁浩渺。酒船鷗夢吳  
江道。倩畫圖。爲傳將。千里歸心。澹煙斜照。

鵲橋仙

前年話別。去年話別。都是早秋時候。今年又到早秋時。只無那、別離長久。  
珠啼錦怨。花憔悴。困聞說玉容消瘦。此生拚道不相逢。怎昨夜、夢中攜手。

河傳

擁被無睡。燭花欹。漏鼓三更盡時。玉爐暗香飄一絲。淒淒。病蟲窗外啼。  
十載江湖游已倦。春夢短。蘭訊秋來遠。畫羅襟。酒痕深。傷心墜歡何處尋。

高陽臺 友人以畫蘭摺扇索題戲作

露眼緘愁。煙鬢裊媚。翠裙展向春陽。葉葉花花。分明相對相當。紅心半坼櫻桃小。謾  
疑他、舊院眉娘。斷吟魂、一握冰紈。吹上柔香。有人甘殉情芽死。忍題完珠字。寶作  
琳琅。繡幕芙蓉。夢雲幾度攜將。湘皋豔譜翻來慣。證芳因、惱盡疏狂。獵清風、玉骨琅  
玕。隨意招涼。

百字令 題張石州仿竹垞老人歸耕圖卷

昂藏七尺。是杜陵狂客，扶風豪士。十載金臺常賃廡，落拓游蹤難已。雨笠煙蓑，瓜疇芋町，生計唯耽此。荷鋤歸好，故山禾怕生耳。收拾莎犢欄深，茅龍屋古，小築臨渦水。得喪浮雲紛過眼，莫問江湖朝市。汜勝之書，峯然子策，粗了平生事。英雄末路，達觀宜作如是。

江城子

詠鰕

鯉魚風急海門秋。檣蕩舟。翦寒流。銀篋筐輕，撈出稻花稠。絕妙水晶人樣子，偏愛著，碧綃頭。夕陽紅上水邊樓。酒新篘。小勾留。一笑登盤，巧配內黃侯。任爾鬚髮張似戟，難洗盡，折腰羞。

又

去年元夕笑相逢。搭春蔥。勸金鍾。鳳尾槽新，聲迸小簾櫳。蠟樹燈毬渾不夜，都忘卻，漏丁東。今年元夕舊情空。捲西風。夢恩恩。欲譜香詞，無那寸心慵。屋角緗梅飄半萼，還錯認，舞衣紅。

百字令 秋晚客中效側帽詞體

愁絲一縷。曩將來，不斷把人纏縛。況是他鄉雲水夜，秋雨秋風蕭索。被冷鴛文，燈殘鳳脰，往事思量著。病蛩無力，惜惜啼近簾箔。遙識翠闥新寒，晚妝卸罷，獨下葳蕤鑰。肺疾深時，眠不慣，有夢也成擔擱。玉子楸枰，銀箋象筆，怎敵情懷惡。浮名何物，賺人隨地飄泊。

摸魚兒 蓴

抹蕢洲，柔波滑笏，湘烟一罨低繞。圓沙溶漾，瑤釵影，青徧五湖三泖。春漸老。挂尺許龜髯，斜映晶奩皎。芳莖翠裊。愛枯豉堆紅，鮮鱸釘碧，嫩共菜根齏。功名事，海水浮沈難料。江湖俊味真好。天涯回首秋風起，誰買季鷹歸棹。空懊惱。讓漁弟漁兄，匕箸年年飽。清饑怎療。待菊釀筍成，菰香煮熟，點筆注葵茆。

風入松 題潘子慎感舊詞後

暖風遲日踏青蕪。立馬叩銅鋪。粉牆低處桃花笑，顫嬌烟、一樹瓊酥。宛轉翠簾，了字。

盈盈十五當壚。夢雲歡劫散模糊。絲淚滴紅珠。錦苔繡了埋香地。盼重泉、消息都無。怕見棠梨暮雨，年年寒食啼鳥。

唐多令 蓮亭晚坐

翠露罨烟汀。柔波翦綠萍。趁花花、葉葉亭亭。一捻斷霞嬌不散，漸紅上、鶯絲翎。照影惜娉婷。鷗寒夢未成。悵銅盤、鉛淚零星。鬢鬢昨宵疏雨滴，潛倚著、畫欄聽。

又 題金織織女史瘦吟樓硯拓本

翠墨洗烟螺。雲腴膩粉渦。蕩愁痕、一掬湘波。惆悵瘦吟人去遠，誰著手、與摩挲。片石未消磨。華年瞥眼過。甚春來、依舊寒多。儘把沈香薰小像，祇無計、熨雙蛾。

鷓鴣天

半靨星痕帖額黃。繡蓉方領藕絲裳。尋常懶著閒脂粉。一種風流淺澹妝。斟玉斝，弄銀簧。人前側立費形相。翠簾下了移紅燭。說道今宵分外涼。

霓裳中序第一 歌席卽事

銅荷蠟淚滴。照見新詞題畫壁。錦字眞珠密織。記酒瀉翠尊。花颺瑤席。蘭蕤蕙質。蕩冶情、無數箏笛。都忘卻、茸裘繡鈿。歲暮遠爲客。幽抑。俊游重憶。共繫馬、朱樓綺陌。芳韶轉眼過隙。漸訊渺湘紅。夢斷楚碧。豔歌閒趁拍。賸怨粉、淒金凝積。暗惆悵、一眉霜月。兩地伴岑寂。

八聲甘州

匏翁太守招同人小集清暉書院倚聲奉酬

菴晴蕪。秀色隱孤亭。絲楊弄春妍。倚屏山六曲。開簾過酒。人坐瓊筵。不比張燈飛蓋。清夜宴西園。橋外東風膩。新綠濺濺。隔水呼鷗一笑。任吟湘賦楚。幽恨都蠲。寫盈盈芳思。分付薛濤箋。託微波、重申後約。擁綃衣。霞珮汎觥船。爭知我看花心事。漸近中年。

水龍吟

擬宋人詠英華詞並步其韻

圓風瑤島清都。仙蹤縹緲疑非是。鸞裾鳳帶。瓊纖寶味。豔魂飛墜。湘管輕拈。半窗蘭韻。一簾松吹。擅非烟才調。無雙容貌。爭怪得、人心醉。汗泗柔波千里。暈檀痕、靚妝



初洗。神光洛浦。行雲巫峽。此情空寄。後會茫茫。塵封薌澤。淚凝鉛水。賸丹崖畫閣。生綃澹墨。寫眉山翠。

高陽臺

題伏城驛店壁記己亥歲同湯子厚計偕北上宿於此店子厚被酒

大醉夜雨不止往事已十有六年矣子厚南歸病物墳有宿草感念存歿愴然予懷因成此調

倦柳鴉棲。重雲雁度。驛亭烟樹迴環。渺渺征程。舊愁吹上眉彎。風塵不恨年華促。恨故人埋骨青山。賦招魂、楚些淒涼。楓淚紅殷。當時倚醉疏狂甚。儘箏鴻啼雨。鞦韆徧湘絃。耳熱悲歌。劍霜寒嘯尊前。如虹豪氣今安在。鎮消磨、明鏡蒼顏。謾驚聽、翠玉簾空。簷溜璫潺。

浣溪紗

菴畫樓臺夕照斜。瑣窗塵黯杏紋紗。斷金零粉綴些些。芳徑碧苔誰著屐。小橋稚柳又飛花。東風悽惻送韶華。

六曲迴廊響玉弓。昔年此地見驚鴻。春魂消盡畫樓東。填海有心銜木石，涉江無路采芙蓉。片雲留恨滿巫峯。

點絳脣

小雨初收。烟郊傍曉秋容淨。野花紅凝。點綴青蕪徑。馬首涼蟬，一路供愁聽。西風勁。弄晴搖暝。幾樹垂楊影。

瑞鶴仙 題黃韻珊明府詞後

玉簫聲慢倚。寫阻風中酒。江湖滋味。天涯莽迢遞。恁閒情都付，衍波箋紙。華年似水。禁幾度、吹花嚼蕊。鎮無慘、傷別傷春，誤了浩歌沈醉。留殢。皖公山色。滕閣烟霞，助吟多麗。京塵染袂。樊川鬢、漸絲矣。儘檀痕細掐。流珠一串，譜入愁羅恨綺。看淡妝、舞上猩氈。繡簾隙底。

清平樂 題新羅山人畫

嫩篁幾節。濕翠苔花鬻。尺五風枝扳欲折。偷眼梢頭紅葉。蛾眉澹掃雙痕。風流京

兆前身。記聽雕籠巧語。日長深院無人。

又

杏青梅小。韶景無多少。榆莢漫天飛不了。心事落花知道。烟痕輕注迴塘。一雙蝴蝶。蝶。蝶。斜日空簾獨倚。春愁沒個商量。

又

霜前雁後。搔遍天涯首。烏帽青袍人似舊。籬畔黃花開又。羅帷低護初寒。小樓眉月愁看。一霎風吹落葉。秋聲先到欄杆。

又

題潘絨庭秋水芙蓉畫冊

明霞古渡。照影花如語。千種相思無著處。朵朵翠嚙紅妒。往時錦帳凝香。而今遠道迴腸。勾起半江幽恨。夜深風露淒涼。

菩薩蠻 三首

綠陰如幄圍階砌。蝶衣涼曬紗窗底。春去漸多時。夜臺人未知。相思心欲折。玉骨

成冰雪。容貌見應難。恨無通替棺。

梨花寒食斜陽路。百年一樣歸黃土。同穴最關情。著鞭先讓卿。鬢絲都雪了。此恨

誰知道。搵淚對禪扉。遠山顰翠眉。

紙錢風起灰如雪。乳鴉向客啼嗚咽。稚子復何知。時來牽我衣。迴車還卻顧。夢斷

心離阻。魚目夜長開。幽魂何自來。

蝶戀花 二首

慘澹斜陽紅古寺。窄徑苔紋。綠徧傷心地。委蛻一棺呼不起。眼中泉路分明是。草  
草今生緣盡矣。虛說他生。依舊成連理。九十春光如水逝。碧桃花落餘空蒂。  
鏡檻妝奩塵漠漠。浮世光陰。一霎全拋卻。月不長圓花易落。墜歡如夢成耽擱。絮  
語傷心悲命薄。道不思量。偏又思量著。斷送芳魂歸夜壑。天台詎有長生藥。

滿江紅

杳杳幽魂。禁爾許、夜臺風露。痛此日、斷旌柳絮。得埋淺土。鶴蛻蟠岍彫玉骨。蝶裙灰

滅餘金縷。儘春風。綠隴到空牀。人何處。莊缶擊。悲難訴。潘鬢減。詩空賦。漫馳情千里。夢尋墟墓。萬事終歸螻蟻穴。百年虛結鴛鴦侶。算不堪。惆悵數生平。成孤負。

青玉案 秋懷效烏絲詞體四首

紙窗橫。誰剖破。寒意迸。些兒個。慘月當樓。眉影墮。千堆紅葉。數枝黃菊。飽受霜風剝。狂來欲把離騷和。寶劍光寒虹繞座。醉擲深杯。磅礴。埋憂無地點。金無術。屈煞平生我。

奇鷹颯爽排雲起。碧眼溜。秋空紫。豪氣稜稜都讓爾。林中鴉鵲。草頭狐兔。一霎空如洗。昏燈挂壁繙青史。往日英雄今賸幾。長憶高歌醉燕市。屠腸臙目。漆身刎頸。個是真男子。

蓬山千仞瓊臺陡。風雨暗。魚龍吼。萬樹琪花金翠糝。凌華拊石。雙成擲管。笑酌麻姑酒。而今難挹浮邱袖。碧海青天莽回首。種種顛毛霜染透。臨風試問。舊時仙侶。同此淒涼否。

荒墳近接秋原渺。龜趺裂。龍碑倒。燐火低飛如豆小。苔錢暈碧。土花鋪繡。滿地紅心草。西風蒼莽愁難掃。歲月無情雙過鳥。惟有北邙山不老。芻靈夜舞。髑髏晝語。添了新華表。

踏莎行

雨斷虹腰。烟迷鴉背。榭林路轉前溪水。戍樓高處，一絲風。暗中刮得秋心碎。倦旅情懷。長途滋味。玉鞭垂手渾如醉。蓼汀菱汊太荒涼。臨流忍製鴛鴦詠。

太 詞

素

運



齋

勒方錡

(嘉慶二一

——光緒六)

字悟九。號少仲。江西新建人。道光舉人。官至河東河道總督。洞達玄理。善書。有太素齋集。



序

詞雖小道。而律甚細。昔周草窗作西湖十景詞。楊守齋謂辭美而律未協。相與訂正。月餘而後定。然則作詞易。協律難也。余同年生勒少仲。河帥起家比部。敷歷中外。臻至封疆。政事文學兼而有之。生平於詩文不苟作。獨喜爲詞。方其少壯時。風流自賞。歌衫舞袖間。長令短調。促節曼聲。每一篇成。輒爲同人所歎賞。又強於記識。宋元名家之詞。背諷如流者。不下千餘首。而於萬氏紅友詞律一書。致力尤深。故其所作婉媚深窈。使人讀之意移。而揆之於律。無一不合。昔人謂史梅溪詞。有瓌奇警邁清新閒婉之長。而無詭蕩汗淫之失。少仲之詞。庶幾近之矣。中年以後。并詞亦不輕作。當同治庚午辛未閒。竹樵方伯恩錫方開詞壇於吳下。杜筱舫觀察文瀾從而和之。爰有重刻詞律之舉。并取吾邑徐誠庵大令本立所輯詞律拾遺附益之。一時唱妍醜麗。逸興遄飛。雖以余章句陋儒。亦頻有緣情之作。而少仲以斲輪老手。密爾自娛。不出一字。殆有少年綺語之悔乎。然其將去姑蘇也。命人錄所作太素齋詞若干首以

贈余。蓋享帚自珍之意。又未嘗不在此也。少仲既歸道山。遂有刻其詞以行世者。而刻之不精。讀者憾焉。陳仲泉同年謀重刻之。余乃出少仲所錄贈者。校讐一過。并補入原刻所未有者數篇。詞雖不多。然其辭美而律又諧。雖紫霞翁見之。不能更易一字。是固詞家之正軌也。余既喜少仲之詞克傳於世。而又歎仲泉之拳拳於故友也。因書數語。以識歲月。余衰病頽唐。自竹樵筱舫諸君長逝。倚聲一道。久輟不作。今讀此編。不勝人琴之感矣。光緒十年歲次甲申仲夏。德清蔭甫俞樾。

太素齋詞

江右勒方錡少仲

鷓鴣天 東湖春眺

楊柳沿隄映畫樓。湖心亭子最清幽。湔裙少女拈花立，岸幘閒人載酒遊。梨雨散，杏煙收。小橋斜徑一芳洲。落紅萬點圍歌舫，春水多情不肯流。

眼兒媚 觀織

三寸靈梭萬千絲。熨貼費心機。低頭記憶，南鄉露冷，北塞霜淒。春羅花色盤鴛鳳，織就是雙飛。是誰忍得兩邊分破，裁作征衣。

長相思 登清華寺樓

花深深。柳深深。紅暈晴光綠暈陰。暖風啼翠禽。強登臨。怕登臨。落日平蕪煙水潯。天涯萬里心。

浪淘沙

細雨夢中聲。燈影三更。鑪香裊盡夜淒清。滿院梨花啼杜宇。撩亂幽情。尋夢杳難成。珊瑚枕孤橫。夢時依約醒時驚。幾度思量愁未了。雨散天明。

金縷曲 凝芬閣席上有懷雲儀并序

維年月日。筱石穎三秋圃。偕飲於凝芬小閣。斜月將墮。疏星自明。雲斂天空。風嚴氣肅。於時主人清暇。促席燕談。醇酎累斟。重簾不卷。華燭卻夜。溫鑪借春。穎三顧謂二君。是宜盡醉。毋獨醒也。塵世可憐。浮生若夢。今我不樂。日月載馳。更俯仰一二十秋。我三人者。亦霜華點鬢矣。謝家別墅。吹竹彈絲。念彼達人。寄情乃爾。我心蘊結。髀肉復生。命酒澆愁。其能已乎。感杜秋須惜少年詩意。爲金縷曲二闋。用以侑觴。倚醉揮毫。倡子和汝。

多少淒涼意。向今宵、解裘貫酒。對花拚醉。打破愁城天地闊。消得青蛾皓齒。君莫問、功名滋味。匣裏星鐔苔繡澀。枉拋殘、湖海英雄淚。驚歲月、一彈指。珊瑚斷折鞭絲墜。算丁年、煙郵水驛。馬蹄千里。落拓京華塵壓帽。如此清歡有幾。肯負了、芳筵羅綺。

喚出紫雲迴粉面。笑分司、御史情腸碎。蘭燭下、更凝睇。  
釵鳳搖花髻。傍熏籠、寒裙掠帶。晚妝新理。窗外稜風吹月落。一片清寒夜氣。待錄事、  
重溫芳醴。手撥金猊呼小玉。倩添香、近把瓊枝倚。還觸我、舊愁思。幽詞密寫銀光  
紙。記年時、更闌訴別。十分顛顛。人道夫君真杜牧。惆悵啼痕滿袂。歎夢影、飛煙流水。  
欲寄楚雲悽惋曲。怕柔娥、蹙損眉峯翠。庭院靜、柝聲起。

洞仙歌 凝芬閣詠香櫞木瓜

大秦仙種。著金衣明麗。一段濃芬壓蘭蕙。想幽閒、鏤刻靈鳥奇花。和石葉、供向文窗  
素几。近知風味好。翠釜湯溫。絕勝生時濺牙齒。倚笑說瓊娥。酒畔茶邊。搓玉手、芳  
名試記。更細絡、紅絲貯牀頭。待蝶帳宵深。夢魂清脆。天台深處。憶橋梁危峭。長得  
靈蛇護仙藻。只金沙一顆。滿室芬流。論格韻、誰數沙棠臺棗。絕憐花放日。暈透胭  
脂。滴露勻霞鬪娟好。摘實記新秋。粉漬晶盤。投贈處、瓊琚速報。袖一點、甘酸獻瑤妃。  
更浸入春醪。駐伊風貌。

采桑子

胭脂坡下風光好。聯臂行歌。問訊香娥。重醉鐙前金叵羅。哀箏彈我淒涼曲。低鎖雙蛾。無奈情何。留得他年感歎多。

又二首

酸心怕聽分攜語。勉酌金卮。轉益愁悲。真箇而今是別離。紅窗爭得重相見。多恐無期。不忍思維。暗背蘭釭淚溼衣。

籌量無計留君住。銀漢東西。咫尺天涯。只恨年時識面遲。雁牋留贈相思字。題了重題。淚墨淒迷。卻悔年時錯見伊。

點絳脣

一片冰蟾。夜深光照梅花底。畫闌閒倚。驚覺棲鴉起。歸掩書齋。細領愁中味。移鐙睡。峭寒孤被。夢醒人千里。

燭影搖紅

踏月尋香。畫絲簾下曾開宴。擊觴親勸雪兒歌。酒暈桃花面。底事十旬繾綣。又無端、金錢會散。夢雲流影。前日新詞空成愁歎。重對離筵。漏聲催得寒宵短。門前潭水失靈槎。路比瀛洲遠。爭怪清魂易斷。聽陽關、芳巾淚滿。舊情長繫。望極藍橋。瓊漿玉平聲語居切。椀。

搗練子 憶內

思遠別不勝情。漏永衾寒夢易驚。窗裏疏燈窗外月。照人心事最分明。

一翦梅 送婦櫬至潞河

暮雨西風滿目愁。多病荀郎。客裏驚秋。送君何日到南州。哀淚千行。灑向東流。獨  
傍魂輿聽漏籌。飄盡鑪烟。冷透衾裯。角聲悲咽下城樓。未到天明。白了人頭。

長相思 哀逝

風淒淒。雨淒淒。葉打疏窗絡緯啼。鐙殘秋夢迷。長別離。黯含悲。驀地驚心聞曉雞。淚痕霑枕衣。

憶秦娥 又一體

月沈沈。秋窗寂寂宵深深。宵深深。暗魂何許，步徧牆陰。空房遺影悲青琴。黃泉碧落愁難尋。愁難尋。無人訴得，咽淚歸心。

菩薩蠻 八月十八日夜

暗風蕭颯搖窗紙。殘燈暈落新愁起。吹得雨聲寒。雁聲空外酸。尋思愁底許。歷亂無頭緒。一枕抱秋眠。夢痕涼化煙。

浪淘沙

別思滿眉端。樺燭膏殘。霜雞催喚五更闌。前日酒痕今日淚。衣袖紅斑。回首隔清歡。驛館秋寒。銀箏淒怨不堪彈。青粉牆邊三尺路。萬水千山。

謁金門

今夜雨。特地吹來酸楚。牽觸當時離別苦。暗蟲階畔語。錦帕香囊分付。結就愁絲千縷。襟袖啼紅溥雪紵。遠書沈雁羽。



燭影搖紅 爲慧琴賦

小閣寒輕。鏡窗窈窕安吟几。銀鑰新淪鳳團茶。坐愛雕欄倚。信是傳芳內史。忍消磨、輕塵隊裏。一枝斑管。百幅紅箋。前身花蕊。見說多愁。素絃彈折春心碎。思量誰是賞音人。冷處聽焦尾。歎我天涯萬里。向尊前、青衫沁淚。桂舟催別。酒醒銷凝。晴江烟水。

清平樂 江行

聽風聽水。百種思量起。飄泊情懷離別意。怊悵煙波千里。天涯日斷平蕪。斜陽澹照棲烏。輸與寒磯釣叟。眼前忘得江湖。

大江東去

朔風吹雨。艤扁舟、寒夜江南孤驛。卷地驚濤連海氣。亂颭荒洲蘆荻。塔暗金山。城迷鐵甕。萬頃蛟龍國。清尊愁對。角聲還助蕭瑟。回念棲泊紅塵。虛名縈繫。十載京華客。辛苦思歸歸路遠。誰寄鄉關消息。寶劍淒涼。銀燈黯淡。香冷羅衾澀。啼鶻驚夢。曉

來星鬢添白。

朝中措

疏林烏鵲動寒聲。江冷月華清。四望楚天空闊，霜鐘飛下孤城。蓬窗夜靜，香痕半  
爇，酒意微醒。正是客愁深處，一鐙紅得無情。

鵲橋仙

烟畦斲菜，霜林翦橘，夢裏家園路近。驚回一枕客舟寒，聽窗外、西風淒緊。青燈照  
影，素牋傳淚，已是休文瘦損。空江月暗雁聲酸，更不許、愁人睡穩。

滿江紅

喚起孤愁，蘆花外、雁聲淒咽。誰念我、寒江煙水，小舟一葉。別緒遙牽楊柳岸，離魂暗  
度楓林月。歎十年、塵海送流光，生華髮。身世事，何堪說。多少淚，空盈睫。儘吟牋書  
破，唾壺敲缺。鑄就悲歡千萬錯，可憐銷費心頭鐵。□西風三尺玉虬龍，橫青雪。

驀山溪

煙愁水怨。冷透蒹葭浦。情味怕孤燈。更聽徹、疏篷細雨。三杯薄酒。對影總荒涼。江南路。蘭成賦。今古銷魂處。鄉關縹渺。隔斷寒山霧。何事十年中。竟忍作、天涯羈旅。一囊書劍。彈指老英雄。功名誤。歸心苦。敲枕殘更曙。

一斛珠 爲小伎珍珠賦

天生智慧。歌喉宛轉春鶯脆。小槽紅酒撩人醉。索得新詞。度向簾兒底。問道寂寥何日慰。買卿十斛曾無計。芙蓉編上空題字。怕見鴛鴦。點滴相思淚。

十六字令 二首

愁。杜宇啼春雁叫秋。孤燈裏。風雨下簾鉤。  
歡。花月笙歌繞畫闌。泥金帖。傳與細君看。

眼兒媚 代筱笠作下三闋同

鳳脰花明漏聲長。聽曲識秋娘。最牽人處。深杯壓酒。窈閣迷香。別時言語無頭緒。千轉結迴腸。如今贏得。小舟孤枕。瑣碎思量。

柳梢青 又一體

哀絃離席。背人魂黯。一聲將息。裏淚緘愁。秋雲羅帕。萬千珍惜。知誰倚玉。搴香怕。枉了、伊家韻格。鏡裏心盟。窗前眉語。怎生忘得。

點絳脣

驚起沙鷗。一去聲枝柔艣。煙中響。夢回惆悵。蘭幕芙蓉帳。才展清歡。越地離歌唱。秋江上。雁風魚浪。愁結千絲網。

喝火令

寶鏡紅鸞舞。靈釵白燕飛。淡煙雙鬢小山眉。長記曲房深幙。含淚訴心期。薄命憐花蕊。芳顏惜柳枝。直饒相見總相思。況是分襟。況是暮秋時。況是越溪孤棹。月冷聽猿啼。

瑤花慢 遊慧山和心耕弟作

峯腰路淨。石乳泉幽。滿巖扉秋綠。嬋娟福慧。端合向、兜率宮中棲宿。鮮冰膩雪。藐姑

射神人芳躅。爭怪道愁絕秦郎賦就烏紗寒玉。瑞煙長繞琳房。儘留得天花衣袖。清馥瓊漿易醉。誰更與、乞取蘭香仙粥。軟紅塵海。想別後、幾多根觸。枉夜來一縷吟魂。暗度九龍山曲。

卜算子 又一體

十里望君來。一霎愁君去。鬢上輕煙髻上雲。遮不到門前路。長被音書誤。空把歸期數。花上靈膏蔗上霜。解不到心中苦。

憶秦娥 又一體

曉朦朧。梵樓僧起傳清鐘。傳清鐘。一絲殘夢。繞向簾櫳。桃花滿樹東牆東。春光染透胭脂紅。胭脂紅。可憐昨夜。暗雨淒風。

浣溪沙 秋圃生索賦

風韻蕭閒憶窈娘。玲瓏豔雪裊欒梁。酒醒時候見殘妝。錦匣暗緘紅蠟燭。羅衾新繡紫鴛鴦。夜深添爇一痕香。

憶仙姿

愁見驛橋芳樹。開盡好花無主。有得許多香。都在冷清清處。風雨。風雨。夢落斷溪橫浦。

卜算子 正月十六日夜作

對酒默含顰。惜別愁相送。莫向今宵望繡鞦。門外霜華重。孤卻枕旁鴛。閒卻衾邊鳳。不道嫦娥更薄情。窺破離人夢。門外春風立繡鞦。蘇子由正月十六夜句

浪淘沙

小會約前期。紈扇留詩。玉函分得露華脂。添寫餘春雙芍藥。記取分離。明日隔天涯。別酒休辭。低聲強道莫相思。無奈橫波紅淚雨。滴向青瓷。

浣溪紗

曲折迴廊夜氣清。綠楊垂地鎖春晴。是誰纖影壓疏櫺。珠箔裊煙龍腦熟。玉屏遮月鳳膏明。了無聲息落花輕。

桂殿秋 悲懷

緘書篋。鎖書樓。年來遺恨在心頭。翦燈共醉花前酒。人自歡娛我自愁。

滿江紅

長嘯臨風。時醉舞。青冥霜鏢。都莫問。古來英傑。剖符分爵。夢裏功名螻蟻郡。畫中光  
寵麒麟閣。直張皇。單手會擎天。何曾著。槐棘府。蓮花幕。樹恩怨。叢悲樂。總煙流雲  
卷。玉銷金鑠。掉首忙回塵海轡。盪胸立破愁城鑰。好凌虛。邀月到揚州。騎黃鶴。

多麗 金山同質堂舅氏作

問靈峯。蟠根如許離奇。邈千秋。蘇髯去後。虛臺誰叩禪機。翠崖幽。松枝瘦曲。蒼壁潤  
羅葉低垂。三度登臨。十年俯仰。浮圖塵網舊題詩。空記得。南泠泉好。亭檻啜茶時。滄  
江遠。澹煙斜照。仙鶴孤飛。語山僧。當年戰蹟。望中野渡漁磯。泊戈船。天兵樓櫓。連  
鐵甕。大帥旌旗。爭信烏珠。山門走馬。紅袍玉帶逸重圍。贖多少。英雄遺恨。風咽暮潮  
悲。歸橈晚。練塘呼酒。手酌冰夷。

南鄉子 席上調某參戎

芳酒瀉銀瓶。素瑟朱絃小鳳聲。檢疊雄心聽麗曲。多情。年少周郎虎帳英。寶劍舞青冥。翦雪團花一鳥輕。鐵券封侯三萬戶。虛名好向君王乞愛卿。

絳都春 丁未南歸重經邗上十年朋侶雲散風流棹小舟出城尋曩時游賞

處荒涼滿目光景全非命酒孤斟悵然成詠

山亭冷醉。歎回首夢華吟愁牽起。萬燭絳紗。曾款瓊筵人多麗。黃金鑄合悲歡淚。半灑向春紅花底。俊游何在。三生暗省杜郎顛顛。荒寺鐘塵梵蝕。更誰見舊日竹西歌吹。二十四橋明月簫聲空流水。秋風亂柳漁舟繫。蕩一片蘋煙蒼翠。小樓曲彙闌干暮涼倦倚。

浪淘沙

闌角橫吳檣。人對離觴。一川夢雨溼春光。解向玉樓遮望眼。多謝垂楊。後約指新涼。蘭鬢吹香。見時重認別時妝。留取羅襟紅淚點。添繡秋棠。



醉春風

執手留歡住。相看無片語。一回凝黯忽生嗔。去。去。去。桃葉江邊。苧蘿溪上。問君何處。  
此意難分付。空遣離心苦。歸期約我雁秋先。許。許。許。輕拭啼痕。怕教銷損。鏡中眉  
嫵。

前調

夜靜燈花墜。旁皇假畫几。香篝拚是一春閒。睡。睡。睡。圖得中宵。釀愁成夢。見君歡喜。  
不道愁難避。新夢還堪悸。起來驚見枕衣紅。淚。淚。淚。裙帶雙鴛。鏡奩孤鵲。信人顛  
顛。

浪淘沙

戊申北上內子李氏在京寓已於仲春逝世

北望五雲鄉。地闊天長。半年時事感滄桑。淮水風煙漳水月。孤鳳迴翔。愁檢客中  
裝。淚滿詩囊。青燈一粒照秋涼。省得單衾無好夢。更莫熏香。

鵲橋仙 七夕有寄

靈橋駕鵲。仙輶策鳳。銀漢東西穩渡。七襄雲錦織通心。算不枉、鴛鴦機杼。人間天上。誰憐月姊。獨守廣寒深處。蛾眉一曲淡含顰。怪今夜、更添淒楚。

畫堂春

秋屏南畔路三叉。竹扉羅壁人家。重來愁對綠陰斜。月冷雛鴉。密字空題鳳紙。虛牕靜鎖蟬紗。東風卷絮水飄花。分去聲向天涯。

桂枝香 聲木生以寶飾紈扇寄楚中桂林校書爲賦此解

離筵索醉。記倚樹吟風。黃雪驚起。人向京華遠隔。驛程迢遞。賦愁暗灑霑襟淚。望南雲、美人湘水。雁函遙附。輕鈿綴玉。軟冠黏翠。念前度、團圓密意。更書贈銀花。寄情千里。留取歸時重認。莫歌顛頓。舊游曾聽霓裳曲。廣寒深、誰護香蕊。夜來明月。多應照冷。素娥仙袂。銀花寄情二妓名

憶故人

簾外鶯聲喚曉煙。似笑我、春愁苦。可曾知我客江關。一榻棲僧宇。手折垂楊露縷。

小闌邊、低徊自語。女夷何事。好箇花朝。冷風吹雨。

醉春風

十畝花成陣。春風吹綠鬢。棠陰宰地透奇香。認認。認認。前日橫塘。似曾相識。淡姿幽韻。  
石磴蒼苔潤。微步凌波穩。翠萸細度玉鉤痕。寸寸。寸寸。飛燕音塵。戲鴻消息。倩誰尋  
問。

行香子

塘外蒹葭。門畔枇杷。記年時、曾賦芳華。流光杳渺。舊夢幽遐。似水邊漚。波底月。鏡中  
花。幾回尋省。何苦愁嗟。譜新詞、玉笛銅琶。向來輕世。隨處浮家。對鴨鑪香。鶴觴酒。  
鳳團茶。

謝池春 春望

靜掩閒門。不覺麗春如許。便催成、花飛絮舞。遙憐芳草。徧沙汀烟渚。種愁根、舊痕迷  
路。蓀橈桂槳。曾記賦情南浦。望天涯、鄉心最苦。東風搖暝。送鶻聲淒楚。怕歸來、又

聽宵雨。

減字木蘭花 旅懷

清明近了。紫豔紅芳爭窈窕。可惜東風。弄影吹香客邸中。月輪重滿。照徹離愁春不管。對月傷春。一樹桃花冷笑人。

曲游春 白下清明

夢杳飛英宴。但石泉槐火。吟思蕭屑。剗地東風。颺桃花如雨。李花如雪。冷食留香蕨。信無奈。可憐時節。問杜鵑。縱勸人歸。何苦夜深哀咽。枉說尋芳佳月。徧郊外雕鞍。溪畔羅襪。鄉國縈心。總蘭襟淚染。柳圈愁結。春浦煙蕪闊。望不到。雙魚書札。料也應念我江南。浪遊恨切。

玉京謠

柳岸東風緊。萬點飛花。亂颺春光碎。嫩草鋪煙。長干遙帶流水。念一片、高下帆檣。定幾許、天涯游子。斜陽裏。蒼茫獨立。平添羈思。黃金買醉長安市。甚而今、向異鄉索

米。匣劍囊書。銷磨多少豪氣。算舊時曾領吟愁。總不道。淒迷如此。誰相慰。惆悵故人千里。

買陂塘 題張氏陶谷別業

好林亭。暗泉奇石。巖巒飛下空翠。雲窩十畝藏春穩。容得柳眠棠睡。圖畫意。渾忘卻浮塵。近隔人間世。攀條弄蕊。看綠罨鴛簾。紅飄燕戶。身在衆香裏。闌干曲。指點苔枝。腕地。巡檐多少幽契。秦川公子家聲舊。風月總能料。平理。人道是。千載上山中宰相。曾來此。神仙故里。想騎鶴歸時。倚樓吟嘯。醜酒向花醉。老梅一株數百年物

絳都春 題楊樸安夢游圖

瓊闌玉樹。記牽引夢魂。徘徊宵午。弄影半開。誰倚寒香。迷離處。疏風澹月長淒楚。望不徹。籠梢煙霧。散花應念。維摩病裏。夜吟清苦。前度。情懷漫憶。似襟上舊染酒痕。消去。細寫畫圖。一枕淩虛。愁何許。幽詞總是空中語。信無礙。禪心泥絮。笑人還羨羅浮。臥聽翠羽。

附樸安自記。少有癡疾。夢中常吟云。風清月白夜相思。一曲闌干一闋詞。寫到  
玉人斜倚處。梅花已有半開枝。醒而益悵惘。謁華藏玉潔師。教讀楞嚴。後夢一  
道士。臥樓上。吟曰。旁臥有人渾不識。滿身只是酒痕多。醒後意頗適。逾月。復夢  
入山聞磬聲。來上界。口占云。十分常寂寂。一磬獨悠悠。響徹竹林末。聲來雲嶺  
頭。一僧撫掌曰。此非一念不生靈光炯炯之謂乎。驚寤。疾遂愈。

蝶戀花

客裏蕭條過禊節。柳絮梨花。飄散晴天雪。多少思量無處說。東風不解心頭結。  
夜聽蚪壺春漏咽。孤似帷燈。冷似窗前月。茗椀停斟香篆歇。輕衾一幅愁千疊。

百宜嬌 和楊樸安詠帳鉤

小柄裁珊半環鑄玉。新喜絳絲輕繫。細影玲瓏。蕊珠圓綰。閒襯流蘇香穗。依稀瘦月。  
卻未解。分明窺睡。笑涼幙。雙珮懸魚。恰宜紋簟鋪水。長省記。移燈畫几。迴面解羅  
衣。冒人花髻。響怯銀螿。縐憐錦額。垂處還勞纖指。封侯夢錯。最怕是。君心如此。待朝

來散盡春愁。卷冰綃起。散春愁。隋宮帳名。

步蟾宮

青紗枕上忘春曉。被雙燕、呢喃來報。定知銜得一窠花。卻曾過、誰家亭沼。游仙惜  
是催歸早。尙依約、香雲縈繞。紅樓飛上不驚人。問燕子、何如夢好。

一落索又一體

怪他風雨無情思。把鄉心敲碎。下簾欹枕一燈殘。獨自箇、惺忪睡。莫是故來相試。  
看愁人何似。而今卻道不曾愁。又特地、和衣起。

長相思

曉風寒。晚風寒。倚徧僧樓十二闌。花深鐘磬閒。小長干。大長干。山外江流江外山。  
春雲迷故關。

柳梢青

最是難聽。夜深風雨。吹滿空城。作意添愁。闌回春夢。攙入秋聲。梵窗誰報寒更。是

檐角、飄蕭斷鈴。中歲光陰，異鄉情味，孤枕殘燈。

金縷曲

贈胡佛生同年四闋

慧業前身種。問生朝、蘭湯百沸，釋迦親送。闌入功名金紫隊，長苦塵波瀕洞。人道是、雲霄鸞鳳。肯信京華秋月夜，向花前、寫出鄉愁重。呼短笛，聽去三弄。蓬萊一覺游仙夢。又無端、鼇峯散直，鶴廳支俸。遺絹家聲留奕葉，饒有清芬可誦。看瓠子、河邊飛鞚。傳語使君今鄭白，待重聽、禾黍新歌頌。毛義檄，勸君捧。

風雅分流派。最憐君、千端鏤織，浣香文海。詩筆三唐詞兩宋，鎔作珠光玉采。花月地、都無聊賴。翦翠裁紅元費日，卻何人、肯負清吟債。多少意，寄言外。新愁舊感紛煙靄。託微辭、秦妍鄭婉，李娟張態。一紙閒情添好賦，難向兒曹索解。算只是、蓉裳蘭佩。生就嶙峋腰畔骨，幾曾來、飛燕裙邊拜。應不事、道人戒。

小榭斟醽醑。有同心、先春種蕙，晚秋餐菊。月底參差聲學鳳，人比秦樓弄玉。更唱和、詞章清馥。分得餘情愁上界，替雙星、宛轉傳心曲。雲葉紙，寫盈幅。燕臺一去更寒



燠料緘來。花陰好句。日邊披讀。見說淒涼聽夜雨。長憶西窗翦燭。信不似尋常羅縠。妝閣鑄成香茗賦。是三生、修到才人福。添韻事。向新錄。佛生與夫人均有閏六月七日詞極佳

邂逅江南路。鎮相憐、嵇生放達。庾郎清苦。別後新霜攙綠鬢。驚問長安舊雨。更歎我、凌雲空賦。將相神仙成畫餅。笑平生、真被儒冠誤。哀樂事、不堪數。長繩莫挽朱光住。入中年、交游歷落。酒龍詩虎。第一難消湖海氣。還憶燕齊越楚。無奈是、貂裘非故。散盡囊金三十萬。讓青蓮、豪逸橫千古。抽佩劍、爲君舞。

朝中措

蘭舟重問水邊廊。塵冷畫樓香。誰放金蟾齧鎖。空憐紫燕窺梁。一天疏雨。籠煙冪冪。關舟重問水邊廊。塵冷畫樓香。誰放金蟾齧鎖。空憐紫燕窺梁。一天疏雨。籠煙冪冪。霧黯淡流光。繫得新愁千縷。分明舊日垂楊。

惜餘春慢 送春誌感

豆筴橫畦。藤陰垂院。又是江南春老。尋詩意淺。對影歡疏。慵問露亭煙島。何況潘郎

鬢華佳節驚心。總添煩惱。似蠶房愁女。潛窺深夜。亂絲縈繞。千萬朵、錦幄花枝柔。  
香棲夢。半入池萍階草。鶯巢翠暖。燕疊紅乾。芳事更餘多少。休念東園勝游。金榼酒  
空。玉平聲語居切。鈿人杏。笑梅風生處。年時紈扇。舊恩重好。

西子妝慢 得韻字

被淺籠霞。裙輕縐水。綽約小姑清韻。啼鶯舞蝶滿溪花。冠春風、一枝芳潤。勻頰淡粉。  
倩誰寫、蘭儀蕙問。寄閒情向錦筵華燭。新調絲軫。觥船引。影動橫波。酒入雙眉暈。  
前身合是捧心人。更能消、綺窗幽恨。香巢未穩。念何日、詩吟楚閨。好丁寧、莫遣韶顏  
瘦損。

一萼紅 得秋字

上簾鉤。乍酒闌分茗。纖手淪冰甌。鬢影欹花。腰肢顫柳。銷魂根觸前游。是那人、香名  
曾合蠻牋上。佳傳寫風流。翠袖塵凝。青衫淚黯。回首悲秋。說與瓊姬惆悵也。驚殘  
歡夢。費盡纏頭。金線縫衣。玉箏移柱。年來嘗徧閒愁。且莫訴、天涯淪落。好春光、還在

小妝樓。只怕仙源重訪。空誤漁舟。

江城梅花引

吹笙樓上送瓊娥。試新螺。理輕蛾。畫作遠山。忍恨聽離歌。春又難留人又去。折楊柳。采蘭荃。喚奈何。奈何。奈何。悔蹉跎。雙淚波。露袖羅。醉也醉也。醉一晌。依舊愁多。迢遞紅牆誰許渡。銀河。寄語浣花堂。上客添廣廈。千萬閒。署鳳窠。

虞美人

韻秋處檢回領衣爲酬此解

昨宵酒國春如海。醉把襟船解。檢來微帶紫花香。還似承雲一襲贈東陽。閒憐心字羅衫畔。輕壓詞梨暖。暗牽窗下舊愁根。曾費柔荑親護玉榴痕。

聲聲慢

題張小溟聽秋圖

蛩階漬雨。雁路澄霜。西風吹滿平林。冷淡年華。空添宋玉悲吟。誰知有人忘世。鎮疏閒、聽得商音。寄情遠、更新評菊譜、穩臥蘆衾。絕似秋聲別館。寫范寬圖畫。梧葉松陰。一片蕭騷。都來洗盪塵襟。多愁定應笑我。到恁時、搖碎幽心。還問取、可能消、涼月

夜深。

薄倖

畫堂歌舞。乍一醉、燈筵綠醕。算歷徧、天涯風月。誰道縈牽如許。片時閒、千萬迴腸。雲  
牋密寫傷春句。悵錦瑟華年。珠簾芳質。飄泊輕萍微絮。最怕是、歸來後。空對影、旁  
皇獨語。解衣纔偃臥。披衣還起。眼前無箇安愁處。倩何人訴。歎相逢、未信相憐。枉用  
相思苦。啼鴉喚曉。淒絕疏窗細雨。

御街行

題朱岫雲夫人蘭梅冊子

幽人獨領荒寒趣。向筆底、傳襟素。靜如蘭蕙瘦如梅。窗下時添新譜。湘江煙雨。孤山  
冰雪。消盡羣芳妒。仙根早信栽瑤圃。夢不到、紅塵路。愁絲纏就七條絃。彈得琴聲  
淒楚。心香一點。與花長在。冷冷清清處。

瑞雲濃

席上爲吳丈蘭皋作

青溪盪槳。桃根今日重見。人影衣香畫樓淺。迴風縹渺。更小弄、紫簫聲顫。倚燭勸蘭

樽送秋波一翦。誰道歡筵。還又觸、蕭郎別怨。十五年前舊人面。流光飄羽。問往事、楚雲天遠。細雨檐牙。暗催曉箭。

月邊嬌

靈府嬋娟。是暖玉鑄成。新冰團就。弄春幽院。迷香邃閣。重款夜筵。芳酒檀槽按曲。露  
十指、柔葱纖秀。銷魂燭底。曼睵轉、牽花搖柳。暗憐臂隱羅衫。好鈴風月。桂膏紅透。  
暈眉煙淺。欹鬢霧密。愁煞翠尊闌後。清宵恨短。聽咽盡、銀壺殘漏。歸來索夢。認臥虹  
溪口。

瑞鶴仙

小窗臨綠水。記送我、雙橈夕陽煙裏。人前暗凝睇。更勝常低道。密傳幽意。閒愁喚起。  
念誰惜、韶顏稚齒。甚長教歌舞。飄零空鎖鏡中眉翠。曾是酒闌燈燧。哽咽殘宵。把  
羅瀟淚。珠零玉碎。繁華夢、半顛願。怕情深分薄。桃源重問。惆悵風花浪蕊。忍孤尋、紅  
板橋邊。畫闌醉倚。

臨江仙 淮東舟次

惆悵踏歌楊柳渡。西風斜日潮平。小舟安穩布帆輕。一尊離別酒。十里短長亭。今  
夜淮東隄畔月。可憐空照淒清。戍樓蘆管動秋聲。澄湖煙水闊。天外望江城。

桂殿秋

涼露滴。晚烟平。白菱花。裊月波明。誰家長笛吹秋怨。有箇離人獨自聽。

鵲橋仙 寄心耕弟

銅街踏月。金船呼酒。人似江南杜牧。墜歡殘夢了無痕。怕重賦、香綃夜玉。紅巾淚  
黯。紫簫聲斷。離恨苦縈心曲。橫山向我學愁蛾。恰臨著、秋波皺綠。

醉花陰 寶應湖晚泊

湖上長隄煙壓樹。暝色催津鼓。水闊雁聲寒。喚起離人。夢落荒洲渡。秋來已是添  
愁緒。更向天涯去。爭得不淒涼。一陣西風。一陣蘆花雨。

蘭陵王 舟次感懷

雨聲歇。林杪低籠淡月。扁舟繫、湖岸冷楓。一點殘螢墜疏葉。波平暮靄闊。蕭屑。蘆花颺雪。荒汀外、嘹唳斷鴻。哀入西風鎮淒切。驚心素秋節。甚枉送年光。輕賦離別。箏樓琴館。纖歌闋。嗟玉鏡空護。繡帷深掩。閒拋針線向。薰篋。定紅淚盈睫。愁絕。意難說。漫密寫鸞牋。重寄鴛牒。幽襟靜鎖。丁香結。望驛路千里。夢魂飛越。孤燈成暈。悵夜永。暗漏咽。

少年游

鬱金堂上浸涼蟾。花影碎篩簾。一曲離歌。千重別意。殘酒逗眉尖。雙隄遙引相思路。淚點溼征衫。淮水東流。秦郵西隔。淒斷錦魚緘。

水龍吟

峭風飄散歌雲。短帆暮落鴛鴦浦。嵐陰萬疊。浪紋千頃。秋連吳楚。暖袖棲香。涼篷消酒。一回凝竚。望蘆花月白。蓼花煙紫。分明是愁生處。羈泊誰憐客路。又驚人、驛亭笳鼓。思量舊迹。墜鞭彈劍。年光馳羽。別思迷茫。歸心縈繞。合成淒苦。怕橫吹鐵笛。天

空水闊。喚魚龍舞。

解連環 別金陵後卻寄

片帆催發。望滄波浩渺。斷腸新別。歎半載、書劍飄零。又遙數去程。故關天末。領受淒涼。第一夜、寒江煙月。傍汀蘆岸。葦漁火數星。雁語幽咽。相思寸心暗結。問魚牋鳳紙。誰寄緘札。待夢魂、飛度青溪。怕依舊成愁。淚灑桃葉。護玉圍香。肯孤負、梅花時節。好重來、畫樓喚酒。翠篷泛雪。

金縷曲 舟中感懷和胡佛生同年泰州客次見憶之作卻寄

寂寞蘆花渡。逗孤帆、閒聽戍笛。倚窗延佇。綠霧蒼霞迷水穀。染出吟愁萬縷。回首望、江城天暮。賸有輕煙樓畔月。向征人、照見相思苦。離別意、黯分付。清狂更憶樊川杜。寫幽懷、魚綾雁帛。報書何許。鶴背高寒騎不得。遙倩迴風寄語。怕總是、關河羈旅。想得漁鄉秋雨夜。對疏燈、重和蘋洲譜。尊酒約、竹西路。

浪淘沙 宿銅陵



沙嶼晚潮平。雲黯南陵。杏山依舊簇寒青。一派仙溪花堰水。流過荒城。對燭數更聲。客裏心驚。小團敲茗散餘醒。悵望吳關飛雁杳。月冷江青。

桂殿秋 望五松山

江上路。指銅陵。五松寒翠轟仙屏。愁心飛上雲峯疊。一瓊蒼茫酬酒星。

點絳脣

千種閒愁。翠牋書破難分付。暗窗敲雨。桐葉隨風舞。多謝秋蟲。會得人心苦。燈殘處。更無頭緒。替我模糊訴。

青玉案

一林煙靄迷寒隴。黯回首、停鞭鞚。襟上酒痕和淚凍。心知長別。繫情何苦。重向津亭送。葦村茆店孤衾擁。月影淒涼透窗縫。待向清宵尋好夢。風燈搖暈。夢飛不起。壓枕離愁重。

醉花陰

記得西樓傳桂酒。人比瓊枝秀。絲管沸深更。醉寫新詞。硯几圍紅袖。花權月榭長依舊。百徧思量透。不道有如今。夢醒孤舟。香冷秋燈瘦。

眉嫵

望娟紅啼雨。嫩綠顰煙。花柳喚愁起。盪槳前溪去。東風曉。樓臺隨處明麗。舊時燕子。向畫梁、重認香壘。又爭信、月榭歌塵冷。悵春夢流水。曾記芙蓉屏裏。見繡裙飄蝶。華帳籠翠。天闊青鸞杳。江南怨、吟成還倩誰寄。訪桃問李。怕更尋、深巷珠履。但腸斷殘綃。千萬點鏡函淚。珠履巷王淑故居也

摸魚兒

乙卯二月同年沈笠湖。鯉赴官東河行有日矣同人設筵相餞余賦

此解卽題其城南送別圖

最銷魂、綺筵華燭。清宵偏照離緒。驚心走馬燕臺客。都是異鄉羈旅。君記取。算眼底貂蟬、誰竟封侯去。流年過羽。好載酒裁牋。謫仙樓上。和我問天句。縈懷處。滿地征笳戰鼓。家山迢遞何許。春蘭秋菊靈均淚。閒寄玉英瑤圃。添樂府。把錦字淒聲、分付

昭華譜。新圖試補。怕根觸東陽。腰圍瘦損。愁對杏花雨。  
笠湖有香冢。記傳奇張春陵。侍御擬爲作填詞圖。

踏莎行

畫裏溪山。鏡中雲樹。斜陽半笠橋頭渡。水亭蘿薜晚涵煙。冷香樓上秋娥住。  
桂子紅醪。茶丁碧露。玉纖親向花甌注。風光回首夢淒迷。天涯萬里相思路。

金縷曲 城南香冢社中人瘞花處也紅芳夢斷碧草愁新撫事枵懷摠詞誌

感

一片苔碑翠。歎芳華。消沈萬古。夜臺深閉。流水斜陽空寫怨。多少紅蘭白芷。又何況。  
東園桃李。玉釜荒唐靈樹杏。問蓬萊。誰是司香尉。憐舊賞。感塵世。三生細憶添顛。  
頓最愁人。寒枝弄葉。影娥池裏。錦帳蘅蕪驚夢短。悄向風前灑淚。臆託意。哀歌山鬼。  
冷碧吹烟蘿月暗。想啼鶻。喚得春魂起。歸騎晚。酒重酬。

摸魚兒 爲六如室主人題女史林蓮卿小照

記塵宵。餞春蘭幕。燈筵曾倚瓊樹。新圖省識崔徽面。依約鏡中眉嫵。君此去。便攜得靈娥。穩踏飛仙路。娉婷倩女。想一片清魂。飄煙抱月。吹向畫函住。尋前夢。空說玄霜玉杵。情絲牽作離緒。天涯回首櫻桃宴。愁滿雁橋犀浦。重寄語。怕十樣花牋。難寫相思苦。秋窗夜雨。好對影添香。綵灰芳酒。南嶽望鴻御。飛仙嶺入蜀要道。

浪淘沙

風葉響虛廊。燈颭寒光。翠衫蕭瑟十年香。記起江湖春夢影。千徧思量。窗外急啼螿。如說衷腸。倩誰傳與卻愁方。難道秋來聽夜雨。都不淒涼。

南鄉子 泰安旅次

一簇小山村。紅豆花圍白板門。茆屋三椽容寄榻。黃昏。淡寂秋釭照酒尊。 怱悵碧天雲。釀得涼陰逗十分。欹枕夢回聽細雨。銷魂。萬里驂鸞去國人。

御街行 檢亡室李恭人手鈔詞卷賦此寄哀

浣花牋上簪花字。賸留向、人間世。瑤釵冷落玉樓空。愁絕餘香殘蕊。春尊孤館。秋鏡

長簾多少思君淚。短緣歡夢隨流水。怕細憶平生事。十年塵鎖翠雲箱。腸斷蘭編重理。吟風感月。悲涼遺譜。吹得鴉笙碎。

浪淘沙 邗上感懷

碧水帶雲流。冷淡成秋。酒旗歌板恨英遊。記得杏花香霧裏。曾艤蘭舟。鱗石古灣頭。鐘磬空樓。舊盟何處問沙鷗。十里煙蕪千步柳。都是春愁。

東風第一枝 衢郡舟中守歲

錦纜橫洲。珠釭照水。天涯人度芳節。漏籤清咽。吟蚪響竹。暗驚夢蝶。多情紅袖。鎮不放、瓊筵歌闋。待醉把、香管華牋。細寫寸心愁結。寒料峭、夜霜散屑。春隱約、霧煙暈纈。玉尊重暖。鳧花翠杓。緩分麝月。篷窗支曉。試聽我、昭華三疊。要喚醒、瀛海東風。淨掃亂山殘雪。

臨江仙 感事

讀破芸緗三萬卷。迴翔直到公卿。胸藏武庫角心兵。綺羅叢裏。擎酒說功名。鏤玉

橫腰金佩肘。白頭一夢零星。舞裙歌扇總飄萍。故人江海閒。續種魚經。

齊天樂 元夜泊鷹潭風雨交作悵然賦此時奉出守南寧之命

繭篷蠟炬愁芳夕。連汀又吹寒雨。浪卷珠花。雲飄翠葉。想得魚龍歡舞。蕭條梵宇。送一陣風鈴。誤聽簫鼓。悵望重宵。素娥深閉廣寒府。殊鄉清興易減。歎吟梅詠柳。空記前度。禁苑春燈。巖關夜酒。併作江湖心緒。年華暗數。怪著破征裘。遠遊何苦。曉夢惺忪。翦波鳴瘦鷺。併字上聲作平

點絳脣 舟行晚霽光景極佳詞以寫之 貴溪道中作

溪雨收寒。斷霞紅淺。飄魚尾。樹簷山髻。村隴斜陽醉。數點漁舟。隨意橫沙背。東風細。棹歌聲裏。一鏡春煙翠。

摸魚兒 東湖感舊

問湖邊。舊時鶯燕。而今亭榭誰主。百花洲畔。波鱗碧。低卷斷煙零雨。淒絕處。是幾箇漁罾。冷挂眠鷗渚。垂楊自舞。想玉笛聲殘。畫船人杳。幽恨向風訴。橋東路。還記題

香俊侶。羅牕深夜絃語。十年重唱西江月。寥落紫雲遺譜。吟思苦。費萬軸情絲。織就銷魂賦。天涯倦旅。悵沾酒樓頭。闌干獨倚。酩酊送春去。

西江月

風細瓊花弄影。雲疏璧月流光。江妃裙幅寫瀟湘。波颭珮環微響。密意歌翻子夜。深恩結綰丁香。春星冷照鬱金堂。人醉鴛幃蝶帳。

前調

重向綺堂開宴。清歌唱徹伊州。琵琶聲裏寄綢繆。腸斷玉人纖手。宿雨潤生絲幔。晚風寒襲茸裘。明朝南浦上扁舟。獨自傷春中酒。

明月逐人來

蘭煙搖穗。蓮釭舒蕊。春醪醺、仙娥微醉。綠腰聲闋。花彈流蘇髻。縹緲驚鴻飛起。迴睇瑤階。酥雨晚來初霽。凌波顫、向人偎倚。一鉤鴛襪。香沁苔痕翠。好是湔裙天氣。

青王案

一繩歸雁橫雲去。漸夕靄籠江樹。征棹參差依近浦。殘笳疏角。野亭荒隴。寂寞湘東路。愁吟況是春光暮。萍水何人慰羈旅。冷醉閒眠凝黯處。薇燈垂蕊。蕙香銷炷。夢醒烏篷雨。

臨江仙又一體 衡陽道中

多謝風前雁侶。相呼似說歸期。應憐飄泊楚江湄。沙寒蘆荻短。水闊稻梁稀。我比征禽更苦。年來孤影天涯。一春愁思只淒迷。九疑遮望眼。猶自向南飛。

前調又一體 寄劉養素方伯

記得城南春夜飲。朦朧月照蘭堂。小蠻盤鼓試霓裳。酒顚紅玉暖。花鬢綠雲香。吟就懊儂愁寄遠。津頭一葉征航。杜鵑聲裏宿瀟湘。雨敲千里夢。江繞九迴腸。

菩薩蠻

畫堂深窈蘭燈綠。微吟遠徧湘屏曲。斜月動虛廊。卷簾花霧香。石闌晴絮滿。風定春煙暖。纖影颺青苔。玉人扶夢來。



滿江紅 題陳竹珊且高歌圖

如此風神。誰信道、閒愁成斛。端合倩、蛾眉翼坐，倚歌橫竹。紅豆記聲傳麗譜。翠綃絨  
淚題芳曲。有鷓鴣、解勸玉東西。春醪熟。浮世恨、窮途哭。槐國蟻。蕉隍鹿。算雲臺煙  
閣。總如碁局。借嬾銷磨湖海氣。買癡領受山林福。把新詞、分付綠朝雲。花閒讀。翠綃  
句陳同甫詞圖上有鸚鵡

高陽臺 題劉養素方伯于潯戎馬書生圖

燕領雄姿。鳶肩異表。書生例許封侯。寶騎騫騰。錦繡新繫吳鉤。平戎不負男兒志。擁  
紅旌、千隊貔貅。問何人、只戀儒冠。不換兜牟。文章一樣驅鋒鏑。看綸巾羽扇。緩帶  
輕裘。顧曲周郎。依然前度風流。功名待畫麒麟閣。算年華、五十平頭。更相期、唱凱歸  
來。重醉金甌。

虞美人

粉雲籠暝低銀浦。空裏飛瓊舞。迷離鷗鷺落平沙。昨日疏林今日盡開花。垂綸好

是煙波客。放眼江天白。孤舟蓑笠不勝寒。虛被閒人指作畫圖看。

壺中天 李一峯五兄南村卜宅圖

綺塵如海問乾坤。浩蕩桃源何處。五畝蒼煙容小築。隨意藥闌瓜圃。揖別公卿。交歡父老。閒作林泉主。幽襟虛結。畫圖遙寄心素。還望榆柳池亭。故園春好。早晚歸耕去。靈谷荒涼山鶴怨。生恐頰顏巢許。飯軟炊菰。醪香釀菊。消領田家趣。誰歌招隱。樹輪深翳衡宇。

水龍吟 望江道中守風

凍雲飛度亭皋。浪花萬疊連霜渚。漁村人散。驚沙卷雪。亂山橫霧。冷逼鷓裘。暈迷蟾鏡。聲喧鼙鼓。訝千軍馳驟。金戈鐵馬。長圍合。麀貔虎。還恐潛蚪夜舞。喚移舟。葦叢深處。閒鷗應笑。江空歲晚。客程良苦。靜對蘭缸。細斟梨醞。憂時懷古。定何年穩泛。鷗夷一舸。向吳淞路。

於中好 題吳穎函秋林獨坐圖

塵寰別有清涼境。對巖岫、竹疏杉冷。紫茵鋪地苔斑淨。是一幅、雲林景。仙心縹緲  
禪心定。料此意、更無人省。幽吟自寫煙霞興。但說與、秋猿聽。

高陽臺 題鄧伯昭同年瑤雪堂聽雨圖

雁字風酸。蛩機夜冷。釀愁多是幽霖。禁得天涯。更聽簷角淒音。池塘夢醒江湖闊。鎮  
無聊、繪雪堂深。寫離襟。尺幅新圖。分付閒吟。十年彈指悲花萼。歎聯牀事杳寥落  
人琴。孤館寒鐙。可堪細說如今。憐君身世還憐我。愴鴿原、一樣傷心。舊園林、手種杉  
篁。惆悵清陰。東坡在黃州次韻子由種杉竹詩有應與杉篁刻日深及先生坐待清陰  
滿之句念之黯然

一翦梅 餞別

買斷韶光直萬千。滿樹榆錢。滿院苔錢。好花初豔月初圓。花下開筵。月下開筵。  
劍  
膽詩心付冷禪。君是中年。我是中年。曉風催上木蘭船。春水連天。春草連天。

四字令 江邊夜泊

長亭短亭。朝程暮程。片帆遲宿荒汀。渺離魂暗驚。風聲雨聲。三更四更。斷笳催喚天明。傍虛窗細聽。

滿江紅 別筵代作

忍淚尊前。重整束衫羅裙縷。愁別路。孤舟煙浪。望迷吳楚。妾命真如波上葉。郎心莫似隄邊絮。歎東風。一霎送春來。催春去。擎天手。凌雲賦。壯遊遠。佳期誤。怕金錢空卜。客程難數。留得花箋三百箇。背人細寫淒涼語。問何時。翦燭說相思。同聽雨。

滿江紅 代和

蜜燭香醪。裁別曲。還歌金縷。驚心是。鸞箋幽澀。鳳簫淒楚。蹤跡十年嗟泛梗。光陰三月愁飛絮。又征帆。一幅度煙江。天涯去。量董策。班揚賦。塵念繞。浮名誤。向君前安慰。後期遙數。樓上春雲團夜色。垂簾莫聽青鶻語。怕梨花。風瓣濺啼珠。成紅雨。

水

雲

樓

詞

運



將春霖（嘉慶二三——同治七）

字鹿潭。江蘇江陰人。幼隨父讀書荆門州署。登黃鶴樓賦詩。老宿斂手。一時有乳虎之目。父歿。家中落。棄制舉業。就淮南鹽官。權富安場大使。因移家東臺。欲訪宗源瀚於衢州。卒。吳江舟次。早歲工詩。中年以後。專力填詞。譚獻嘗曰。咸豐兵事。天挺此才。爲倚聲家老杜。蓋定評也。

序一

原夫詩餘之作。蓋亦樂府之遺。孤臣孽子。勞人思婦。籲閭闔而不聰。繼以歌哭。懼正容之莫悟。矢以曼音。其體卑。其思苦。其寄託幽隱。其節奏擘緩。故爲之者。必中句中。矩端如貫珠。宜宮宜商。較之桑黍。太白飛卿。實導先路。南唐兩宋。蔚成巨觀。玉宇高寒。子瞻將其忠愛。斜陽煙柳。壽皇識爲怨誹。當日朝野。不少賞音。元之雜以俳優。明人決裂阡陌。淫哇日起。正始胥亡。高論鄙之弁髦。小儒鼓其瓦缶。臣質之死。匠石傷焉。蔣生鹿潭承明不遇。作吏淮東。駟僮與居。踞觚竈北。芟衣荷裳。羌修能之自絜。霓旌玉玦。指潛淵以爲期。一夕相思。八公招隱。孰海唱之孤憤。答鬼語之幽修。有河上之同歌。吹參差兮自訴。又況簾雨闌珊。念家山於破後。衍波迢遞。悵環佩之來遲。鳩媒讐詈。傷如之何。徒觀其擁鼻苦吟。吹唇審律。性有三好。技了十人。謂爲倚聲。誠淺之論作者矣。僕強舌難調。知心幸託。不辭嚶引。聊代舷歌。駒谷人來。問花外羊求之徑。虎谿送罷。聽嶺間鸞嘯之音。歲在丁巳冬杪。六合彝舟甫徐。燕紱於東臺舟次。

序二

暝色沈花。晴颺扇竹。海月將吐。谿雲亂飛。惟時薄遊東亭。一燈僧榻。迺興索居之歎。載詠伐木之什。夜漏二下。見有排闥入者。蔣君鹿潭也。匪子猷雪夜之船。來因乘興。異張敏夢中之路。歡若平生。相與俯仰古今。斟酌損益。繹阮瞻之三語。研沈約之四聲。于是得讀所著水雲樓詞焉。夫倚聲一道。厥工南渡。後有作者。等諸自鄧。清詞麗句。或嗤以聲律無準。引商刻羽。則失之葩采不流。學者病焉。蒙有述矣。善乎休文之答韓卿。天機啓則律呂自調。六情滯則音韻頓舛。誠祛惑之丹沙。摘詞之藻鏡也。以今證古。如鑑取影。詞爲詩餘。不易此論。鹿潭所作。于九宮七始八十四調。不差毫黍。而能天機開闔。六情諧暢。別具工倕。自成馨逸。視夫膠柱聆音。引繩約尺。目論一孔。技窮三變者。不啻水觀海而泥憶雲矣。況復資性過人。幼辨燈瑗。默識在己。長知爨材。元亮讀書。義無求于甚解。伯休賣藥。名獨畏夫人知。構思旣深。每踖壁而臥。造語有得。則閉門以吟。泊夫漢上題襟。揚州聽鼓。十年短夢。付紅橋水上之簫。五月思家。



譜黃鶴樓中之笛。而鹽鐵之論。未申于文學。衙官之寄。尙屈於幕僚。幾呼賀鑄爲老  
兵。笑左思爲僮父矣。宜其長卿善病。平子工愁。四時得秋氣爲多。八音惟金聲最響。  
人來冀野。馬價難高。客上樊樓。酒悲不少。旗亭驛壁。寫行旅之蕭騷。趙北燕南。極風  
懷之跌宕。讀者徒知其詞之豐。不知其遇之蹇也。僕妃豨未學。硯肆無分。才謝王筠。  
偶賞其雌霓。居鄰淮海。愛唱其微雲。差有一日之知。能無千秋之想。揜蓬蒿於舊徑。  
君稱元卿。忘詞筆於春風。我慚何遜。感豐八年歲在戊午三月既望。江寧何詠撰于  
東亭慈雲禪社之散花室。

序三

嗚呼噫嘻。楚客幽憤。呵壁問天。王郎抑塞。拔劍斫地。盛孝章之身世。憂能傷人。陶靖  
節之生平。飢來驅我。素不習搔頭弄姿。委遺躄旅。以取一時之妍。復不敢明目張膽。  
跳盪跌肱。致觸並世之忌。出室一步。舉扇障元規之塵。讀書三年。鉏金割管寧之席。  
不得已而集成乾牒。名噉畫餅。么弦響振。則峽猿啼血。單詞吟妥。則窗雞破夢。天雖

高倚杵及之。海雖深。銜石平之。崔君苗焚棄筆硯。李長吉歐出心肝。我讀蔣子水雲樓詞。而悄然以悲廢然以歎也。夫其乘彌戾之車。抱蕭邱之性。方寸映日。都現文章。清談干雲。不模珠玉。羅含之夢。鳥五色。汗漫之屠龍。千金。謂宜一上強臺。三奪坐席。影然而魚龍跨。鏘爾而鸞皇鳴。而乃司馬家貧。安仁宦拙。神劍繞指。明瓊表心。世方以大樂享魯爰居。我且視諸石如海鷗鳥。洗耳行潔。或誣以盜冠。倚柱聲悲。頗疑爲求牡。伯龍牟利。鬼笑梁間。子昂賣文。琴碎市上。徒墮蠹以何裨。究連狝而無傷。猶復絲竹寓感。煙雲鬱懷。晶飯留賓。楹書付子。南面北面。何曾夫婦之儀。東頭西頭。陸機弟兄之屋。時或蕪城作賦。山陽聞笛。吟杜陵出塞之章。灑新亭高會之涕。目倦修塗。心傷逝湍。弔精靈於夜壑。惜日月於扁舟。逮至秋鬢凋殘。春人委化。淚浮盈寸。目鰥徹旦。百歲栩栩。蒙楚但思歸其居。四海浩浩。浮萍不能予之蒂。於是天錫小名。自稱獨活。玉谿短詠。半託無題。故其爲詞也。秀奪山骨。豔息花胎。鶯簧百轉。螳珠九曲。繭宵愁狀。果回甘味。合僊梵以同音。起古人而對面。始信崔浩思苦。至與魅爭。道衡功

專惡聞人語。宜其神解獨超。而孤芳自賞者焉。榮槐以丁戌之歲。客游淮海間。秦人視越。肥瘠何關。罔兩問景。蹤跡適合。雲喬晏起。終朝而伴休文。范縝寡交。舉足輒尋。王亮每當抽豪發詠。託旨騁妍。賞王筠之一篇。定虞松之五字。未嘗不抉剔癥垢。灑滌性靈。相視而笑。莫逆於心。落落焉。渺千古爲一瞬。羅萬象於寸紙。槐雖舌彊腕棘。而於蔣子所作。無間然矣。嗚呼。弦歌應節。流水可以移情。河梁小別。停雲因而增慨。君如效塞主吟。何減黃葉碧雲之句。我知有井水處。能唱曉風殘月之詞。辛酉八月。秀水二梅褚榮槐敘。

續集序

同治壬戌以後。予居泰州數年。兵戈方盛。人士流離。渡江而來。率多才傑。一時往還。如王雨嵐。楊柳門。姚西農。黃琴川。錢揆初。黃子湘。皆以詩名。而蔣鹿潭之詞尤著。鹿潭名春霖。江陰人。少負雋才。不拘繩尺。屢不得志于有司。乃俛就鹽官。嘗權東臺場。卸寵利。課團丁。禦侮。人咸德之。罷官後。猶供食數年。生平抑塞激宕之意。一託之于

詞運以深沈之思。清折之語。先刻水雲樓詞于東臺。同時作者莫不斂手。而鹿潭慨然自謂。欲以騷經爲骨。類情指事。意內言外。造詞人之極致。譽以南唐兩宋。意弗滿也。鹿潭既死。于漢卿哀其未刻之詞。畀予。予弟載之。復于篋中得鄉所札致者。都爲四十九首。並以付梓。鹿潭晚歲困甚。益復無聊。倒心回腸。博青眸之一顧。詞中所謂黃婉君者。聚散乖合。恩極怨生。鹿潭卒爲婉君而死。婉君亦以死殉鹿潭。瀕死向陳百生再拜。乞佳傳。從容就絕。論者謂此可以慰鹿潭。而鹿潭愈足傷矣。鹿潭復能詩。予弟亦嘗錄其可傳者數十篇。安得與雨嵐柳門西農琴川揆初子湘諸故友之作。搜輯而並刊之。一慰幽沈于地下乎。歲在癸酉冬十一月。上元宗源翰。

水雲樓詞

江陰蔣春霖鹿潭

甘州 余少識劉梅史於武昌不見且二十年辛亥余爲淮南鹽官梅史自吳

來訪秋窗話舊清淚盈睫其飄泊更不余若也

怪西風偏聚斷腸人相逢又天涯似晴空墮葉偶隨寒雁吹集平沙塵世幾番蕉鹿春夢冷窗紗一夜巴山雨雙鬢都華笑指江邊黃鶴問樓頭明月今爲誰斜共飄零千里燕子尙無家且休賣珊瑚寶玦看青衫寫恨入琵琶同懷感把悲秋淚彈上蘆花。

東風第一枝 冬至

雀醉晴檐蠅蘇凍紙嚴霜忽作輕暖錦貂纔近薰鑪鳳律暗移翠琯尋春無處但日日春痕偷展恰引起千丈愁思添似繡牀金綫雲影薄畫簾乍卷山意冷瘦筇又嬾幾多釀雪樓臺豫滌熨寒酒淺梅魂知否怕迤邐年華將換待借佗一縷東風悄

把萬花吹轉。

一萼紅 清明前一日偕周蓮伯散步城北紅日已西乃至虹橋復買小舟過

桃花庵蓮性寺煙水淒然遊人絕少共溯洄者漁船三兩而已

趁春晴。步前汀未晚。舟小蹙波行。抱樹谿彎。眠沙石老。芳草隨意青青。乍驚起、閒鷗短夢。伴落日、三兩櫂歌聲。水曲豪筇。柳陰叢笛。那處重聽。多少夕陽樓閣。倚闌干不見。空見流鶯。螢苑星繁。虹橋月豔。還記玉輦曾經。自湖上、遊僊事杳。問桃花、又過幾清明。賸取淒煙楚雨。愁畫蕪城。

謁金門

人未起。桐影暗移窗紙。隔夜酒香添睡美。鵲聲春夢裏。妝罷小屏獨倚。風定柳花到地。欲拾斷紅憐素指。卷簾呼燕子。

掃花遊

點波細雨。乍泥住歸人。便遲春信。布帆漫整。滿空江化酒。別筵花韻。數徧郵籤。也怕

鶯期未準。雁程緊。試悄向故園。先探芳訊。歸夢今夜穩。奈溼霧濛濛。畫樓難認。野梅瘦損。爲淒吟客裏。臙紅銷盡。墮水流香。又把孤篷暗引。醉鄉近。壓春潮。一船幽恨。

木蘭花慢 江行晚過北固山

泊秦淮雨霽。又燈火。送歸船。正樹擁雲昏。星垂野闊。暝色浮天。蘆邊夜潮驟起。暈波心。月影盪江圓。夢醒誰歌楚些。泠泠霜激哀弦。嬋娟不語對愁眠。往事恨難捐。看莽莽南徐。蒼蒼北固。如此山川。鉤連更無鐵鎖。任排空。檣艣自回旋。寂寞魚龍睡穩。傷心付與秋煙。

瑣窗寒

荒江晚泊清寒。送秋記去年款紅軒茗話。正此時也。

細竹通涼。疏苔媚雨。曉簾慵卷。窺花隔座。鏡裏暗傳嬌眼。最憐佗。傷春未工。畫眉錯問愁深淺。甚妝樓一霎。西風如葉。冷雲吹散。重見羞郎面。但恨指吳山。斷霞沈晚。扁舟暝宿。冷月稀星孤伴。繞空江。蘆花夜明。去鴻影淡煙岫遠。又寒莎。兩岸鳴蟲。細雨驚秋換。

浪淘沙

雲氣壓虛闌。青失遙山。雨絲風絮一番番。上巳清明都過了，只是春寒。花發已無端。何況花殘。飛來胡蝶又成團。明日朱樓人睡起，莫捲簾看。

渡江雲

春明再到人事都非。崔護蕭郎一時同感。

燕泥銜杏雨。鑪薰隱篆。朱戶晝悄悄。半窗松影碎。小語分襟。日暖喚青禽。羊車再到。那不見、招手樓陰。空自踢落花歸去。消歇酒杯心。沈吟。紅牆幾尺。遠過蓬山。更難通魚錦。換盡了、陌頭柳色。愁滿羅襟。夢中常訂重逢約。甚隔簾、翻怕相尋。門又掩。碧桃一樹春深。

綺羅香 寒菜

曉露荒園。斜陽破寺。十畝蟬聲啼徧。倦綠無多。生意井闌西畔。繞槿籬。蝶影還飛。近麥隴。馬蹄偏踐。怪年年、冷逐蓬蒿。閉門秋老。壯心嬾。齋鹽滋味最好。記伴西風信。裏蕪羹菰飯。笠影鴉鉏。因甚故鄉歸晚。待青玉、一甕春深。賸黃葉、半畦霜淺。認挑燈。



細雨山家。客來寒夜剪。

壽樓春 揚州之行歷春徂。秋萍梗再移。短夢雲散。作閒情賦。

過垂楊春城。繚游絲一縷。偷倚紅情。記得開簾收燕。隔花調鶯。桃葉渡。誰相迎。又幾番。潮生潮平。待菱唱船歸。荷香路。悄留月伴娉婷。西風起。涼蟬鳴。早拋閒素扇。歌斷瑤箏。可奈詩題愁寄。夢回無憑。珠戶寂。銀釭明。任聽殘。秋宵長更。但疏雨空階。蕭蕭半山黃葉馨。

水龍吟 沈珠傳奇好。以落花胡蝶泥人賦詩爲填此闕

絳娥吹墮瑤京。可憐豔骨多塵土。幾番夢醒。僊衣重試。冶遊愁數。寶扇兜雲。玉階團雪。欲離還聚。恨東風力倦。娉婷雙翅。銜不上。朱樓去。記共蹋青歸路。鬪盈盈。瘦腰紅舞。西鄰再過。滿庭莎草。一天飛絮。枝老春空。水流香在。綠陰千樹。但銷魂歌板。年年彈淚。憶花開處。

甘州 王午橋常山人詞筆清麗似吳夢窗。渡滹沱時相見。庚午復遇於南中。

云自越絕返都門也歌而送之

記疏林霜墮薊門秋。高談四筵驚擊珊瑚欲碎。長歌裂石。分取狂名。短夢依依同話。風雨客窗燈。一醉江湖老人似春星。驀上長安舊路。悵春來王粲。還賦離亭。喚天涯綠徧。今夜子規聲。待攀取垂楊寄遠。怕楊花比客更飄零。淒涼調向琵琶裏。唱徹幽并。

蝶戀花

雲影壓檐蛩語咽。涼雨聲聲。心碎梧桐葉。天外雁程飛又歇。小屏山上晴沙闊。愁減腰圍添鬢雪。慵戀寒花。病似殘秋蝶。題罷瑤箋和淚疊。相思後夜團團月。

金菊對芙蓉 層雲閣陰春寒不休年年梅子黃時客懷如是

日澹還收。雲低不落。輕寒輕暖輕陰。正朱弦響澀。寬褪湘琴。獸鑪潮暈香遲起。似潑水庭戶惜惜。疏簾影裏。晝長人嬾。都戀香衾。費盡春深春淺。把春人釀作梅子酸心。怕東風去後。夢更難尋。近來天亦愁如睡。鎖山眉。雨意沈沈。無端送別。絮飛花落。

偏是而今。

探芳訊 瓜州夜渡

大江暮。漸遠寺沈鐘。津亭換鼓。趁荒荒殘月。斜帆夜深渡。曹騰夢在寒潮裏。浪留船  
唇語。信西風。櫂入菰蘆。纜維霜樹。回首竹西路。賸鴉宿孤村。雁驚遙戍。星火微茫。  
曉色亂瓜步。數聲漁笛吹秋起。往事空煙浦。正無聊。篷背瀟瀟細雨。

大蘭花慢 中秋日周桐實自浙西歸得周蓮伯字

亂霞晴隔浦。正橫笛。莫江樓。看沙際潮回。城陰樹暝。帆勢遙收。灣頭數枝瘦柳。尙依  
稀。認得去時舟。雁外心傳錦字。鷗邊夢閣離愁。凝眸。桂影碧空浮。誰共舉瓊甌。問  
西湖今夜。幾分明月。可似揚州。重遊待拌醉倒。怕石橋。楓冷又深秋。折得蘆花。嬾寄  
絮雲吹滿芳洲。

月下笛 院落乍秋亂蛩絮壁賦寄眉月樓

淺樹留雲。疏花倚石。小亭秋聚。風泉暗語。夜深琴韻愁譜。芭蕉葉碎桐陰減。料不礙、

空階細雨。奈箋紋疊雪。箏牀橫玉。舊情無數。休賦歸來句。待采徧芙蓉。隔江煙霧。吹簫俊侶。跨鸞今在何許。相思淚滴珊瑚枕。尙夢到、穿鍼院宇。只後夜、酒醒時、滿地鳴蟲自苦。

柳梢青

芳草間門。清明過了。酒滯香塵。白楝花開。海棠花落。容易黃昏。東風陣陣斜曛。任倚徧、紅闌未溫。一片春愁。漸吹漸起。恰似春雲。

淒涼犯 十二月十七日夜大寒讀書至漏三下屋小如舟虛窗生白不知是

月是雪因憶江南野泊雪壓篷背時光景正復似之

短檐鐵馬。和冰語、敲階更少殘葉。鼠聲漸起。芸編倦擁。酒懷添渴。疏燈暈結。覺霜逼、簾衣自裂。似扁舟、風來柁尾。野岸冷雲疊。回首垂虹夜。瘦艣搖波。一枝簫咽。窗鳴敗紙。尙驚疑、打篷乾雪。悄護銅瓶。怕寒重、梅花暗折。卻開門、樹影滿地壓凍月。

探春 己酉秋莫飲於珠谿奉觴人頗似阿素霧鬢風鬢飄零亦相若也感成

此解

墮葉紅腴。疏苔綠倦。年華輕換。箏柱。玉病禁秋。花嬌媚晚。燭底鬢添涼霧。縹緲驚鴻影。似乍見、春風前度。暗憐舞褪絲楊。鏡中消瘦眉嫵。蘇小芳顏認否。甚油壁歸來。偏恨遲暮。帶眼移香。琴心記夢。鉛淚也無重數。寒雨連江夜。莫更把、琵琶低訴。明日相思。峭帆還挂愁去。

踏莎行 癸丑三月賦

疊砌苔深。遮窗松密。無人小院纖塵隔。斜陽雙燕欲歸來。卷簾錯放楊花入。蝶怨香遲。鶯嫌語澀。老紅吹盡春無力。東風一夜轉平蕪。可憐愁滿江南北。

滿庭芳 秋水時至海陵諸村落輒成湖蕩小舟來去竟日在蘆花中余居此

既久亦忘岑寂。鄉人偶至。話及兵革。詠我亦有家歸未得之句。不覺悵然。黃葉人家。蘆花天氣。到門秋水成湖。攜尊船過。帆小入菰蒲。誰識天涯倦客。野橋外。寒雀驚呼。還惆悵。霜前瘦影。人似柳蕭疏。愁余空自把。鄉心寄雁。泛宅依鳧。任相

逢一笑。不是吾廬。漫託魚波萬頃。便秋風、難問蒹鱸。空江上、沈沈戍鼓。落日大旗孤。  
瑤華 敗荷  
青房乍結。夢醒江南。又雨聲敲碎。羅衣葉葉。寒未翦、亂壓一湖深翠。月明歌斷。更誰  
倚。畫船閒醉。賸數叢敗葦荒蘆。合寫橫塘秋意。飄零漫惜青衫。算舞散湘皋。都是  
憔悴。鴛鴦自浴。竟不管、悄換西風塵世。淒涼太液。莫暗滴、露盤清淚。待幾時重展枯  
香。斜日小橋魚市。

蝶戀花 北遊道上

沙外斜陽車影淡。紅杏深深。人語黃茅店。陌上馬塵吹又暗。柳花風裏征衣減。屋  
後箏弦鶯語豔。濁酒孤琴。門對春寒揜。鴉背殘霜侵短劍。紙窗夢破疏燈颯。

木蘭花慢 甲寅四月客有自金陵來者感賦此闕

破驚濤一葉。看千里陣圖開。正鐵鎖橫江。長旗樹壘。半壁塵埃。秦淮幾星燐火。錯驚  
疑。燈影舊樓臺。落日征帆黯黯。沈江戍鼓哀哀。安排。多少清才。弓挂樹。字磨崖。甚

繞鵲寒枝。聞雞曉色。歲月無涯。雲埋蔣山自碧。打空城。只有夜潮來。誰倚暮愁艇子。  
一川煙雨徘徊。

玉京秋 秋江晚泊用草窗韻

江影闊。孤帆卸天際。倦懷淒切。晴樹生秋。岸風送響。篷敲殘葉。山勒寒潮怒起。湧波  
心。千萬堆雪。者離別。一程程恨。去鴻愁說。日落征衫寒怯。數歸期。冰輪又缺。漬酒  
羅襟。緘詩瑤軸。餘香都歇。瘦菊霜橙。怕客裏。偏過登臨佳節。暮笳咽。沙影沈沈動月。

高陽臺

暗水平橋。明霞低浦。霜痕冷閣魚叉。纔一番寒。微黃卻上蒹葭。瘦腰不恨秋來早。恨  
秋來。偏在天涯。更堪傷。十載荷衣。吟鬢蒼華。燈邊記得分明語。待夢圓鵲鏡。窗倚  
蟲紗。幾日西風。雁歸客未還家。陌頭柳色渾難覓。滿空江。換了蘆花。又斜陽。過盡西  
樓。都是昏鴉。

好事近

吹徧野塘風。顰翠倦紅都歇。寂寞斜陽牆角。見春前胡蝶。籬根露滴海棠疏。蟲影顫秋葉。猶有一分花意。媚空階涼月。

一萼紅 牆角小梅未春。忽放因憶東園萬樹摧殘。可憐哀吟成調。歌竟淒然。短牆陰。怪東風未到。春色已深深。壓雪檐低。垂蘿徑窄。紅萼開倩誰簪。漫惆悵、天寒袖薄。喚玉笛、吹怨入空林。烽火連江河山滿眼。那處登臨。回首東園舊路。賸幾分流水。幾樹寒岑。冷雨宮垣。斜陽喬木。還聽笳鼓沈沈。待銷盡、華鬢小劫。洗冰淚、招客說傷心。只怕南枝開徧。沒箇人尋。

垂楊 送陳百生北遊

偷彈老淚。向短亭話別。蘭舟重檣。韻咽寒簫。斷腸聽到篷窗底。漁灘風定蘆花起。破霜色、天涯行李。晚來潮、催送秋心。共故人千里。猶記題詩舊邸。染京洛暗塵。醉春游騎。戍鼓驚秋。夢魂還渡桑乾水。連村黃葉圍殘壘。雁聲在、斜陽紅裏。何時一笛山樓。杯共洗。



揚州慢 癸丑十一月二十七日賊趨京 報官軍收揚州

野幕巢烏。旗門噪鵲。譙樓吹斷笳聲。過滄桑一霎。又舊日蕪城。怕雙燕歸來恨晚。斜陽頽閣。不忍重登。但紅橋風雨。梅花開落空營。劫灰到處。使司空見慣都驚。問障扇遮塵。圍棋賭墅。可奈蒼生。月黑流螢何處。西風黯。鬼火星星。更傷心南望。隔江無數峯青。

虞美人 初三夜月

冰痕微借斜陽送。鉤小驚魚夢。多情還說十分圓。才畫些兒眉意便嬋娟。籠階夜色如煙薄。花影輕簾幕。倚闌不用更眠遲。只向黃昏一見最相思。

水龍吟 癸丑除夕

一年似夢光陰。恁恁戰鼓聲中過。舊愁纔翦。新愁又起。傷心還我。凍雨連山。江烽照晚。歸思無那。任春盤堆玉。邀人臘酒。渾不耐。通宵坐。還記敲冰官舸。鬧蛾兒。揚州燈火。舊嬉遊處。而今何在。城闔空鎖。小市春聲。深門笑語。不聽猶可。怕天涯憶著。梅

花有淚。向東風墮。

甘州 甲寅元日趙敬甫見過

又東風喚醒一分春。吹愁上眉山。趁晴梢臘雪。斜陽小立。人影珊珊。避地依然滄海。險夢逐潮還。一樣貂裘冷。不似長安。多少悲笳聲裏。認怱怱過客。草草辛盤。引吳鉤不語。酒罷玉犀寒。總休問。杜鵑橋上。有梅花。且向醉中看。南雲暗。任征鴻去。莫倚闌干。

清商怨

津亭飛絮倦舞。趁隋帆南浦。別酒初醒。春潮催瘦艣。天涯花落更苦。客乍到。春又歸去。夢徧千山。江寒無杜宇。

憶舊游

記星街揜柳。雨徑穿莎。悄叩閒門。酒態添花活。任翩翩燕子。偷啄紅巾。篆銷萬重心字。窗影護愁雲。甚飛絮年光。綠陰滿地。斷送春人。癡魂正無賴。又琵琶弦上。迸起

煙塵。鴻影驚回雪。悵天寒竹翠。色暗羅裙。黛蛾更羞重鬪。避面月黃昏。教說與東風。垂楊淡碧吹夢痕。

齊天樂 送周弼甫趙敬甫之杭州

天涯只恨谿山少。青春未留人住。海上閒鷗。沙邊客燕。總被西湖招去。垂楊萬縷。帶離恨絲絲。暗牽柔艣。好趁東風。畫船一路看飛絮。相逢知更甚處。鷓鴣啼不斷。都是煙雨。淚點關河。軍聲草木。愁殺江南行旅。絲闌漫譜。怕怨笛吹殘。落花難數。門掩春寒。日斜聞戍鼓。

虞美人 金陵失秦淮女子高蕊陷賊中數月今春見於東淘愁蛾蓬鬢不似舊時矣

風前忽墮驚飛燕。鬢影春雲亂。而今翻說羨楊花。縱解飄零猶不到天涯。琵琶聲咽玲瓏玉。愁損歌眉綠。酒邊休唱念家山。還是兵戈滿眼路漫漫。

南浦 春草

綠意隱汀沙。雪痕消，又潤村村酥雨。山曉睡容蘇。斜陽外，深淺青無重數。飛飛蝴蝶，荒庭也是春來處。千里相思誰種出，攪了二分塵土。年年空怨裙腰，甚愁根欲刻。東風未許。接岸綠波平，銷魂事，第一送君南浦。鶯啼幾度，憑高不見天涯路。陌上閒花開落後，多少馬蹄歸去。

淒涼犯 夜泊萬福橋

平蕪黯淡，連鴉陣，危灘時響風葉。夜潮乍起，蘆根浪湧，估帆催歇。深杯倦潑，聽風激，哀笳亂咽。正遙空，寒星數點，旗影動殘雪。誰念荒江外，鐵甲生寒，淚花冰結。枕戈夢短，壞雲堆，餓鴟啼絕。醉倚貂裘，問知否，霜袍凍裂。但平沙萬幕，寂寂擁夜月。

南鄉子

寒意賸春纖。放燕歸來又下簾。胡蝶漸稀人漸嬾，厭厭。滿地青榆午夢甜。淡日隱重檐。雨氣雲痕百態兼。睡起卻驚天影暗，眉尖。愁似春陰向晚添。

春原草宿。釀溼痕作影。光散林麓。近水偏多。避月還明。飛飛自照幽獨。西風不醒雷塘夢。化萬點、秋魂相逐。更那堪、雨暗黃昏。敗井廢苔凝綠。還記荷亭露坐。小池乍退暑。涼氣吹燭。繞徧花陰。巧入湘簾。笑倚畫羅同撲。而今一院繁星亂。但冷颭、蕭蕭疏竹。等恁時、閒貯綃囊。怕展翠箋重讀。

風入松 昔夢重尋春情非舊絲竹中年歲華自惜東澤綺語債亦將借此銷除也

彎環綠水抱西城。小舫臥聞鶯。櫻桃樹底春衫薄。倚紅樓、偷聽調箏。心事花開花謝。閒愁潮落潮生。夕陽江上數峯青。煙草暗離亭。風懷老去如殘柳。一絲絲、漸減春情。重寫綠窗舊夢。酒闌渾不分明。

金縷曲 乙卯初春將之揚州或以蕪城爲言悄然而止

雪淨梅根土。被瓊簫、暗將殘寒。一絲吹去。碎翦東風爲花瓣。分散春心幾許。料從此、紅酣翠嫵。驀地思量虹橋月。是年時、刻意傷春處。還夢到、竹西路。扁舟待趁寒潮

渡。繞空江、鷓鴣聲裏。亂煙無數。歌管樓臺斜陽冷。換了城西戍鼓。更不見、垂楊一樹。十里深蕪陰燐碧。哭青山、誰喚春魂語。雲影暗、自延佇。

鷓鴣天

楊柳東塘細水流。紅窗睡起喚晴鳩。屏間山壓眉心翠。鏡裏波生鬢角秋。臨玉管。試瓊甌。醒時題恨醉時休。明朝花落歸鴻盡。細雨春寒閉小樓。

好事近

蘆芽茁岸楊花墜。谿舟過東淘時見此景。

帆影比鷓遲。谿上柳花風軟閒。理半牀襟具。任船隨谿轉。一春不聽雨聲譁。橋峙水痕淺。夢入菰蒲深處。共湖雲低展。

高陽臺

淡月依橋。平煙汨水。夜潮寒送歸人。別酒無多。莫教翻污羅裙。愁來始覺眉尖窄。悔當時、錯夢梨雲。揜鑪薰、袖底殘香。都化秋痕。扁舟尚有東風約。認摘梅小徑。吹絮前村。一尺江波。年年誤卻桃根。春心待共花爭發。怕花開、更易傷春。怯黃昏、不到斜

陽。先閉重門。

清平樂

瑣窗朱戶。夜定人初去。滿院商聲無覓處。梧葉堆中蟲語。微寒乍揜屏紗。西風孤怯燈花。不是悲秋淚少。如今住慣天涯。

三姝媚 送別黃子湘

相思隄上柳。喚漁童樵青。繫船沽酒。水鶴飛來。背亂山無語。共君招手。莫上層樓。春已在、斜陽時候。雁磧沙寒。潮落潮生。莫帆催又。塵海吟身驚瘦。賸卅載才名。對花消受。尙著宮衣。聽夜窗弦索。淚殷雙袖。眼底滄桑。休更疊、哀蟬淒奏。怕問王孫芳草。淮陰渡口。

角招 壬子正月遊慈慧寺舟穿梅花林曲折數里而至石峯陷碧沙水明潔

佛樓藏松陰中清涼悅人十年後與郭堯卿復過其地則夕烽不遠寺門闔然閉梅樹半摧爲薪存者亦蕉萃如不欲花堯卿謂白石正角招譜後罕有

和者曷倚新聲。紀今日事。余旣命筆。硯堯卿擊節而歌。蓋淒然不可卒聽也。莫寒際。誰家尙遣。扁舟去看煙水。艣枝沙外倚。忘卻那回。花下游事。山靈倦矣。漸露出。雙峯憔悴。十里寒香何在。賸千萬樹梅魂。伴銅僊垂淚。還喜。梵王殿址。松梢塔影。陳迹殘僧指。回闌仍畫裏。戍角聲聲。當年無此。霜楓滿地。更嬾問。歸人歸未。月上西風又起。怕潮落。石橋灣。愁難洗。

瑣窗寒

歲聿云莫。舟行苦寒。擁衾酌酒。感吟成調。

枯柏團鴉。荒蘆聚鴨。淡陰催暝。雲垂貼水。波暗更無星影。湧平沙。寒潮夜生。布帆一霎。江風勁。正嘹空。斷雁趁船斜去。酒邊愁聽。重省。歡遊境。記借舫移花。試泉分茗。西洲再過。可奈鷗鄉人醒。揜霜篷。殘燈自挑。半牀翠被支隋冷。任秋窗。夢繞疏蘋。隔浦尋煙艇。

虞美人

水晶簾卷澁濃霧。夜靜涼生樹。病來身似瘦梧桐。覺道一枝一葉怕秋風。銀潢何



日銷兵氣。劍指寒星碎。遙憑南斗望京華。忘卻滿身清露在天涯。

甘州 洪彥先與秦淮女子有桃葉渡江之約未果而金陵陷不可尋問矣彥

先哀之爲賦此解

悔年時。刻意學傷春。東風柳花顛。繞紅闌。是水清波照影。鏡擁雙鴛。擊楫桃根何處。團扇誤嬋娟。夢醒還疑夢。此恨絲絲。休記銀屏朱閣。便江山如畫。今落誰邊。倚斜陽。彈淚。一例弔秋煙。待低拜。青谿夜月。問何時。重爲玉人圓。長懷感。有相思血。都化啼鵲。

淡黃柳 揚州兵後平山諸園林皆成榛莽爲賦數詞以寄哀怨詒園索稿作

此謝之悲從中來更不能已

寒枝病葉。驚定癡魂結。小管吹香愁疊疊。寫徧殘山賸水。都是春風杜鵑血。自離別。清遊更消歇。忍重唱。舊明月。怕傷心。又惹啼鶯說。十里平山。夢中曾去。唯有桃花似雪。

無悶

花外東風。吹過斷橋。香到春衫袖底。甚晚徑餘寒。畫闌猶倚。應是憐春欲去。看萬點、飛紅斜陽裏。冶遊散後。深深胡蝶。綠煙垂地。憔悴更無計。聚鏡角愁痕。遠山眉意。教燕子休歸。小窗須閉。只有楊花未醒。化一縷春痕隨流水。怕片霎殘夢。谿西又聽倦鶯啼起。

憶秦娥

垂楊陌。綠陰蘸水煙痕溼。煙痕溼。一灣城影。畫橋雙笛。桃花岸上人如織。流鶯久住都相識。都相識。斜陽船去。半湖春碧。

尉遲杯

春莫別緒。又梅金麗生秋始。相見余又將出遊。用美成韻留別。河隄路。正下馬。曉日籠高樹。遙山隱隱雲橫。知是輕帆歸處。長亭燕子。偏不許。春光別南浦。聽歌聲。唱到將離。悄銜花瓣飛去。還記水曲吹笙。頻呼酒江船。勝友星聚。舊日垂楊都消瘦。誰更約。東風對舞。今宵又。蘆根繫纜。暗潮湧。霜寒聞雁語。怕孤篷。

雨溼疏燈。醉中猶喚鷗侶。

法曲獻僊音 天氣乍秋微涼生夕懷周蓮伯

雲薄鋪涼。露輕晞月。簾挂碧天秋淺。倚鶴琴閒。照螢燈瘦。依依夢隨蕉扇。念極浦。人歸後。西風片帆遠。恨疏嬾。趁扁舟。又孤遊興。頻冷落。湖山舊時鷗伴。清霧溼屏紗。絮荒庭。蟲韻淒婉。萬感煙鴻。寄相思。梧葉怕翦。對空江殘角。一夜蓼花紅怨。

憶舊遊

記倚窗窺笑。接座熏香。扇角初逢。門掩枇杷靜。又驚枝暗起。人似春鴻。隋寒幾番侵。袂眉翠淡芙蓉。歎絮語衾邊。淚痕殘底。同訴飄蓬。 怱怱最無賴。是種得垂楊。偏繫歸驄。別恨絲鞭阻。指一林殘葉。瘦馬西風。夢醒半規蛾月。依舊印簾櫳。怕數徧幽期。燈花尙說今夜紅。

卜算子

燕子不曾來。小院陰陰雨。一角闌干聚落花。此是春歸處。 彈淚別東風。把酒澆飛

絮。化了浮萍也是愁。莫向天涯去。

綺羅香 秋雨

晚樹沈煙。枯荷亂浦。一換一番秋信。漬水庭陰。涼逼畫羅衣潤。滴疏桐。此夜偏長。滯  
新菊。重陽剛近。最蕭條。鐵馬檐聲。紙窗棋響。落燈燼。朝來蘆絮似雪。望斷濛濛影  
裏。歸飛鴻陣。帶溼征帆。還共莫潮難準。賸空階。蕉葉無多。恰添了。砌蟲淒緊。怕遙山、  
洗褪微黃。倦妝眉黛損。

拜星月慢 予事羈東。洵遇丙辰除夕。春事蕭條。不似往歲。把酒祭詩。愁鬢欲  
雪。淒然歌此。

臘酒餘寒。春燈殘雪。地僻還聞簫鼓。帖翠黏紅。是年時情緒。念前夢。頓覺啼痕唾碧  
都化。半漬征衫塵土。馬影雞聲。又韶華催莫。隔簾櫳。舊是相思路。闌干角。似有東  
風度。便覓象管鵝笙。奈淒涼難譜。抱孤琴。淚灑無人處。梅花外。強琢宜春句。怕凍草、  
暗長愁苗。滯遊鞍不去。

少年遊

曲闌斜護柳邊樓。人影漾簾鉤。銀燭光沈，檀槽語澀，拌醉不曾休。十年夢似朝雲散，花落水空流。燕子歸來，淡煙微雨，寂寞畫春愁。

聲聲慢 賦白菊寄洗紅仙館

秋痕欲化，冷夢初圓，閒庭似帶新霜。病起西風，眉印淺褪宮黃。徐娘漸羞臙粉，問何時、偷種柔鄉。明月底，怪飛來寒蝶，無處尋香。姑射仙姿何處，記紅萸烏帽，看舞霓裳。酒暈全消，籬外嬾送瑤觴。疏燈漫憐鬢影，伴羈愁、閒過重陽。怕瘦損、卷簾人，依舊淡妝。

又 春飲馬鶴船書舍

荒城補壁，野澗侵籬，人來鵲起孤亭。未到花開，可憐春已零星。餘寒尙棲穉柳，問東風、眼向誰青。空歎息，甚鳶肩火色，老更飄萍。還賸蒼藤古屋，趁斜陽泥飲，三兩鷗盟。拍碎闌干，長嘯暗答笳聲。飛鴻漫愁印爪，算麻姑、滄海曾經。且盡醉，夢江南、殘睡

未醒。

瑤華 聞妙香感詠

簾櫳未卷。甚處氤氳。乍吹來羅綺。隨鶯趁蝶。窗影外、一縷嬌雲同起。東風滿院。更辨  
不分明花氣。料暗從鬢角衣邊送到。膩人滋味。年時薰散筠籠。伴溫酒華燈。春思  
濃醉。蘅蕪夢遠。金鴨冷、枉斷綠窗心字。遺芳怕檢。臙袖底、傷春清淚。問夜深繡佛龕  
前。爇徧返魂知未。

唐多令

楓老樹流丹。蘆花吹又殘。繫扁舟、同倚朱闌。還似少年歌舞地。聽落葉、憶長安。哀  
角起重關。霜深楚水寒。背西風、歸雁聲酸。一片石頭城上月。渾怕照、舊江山。

東風第一枝 春雪

糝草疑霜。融泥似水。飛花覓又無處。樹梢纔褪。遙峯簾外。暗兼細雨。輕冰半霎。甚倚  
著。東風狂舞。怕一番、暖意烘晴。還帶落梅銷去。花市冷、試燈已誤。芳徑滑、蹋青尙

阻。依然淺畫谿山。愁殺嫫寒院宇。春回萬瓦。聽滴斷。檐聲淒楚。賸幾分。殘粉樓臺。好趁夕陽句取。

相見歡 柳

東風舞倦腰支。幾多時。惆悵春前綠鬢欲成絲。枝頭絮。吹不去。爲相思。長把愁煙恨雨自禁持。

燭影搖紅 丁巳元夜獨遊

天半樓臺。月華未上先簫鼓。瘦腰無計避春愁。也逐歌塵去。迤邐歡遊細數。試霞燈、誰家院宇。長陵小市。簾影釵光。一宵春聚。絳蠟銷遲。錦街夜色澄香霧。好遊還有未歸人。冷索梅邊句。間卻西園俊侶。傍闌干、深杯自語。東風醉後。夢轉瑤京。銀花千樹。

青衫溼 話平山舊游

當時淮水西邊月。會照玉鉤斜。游船多處。年年風雨。開盡桃花。夕陽一醉樓空失。

燕樹晚棲鴉。三生杜牧。揚州夢覺。依舊天涯。

齊天樂

用碧山韻送人歸楚南

半春絲雨聲中過。河橋未青楊葉。斷角吹寒。孤帆滯遠。可是將離時節。家山夢切。對岸芷汀蘭。楚騷歌闋。那不還鄉。杜鵑啼後更愁絕。瀟湘春色似畫。賸烽斜照裏。悲恨休說。鶴唳空江。鴉棲舊壘。景物歸來都別。羈懷暗結。怕瘦盡東風。驛梅難折。後夜西窗。鏡塵添鬢雪。

更漏子

枕函敲。釵股重。睡起自疑殘夢。臨玉鏡。寫瑤箋。隔窗紅杜鵑。花影亂。卷簾看。砌下落梅風換。芳草歇。繡鞍歸。送春胡蝶飛。柳絲風。菰葉雨。湖上畫船來去。蘭槳定。釣竿收。藕花香滿樓。歌聲歇。望明月。沙靜夜灘如雪。燈欲燼。酒初醒。隔河吹玉笙。

臺城路

金麗生自金陵圍城出爲述沙洲避雨光景感成此解時畫角咽秋



燈燄慘綠如有鬼聲在紙上也

驚飛燕子魂無定。荒洲墜如殘葉。樹影疑人。鴉聲幻鬼。敲側春冰。途滑。頽雲萬疊。又雨擊寒沙。亂鳴金鐵。似引宵程。隔谿燐火乍明滅。江間奔浪怒湧。斷笳時隱隱。相和嗚咽。野渡舟危。空村草溼。一飯蘆中淒絕。孤城霧結。賸羅網離鴻。怨啼昏月。險夢愁題。杜鵑枝上血。

渡江雲 燕臺遊迹阻隔十年感事懷人書寄王午橋李閏生諸友

春風燕市酒旗亭。賭醉花壓帽檐香。暗塵隨馬去。笑擲絲鞭。壓笛傍宮牆。流鶯別後。問可會。添種垂楊。但聽得。哀蟬曲破。樹樹總斜陽。堪傷秋生淮海。霜冷關河。縱青衫無恙。換了二分明月。一角滄桑。雁書夜寄相思淚。莫更談天寶淒涼。殘夢醒。長安落葉啼螿。

點絳脣

記倒離尊。斷崖野樹圍孤店。翠帘風黯。客去春寒減。雁背征帆。漸漸斜陽淡。歸程

暗。柁樓燈閃。猶繫東湖纜。

慶春宮 秋宵露坐時婦亡四月矣

蚓曲依牆。魚更隔岸。短廊陰亞薔薇。露冪間階。微涼自警。無人泥問添衣。並禽棲徧。趁星影、孤鴻夜飛。繩河低轉。夢冷孀娥。香霧霏霏。當時曲檻花園。卻月疏簾。玉臂清輝。紈扇拋殘。空憐錦瑟。西風怨入金徽。返魂燒盡。甚環佩、宵深怕歸。茫茫此恨。碧海青天。惟有秋知。

一絡索 江村夜泊懷丁保盦

村外柳煙深鎖。晚寒驚破。強沾殘酒熨春秋。已節候、梨花過。望盡隔江星火。擁衾猶坐。斷鐘隱隱欲霜天。問可有、詩魂墮。

換巢鸞鳳 嘉禾周存伯工填詞移居杭州橫河橋未幾避兵過江爲述舊事

時復淒絕

帆掛新蒲。背家山未遠。又認吾廬。琴尊雙鶴管。風月一船租。南湖拋卻換西湖。廿年

往來。天涯酒徒。鷗鄰好。任占得。畫橋閒住。遲莫。成倦旅。孤櫂冷煙。客燕棲何處。柳影低門。杏梢深巷。花落可憐焦土。無奈啼鴉尙聲聲。隔江催喚人歸去。南屏鐘。亂鄉愁。滿地秋雨。

霜葉飛 庚申重九杜小舫以西岐登高之作見寄是日余遊虎墩大聖寺亦用清真韻和之

岸雲湖草秋無際。斜帆疑挂雲表。傍村楓葉未全霜。擁寺門紅悄。正雨霽。山容似曉。經臺吹帽西風小。試筆染。麩香。又卻怕。黃花笑我。空醉斜照。遙認瘦塔玲瓏。苔斑青換。去年人。又重到。翠萸杯冷。客衣單。況玉琴孤抱。算鬢影。蒼華誤了。絲闌愁和淒涼調。待寄還。相思語。寒樹冥冥。舊鴻稀少。

西子妝 爲金鷺卿紀海陵繫纜本事

山暈眉青。波揩鏡曉。燕燕靜依柔艣。戲圈楊柳作連環。印香心。畫橋雙樹。紋窗泥語。渾不怕。鴛鴦聽取。趁春潮。喚桃根桃葉。江頭歸去。深盟誤。一夢成煙。卷入東風絮。

繞船三月落花多。是千點、淚痕紅聚。淒涼畫譜。待呼起、春魂重訴。亂箏弦、幾陣疏篷  
暗雨。

瑞鶴僊 蘭花美人

薰煙銷素被。正地帖、湘紋小庭澄水。妝成臉霞膩。厭穠枝壓鬢。鳳鈿重理。闌干倦倚。  
漸吹得、瑤芳竟體。料前身、夢託蘅皋。花影靜如人意。會記。梳雲窗眼。迓月簾腰。國  
香親試。鸞臺更啓。驚消瘦。舊眉翠待天涯偷寄。同心私語。又怕春愁暗起。賸冰紈、背  
面東風。箇儂畫裏。

清平樂 金麗生工愁少寐每以斜倚熏籠自況賦此調之

枕鴛釵鳳。清夜和愁共。窗外月斜寒忒重。瘦盡梨花無夢。東風燕子朱門。年年燈  
影黃昏。閒卻半牀金綫。羅衣獨自溫存。

齊天樂 董竹沙亡兄苔石嘗寓焦山松寮閣竹沙追賦焦山夜話詩

千帆影裏斜陽墮。危闌醉中同倚。海氣浮山。江聲擁樹。閃閃燈紅蕭寺。高談未已。任

夜鵲驚枝。睡蛟吟水。笑指天東。一丸霜月。盪潮尾。西風空想。欬唾似霏霏。玉屑吹散煙際。瘞鶴銘寒。盟鷗會冷。畫出孤峯憔悴。啼鵲萬里。怕化作秋聲。醉魂驚起。涼露沈沈。斷鴻悲暗葦。

祝英臺近

竹沙爲苔石請賦棲霞曉發詩倚聲應之

嶺霞明。江月墮。曉起浩無際。黃葉深深。詩思在驢背。不妨茸帽侵霜。滿身松影。且飽看六朝煙寺。幾年事。一番夢逐雲空。仙瓢付流水。雪散沙鴻。愁寫斷腸字。可知畫角聲中。連天風雨。又減了。舊時山翠。

臺城路

易州寄高寄泉

兩年心上西窗雨。闌干背燈敲徧。雪擁驚沙。星寒大野。馬足關河同賤。羈愁數點。問春去秋來。幾多鴻雁。忘卻花顛。昔時顏色夢中見。青衫鉛淚似洗。斷笳明月裏。涼夜吹怨。古石欹臺。悲風咽筑。酒罷哀歌難遣。飛花亂卷。對萬樹垂楊。故人青眼。霧隱孤城。夕陽山外遠。

采桑子 贈顧鶯

病餘十日羞鸞鏡。剛近瑤釵。小玉偏來。報道辛夷嬾未開。  
繡牀卻願雙谿鴉。紅沁霞顚。芳思難猜。簾隙東風暈酒懷。

掃花遊 新綠

扇香乍倚。看瘦盡疏紅。曉光吹霧。碎陰似舞。五村煙漠漠。潤生窗戶。怨雀空枝。算有東風替補。送春處。又千樹嬾晴。春未歸去。芳訊休更數。但早與安排。聽鶯情緒。秀眉鬪嫵。畫新妝暗換。舊時花譜。萬翦齊勻。漸隱樓臺細雨。燕歸阻。淡斜陽。翠深庭宇。

徵招 李冰叔與鄧薌甫善客南匯數年今春歸東臺將復遊揚州書此贈行

維舟聽慣松江雨。離琴更親良友。去住兩傷心。指垂垂煙柳。青山無恙否。怕歸日、野鷗驚瘦。故國春寒。夕陽潮落。卸帆偏又。不擬此重逢。人何似、飄然白雲爲耦。語罷卽天涯。忍淒涼杯酒。詩情誰共剖。漫相約、石榴開後。雁聲起。渺渺涼天。待夜窗攜手。

一萼紅 舟過小村幽景殊勝因動蒹鱸之感

小谿灣。引扁舟幾曲。風景未荒寒。密篠圈籬。深蘆倚岸。斜照人語柴關。繞村徑。桑麻漸了。晚樹外。黃葉當花看。罨畫人家。光陰似醉。雞犬皆頑。此地誰知。魏晉笑估帆來去。空羨桃源。綠翦葵根。紅餘稻粒。秋到還憶家山。乍飛夢。煙波舊隱。又海天。催月角聲殘。一夜吳江楓冷。老屋霜團。

浣谿紗

鳳焙團成小。殘分一墀簾影靜。湘紋柳梢蟬咽欲黃昏。細竹方牀蕉葉伴。薄羅衫子藕花熏。晚涼閒坐看秋雲。

八聲甘州 贈褚又梅

甚天涯。芳草引遊韉。春歸舊奚囊。似登樓王粲。斜陽瘦馬。飽看山光。飄泊可憐淮海。風雨醉殊鄉。長鋏歸來未。燕子空梁。誰識幽情苦調。借一枝斑管。散徧瑤芳。更煙蘿池館。彈淚說滄桑。莫偷和。玉臺新句。怕春風。又妒畫眉長。如虹氣。不消磨處。夜識干將。

西谿子 壑軒爲周存伯賦

天外晴虹孤臥。瘦石撐空疑墮。鶴飛來。幽壑底。雲欲起。人坐羣峯青裏。聽泉流。一窗秋。

西河 悼曹素雲

芳信斷。鶯簾恨事誰管。籠鸚生小忒聰明。妒春命短。玉奴枉約嫁東風。釵頭棲鳳先散。記深夜。溫翠琰。藥窗花影零亂。絲絲紅冷唾壺冰。鏡眉未展。怨鴻還說不傷心。龍綃都餽香汗。只今淚點凝素練。挽春魂。難畫嬌面。除夢應羞重見。奈梨雲瘦盡。羅屏薰換。殘月相思和天遠。

減字木蘭花

疏篷淡月。短燭熒熒侵曉別。黃葉深村。入夢依然昨夜人。蘆花滿地。多是離人衣上淚。秋色連波。比到寒潮淚更多。

四字令



釵邊淚紋。燈邊夢痕。花開處處思君。況無花過春。鬢飛斷雲。衣殘舊薰。垂楊一路  
黃昏。到東風墓門。

鶯啼序 哀顧鶯

淒風又驚院竹。是春魂悄轉。淚殘霧。眉月微陰。背窗如聽嬌歎。夢回乍。蘭釭淡碧。飛  
鴻冉冉輕煙散。誤籠鸚。檀板聲空。畫圖誰喚。翦燭青樓。桐陰試茗。道尋春未晚。鏡  
花揜。相見還休。那時爭似不見。記犀帷扶肩問字。枉吟熟。鴛鴦詩卷。玉簫寒。門閉湘  
桃。去年人面。離巾寄語。藥檻移栽。算棲香願滿。旛影護。蔦紅幾日。露葉霜蕊。瘦倚  
斜陽。頓成秋苑。啼鵲夜訴。飄蓬舊事。無端落絮。縈塵沓。更關山。笛裏江烽亂。羅囊向  
祕。傷心繡纈痕銷。淚點凝滴。湘管。蓮枝解脫。丈室禪枯。任鬢絲素鬢。但沈恨。珠根  
玉蒂。墮溷何因。寄燕巢成。妒鶯緣短。韋郎老矣。楚招歌罷。清宵歸鶴環佩冷。賸西陵。  
松柏埋幽怨。今生拌醉拌愁。聽絕哀弦。翠衾怕展。

鬪莎行 贈丁保齋用王碧山韻

醉鶴幽懷。品鸞淒調。青袍舊淚知多少。夢回誰倚十三樓。斜陽滿地空秋草。雪浪愁題。雲和孤抱。吟情除是鶯能道。隔江殘笛雨瀟瀟。垂楊瘦盡鷗波老。

暗香 寄周瀟碧

故山老鶴。等酒人散盡。飛歸池閣。漫倚焦琴。斜月相思滿京洛。知否休文病起。渾怕憶西園花藥。但自揜。獨樹閒門。燈影惜孤酌。深約更寂寞。待問取斷鴻。去程難託。素衾怨薄。江上春寒晚來惡。千里誰攜夢轉。絲鬢有東風吹覺。怕秀句題未了。野棠又落。

醉桃源

遲遲樹影過朱闌。日高門尙關。海棠紅勒昨宵寒。花遲春限寬。新舊雁。去來船。歸程山外山。一年長恨得書難。賺人雙玉環。

一枝春 憶蘭曲爲汪西林賦

夢遠瀟湘。雨絲寒。半摺簾波垂曉。芳晨換了。畫裏媚香人杳。疏苔院宇。記同說。味秋

懷抱。經幾度。風翦冰鉏。怨入玉琴淒調。紋紗素蟾低照。奈姮娥更妒。同心花好。飄零瘦影。暗指鬢邊春老。蘅皋步冷。怕難喚。倩魂飛到。空自倚。滴露間階。醉吟恨稿。

憶秦娥

去去。去覓春歸處。難尋。萬樹垂楊盡夕陰。妝成祇是熏香坐。簾影疏燈我。誰家。猶放冰蟾照落花。

西子妝 贈雛鬢葉素蘭爲何菱眉賦

倚穉鶯愁。移香蝶瘦。一鏡薦紅羞放。秀眉生小。恨楊絲借新月。替描愁樣。春潮暗長。待輕把相思吹上。燕飛回。任疏陰晝揜。枇杷深巷。妝臺傍。字寫雙鴛。頰暈初霞漲。拗枝花弱。不禁秋諱。傷心。淚波酸釀。江頭畫槳。怕空付。桃根低唱。甚何郎。還對東風。凝想。

霓裳中敍第一 春事欲闌故人江外旅窗竟夕索夢不得書寄何梅屋

蒼苔換舊迹。過卻清明春是客。花外玉尊又側。任庭樹斂陰。風簾催夕。天涯倦翼。趁

墜紅飛去無力。淒涼久，一燈夢覺，隱約夜窗白。檐隙。隋寒猶積。歎瘦骨、輕衾恁敵。相思偏在故國。竹檻敲琴。水榭題壁。斷鴻歸太急。便忘卻、江南舊識。鄉程遠，何時孤權臥聽倚樓笛。

續集

菩薩蠻 子夜

雄龍雌鳳盤高閣。紅牆百尺銀河落。蠟燭散輕烟。春城寒食天。獸環金屈戌。花影空芳宿。輕燕趁風斜。還來王謝家。

青溪流水宵嗚咽。青溪楊柳無枝葉。遠客莫相思。江南春信遲。遲君隄上道。隄下多荒草。布穀雨聲中。野花腸斷紅。

鏤金屏扇雙青鳳。象牀日午遲嬌夢。寶鏡不相憐。好花窗外妍。畫堂傳喚急。指重箏絃澀。舞罷又回身。春風陌上塵。

銅鞮歌斷江烟白。神絃醉舞湘靈泣。惟有故鄉音。高樓傷客心。春風三十度。歌管

春聲聚。煙月過花期。惜君金縷衣。  
南塘洗馬喧春水。馱金買宅長千里。錦帶玉麒麟。雙鸞羅帳溫。御箋銀沫冷。北雁  
音書警。落日動邊愁。春寒罷遠遊。

綠章伏劍青銅吼。紫皇夜醉搖星斗。銀漢有風波。僊郎休度河。上清淪小謫。雞唱  
瀛洲白。霖雨起蒼龍。還來朝帝宮。  
碧窗新火明朱鳥。金盤侍女分瑤草。作婦已經年。鸞刀清晝閒。松紋團細綠。采采  
愁盈掬。微笑別春廚。羹湯勞小姑。

桂殿秋

瑤殿侶。五銖衣。青鳥無書相見稀。璇宮織罷當窗坐。獨看星河秋雁飛。

感恩多

洞房花獨宿。啼損橫波目。錦字不思看。夜燈殘。露井蛩啼落秋月。曉風寒。曉風寒。  
馬策弓衣。客程霜未乾。

蕃女怨

美人樓上暝未起。樓下春水。碧魚鱗。紅燕尾。夢魂千里。去年楊柳已天涯。況楊花。

南歌子

袖闊雙鸞舞。簾深小燕棲。春盡更依依。如何驄馬去。不知歸。

南鄉子

燕麥青青。大河西畔短長亭。日落子規啼不住。征颿去。蜀水秦山無盡處。

河傳

鸚鵡。低語。繡簾垂。殘日空房夢迷。白狼塞前書信稀。花枝好如郎去時。屋後垂楊臨古道。飛絮少。極目空芳草。袖羅單。愁倚闌。玉關。鐵衣春更寒。

謁金門

春雨足。闌外半池新綠。風聚落花紅一簇。水搖樓影蹙。江上征颿去速。鷓鴣飛來

自浴。獨下晶簾翻象局。畫長香篆促。

殘燭。光亂畫屏金屈戍。起來雙臉紅玉。酒情春睡足。月過杏花斜屋。燕梁何處宿。夜寒微雨飄竹。曉陰窗影綠。

漁家傲

桂屑銅盤銷燭淚。玉釵斜鬢煙光紫。蜀錦雙梭閒未理。闌獨倚。愁鸞帶月歸千里。妾夢悠悠江上水。江潮如箭催船尾。欲鼓湘絃邀帝子。香霧裊。潛蚪舞罷春陰起。

桃源憶故人

雲衫洗淨江湖溜。漠漠綠煙雙袖。何處翠裾金繡。共說吳宮有。銀環夜進房中奏。花朵濃飛眉岫。聽徧玉壺清漏。淚溼星鋪柳。

調笑令

銀燭。銀燭。樓上美人獨宿。雪花飛滿千山。繡被熏鑪夜寒。寒夜。寒夜。笳鼓征帆未卸。

卜算子

丹嶺鳳凰兒。愛集梧桐樹。百尺宮牆一苑花。只見流鶯度。羞澀畫蛾眉。宛轉邀蓮步。抱得雲和不肯彈。還宿空房去。

河傳

春曉。啼鳥。昨夜新寒。露桃開少。起來試簪雙鳳釵。徘徊綠莎生玉階。雲外飛鴻飛幾度。來又去。落月湘皋路。古灣頭。春水流。□愁。夢君江上樓。

玉胡蝶

青泥未長蓮枝。迴影綠秋池。寶鏡網蟲絲。猶能惜玉姿。花裙旋月冷。蘭臉別春遲。琴調不相知。白頭空與期。

南歌子

燭穗殘蛾綠。釵花獨繭紅。無意向春風。不堪雙語燕。畫梁中。

女冠子

紅牆榆柳。窗戶離離星斗。夜寒生。香霧沈珠幔。銀河罷玉笙。睡鬢春水綠。啼粉落



花明爲著歸霞帔。更傾城。

惜秋花 六合城南廢祠。或謂祀九江王英布。粵賊陳玉成之潰土人。以爲有

神力云

斷壁頽黃。帶衰陽野色。何王宮宇。老鶴沫空。陰崖乍移晴雨。寒飈晝下。靈旂看冥合。斑蚪青霧。荒涼有落花。暈紫頻邀幽步。江上亂烽舉。應潮聲月上。還遲鐘鼓。石騎夜歸。瑠戈暗驚塵土。精靈尙惜孤城。問玉帳牙旗何處。春莫。賽神絃。陳雅空舞。

換巢鸞鳳

雲湧菰橈。正薇煙綠帳。夢警龍綃。秋肌涼玉粟。花鬢妥金翹。湘絃冰斷。澀歸潮。洞庭野陰。霜驚嬾蛟。蘋颺冷。漸月墮。珮珠聲悄。青鳥飛縹緲。沙路遠燈細。竹迷春嘯。溼岸交禽。香闌文鯉。暗泣菱絲紅老。誰爲天孫塞秋河。翠梭當夜呈雙笑。穿鍼樓看疏星。白露橫曉。

絳都春 夜坐吟

縈塵罷舞。弄綫縷睡遲。春窗疑曙。露井夜寒。亂落桃花。如紅雨。橫波啼染蛟龍杼。寄遙怨、羈雌殘樹。玉顏爭月。隨君照轉。鏡花休蝨。知否。蟾蜍漏促。探芳徑暗引。淺莎微步。怕近翠簾。一尺春風。銀鈎阻。屏山幽夢盤蛇路。喚孤鳳、行煙來去。病容扶起。犀帷刺桐。又乳。

角招 送宗湘文入都即之官杭州

勸君去。傷心海上孤琴。又緩君住。隋飄催晚渡。更酌酒杯。燈下深語。青春鬢縷。莫厭染、京華塵土。十載江鄉烽火。到樓閣、五雲中。憶哀鴻音苦。應許。橋題秀句。花園錦帶。繫馬揚州路。故人還寄旅。待與重攀。津亭秋樹。西冷夢阻。更不比、春波南浦。後日相思甚處。怕零落、石磯邊。閒鷗鷺。

醉吟商

再過了清明。莫雨片飄歸晚。玉樽空伴。舊曲青樓換。十里春愁吹亂。楊花那管。

酒泉子

落日放船。風定晚煙沈樹。荻蘆秋。鴻雁去。大江寒。白波千里江灘長。歸夢野雲來往。莫山多。潮信爽。寄書難。

揚州慢 兵後金眉生還居揚州賦詩索和

亂草埋沙。孤城照水。倦遊重見淒涼。近東園巷陌。但一片斜陽。占蘿徑。幽人自喜。莫鴉啼處。猶有垂楊。奈新栽紅藥。開時偏斷人腸。竹邊舊屋。問歸來。燕子都忘。漫指點煙蕪。梅花冢在。文選樓荒。一覺十年前夢。春風減。杜牧清狂。又簫聲吹起。疏簾殘月微茫。

徵招 銷英居士新作小軒有花光雲影恂恍之狀

添修五鳳樓臺手。華嚴現來彈指。曲徑轉東風。似珠穿靈蟻。瓏玲窗四啓。看離合。海天雲市。片片花飛。九微香瑣。寫春無際。且自賦閒居。陳蕃室。誰云掃除安事。別館舊煙蘿也。滄桑如此。樵柯今爛矣。但一笑。玉枰推起。醉眠久。尙未消磨。是劍弢龍氣。

徵招 錢辛白侍御以言事回翰林築一松軒自居

星宮夜啓蒼官事。沈沈太陰雷雨。海鶴倦飛來。選磐阿嘉樹。靈姿誰共伍。祇老桂。伴香瑤圃。謾謾霜風。半空回首。尙通天語。高處不勝寒。相思後。瓊樓又教歸去。恣意作龍吟。有清聲千古。孤懷還自撫。放直幹。化工能補。紫皇護。一柱層霄。召鳳鸞仙侶。

角招 陳小翠揚妓也居南水灘門外多楊柳樹春來一碧如煙如潮江西黃琴川爲賦南灘春柳詩數十章小翠每謂之曰青青若此忍使有隨風報秋之感邪

傍花醉。無端一片花飛。又趁流水。畫船春去矣。猛折綠楊。幽恨都起。芳遊夢裏。譜豔曲。流鶯能記。昔日青青猶在。到風雨客歸時。管相思千里。誰使單衫聚淚。冰紈寫怨。黃九詩輕寄。露橋驚後會。怕貼雙蛾。羞郎憔悴。煙條踈地。似說與。飄零如此。葉落江潭尙未。漫忘卻。玉簫心。銀屏事。

齊天樂 畫竹帳額

橫窗綠霧涼波起。西風雁啼清沼。墮粉侵牀。疏陰臥酒。冉冉銀蟾低照。空江易老。認

淺刻題名。自非年少。尙作龍吟。露寒深夜共悲歎。蕭齋休話舊雨。廢落三徑冷。春去誰到。篋怨枯椽。書殘蠹簡。過眼煙雲一笑。霜清睡早。但許聽秋聲。醉醒都好。水葉風枝。畫禪參未了。

玉胡蝶 金眉生歸鳳曲用吳夢窗韻

水面乍開妝鏡。弄波風起。驚墮疏蟬。翠檝香空。畫眉聲咽江邊。怨歌長。蹋搖心苦。攀折誤。叱利威寒。憶前歡。絳綃緘語。紅淚闌干。愁端。憑誰代理。檻移病藥。錦護雙蓮。因甚瓊簫。不招彩鳳過樓前。溼青衫。自題秋恨。憐翠袖。猶熨春暄。夢如煙。數峯青斷。涼月娟娟。

徵招 石似梅書來賦寄之

石郎磊落今年少。雄才尙齊班馬。廣袖倚天風。引龍媒高駕。賞心知更寡。甚偏愛。野人情話。渺渺滄波。霜空木落。月明今夜。醉也不成眠。窗燈暗。翩然寒鴻飛下。底用惜飄零。已蒼毛盈把。孤琴羞自寫。蕩雲壑。古音彈罷。鎮相憶。卻恐相逢。又野梅春卸。

甘州 題趙漁亭詩集

恨西風、吹淡白鷗心。吟詩鬢毛斑。任霜枝啼碧。舍南有竹。蝨粉空乾。猛折芙蓉江上。老去覺春寬。百尺珊瑚冷。煙霧漁竿。長記五陵豪事。喚銀箏催客。玉鉞光寒。瀉龍頭春酒。咳唾亂珠盤。又萬感、滄溟變石。問桃花、流水幾人間。還搔首、向松門外。愁看秋山。

玲瓏四犯

湘文既之浙。余亦東遊江。空歲寒。念湘文當過常熟。結鄰之約幾

時可遂

曳艣夢輕。平窗秋遠。壺觴猶負清景。歲華歸去晚。雁鶩驚霜冷。多愁更添舊病。又天涯、布颿催暝。逝水遊情。夕陽宦味。從古幾人省。幽齋記同佳興。有燈前句好。簾外花靚。送君江上水。淚滴寒沙靜。關河戰罷餘蕭瑟。誤松菊、遲來三徑。成獨醒。飄然去、魚波萬頃。

西子妝 夾竹桃

雨葉宜顰。露花扶笑。睡起春情非舊。月中霜裏見嬋娟。換秋眉、醉妝頻鬪。紅霞半口。記掃徑、煎茶時候。畫雙身、算朱顏綠鬢。原是佳耦。春歸後。淚粉啼脂。暗逐湘波溜。可憐細骨爲相思。幾禁持、莫寒衫袖。燈窗試酒。任簾外、春風吹瘦。護仙心、玉洞青鸞夜守。

琵琶仙

五湖之志久矣。羈縻江北。苦不得去。歲乙丑偕婉君泛舟黃橋。望見

煙水益念鄉土。譜白石自度曲一章。以箜篌按之。婉君曾經喪亂。歌聲甚哀。天際歸舟。悔輕與故國梅花爲約。歸雁啼入箜篌。沙洲共飄泊。寒未減、東風又急。問誰管、沈腰愁削。一舸青琴。藥濤載雪。聊共斟酌。更休怨、傷別傷春。怕垂老、心期漸非昨。彈指十年幽恨。損蕭娘眉萼。今夜冷、篷窗倦倚。爲月明、強起梳掠。恁奈銀甲秋聲。暗回清角。

青房並蒂蓮

送別宗載之

盼煙隄。又春歸露草。愁長江離。絮語津亭。老去重分攜。玉箏絃外吟髭白。記挑燈、同

翦新詞。伴翠樽、未了高談。照花微月轉窗西。明朝布帆去遠，聽古岸垂楊，處處鶯啼。也應憶、菰鄉舊侶，醉隱漁磯。江上幾番夜雨，怕春恨、還染薜蘿衣。正倚闌、卻過飛鴻，淡煙斜日晚淒迷。

遐方怨

芹葉亂。棗花零。送客江南。畫船無風春水輕。斷腸何處蹋歌聲。淡煙斜日裏，閉孤城。

生查子

楊花飛去圖爲子漢卿賦

畫橋楊柳枝。生小成連理。不解作飛花。繞樹東風起。郎歸如路塵。儂去隨流水。今

夜夢彈箏。還似朱門裏。

慶春宮

高茶菴婦死於兵作空江弔月圖

慘月啼鵑。荒灘警雁。四山恨匝低雲。心指潛淵。銀瓶問絕。夜寒流水無春。戍笳吹斷。歎釵鈿、倉皇路塵。驚颿亂起。滿地青楓。彌望秋燐。誰知彳亍江濤。濁酒疏篷。細雨燈昏。幽壑難呼。空彈怨瑟。珮環何處歸魂。素波重照。賸雙鬢、孤懷自溫。楚招歌罷。千



里藤蕪。都長愁根。

琵琶仙 送于漢卿北上

江表春寒已遲了。四月薔薇消息。輕燕低蹴。箏弦飛花趁離席。驚夜雨、鶻聲正惡。又千里野雲愁積。酌酒關河。驅車歲月。鄉路休覓。待重話、韋曲清遊。歎塵海蒼茫鬢毛白。顛倒百年心事。有歸颿知得。鷗鷺少、溪山更遠。問一生、幾兩遊屐。也但燈夕繙書。夢君顏色。

采桑子 眉

修蛾帖帖生疏翠。鸞鏡迴翔。蘭燭明光。不爲承恩試晚妝。綠波照影憐溪水。細柳春藏。額印微黃。恨與遙山細細長。

醉蓬萊 和夢窗

蜀桐虛素軫。菱檻涼歸。晚風雙袖。釵挂臣冠。鏡影青蟬瘦。料蟀薇根。招螢竹尾。漸綺窗停繡。軟淚霞綃。柔肌雪簟。夜闌冰透。莫問芳時。春草抽心。繫馬桃花。水波紅皺。

琥珀沈壺。夜語遲街漏。露溼芹芽。岸生檀樹。又噓船時候。璧月朱門。依依夢醒。翠環銅獸。

霜葉飛 鬢梅

翠禽啼緊空閨暮。殘妝都怨朱粉。玉釵微墮一枝斜。籬角黃昏近。看月下、疏香暗引。春愁先上徐娘鬢。向紙閣蘆簾。傍燭影低迷。夜來無限丰韻。爭奈絳縷淒涼。冷紅吹罷。那時歸。又難準。髻鬢低處不勝寒。自倚東風問。怕竹外、腰肢瘦損。瓊匳珠琲飄零盡。待寄回、西洲句。雙挽雛鴉玉奴棲穩。

疏影 又

雕闌近曲。翦凍雲幾點。衫袖凝馥。珠絡穿成。霜顆玲瓏。珊瑚燕尾低簇。含章遺恨悲鸞鏡。忍再見、當時裝束。祇斷魂、偷趁幽香。飛傍那人蛾綠。還記枝橫翠帳。墮鬢倦未整。春睡初足。簾隙風尖。疏朵微欹。私語畫屏斜觸。犀帷月暗瓊梳碎。任散亂、釵梁寒玉。賸幾絲、冰膩殘膏。冷挹淚綃難掬。

藤

二

種

香

館

運彰

詞



薛時雨（嘉慶二三——光緒一一）

字慰農。晚號桑根老農。滁州全椒人。道光二十三年  
舉于鄉。以母病。不應禮部試。至咸豐三年始成進士。  
出知浙江嘉興嘉善二縣。遷知杭州府。兼署督糧道。  
代行布政按察兩司事。以疾歸。主杭州崇文江寧尊  
經惜陰三書院。卒於江寧。著有藤香館集。

序一

夫溷景朝市。一視蘿袞。鑒彼勞生。達視齊物。非不可擺脫。蕭杙作弘農之坐嘯。陶詠溪谷。追客兒之游娛。然而珪組牽絡。襟靈弗暢。政繁東閣。或阻興於命篇。氣爽西山。徒勞形於執板。一行作吏。九能轉局。倏然感矣。是故藻瑩幽素。發皇文翰。希風竹溪之侶。乃足弦觴。歸隱鑑湖之濱。方滋山水。魚鳥樂致。曦月送懷。其內史誓墓之年。與公遂初之候乎。椒陵薛慰農觀察鸞鶴標質。穀玉兼才。三筆之雋。挺秀家術。二始之美。騰聲郡秩。方開明聖之利。惠溢葑田。遽卻翠黛之留情。殷香社。河內莫借。東峯頓歸。論者惜焉。然而水波不競。湛此寒泉。崇蘭信芳。眷於空谷。冥通遐寄。有性存焉。亦微尙之不可及也。於是抽簪自喜。命棹灑然。賦三閭之涉江。應八公之招隱。紱冕旣謝。笠屐相尋。聽水菱蘆之庵。狎月桃花之塢。斜陽煙柳。孤懷獨攄。濁酒殘燈。墜歡若接。並入妍唱。發爲清聲。若夫江濱隻雁。招魂不歸。天末哀蟬。懷香無夢。舟陳大被。覆夜雪而逾寒。山對小姑。憶朝雲而彌楚。鴿孤寫哀。鳳靡鳴恨。叩靈均之些。極竹屋之

癡言愁欲愁。吁可戚矣。乃若柴桑歸去。松菊並荒。輞川故居。溪山異色。鄰曲則流人  
雪散。耆舊則故鬼。煙啼。遂乃董逃續歌。亂傷白馬。阮哭抒痛。聲激黃鑿。綜此鬱伊。具  
歸促拍。夫公謹贛洲之譜。君衡漁唱之詞。類皆曳響蘆碕。結念葭水。此則江湖遺迹。  
動若虛舟。山川拓懷。從其弭楫。聲答鳴雁。興逸垂虹。圭塘之後。欵乃名集。信無愧古  
人矣。在昔始興罷守。貧乏裙衫。東萊還家。儲無甕缶。維君歸狀。清素似之。吾知晉平  
守約。未足山資。陝州才良。終爲國寶。北山之阿。暫棲一鶴。西湖之曲。還遲單船。民望  
方殷。斯人卽出。是又琴酒輔趣。難淹池上之吟。鼓節宣風。更奏襄陽之樂。以彼治譜。  
暢厥雅音。小山非工。大晟且作。乘風便去。君更陟夫瓊樓。飲水能歌。余竊尋夫金井。  
甘泉李肇增。

序二

嗟夫。諸公袞袞。爭爲擊楫之行。宦海滔滔。誰是收帆之客。印纍綬若。富貴何常。手板  
脚鞞。塵勞曷極。而乃田無負郭。大都官以爲家。廡仕難營。言歸亦不易矣。吾友薛慰

農觀察早歲甲科。游膺民社。鳴琴而治。則陽春乘弦。橐筆從戎。則萑苻斂跡。其守杭也。值灰燼之餘。作撫綏之計。見星視事。如雨澤人。補孤嶼之梅花。種長隄之楊柳。方謂名齊白傅。翠黛能留。詎知冠挂逢萌。湖山惜別。江舟一去。欸乃成詞。余受而讀之。祓濯塵纓。刊落世務。綠蓑一領。換卻朝衫。白酒半瓶。載之煙舸。鷗邊之月如晝。雁外之天易秋。墮涼句於樽前。吹淚痕於笛裏。曉風殘月。柳郎中佳什居多。衰草微雲。秦學士哀吟不少。歸雲之思。招黃鶴而共語。聽水之譜。搴素蘭以佩芳。惟其結想孤高。寄情繇邈。謝逋招隱。貨騎買舟。故能本嶽奇磊。落之胸。發窅渺幽微之韻。洵可遠追白石。近抗迦陵也已。僕春蠶絲盡。寒蟹腸空。甘爲退鷁。而不辭。有志盟鷗。而未逮。千金虛擲。草草光陰。一錯鑄成。悠悠故我。計固失矣。悔已晚矣。今者手子一編。行將送君千里。茫茫春水。我亦欲愁黯黯。秋江。人能無恨。猶幸葑菲不棄。苔岑相知。篤愛旣深。虛懷莫及。儻他日者。歸田得遂。入山必深。則花邊雙槳。柳外一帆。效蘆笛之烏烏。和菱歌之嫋嫋。猶能扣舷流唱。訪君於青山綠水間也。同治丙寅秋。侯官楊叔懌。

跋一

嘗考唐宋倚聲之製。猶有齊梁樂府之遺。其後作者競尙尖新。流爲儂薄。以致法曲飄零。而正始之源絕矣。慰農觀察才思超邁。長於詩章。妙解音律。去冬解組歸田。往來於大江南北者數月。評量客邸風光。探問故山消息。以王郎抑塞之懷。作爲長歌小令。顏其稿曰江舟欸。乃雖潛心按譜。仍能揮灑如意。一氣卷舒。余一見卽曰。此蔣心餘先生遺音也。公相視而笑曰。舟中適展閱忠雅堂集。豈君有先見之明耶。夫文人拈毫託興。貴在遇事卽書。直抒胸臆。而無失唐宋清真之意。何必刻腎鏤肝。始得爲西崑詞客乎。若乃紅牙哲匠。致誚俳優。綺袖專門。共嗤輕薄。才士因此激而改弦。力洗柔靡之習。亦安見銅琶鐵板。不與搓酥滴粉。異曲而同工哉。丙寅秋。秀水金鴻佺。

跋二

斲肩斗酒。風雨人歸。茸帽金鞭。鄉關歲晚。明月千里。涼雪一篷。招白鷗爲主盟。辭朱



組若脫屣。獻唱互答。瑟波不秋。其宜城去官之年。季鷹歸國之日乎。桑根夫子大峽。迴瀾滄浪散髮。綠波三尺。徑挂朝緋。鐵笛一枝。可換牙笏。煙蘿小築。願傍醉翁之亭。書畫輕裝。獨載米家之舫。大江東去。淮海南來。瓜步鐘聲。遙閣塵夢。秣陵燈火。平分古愁。攜蠟屐叩通明所居。睨酒樓呼太白與飲。一葉盪水。萬籟沈山。空波渺瀰。微激涼吹。柔艣嘔軋。如聞鄉音。感伯鸞之五噫。發子野之三弄。斷雁警夜。淒絕桓山之吟。哀蟬眷秋。渺矣團扇之曲。彭澤乞米。秣田已荒。杜陵誅茆。草堂孰構。厄駿馬於折坂。號鷓鴣於枉渚。徒汎元真之宅。行牽思曼之船。於是鬱紆乍宣。靈響畢會。峯催險句。翠落樽前。月盪寥情。秋生弦外。蘭成以枯樹見意。靈均以香草寫憂。狀身世之支離。吐胸襟之壘塊。縱復長途置驛。鄭莊迎賓。狂笑絕纓。齊髡促席。而中年哀樂。陶寫誰知。老大沈淪。風塵同泣。菰葉橫塘之夢。楊花小伎之弦。翠袖紅巾。辛幼安能無淒咽。鬢絲禪榻。杜樊川輒用拊心。此又借鏡繪神。拈花破涕者已。涉歷既久。謠詠遂繁。效賈洲笛譜之編。儷日湖漁唱之製。成江舟欸乃詞一卷。流水今日。若聽瓠梁之吟。飛

鴻遠音可躍方響之鐵。大晟有作。皇雅奚愧。噫嘻。乘風鼓柁。莫挽中流。擊節叩舷。獨唱小海。里耳何知白雪。釣師原是紅衣。今者雁杪雲高。鷗邊灘靜。帆隨九面。湘波自遙。風引三山。蓬島可接。歌玉局水調。願留五馬於西湖。從成連浪游。敢抱孤琴於東海。丙寅冬。錢塘受業張景祁。

跋三

今夫鄉曲下士。邱樊羈身。煙墨多疏。江山乏助。飛蟲一響。大雅弗登。厥有盤辟手板。浮沈簿領。性真壅固。無當獻詠。若乃英篋涉歷。鋒車遄征。似可藻績山川。鋪陳謠俗。然而世腴易競。襟靈罔攄。衷悻或暎。飈焰蓋寡。是惟醴粹蘊德。魁壘挺姿。瑋抱霄嶂。鬱風雲氣。崇情嶽峙。結山水緣。征路片帆。輕裝千里。於是搖襜綈槩。鏗訇宮商。鳴榔獨謳。舒其眉繭。鼓柁促拍。寫彼胸春。如我慰農。薛夫子江舟欸乃詞。可謂古音別操。靈響自振矣。夫子擻掖風雅。邳張徽猷。阮瑤在官。不輟吟詠。謝朓治郡。彌精翰章。銀鏤手中。蒼生懷裏。辛苦栽花之手。艱難拔薤之心。丹衿所孚。膏雨潤瘠。彤帷所泄。條

風扇和方諸白蘇頔頔何愧假使符綰銅虎膾謝銀鱸鯤程遐騫馬當逕送破長風  
之浪展霖雨之猷三擲三盧一官一集千秋流唱四海傳鈔無如船移下瀨鼓打迴  
颿乞湖之蹤抗希賀老誓墓之約追蹤右軍解組翛然攀轅不得人念循吏公作散  
仙風月題襟江湖載酒滌筆洞庭之雪削墨鄱陽之雲山郵水郵時發靈緒今雨舊  
雨言續墜歡撫么弦於篷窗譜箏弄於酒座致足樂已既而惆悵離蹤觸摠舊恨霜  
前隻雁停素琴而欲招夢裏修蛾舉羅幃而宛在風饕雪虐天闊雲低集中句擊楫  
愁來扣舷響應加以懷人羈屑弔古蒼涼雁戶鱗塍依依昨夢兔絲燕麥處處荒尫  
宜其黯然魂消聲與淚迸也嗟嗟姜白石借梅傳恨環珮空歸王碧山託月興思山  
河影老此中寓旨大有深情第謂子母陰陽九宮能叶慢聲哨遍半黍不差又烏知  
玉宇瓊樓原本忠愛斜陽煙柳並非怨歌聆音者興慨慕之思按拍者極鬱伊之感  
耶比者西冷小住結文字之緣東山暫留望斯人復出行見琴樽一席雅調鏘流絲  
竹雙聆古懷陶寫笙簧治譜圭臬文壇若慎言者橋舌不調枯腸易澀按蕢洲之笛

譜聲律未嫻。慕茗溪之漁隱。音塵欲溯。他日汎蜻蛉之舟。浮綠蠟之酒。從成連於海上。訪玉局於湖濱。煙波杳靄。閒出此卷。擷笛歌之。當令衆山皆響也。丙寅冬。仁和受業董慎言。

西湖艣唱自序

余以甲寅抵浙。需次暇日。輒以長短句自遣。積久成冊。題曰西湖艣唱。秀水孫次公外史刊入同人詞選。寶山蔣劍人司馬摘入芬它利室詞話。嗣是兩任劇邑。又奔走南北間。有所作。亦附入焉。庚申遭浙變。播越經年。藏書散佚。辛壬之交。流寓西江。寇警日逼。心搖搖如懸旌。賊退。稍事撫拾。而生平長物。遺棄略盡。偶於敝篋。檢得艣唱初稿。十存四五。適亡姪葆樟隨侍。爲鈔錄之。癸甲以後。重膺民社。時會垣新復。事事草創。日不暇給。直至乙丑闈後。挂冠始得重親翰墨。既訂詩稿。遂兼及詞。取樟姪所錄。並近作。都爲一卷。仍其舊名。噫。余俗吏。非詞人也。顧十年游蹟。強半寄此。姑編存之。以誌春夢。若云搓酥滴粉。咀宮含商。於律法不差銖黍。則詞人之能事。俗吏謝不

敏矣。同治丙寅冬十月。

江舟欸乃自序

蘧伯玉行年五十。而知四十九年之非。余四十有九矣。生平之非在直。居官涉世。獲戾不少。思有以變化之。計文字中最曲者莫如詞。向曾肄業及之。簿書鞅掌。久弗託於音矣。乙丑闈後。挂冠由之江。買棹出吳門。陟金焦。渡揚子。江返里。復西上。至皖江。過彭蠡湖。達章江。度歲丙寅。自章江歸。再經里門。泛秦淮。涉黃浦。重入錢塘。往返七千里。舟中壹意倚聲。積成一冊。題曰江舟欸乃。自取讀之。律疏而語率。無柔腸冶態。以蕩其思。無遠韻深情。以媚其格。病根仍是犯一直字。噫。言者心之聲。幾者動之微。詞翰小道。無足比數。顧能直不能曲。儻所謂習與性成耶。游蹟所寄。姑錄存之。以志吾過。欲寡未能。吾其私淑蘧大夫乎。同治丙寅冬十一月。



藤香館詞

全椒薛時雨樹生

西湖艣唱

水調歌頭

吳蓉圃太史同年鳳藻招宴吳山道院卽席有作

積雨放晴霽。風景倍清妍。拓開游覽眼界，須上最高巔。多少紅樓白塔，一派湖光山色，都落綺筵前。極目遠天盡，正練截江邊。聯今雨，呼舊雨，共流連。良辰勝境難值，況又主賓賢。峯是吳山第一，人是蓬萊第一，此會續羣仙。座皆癸丑同年，蓉圃爲癸丑榜首，起舞倚殘醉，自謂我非顛。

百字令 雨中游湖

畫圖流覽。愛龍眠、描寫樓臺重疊。紙上湖山親領略，轉惜畫工筆拙。柔艣輕搖，濃陰密釀。有地都佳絕。煙嵐如沐，六橋波影遙接。笑我卅載鄉園，拳山勺水，到此胸襟闊。絕代果然西子貌。任爾淡妝濃抹。暝色催人，山靈送客，過眼猶嫌瞥。城闌回首，眉

痕添畫新月。

瀟湘夜雨 海昌寓館逼近海塘潮聲洶湧夜常失眠加以連宵風雨倍難成

寐枕上倚聲

江北波澄淮南漲淺。生平不慣潮聲。海濱風浪太縱橫。翻水國，蛟龍吼怒，嘶敵騎，金鼓齊鳴。驚魂處，音沈永漏，響咽殘更。連宵怯聽蕉窗零雨。浙瀝交并。累羈人不寐，輾轉天明。燈剔燼，瘦紅影墮，鴉噪曉，虛白光生。爭能似，鄉園睡穩，猿鶴伴，淒清。

百字令 海昌署中古柏相傳千百年神物屢著靈異嘗親降墨蹟於署之西

軒自稱古木主人筆勢飄灑語亦盤曲可味當事者勒諸碑石胡雲次刺史

澤沛以搨本見贈並索題詞

虬枝聳翠儼鬢眉耆耆衣冠太古密蔭遮來官閣遍長養使君霖雨丞相祠堂精忠廟貌一氣同凝聚神光離合素箋親降幽語細審筆勢縱橫翔鸞舞鶴妙得雲煙趣古帖人間容易覓珍重赤松儔侶石蘚鉤摹銅柯展謁眼界開如許龕官慚愧蚓



蛇難續書譜

減字木蘭花 苦雨

困人天氣。睡起恹恹無意思。天也心酸。鎮日淋漓淚不乾。濃情密緒。恰似飄來千萬縷。斜倚窗櫺。翦個紅衣人掃晴。

偷聲木蘭花 新晴

禽聲得意喧清晝。一線朝陽窗隙透。風漾簾旌。檐溜猶聞滴瀝聲。滿庭花木增妍好。出浴美人眉黛掃。等是羈留。風日融和便減愁。

菩薩蠻 南道宮後院樹陰深靜晚卉叢生時一散步

春花落盡都無影。桐陰滿罩蕉陰冷。晚豔孕秋芳。纖紅發海棠。上清書未讀。墮落愁塵俗。偶結道家緣。何人香案仙。

鳳凰臺上憶吹簫 晚坐南道宮納涼弔影淒然感而有作

雨過炎蒸。霉消暑逼。安排葛帔蕉裳。幸室鄰荷院。靜極生涼。多少闌干倚遍。情脈脈。

倦引藤牀。淒清況。燈昏古壁。月轉虛廊。荒唐上清迢遞。偏許我塵蹤。寄託雲房。賸影形相贈。色相全忘。待把關頭打破。何時熟。枕畔黃梁。空縈想。三生幻夢。一瓣心香。

虞美人

蘭湯浴罷梳妝懶。寶髻鬆鬆挽。白羅衫子茜紗裙。閒與知心小婢立斜曛。桃枝綠扇搖風細。粉汗香融膩。扇頭誰寫十三行。仔細猜他筆畫似檀郎。

憶王孫 題畫

遠山煙靄近山雲。水竹三分屋二分。此景江南畫是真。暗傷神。少箇桃源可避秦。

調笑令

調笑。調笑。白。詡年華正妙。怪他阿姊情癡。鎮日妝樓鎖眉。眉鎖。眉鎖。漸漸新愁到我。

多麗 暑夕思鄉

暑天長。客窗愁思茫茫。想招涼、吾廬最好。草堂舊署藤香。一庭花、芳馨徐送。滿園竹、熱惱俱忘。弱女移尊。嬌兒搔背。山妻閒話伴疏狂。問何處、風多便去。角枕自攜將。安

排定時新瓜果。小佐壺觴。歎今生、未修清福。台教馳逐名場。日當天、衣冠苦著。塵滿地、僕馬紛忙。腰折眉摧。形勞神役。算來無地是清涼。到退食、科頭小憩。樹色隱殘陽。爭能似、山中脫略。苻帶荷裳。

浣溪紗

題桃花扇傳奇後

南部煙花賽六朝。江山佳麗美人嬌。風流公子此魂消。畫戟寧南通舊好。靈旗閣部締新交。忠魂兩地待君招。

一萼紅

贈月娥

稱芳名。是廣寒舊隊。小謫下瑤京。蛾樣猶纖。蟾輝未滿。神彩先自光明。曾學過、霓裳法曲。串新聲。嚶嚶妒啼鶯。靨笑添渦。眉修露慧。睇轉流情。快到團圓時候。願靈娥珍重。莫墮愁城。荳蔻含香。芙蓉作蕊。煩惱何苦相縈。須記著、前身小影。伴青天、碧海耐淒清。留待梯雲客至。喚取卿卿。

西江月

弱質自甘憔悴。輕顰淺笑休誇。蛾眉有樣在西家。懶學新人描畫。翠袖單寒倚竹。紅塵多少看花。承恩若要借鉛華。蝴蝶今生休化。

瑤臺聚八仙 同人湖上賞荷座客有談秦淮風景者感賦

繞郭紅芳誰比似。西湖六月風光。水天無暑。柔櫓盪處。悠揚三竺浮嵐。籠竹樹。六橋軟漲狎鴛鴦。儘徜徉。綠荷四面。人在中央。秦淮那便讓此。有山溫水膩。粉豔脂香。十里珠簾。而今一片滄桑。少年游蹟寄處。猛迴首。煙雲劫一場。休惆悵。趁花間酒熟。沈醉鷗鄉。

過秦樓 六月廿三夕吳山香社極盛循山小步經月娥家

月影參差。燈輝高下。拂拂衣香不斷。蓮纖徑窄。柳弱風欺。暗倩阿娘扶緩。綠趁夜永。人稀。偏是游人也。耽宵翫。借輕羅小扇。遮來羞靨。障來愁面。有幾輩。倚竹招涼。挑燈默坐。不把晚妝勻染。房櫳寂寂。門巷悵悵。熟客許來消遣。簾外鸚哥喚茶。雪碗冰甌。清談儘便。道燒香則甚。儂有丹心一點。

百宜嬌 茉莉毬

琢玉爲花。翦冰成顆。妝罷綵絲穿就。式仿晶圓。影偷月小。鼻端清芬參透。奇葩媚夜。恐暗裏、春光微漏。想攢將、碎朵團圓。趁伊含蕊時候。剛好是、風前浴後。偏懶押瑤簪。學貽瓊玖。配有蓮花。答來梔子。故故芳心挑逗。低懸麝帳。料素豔、今宵生受。到更闌。酒夢醒初。妙香徐嗅。

青玉案

何人背誦閒情賦。暗逗起、閒情緒。綺語翻新驚復妒。禽描鸞鳳。卉摹蘅杜。種出愁無數。彩雲縹緲紅樓護。錦字空緘斷腸句。青鳥殷勤相採取。魂離神合。目成心許。私共靈修語。

減字木蘭花

揚州小杜。枉把惜花新什賦。葉已成陰。孤負尋春一片心。宵涼夢杳。月影蒼茫星影小。不怨嫦娥。只怪瑤臺風露多。

望江南 新月

新月上。影恰二分宜。兩地情懷憑管領。一分照我一分伊。脈脈此相思。

一葉落

一葉落。涼初覺。彩雲舊訂銀潢約。美人期不來。秋院羅衫薄。羅衫薄。恨向青燈閣。

鵲橋仙 七夕

經年別緒。經秋聚晤。一夕雲輶小住。替他牛女預思量。是那箇、銀河先渡。娟娟素月。珊珊玉露。註定星期休誤。也知判袂在明朝。卻自勝、參商兩處。

滿江紅 感事用鄂王韻

虎踞龍蟠。爭一霎、繁華消歇。問誰啓、東南門戶。火炎岡烈。皖水先期歸戰艦。秦淮從此無風月。展吟箋、愁譜望江南。音淒切。虛聲誚。誰能雪。家國恨、難磨滅。把金樽斟滿。玉壺敲缺。斫地歌哀襟濺淚。憂天心赤腔凝血。問何人、遺世獨遨遊。朝仙闕。

搗練子 螢火

形閃爍。影低微。一日秋風一日稀。莫笑前生真草草。今生還避太陽飛。

明月逐人來 中秋前一夕偕黃孝侯太史同年鉅步月

長空雲淨。六街人靜。扶殘醉、良宵共趁。碧虛縹緲。天遠清光近。匝地瓊瑤雙影。秋思誰家。四面紅牆掩映。偏今夕、金吾猶禁。玉樓深鎖。不放仙郎進。鐵笛一聲酒醒。

月華清 中秋對月感懷

冷襲吟魂。清圍詩境。碧霄塵淨如洗。萬戶笙歌。只我淒涼獨自。倚法曲、仙侶虛邀。賡水調、妙才難擬。遙睇。悵高寒宮闕。雲中天際。往事蹉跎猶記。算半住風簷。半消客邸。月色年年。看向故園能幾。況者番、春夢新牽。更不許、秋懷高寄。徙倚。漸更闌漏寂。斗杓斜指。

踏莎行 餘杭道中

苦竹沿溪。青莎貼水。斜陽黯黯遙山翠。一聲欸乃送輕舟。行人漸入蘆花裏。打稻場連。剝棉天霽。桑麻而外無閒地。村居風景舊關心。句將一片鄉思起。

柳梢青 秋柳

絮果難圓。楊枝易老。秋又今年。少婦樓頭。征人陌上。依舊纏絲。江南紅板橋邊。記弱態、依依可憐。過眼繁華。驚心搖落。況更烽煙。

唐多令 夜泊紹興聞笛

月影碎中流。推篷客思悠。是誰家、人倚高樓。笛裏從來增別恨。況永夕、擁孤舟。折柳起邊愁。梅花落素秋。一聲聲、跌宕猶。曲罷更闌星在水。聽隱約、答漁謳。

南鄉子 餘姚舟次

風葉颭秋聲。涼逼疏篷漸不勝。黯黯水荳花謝了。淒清。何處新歌唱采菱。一曲一橋橫。宵冷霜揩鏡面澄。罷釣漁翁無箇事。閒評。幾輩高風似子陵。道旁有巖子陵故里碑。

臨江仙 自姚江迴杭內子輩先已抵杭數日喜賦

倦客歸來秋颯颯。鄉音入耳分明。相逢何暇敘離情。隔江風鶴警。戚里最心縈。且



喜雙雙兒女小。膝前團坐。慙生爲耶。屈指說行程。烽連瓜步。赤山到虎林青。

金縷曲 借內子泛湖

霜氣澄秋潦。喜空明、水天一色。鏡開清曉。酒榼茶籃隨意挈。買個船兒小小。恰稱我、一家舒嘯。湖外煙嵐湖裏樹。襯樓臺、金碧增奇巧。鈴塔影、翳斜照。愁眉到此應都掃。泛中流、櫓聲搖曳。大開懷抱。十載齏鹽艱苦共。酬爾溪山畫稿。試領略、天然佳妙。俗狀塵容須脫盡。有逋仙、冷抱梅花笑。扶殘醉、倚歸棹。

東風第一枝 乙卯新正三日孝侯同年招作長夜之飲賦此

嶺雪晴融。唐花暖放。咬春筵啓初度。選聲宜趁新年。把盞喜聯舊雨。多君灑落。早准備、登壇旗鼓。看布成、酒陣森嚴。蒸作滿庭香霧。難得是、搏沙再聚。何況是、歲朝佳序。撥來內翰銅琶。和出杜娘金縷。豪情綺習。爭忍令、芳時孤負。笑夜闌、扶醉歸來。借爾玉堂蓮炬。

一萼紅 朱修伯太史同年學動見余上年贈月娥詞屬倚原調轉贈雪卿爲

賦此闕

掃蛾眉。看朝天素面。恰與月交輝。皓魄難圓。靈娥已嫁。深夜誰叩朱扉。讓青女、嬋娟獨擅。落九天、咳唾盡珠璣。柳絮聯因。桃花作醜。梅萼添肥。門掩枇杷花下。有煎茶學士。冷豔相依。姑射肌豐。太真膚膩。清品塵世應稀。卻笑我、停舟訪戴。本姓眩生花。銀海倏迷離。爲譜陽春一曲。算比紅兒。

解佩令

歌筵解嘲

香山歌席。坡仙吟舫。是杭州、宦蹟都佳麗。落拓粗官。敢謬託、風流高致。只難刪、少年幽思。春江花月。西陵驄馬。問歡場、消魂能幾。陶令閒情。也只是、遣愁而已。好春光、半歸流水。

浣溪紗

詠江山船八首

江水灣灣漾碧波。山嵐冉冉映青螺。江山如此易情多。江上潮來游客夢。山中雲  
過美人歌。江山如此奈情何。

舊籍誰編九姓漁。江干供億累花奴。紛紛花使索花租。生小慣嘗風浪險。合家齊  
傍水雲居。朝潮暮汐意何如。

時樣梳妝絕可憐。東船西舫鬪嬋娟。春江多少買花錢。手帕行中原是妹。鴛鴦牒

上不論年。桐巖解說太言詮。

臨水花枝分外嬌。一江煙月路迢迢。燈紅酒碧可憐宵。半面琵琶羞客顧。雙聲檀

板倩郎敲。東君無語暗魂消。

一路珠簾不上鉤。杭州過了是嚴州。石尤風急打船頭。昨夜飄蕭留客雨。明朝艱

苦上灘舟。有花有酒不須愁。

鷗戀煙波蝶戀香。嘲風弄月度年光。夜深人不隔紅牆。薄倖有時嗔杜牧。風流私

許嫁王昌。聘錢十萬待商量。

桃葉桃根並擅名。雙雙姊妹總多情。舊歡未了又新盟。舞袖慣飄香拂拂。歌喉不

唱淚盈盈。何人花外學調笙。

湖舫江船美並誇。有時湖舫去看花。妒他名勝屬西家。蘇小芳魂留豔土。越妃遺蹟冷香車。維舟憑弔夕陽斜。

臨江仙 闌後借景劍泉太史其濬泛湖

天上文星湖上落。一湖秋水澄鮮。畫船來往夕陽邊。波光濃似酒。人影淡於煙。珊瑚樹珍奇齊入網。遺珠訪到嬋娟。錦袍紅袖兩蹁躚。泥他金縷曲。酬爾玉堂仙。

南浦 鴛鴦湖

春水長蘼蕪。問晚來鴛鴦並宿何處。打槳趁文禽。沙隄上、惟有浴鳧飛鷺。風光豔麗。湖名也作消魂語。畫船緩度。看多少垂楊綠。迷洲渚。漁莊蟹舍排連。又菱角雞頭。乘春培護。此地足幽棲。應容我。他日權歌來去。心盟白水。抽身便作煙波侶。東流可泝。待準備吟囊。更題鸚鵡。鸚鵡湖在郡東。

翠樓吟 煙雨樓

淺溜蜻蜓。深藏鷓鴣。綠波四圍縈護。芳辰供眺覽。有多少、畫船簫鼓。宜煙宜雨。便雨

霽煙消也。饒佳趣。倪迂譜。只應郊外。遠山添取。禾城四面無山。日暮。縱目登臨。覺此身清曠。予懷欲訴。一官資坐鎮。爭名勝。荒涼如許。頽垣廢礎。問大地樓臺。幾人摺拄。空延佇。一湖春水。滿天晴絮。

紅情 題張玉珊茂才鳴珂紅豆花畫冊次韻

替誰著色。是個人影子。疏疏密密。綺夢三生。畫裏穠華似曾識。南國荒涼若許。算往事。紅牆空憶。待約略說起相思。未語淚先溼。小立玉階側。愁綽約仙姿。瘦損風日。凝脂作液。點點唾壺血同碧。千古情苗難斷。花落去。陰成猶昔。月影下。勞記著。幾聲長笛。

一斛珠 王芑亭外史逢辰饋樵李

玉衡天上。歷歷星精偷色相。城荒嘉果留無恙。一捻新紅。爪印西施樣。梅里奇珍勞遠餉。承筐較勝投桃貺。豐姿掩映嬌無兩。纖核中虛。漫把王戎謗。竹垞詩纖核乃

中虛

臺城路 題隨園圖次陳實庵太史元鼎韻

鍾山雲冷。騷壇寂。亭臺廢興誰主。地拓清涼。天開畫稿。點綴夕陽蔬圃。啼猿學語。說  
往昔鶯花了。無尋處。粉本重摹。箇中幽徑孰來去。秋風回首舊夢。雅游裙屐集。絲  
竹曾譜。茂苑花闌。秦淮水咽。太息蕪城同賦。經年戰鼓。問甚日陂塘。再盟鷗鷺。寫入  
吟箋。望江南調苦。

一萼紅 題楊眉影夫人畫蘭遺墨爲秦次游中翰光第作

賸愁苗。教秦嘉腸斷。香草泣離騷。寶匣塵昏。瑤琴調澀。三生福分全消。算只有、曇花  
小幅。是當年、螺子黛親描。並蒂緣慳。同心影瘦。紉佩香凋。千古才人工怨。覩零縑  
斷素。分外無聊。碧杜緘情。紅蘅憶遠。古芬飛上吟毫。最惆悵。湘君魂窄。一聲聲。楚些  
渺難招。爭怪潘郎華鬢。逐漸飄蕭。

摸魚兒 陸費春帆中丞琮餞余於鴛鴦湖並賦長歌贈別未及踐和倚此作

答

啓離筵。與秋同餞。西園冠蓋如綺。巋然又見靈光叟。紗帽隱囊來止。歌自倚。祇一種、深情深比鴛湖水。風流老輩。看白髮傳杯。紅腔選韻。不飲也須醉。書生習。自揣難諧時世。一言公最知己。公贈詩有前俯後仰羞不爲之句。生平俯仰期無忝。虛譽那爭循吏。今去矣。愁滿目。哀鴻未了臨歧事。本年禾郡赤旱。蒼生有淚。望休沐餘閒。仙因佛果。分惠及桑梓。

百字令

題戚砥齋明經士廉拈花圖。圖中人爲北道歌者。

竹枝聲裏。記滿城蜂蝶。消魂無奈。舊作北道竹枝詞。有消魂最是在平境。花滿春城。蝶滿街之句。北地胭脂容易冷。賸有籠紗詩在。淚搵青衫。香闌紅袖。夢遠愁難載。詞人老去。畫圖猶認憨態。遙想驛路車停。黃塵白酒。風月良宵買。天女維摩花現相。學得神仙狡獪。小影真真。華年負負。未了三生債。憑君作主。瓣香清茗。供待。

喝火令

舟泊姑蘇

柔櫓驚殘夢。韶華逐逝波。四年重向此經過。一笑虎邱風月。大半屬青娥。彩袖香

招蝶。新妝黛掩螺。畫船雙槳疾於梭。越是三更。越是冶游多。越是客舟停處。面面起笙歌。

清平樂 花朝

春光一半。風信連番換。陌上香車歌緩緩。客裏有人腸斷。雛晴穉雨時光。驕花寵柳芬芳。蛺蝶眠香已倦。因風飛落輕航。

昭君怨 露筋祠

甃社湖邊風定。繫纜女郎祠近。何處弔吳娃。白蓮花。一夕蘭摧玉折。千載霜清露潔。門外碧波深。鑒貞心。

南歌子 袁浦觀女優

碧玉教歌舞。黃金買豔妝。笑他袍笏學登場。畢竟柳腰蓮步。太輕颺。學士新科第。佳人舊洞房。朝朝比翼作鴛鴦。爲問迷離撲朔。可相妨。

離亭燕 早發王家營



鞍背船唇滋味。都向此間交遞。十載郵亭三駐馬。甘苦自家嘗試。殘月五更頭。舊夢  
新愁縈繫。往日凌雲豪氣。今日倦游情思。轉轂此心真似。迴首  
望南天。一片碧雲無際。

御街行 入都與淮生仲兄夜話

五年京邸重相聚。未握手。猶縈注。夜闌翦燭話行藏。別久翻無頭緒。鄉愁旅恨。游蹤  
宦蹟。事事增悽楚。郊禠科第誇同譜。奈中外。殊遭遇。清高畢竟是詞曹。太息風塵  
艱阻。何時擺脫。坡吟穎和。永聽聯牀雨。

薄倖 出都感懷

栖栖何用。猛過眼。繁華一夢。想劉阮。天台重到。儘有煙雲供奉。爭向來。樓閣全迷。桃  
源閉了秦人洞。歎影誤杯蛇。宮臨磨蝎。一騎長途獨擁。經過了。重重劫。仍未脫。塵  
中羈鞅。等閒思拋卻。堂前舊壘。辛勤多少香泥壅。東君情重。算歸來。燕子飛飛。不離  
連雲棟。秋風起矣。陌上車塵碾動。

卜算子 秋晚抵嘉禾寓館

去日柳依依。來日何憔悴。柳色經秋尙減姿。多少行人淚。愁與路同長。病與愁相倚。若問何時帶病愁。客路三千里。

長相思 江干

子時潮。午時潮。午睡朦朧綺夢交。驚心是曩宵。路迢迢。思迢迢。三折江流經那條。畫船平處搖。

誤佳期 戊午新正風雪連綿久無春意

幾日試燈風起。轉瞬燈宵過矣。望春春久不歸來。古雪封梅蕊。新歲咬春筵。舊客消寒會。灞橋重續去年詩。醉墨含春意。

生查子 感舊

去年渡江時。風月笙歌舫。桃葉共桃根。兩兩江頭漿。今年渡江時。煙雨迷孤港。花落綠陰濃。人去春潮長。

漁家傲 嚴子陵釣臺

江繞青山山繞郡。羊裘去後猶留姓。千載嚴州歸管領。真大隱。功名那羨雲臺盛。人自清高風自峻。客星彷彿中流映。過客維舟爭攬勝。波影淨。塵容俗狀難相近。

水龍吟 舟泊蘭溪

春風十里煙花。珠簾疑到揚州路。鶯鶯燕燕。真真好。歌歌舞舞。畫槳移來。兜娘捧出。綺筵留住。想濃情似酒。歡場如夢。渾忘卻。身羈旅。我是江干倦羽。證禪心。早成泥絮。飄蕭宦況。浮沈身世。淒涼愁緒。青鳥傳言。紫雲度曲。幾番孤負。向鷗邊問訊。沿溪香草。是鍾情處。

陌上花 自江山迴旋有富陽之役一年春事盡付江舟矣

春光去矣。江干絲柳。黯將成絮。短堠長亭。總是慣經行處。昨宵鼓打迴帆調。笑別煙波鷗鷺。爭芳塵未浣。征衫重著。又忽忽去。記前游夢影。桃花淺笑。半面紅妝微妒。轉眼東風已作去年崔護。綠波渺渺天涯遠。腸斷隔江雲樹。問江郎可有生花詞筆。

別蹤留住。

滿庭芳 自富陽迴又有嘉禾之役

東浙題詩。西園餞別。客游如此忽忽。江鄉春老。開過棟花風。算起今年花信。一番信。一處塵蹤。沙隄上。白鷗笑我。纔別又相逢。鴛湖游宦地。當年父老。留戀情濃。記柳邊騎竹。花外扶筇。過眼浮雲一瞥。鴻飛去。爪印都空。重尋夢。扁舟繫處。煙雨望濛濛。

摸魚兒

秀水汪碧。巢先生遺照。其裔孫鐵宋大令。世梅得之西江。畫肆屬爲

補題。依圖中原題韻。

問鴛湖。萬株楊柳。飄零幾歷寒暑。滄桑劫後。雲煙幻。零落扇紈衫紵。誰付與。是往日。昇平選勝。高歌處。雙雙董許。看指落天花。書翻祕笈。含睇各無語。靈呵護。楚失依然歸楚。神光想像。毫楮。南邦黎獻。留題遍。誰更抗聲鐘呂。吟復住。悵畫裏。蕉欄竹徑。難尋取。烽連古戍。問甚日。煙波重攜琴鶴。續訪權歌侶。

一萼紅 題曹梅庵茂才葬花圖

莽無端。把靈根斷送。黃土蓋紅顏。劫轉維摩。玄參天女。因果從古難言。縱說是色空  
空色。爭彩雲。一瞬便成煙。世界花花。因緣草草。幽恨絲絲。觸我天涯愁緒。算風姨  
月姊。香火會聯。鵝水同盟。鴛湖同載。埋玉同落江邊。亡妾沈姬與圖中人爲姻。姬皆  
產平湖而沒。西江料泉下。浣紗舊伴。話鄉情。形影永相憐。可歎韋皋漸老。重侍無緣。  
南浦 陳槐庭大令鍾英以碧草綠波製題各賦一闋余適悼沈姬之亡藉以

書痛

煙水襯平蕪。轉眼來。春光舊媚如許。一色染青袍。句挑起。多少客愁離緒。王孫去也。  
萋萋總是傷心處。長亭遮住。疑化血魂歸。一靈常聚。天涯幾度登樓。念故國關河。  
迷離無路。渺渺逗吟情。何人續。金勒馬嘶佳句。暮雲千里。凝眸猶恐看朱誤。哀思欲  
訴。傷玉瘞香埋。墓門深護。碧草

軟翠泛迢迢。是絕佳。春江設色圖譜。老我臥煙波。沙隄上。常狎睡鷗拳鷺。拖藍染黛。  
無端盪起愁千縷。臨流洄溯。傷一舸難歸。好春虛度。當時送客懷人。慣腸斷西洲。

魂消南浦。逝水促華年。新來恨，更比別情酸楚。桃根渺矣。那堪重喚江頭渡。可憐弱絮。問甚日成萍。隨流飄去。綠波

百字令 題錢芝門太守恩榮詞稿

軍門長揖。羨婁東佳客。翩翩才調。鼓角聲中磨盾急。偏爾深情綿邈。弄影郎中。鬧春學士。一瓣心香裊。吟情何處。春申江上春老。爲憶十載長安。停車載酒。月冷斜街曉。自別紅塵來碧海。另有惜花襟抱。杜牧三生。秋娘一曲。贏得仙雲繞。紅牙低按。醉歌重續新稿。

鳳凰臺上憶吹簫 題許縷寶茂才月下修簫譜圖

丁卯橋邊。宣平宅畔。宮商一片清幽。有小紅低唱。大白狂浮。不管旁人奇妒。消受盡。竹肉風流。推敲久。玉人對面。璧月當頭。堪愁。廣陵散絕。千萬種柔情。也索休休。記酒闌燈炮。雅調親酬。驀地彩雲散也。十年夢。一覺揚州。空回首。秦樓縹緲。舊譜誰修。

雨過天清如洗。風定夜涼似水。秋心一縷上眉頭。怯把闌干倚。棠是斷腸花。豆是相思子。相思也要斷人腸。愁對秋棠麗。

一翦梅

何處思量不可憐。清影娟娟。瘦影翩翩。一甌香茗一爐煙。淡到無言。濃到無言。萬斛閒愁載上船。燈黯離筵。箏咽離弦。酒闌人散奈何天。話又連絲。淚又連絲。

多麗 別西湖五載矣甲子中元節建孟蘭盆會于湖上禮佛雲林寺循岳墳

蘇隄而歸老葑蔽天湖流如線荒涼景況觸目傷心偶憶蛻巖舊詞三復不能自己用原拍韻書感

萬燐青。壓波煙霧冥冥。好湖山、鞠爲茂草。晚鐘咽斷南屏。梵王宮、枯杉啼鴉。精忠院、斷甃棲螢。柳悴隄荒。梅薪鶴瘞。六橋風月恁凋零。更慘絕、千堆白骨。滯魄永難醒。近  
日收買枯骨建萬人塚十座於湖上空攜得一樽濁酒澆上孤亭。憶當年、詩壇酒  
社。名流麴集西冷。七香車、豔招蛟蝶。百花舫、紅引蜻蜓。劫過雲飛。人來夢換。萬家野

哭不堪聽。賸幾箇、湖鄉舊侶。霜鬢各星星。滄桑感、一行淚雨。灑過前汀。

一萼紅 徐頌閣殿撰卹以留香仙館主人小影寄題

古杭州。好鶯花寥落。煙水不勝愁。劫重神傷。形勞吏俗。瓊思瑤想都休。驀一朵、彩雲飛下。認丰姿、重見杜家秋。影裏情悰。塵中物色。紙上靈修。豔說秦娘聲價。住江天海市。占盡風流。潮長瞿塘。人歸叱利。司勳夢醒從頭。借一幅、崔徽圖畫。寄相思、價要百縑酬。畢竟文姬未贖。幻影浮漚。

齊天樂 絡緯用白石蟋蟀韻

歐陽吟罷秋聲賦。中庭寂無人語。乙乙徐抽。申申不斷。豆葉瓜花多處。輕攏薄訴。恰涼月當篝。好風穿杼。徹夜機關。曉來理就甚絲緒。清宵那堪聽雨。更淒淒切切。遙應鄰杵。去日如梭。離情似織。淚點縱橫無數。迴文寄與。道天上星期。又逢牛女。譜入相思。井闌啼最苦。

減字木蘭花



曉鴉啼樹。夢裏無端逢彼怒。皎皎熒熒。明鏡臺前照妾心。  
塵襟擺脫。粗服亂頭甘寂寞。小婢情癡。故故催儂理鬢絲。

蝶戀花

送舊迎新何日了。車馬門前。一片紅塵繞。舊客含顰新客笑。  
教儂新舊難分曉。情極魔生歡是惱。私祝東君。容我回頭早。祝罷又聞鸚鵡報。  
簾衣速下郎君到。

菩薩蠻

曲闌倚遍愁心續。郎心更比闌干曲。寒意襲輕衫。郎心寒不寒。  
秋風吹木葉。葉與林長別。莫漫怨秋風。春花往日紅。

江舟欸乃

摸魚兒 將去杭州偕丁松生大令丙吳仲英司馬恆高呈甫廣文人驥譚仲

修猷沈蒙叔景修兩明經宿靈隱寺話別次日登飛來峯遍訪唐宋題名經  
十里松達棲霞謁岳墳過西泠橋弔蘇小墓泛湖心亭陟孤山放鶴亭小憩

遂循雷峯訪淨慈遺址而歸

好湖山，十年臨眺。襟懷無此閒散。山靈知我身將隱，故放白雲舒卷。途未遠。借佛座蒲團，暫把塵緣遣。燈殘自翦。聽粥鼓齋魚，聲聲入破。僧定鶴來伴。晨鐘動，半日浮生留戀。藤蘿游蹟重踐。煙嵐水黛天然好，惟有劫灰難變。君不見。賸萬點寒鴉，占住斜陽院。峯迴路轉。看野色蒼茫，霜林搖落，似我宦情懶。

齊天樂

行舟將發同人極道西溪菱蘆庵之勝遂棹小舟往游夜載月而歸

勝游都道西湖好。清溪別饒幽致。路曲如環，舟輕似葉，十里蘆花無際。波光淨洗。襯竹翠楓丹，自然明媚。渺渺伊人，溯洄宛在水中沚。名流一觴一詠，碧紗籠好句，游蹟曾寄。庵爲昔賢游憩之所舊奉樊榭老人栗主學士詞章，佛龕燈火，都付頽垣荆杞。我來暮矣。趁酒熟尊香，一舟孤繫。冷月黃昏，盪吟情欲起。

菩薩蠻

蘆涇舟中與蒙叔話別時蒙叔將入都

丈夫不灑臨歧淚。淚珠偏向臨歧墜。有酒不成歡。擎杯強自寬。前程期萬里。萬里

今朝始。莫漫怨今朝。明朝人更遙。

百字令 舟出吳門沈書森太守瑋寶招同潘玉淦廉訪曾瑋錢芝門太守恩

榮宴集桃花塢卽言別

春申江冷。甚鶯花煙月。游蹤都掃。八詠樓前重聚首。落落紅裙烏帽。夢影纔圓。離襟已促。制淚成歡笑。小紅大白。坐中何客傾倒。偏我落拓江湖。蕭蕭瑟瑟。蒲柳驚秋早。十載名場如一夢。心事春婆知道。鼓打迴帆。詩成畫壁。綺障真難了。酒闌惆悵。美人名士俱老。

清平樂 晚泊楓橋訪寒山寺遺址

夕陽明滅。流水聲嗚咽。七里鶯花今歇絕。蘿徑一輪孤月。漁燈紅出橋南。江楓搖落何堪。領取寒山風景。一僧補衲茅庵。

金縷曲 丹陽阻風小集雲藍室卽席留別

風雪天留我。白茫茫、寒江浪捲。幾人飛過。地近蘭陵多美酒。容得酒星一箇。何況有、

鶯嬌花驪。末路英雄閒散甚。除寄情、竹肉愁無那。歌一曲、請君和。歌聲未了愁眉鎖。趁今宵、酒闌燭跋。訴愁猶可。明日明宵當此際。寂寞孤舟獨坐。只滿目、江楓漁火。鴻雪因緣誰料得。莽無端、綺夢縈歸柁。儂去也、淚休墮。

摸魚兒

棠城感舊甲辰北上駐此今二十二年矣

黯神傷、半城灰劫。水光山色如故。龍津橋畔垂楊老。是我舊維舟處。心暗數。記去日元宵、來日剛重午。新腔自度。有碧玉當筵。紫雲按拍。過客暫須駐。風流歇。惟有荆榛滿路。重來游蹟都誤。花天酒地尋常事。太息綺羅塵土。時易暮。問何日東風、綠徧江南樹。閒情記取。聽浪捲黃蘆。淒淒戚戚。彷彿舊歌舞。

水龍吟

大風寒甚舟中閉塞如新婦倚此排悶

淒涼一葉孤舟。客懷已自傷蕭瑟。封姨作勢。飛揚跋扈。欺人寥寂。慣起潮頭。暗牽篷脚。偷來簾隙。笑籠頭破帽。多情戀我。爭禁得寒威襲。猶幸耽吟成癖。壓歸裝、縹緗青碧。愁多須遣。不吟黃九。便吟秦七。調古詞新。狂來悶去。夜燈重剔。聽隔江戍鼓聲。

聲點點。和孤吟客。

浪淘沙 夜舟聽雪

一夜響蕭騷。玉碎珠跳。打篷聲急浪花飄。比似芭蕉窗外雨，分外魂消。孤客太無聊。短鬢空搔。一燈明滅映船梢。今夕杭州應有夢，隔住江潮。

南歌子 自椒城迴里途中墜馬

髀肉英雄感。鹽車壯士悲。老來矍鑠強支持。恰似知章、沈醉眼花時。上苑探春疾。軍門草檄馳。而今蹀躞復何爲。只合灞橋、驢背去尋詩。

一萼紅 舊宅中闌天竹獨存作此賞之

古牆東。見一枝濯濯。搖落不隨風。佛國因緣。山家點綴。園林雪後殷紅。曾經過、畫闌培植。挺孤芳、留待主人翁。豔奪朱櫻。珍逾絳蠟。色亞青松。多少名園別館。歎滄桑過眼。人去梁空。七尺珊瑚。千林錦繡。繁華都付狂烽。最難得、丹成粒粒。耐冰霜、節與此君同。一任蓬蒿沒徑。黃月濛濛。

風入松 里中冒雪開車

天公知我酒懷驕。奇冷逼金貂。行裝不帶苞苴物。霎時間、滿載瓊瑤。衰柳重看絮舞，寒林又見花飄。征車緩緩度溪橋。凍合碾難消。生平飽歷冰霜味，聳吟肩、白戰詩塵。四面山如羣玉，我如遺世佺喬。

羅敷媚

寒閨料峭芳心警。枕是鴛鴦。被是鴛鴦。寶鴨空薰半面香。天涯游子知何處。舟也風霜。車也風霜。手合寒衣引夢長。

疏影 自二壩渡江至蕪湖舟中賞雪

彤雲密結。看玉龍戰罷。紛蛻鱗甲。狡獪天公。何去何來。神通直恁奇絕。江山一片光明界。應滌盡、人間塵劫。便寓言、瑤島瓊樓。何似水天澄澈。有客扁舟獨倚。中流恣眺覽。萬象空闊。畫景詩情。無限愁腸。到此料應消滅。翛然我欲凌風去。盼不到、高寒宮闕。也只合、橫笛孤吟。心蹟自盟江雪。

滿江紅 嶼磯懷古

吳蜀山河到今日。一般焦土。空贏得。危磯孤聳。浪淘千古。白帝幾曾歸御輦。赤烏枉  
自分疆宇。笑仲謀。那便是英雄。豚兒伍。寒潮咽。愁如訴。靈旗颭。神如覩。想寶刀金  
玦。美人英武。玉貌不爭甘后寵。貞魂只共湘妃語。痛千秋。江水各分流。劉郎浦。

誤佳期 江舟晚眺

欸乃一聲風定。歛豔波平似鏡。蒲帆十幅翦江來。界斷寒流影。臨水晚霞明。隔岸  
炊煙暝。新月看看補夕陽。莫悵黃昏近。

浣溪紗 舟泊大孤山

葉葉輕帆捲浪行。江山如畫認分明。小姑送我大姑迎。萬頃洪濤蒸蠡澤。一星幽  
火指湓城。天風鼓盪助吟情。

沁園春 歲暮書懷

老矣吾衰。急景殘年。言愁欲愁。想寒家雞酒。團團白屋。豪家歌舞。跌宕紅樓。天闊雲

低風饕雪虐。落落關河一敝裘。淒涼甚。只青燈照影。伴我孤舟。封侯壯志都休。須及早。安排返故邱。歎十年講舍。詩書糟粕。十年宦海。蹤跡浮漚。瓜子金黃。桃花綬紫。富貴驕人應自羞。吾何羨。要漁樵作伴。猿鳥同游。

東風第一枝 章門新年

彩煥桃符。聲喧竹爆。瞳瞳日射朱戶。蘭閨喜溢。芳朝花市。袂聯姹女。香車扶上看風裏。楊枝如舞。最憐他。血色羅裙。付與九衢塵土。池洗馬。豔名自古。椿繫馬。舊游記取。臨街新繡春燈。隔江罷聞戰鼓。韶華恰好。偏十日。九逢風雨。倚綠窗。輕按紅牙。補入竹枝詞譜。

憶故人 題李芝巖觀察祥麟遺照

如此丰神。佛心仙骨。文章伯。天教領郡浙西東。山水吟情愜。過眼煙雲一瞥。更懶學。北平射獵。花間補讀。松下清齋。茗香泉冽。宦海茫茫。惟公與我盟冰雪。三年蹤跡。又西州。惆悵人琴歇。一瓣心香私爇。好燈宵。風酸雨咽。機鞋桐帽。老帶莊襟。遺徽如



接。

洞仙歌

積雨新晴。泥融徑軟。衆綠褪甲羣芳孕。胎盎然春意。

春來何處。在晴初雨後。芳訊先教逗梅柳。喜冰霜、歷盡大地繁華。原不合、老向客窗  
斷守。輕衫猶未試。纔著陽和。尙有餘寒襲襟袖。此是好韶光。比似佳人。恰十五、盈  
盈時候。再過一番風便花朝。問開遍羣芳。殿春誰又。

蝶戀花

蝴蝶風箏

金粉描成增綽約。夢裏莊生。已遂逍遙樂。不學秦宮花裏活。迴翔暫共雲霄鶴。一  
縷香魂箋樣薄。也自雙飛。也自雙雙落。深院有人方笑謔。輕輕搭上鞦韆索。

虞美人

美人風箏

紅閨翠閣春深矣。飄泊今如此。休將飄泊怨封姨。只是淺深眉樣未相宜。筠裁紙  
翦真兒戲。小小芳魂寄。雲中遙見許飛瓊。羊角風微無力達瑤京。

薄倖

追悼沈姬

煙波江上。舊會共、桃根打槳。記王粲、客游無緒，累爾伶仃相向。爭蘭橈、雙載人來，經年不載人同往。歎逝水無情，罡風太惡，人與落花並葬。生就了，聰明性，應悟徹，塵因俗障。夢中傳幽怨，聲聲訴出，夜臺多少淒涼況。余至西江沈姬頻頻見夢音容，慘淡若有所苦，啓攢果見蟻穴，因爲改斂載歸一靈無恙。趁歸舟，安穩玉簫，重侍章皋帳。吟成楚些，付與秋墳鬼唱。

水龍吟 奉仲兄靈輻登舟樟姪姪婦郭亡妾沈附載仿竹山效稼軒體招魂  
魂兮毋滯章江些。招兮返吾鄉些。觥觥星使，駢鸞駕鶴，雲中翔些。玉樹庭階，翩翩秀異，冠諸郎些。作家兮中婦，娥娥皎皎，蘭閨歇，流黃些。小星黯無光些。問芳齡，二九剛些。東風狼藉，啼紅泣翠，摧肝腸些。春水方生，衆靈雜遝，神旗颺些。揚舲兮擊楫，幽明共載，毋相妨些。

南浦 次李肇卿司馬韻留別

鴻雪偶然留，證前因，搏沙爭可常聚。琴劍一身輕，飄然去，長揖舊時鷓鴣。萬緣是幻。

泥人只有情難訴。酒懷詩趣。除付與歌樓小紅低譜。年來放浪煙波。慣託興蘭皋。舉  
寒芳蘅浦。吟草滿江湖。傷心事。多在灞橋煙雨。春風楊柳。旗亭又到消魂處。停撓小  
住。聽笛裏陽關。涕零無語。

祝英臺近

喜春來。愁客去。畫舫繫南浦。射覆藏鉤。忍淚強歡聚。泥他指上鷓鴣弦。離情不管。慣彈  
到。最消魂處。暗凝注。似曾相識人來。重彈又重訴。過眼烟花。慘惻曲中語。可憐暮  
雨瀟瀟。吳娘憔悴。爭怪我。鬢絲如許。

西江月 早發章門

離緒未醒宿酒。吟情重倚孤篷。頻年浪跡仗東風。五兩竿頭微動。來日冰凝霰結。  
去時柳媚花濃。繁華冷淡任天公。安穩春江一夢。

南鄉子 過彭蠡湖風和日暖一波不興迴憶去冬阻雪時光景頓異

風靜浪花平。柔櫓呀啞蕩客情。湖外青山湖裏樹。分明。貪看春光不計程。 潏汨舊

心驚。雪壓孤篷夢未成。轉眼寒暄誰作主。難憑。白舫青簾自在行。

金縷曲 舟過彭澤

陶令辭官地。想當年、風塵溷跡。本非初計。千駟萬鍾都弗屑。何況區區斗米。便從此、先生歸矣。人是羲皇時魏晉。除黃花、以外無知己。千載下、懦夫起。折腰我也知無謂。歎年來、曳裾奔走。俗塵難洗。宦海浮沈原有岸。覩得虛名敝屣。買一葉、扁舟來此。咫尺柴桑閒弔古。悵茫茫、一片蠡湖水。停征棹、薦芳芷。

浣溪紗 舟泊東流

一幅雲藍一葉舟。隔江山色鏡中收。夕陽芳草滿汀洲。客裏鶯花繁似錦。春來情思膩於油。蘭橈扶夢駐東流。

一萼紅 題朱久香學使花間補讀圖

太匆匆。悔十年讀律。萬軸付塵封。鶴筵人歸。雲扶夢住。杜門春掃殘紅。喜奎壁、星明故國。十三州、脫劍盡歌風。一代名臣。千秋絕學。都在書叢。猶記鴛湖作宰。看諸生

袞袞門慶登龍。余宰嘉興公主講鴛湖書院。桃李陰成。娜環祕洩。文光十丈騰虹。最珍重、縹緗世業。展生綃、依舊古香濃。應笑魯論半部。學究冬烘。

水調歌頭

皖江阻雨日與朱久香學使蘭何小宋方伯環吳竹莊廉訪坤修

詩筒往來自題酬唱詩後

繫纜不能發。釀酒酌春江。江間波浪千尺。留客角詞場。不向公卿屈膝。翻向公卿鬪捷。老我十分狂。一醉弄柔翰。贏得小奚忙。爭遲速。分殿最。共平章。堂堂大將旗鼓。誰屑倒戈降。篷背雨聲淅瀝。恰與吟聲相答。長嘯水雲鄉。敝帚自珍惜。佳話記歸艤。

離亭燕

伯兄前數日過皖不及把晤聞逕赴杭州矣

苜蓿一盤瀟灑。投筆先生歸也。老至郵亭逢骨肉。世上金縉無價。極目皖公山。只見暮雲如畫。滾滾大江東下。渺渺片帆高挂。君去我來無十日。慳此水天清話。有約在西湖。記取一樽重把。

訴衷情

鄰舟簫聲

簫聲幽咽出鄰舟。彷彿憶揚州。多應離緒難遣。故付與、別人愁。江月上。浦雲收。夜悠悠。我歌誰和。心在吳天。夢落秦樓。

天仙子 阻風江村小步

江外風波江裏靜。插筍牙檣江岸並。晝長人倦不勝愁。酒夢醒。詩情引。短檣扶過芳草徑。綠柳陰疏帆閣影。紅杏烟籠鶯喚暝。村姑十五背人嬉。波作鏡。釵橫鬢。私共野薔花鬪靚。

相見歡

無端挑逗春光。是垂楊。鎮日絲絲縷縷。搭紅牆。睡未足。愁相續。恨春長。寶鴨爐中香燼。又添香。

木蘭花慢

問春風來處。可經過。幾重山。慣偷揭珠簾。輕將離緒。逗入眉彎。機中製成錦字。更無人。重到玉門關。架上鸚哥自語。梁間燕子知還。經年漸減芳顏。愁不斷。淚空漣。想

東君恩重料非薄。倖只是緣慳。妝臺懶勻膏澤。盼書來、重整舊雲鬢。難得知心小婢，背人私祝刀環。

晝夜樂 和屯田韻

當年邂逅南樓遇。得幾日、團團聚。可憐一晌歡悰。爭敵經年離緒。怨柳啼花朝復暮。又捲起畫橋晴絮。妒煞木蘭舟。只搖將人去。春情合向春皇訴。記前盟、忍孤負。算來芳草天涯。甚地不留客住。一縷香魂風颺起。待颺到、畫船停處。不怕別離多。怕華年虛度。

謁金門

春乍到。先被林鶯知道。百轉聲中天漸曉。喜爭靈鵲報。夢裏不知夢好。醒後卻嫌醒早。門外落花呼婢掃。怕看春色老。

八聲甘州 荒江晚泊四無人烟春風侵人客況可想

怪東風、不喜放晴光。朝朝釀春陰。把春人滋味。釀成酸苦。都似秋心。百五韶華有限。

歸棹閣江濤。浪齧船唇急。遠夢沈沈。似有夕陽鐘動。在臨江古戍。隔浦遙岑。漸荒烟弄暝。燐火出深林。最淒絕。箇時情況。只孤燈。伴我裏頭吟。征人淚。借伊涼調。彈上瑤琴。

鷓鴣天 江中望九華山

不爲看山不挂冠。布帆無恙度雲關。匡廬九疊都看遍。九子重看畫裏山。天澹澹。水漫漫。隔江嵐翠襲衣寒。輕舟不住梅根浦。愛向中流數髻鬟。

江神子 繁昌蕪湖道中山景明媚目不給賞

大江影裏洗螺鬟。度雲關。愛烟巒。今夕維舟。只在夕陽灣。醉飲謫仙樓上酒。邀李白。訪青山。濃皴淡抹有無間。路彎彎。水潺潺。柔櫓聲中。看過又重看。一幅將軍金碧畫。人不住。惜緣慳。

一叢花

春閨寂寞掩莓苔。次第報花開。折花簪鬢都無緒。倩侍兒。扶上香階。鏡裏朱顏。壺中



紅淚。心事自家猜。忍將脂粉付塵埃。無語對良媒。釵盟鈿約今何在。蹙雙蛾。慵倚妝臺。待踏楊花。夢魂拘束。怕過謝橋來。夢魂慣得無拘檢。又踏楊花。過謝橋。小山名句似嫌過蕩。故反其意。

金縷曲 采石磯

采石江邊路。截中流。危磯孤聳。大江門戶。多少英雄成敗事。分付江潮記取。曾聽慣。連江鞞鼓。千載戰功垂赫赫。常開平。遠軼韓擒虎。吞建業。壓牛渚。十年羣盜紛如鼠。諸葛君。是真名士。手揮白羽。斥埃至今烽火息。依舊青山綠樹。供過客。登臨懷古。埋骨詩人同不朽。恰長江。墳傍青蓮墓。尋往蹟。幾傾慕。

水調歌頭 二月十五夜大江看月

獨飲不成醉。橫槩望江天。吟魂飛落天外。無語對嬋娟。萬里山河寂靜。淒絕嫦娥孤影。偏喜十分圓。鶴唳不知處。縹緲入雲烟。人渺渺。春寂寂。夜緜緜。長空如此寥闊。一客倚孤船。過眼風光誰賞。回首錢塘江上。鐵笛會羣仙。今夕復何夕。香霧襲衣寒。

臺城路 十六夜無月泊荒港中淒涼特甚遙指金陵不遠扣舷歌此

廿年不到江南岸。荒溪者般寥落。月黑鴉鳴。雲陰鬼哭。古寺鐘聲遙閣。客懷恁惡。又惻惻風酸。暗生林薄。縱不工愁。箇時也自感離索。依稀一星幽火。石頭城下路。尋夢如昨。白社狂名。紅樓綺習。畫舫秦淮宵泊。驚天鼓角。歎六代鶯花。幻成風鶴。訴盡淒涼。一聲聲巷柝。

百字令 黃天蕩用東坡赤壁韻

長江千里。到黃天蕩口。別開風物。水立雲垂。天異色。返照江翻石壁。大將樓船。美人桴鼓。千載濤驅雪。中流憑弔。古今有數人傑。記我小住西湖。荒墳拜岳。歸棹遲遲。發末路英雄。驢背穩。多少壯懷消滅。獄底埋冤。亭邊挹翠。生死爭毫髮。臨江釀酒。江心湧起明月。

瑣窗寒 寒食

粥白餠香。芹肥韭嫩。客中清奉。可憐時節。裊裊輕烟颺動。作春寒。東風未休。敝裘一

襲多情擁。笑頻年宦況。朝朝如此。不離螿蟻。誰共吟肩聳。正百五韶光。林禽爭哢。閒身冷食。也是東皇恩寵。最傷心。芳辰易過。紙錢麥飯。虛故壠。待歸來。約取鄰翁。薄醉尋春夢。

雙雙燕 和梅溪韻

星移物換。盼昔游門巷。社前春冷。空梁泥落。何處倚樓人並。又是桃開露井。問舊主。萍蹤未定。可憐遍地蓬蒿。孤負蹁躚雙影。幽徑沾衣雨潤。想子弟風流。灑然清俊。穿花掠水。容易夕陽烟暝。好把香巢寄穩。莫負了。今年風信。有人海國相思。妝罷畫闌自凭。

風入松 舟中讀汲古閣刻宋詞

風騷遺響在詞場。蘭蕙採幽芳。青衫紅袖才人淚。一聲聲。費盡柔腸。多少英雄兒女。話來情短情長。酒旗影裏又斜陽。何處譜宮商。瓜皮艇子春愁重。倚孤篷。閒爇心香。有井能歌豔曲。無波未減清狂。

換巢鸞鳳

林下風流。謝鉛華弗御。淡掃眉修。薰香欹被角。拜月挂簾鉤。風扶花片上紅樓。彩鸞不來。雲天寄愁。春老矣。又消得、隔年人瘦。 憊憊閒恨逗。密緒癡情。往事空回首。夢穩鴉驚。媒良鳩妒。此錯前生鑄就。新製齊紈扇。盈盈障塵生。怕纖埃受。冰雪心。倚妝臺。一鏡孤守。

滿庭芳 和東坡韻二首

歸去來兮。朝衫脫卻。那須帶闕冠峨。塵中羈絆。輾轉誤人多。爭似幕天席地。何處好。何處高歌。歌成了。自酬自唱。私淑老東坡。 如何還豔羨。山中起蟄。澤畔飛梭。任風驅浪捲。井自無波。問我他年經濟。關心在、園卉庭柯。逍遙樂。閒中布置。未雨翦青葢。 歸去來兮。人皆逐逐。那堪我獨峨峨。囊中鶴俸。支領本無多。還穀今朝買酒。拍銅斗。慷慨悲歌。漁樵友。相將把臂。同住白雲坡。 誰何偏愛道。功高虎幄。才豔龍梭。歎駒無留隙。水不停波。任爾文經武緯。收場事。一夢南柯。歸來好。滄江醉臥。不脫釣魚蓑。

唐多令 夜泊龍津橋

殘月挂林梢。微風漾畫橈。打空城、寂寞春潮。千里懷人空有夢，飛不過、赤欄橋。何處教吹簫。江天入望遙。一聲聲、戍鼓輕敲。酒醒方知身是客，燈影暗、篆烟消。

長相思 夜泊陳家淺

江水深。湖水深。行盡江湖返故林。江湖鑒此心。夜沈沈。月沈沈。猿嘯鴉鳴度遠岑。人家烟外尋。

南鄉子 故鄉小住日與村農閒話殊有古風

絮語半桑麻。小立畦邊日又斜。問我朝衫何事脫，無他。愛住鄉園學種瓜。今歲好春花。雨足郊原臥水車。可惜荒田畊不了，堪嗟。牛價昂於白鼻騮。

西子妝 憶西湖

羅綺成塵。鶯花過眼。西子可憐憔悴。美人劫後也心寒。倩春山、另描眉翠。芳魂漸起。似月下、歸來環珮。到如今、想濃妝淡抹，依然佳麗。句留地。往日游蹤，遙指烟中寺。

白蘇隄上柳枝多。倚東風。爲誰凝睇。蹇修去矣。歎春夢。半歸流水。問山靈。別後相思知未。

水龍吟 楊花和東坡韻

可憐一片春痕。紛紛都似天花墜。飄茵墮溷。自家不管。管人離思。倦眼愁看。閒情怕惹。枇杷門閉。是箇儂小影。要留他住。又依舊。三眠起。庭院悄悄。晝靜。悄無人。榆錢青綴。也曾經過。繁華世界。教誰揉碎。蕩子寒盟。美人訴怨。有如春水。便浮萍化出。今生已過。釀來生淚。

掃花游 送春和夢窗韻

者番話別。便拂袖塵寰。獨歸烟島。夙因未了。賸青袍色黯。誤尋芳草。萬綠如雲。可惜花魂瘦小。徑幽窈。只流鶯惜春。長祝春好。愁緒借酒掃。又酒病惺忪。泥人昏曉。烟波泛棹。問留春可比。探春人少。閱盡繁華。落得蹇驢破帽。夕陽照。掩重門。故人不到。

減字木蘭花 重泊瓜步

江光山色。望裏遙天青一抹。終古寒潮。流到揚州廿四橋。一帆輕落。流水聲中鄉夢閣。黯黯離宮。劫後花開寂寞紅。

臺城路

張芝浦太史端卿招集妙相庵賞芍藥兼爲馬雨農學使同年恩溥

餞別

鍾山樹禿臺城圯。南朝更無遺寺。渺矣吳宮。歸然魯殿。一角樓臺孤峙。閣黎舊址。看古佛低眉。似含鉛淚。漫感興亡。放懷且作習池醉。龍華幾逢勝會。眼前冠蓋集。佳興何似。易老鶯花。難聯香火。薄暖輕寒天氣。繁華逝水。喜梵宇春長。尙留婪尾。只恐將離。促人愁緒起。

風入松

弔秦淮

板橋風景豔當年。花月鬪嬋娟。畫船省識青溪路。慣停橈。丁字簾前。十里香塵不斷。而今付與頽垣。鶯啼蝶怨晚芳天。何處拾遺鈿。楊花飄蕩渾無主。一團團。亂撲溪烟。應有白頭詞客。舊愁彈上新弦。

南歌子 舟泊崑山訪玉山草堂遺址

繫纜招清籟。披襟坐夕陽。菱歌嫋嫋出漁莊。猶認西園明月、夜飛觴。烟冷藍田寂。雲陰草閣涼。豪華如夢水茫茫。無復芙蓉楊柳、滿秋江。

望海潮 舟泊黃浦

浪擁江聲。雲浮海氣。奔流直下吳淞。巨壑騰蛟。危樓結蜃。遙天萬里空濛。歎薄起魚龍。念蒼茫身世。寄與艤艫。濁酒孤斟。銅弦高唱大江東。八蠻重譯來同。算漢家長策。只是和戎。水驛馳輪。樓船激箭。海門百道能通。落日大旗紅。歎藩籬久撤。誰靖邊烽。聊把黃金。買醉歌舞向西風。

青衫溼 申江感舊

申江水漲胭脂膩。春在箇農家。瓊枝璧月。朝朝暮暮。占盡繁華。彩雲一散。珠簾放燕。青粉棲鴉。夢中錦瑟。懷中錦字。都是虛花。

解佩令



婷婷嫋嫋。遮遮掩掩。想雲翹。更比雲英怯。心有靈犀。嗔小婢。春光偷洩。倚妝樓。自攏  
雛髮。學鈔吟稿。愛繡院本。引箜篌。欲彈還歇。生小工愁。怕孤負。可憐時節。鬪丰姿。  
一鉤新月。

青玉案

流鶯百轉留春住。忍目送、東君去。心字香燒須記取。織成羅帕。繡成金縷。總是絨情  
處。桃粗李俗羞爲伍。傲骨真堪冠儕侶。輕薄男兒今幾許。紅綃易盡。玉顏難駐。私  
把年華數。

漁家傲 月夜泊五庫

薛澱湖邊新雨霽。庫公山下孤帆繫。月到天心天亦喜。風不起。白蓮香靜鴛鴦睡。  
浦樹江雲離緒寄。鶯花過眼如流水。自譜新詞傳綺思。誰共倚。松陵路盡波無際。

南鄉子 六月十八夜呈甫仲修邀至湖上納涼

水閣映殘霞。簫鼓迎神笑語譁。破碎湖山重點綴。繁華。燈火宵明賣酒家。薄醉話

周遮。清露無聲溼臂紗。隄柳暗籠殘月影。橫斜。自棹輕舟宿藕花。

水龍吟 殘暑初退涼月滿庭露咽蟲嘶秋心碎矣

秋人直凭無聊。玉階踏碎涼蟾影。愁腸百結。醉中難遣。又逢酒醒。月在青天。風來畫閣。露生金井。聽蛩吟鶴唳。總關秋思。叵耐得。相如病。容易名場夢冷。紀前因。雪泥空證。元龍豪氣。香山宦蹟。樊川游興。湖海逢迎。鶯花侍從。半生僥倖。想斯人位置。悠悠青史。待何人定。

浣溪紗 十年前譜江山船曲八闋錢塘富春間十七八女郎爭引笙篴傳唱

今秋重至江干霧鬢風鬢都非疇昔亦無能翻舊曲者酒酣耳熱情思黯然  
偶誦舊曲誇客客曰對新人誦舊曲江郎才盡耶遂卽席重倚八闋命曰後

江山船曲

鞞鼓聲闌又管弦。江干無浪復無煙。佳人錦瑟訴華年。小婦苗條中婦豔。新愁掩抑舊愁牽。襲人風露冷娟娟。

劉阮重來往蹟荒。桃花流水兩茫茫。雙飛不是舊鴛鴦。  
髮駕船娘。夕陽影裏話滄桑。

黯黯青衫題曲客。蕭蕭白

青雀黃龍戰艦分。而今花月也翻新。金戈鐵甲倚紅裙。  
見党將軍。淺斟低唱大江濱。

瀟灑更無陶學士。豪華重

聽水聽風伴寂寥。郵亭官妓仿前朝。因緣只在木蘭橈。  
結鳳凰巢。夜深私授鬱輪袍。

綠樹暗藏鸚鵡語。碧梧新

三折江流曲又灣。美人生長碧波間。閒愁歷劫不曾刪。  
對玉皇山。珠簾半捲理雲鬟。

郎意恰如之字水。儂心長

輕撥檀槽發曼聲。啼眉慵髻不勝情。芳名新換囀春鶯。  
掛漲痕平。晚涼獨自倚紅亭。

團扇暗遮人影瘦。輕帆低

勝日賓僚愛泛舟。玉簫金管恣遨遊。翩翩裙屐儘風流。  
扇當纏頭。神傷只是白江州。

醉脫金貂償酒債。狂題歌

老向花叢自懺癡。西風吹鬢暗成絲。十年影事幾人知。  
新婦磯頭空悵望。女兒浦口寄相思。不堪重寫衍波詞。

清平樂

癡情懺悔。私把脂痕洗。秋冷花枝扶不起。月上迴欄第幾。  
清宵未覺更長。挑燈淪茗焚香。半臂輕棉添著。隔簾似有微霜。

白石

筆影

畫



詞

端木埰（嘉慶二一——光緒一三）

字子疇。江蘇江寧人。優貢生。以薦除內閣中書。尋充  
會典館總纂。升侍讀。工書。善詩詞。性甘冷僻。布衣蔬  
食。惡權貴人。意所不愜。必面斥之。遺著散落。王鵬運  
甚稱其詞。刻入薇省同聲集中。

自敘

僕詞不足刻也。且不可刻。道光戊申。江寧水災。偉君金先生居采蘩橋。水汨其半扉。移居天禧寺之聽松閣。去僕家數武。朝夕請業。楊君樸庵許君仲常錢君漸之僧花雨及家兄西園猶子錫嘏常侍側。閱先生窮愁謀所以慰安之。適先生填秋影秋聲兩詞。仲常首屬和。謂予曰。先生境困極。又一無所好。盍羣和焉。聯爲詞社。稍釋老人牢愁。衆以爲然。先生亦不忍拂羣意。遂就所作。名曰聽松詞社。自秋徂冬。各得詞百首餘。僕雖從事於斯。茫然不知詞爲何物。先生爲約略指示。且告以先君子篤耨者爲此。閒與倡和。吟成亟毀之。家亦無片紙存稿。於古人酷好白石。以未見全集爲憾。且極嚴詞曲兩戒之辨。每謂今人所作皆曲也。非詞也。惴焉懼辱家訓。亟敏先生以詞曲所以異。先生曰。其精微處。予亦心知之。而口不能言。子但多讀宋詞。嚴奉萬譜。以端其趨。可矣。家有知不足齋叢書。乃悉取碧山草窗蛻巖君衡諸公集。熟讀之。一日。仲常樸庵論詞。僕僂言曰。古人明於音律。故所爲不稍苟。亦有自製曲調者。今人既不知樂。當師古人意而慎守之。未可求自便。陽奉而陰違也。語聞於先生。頗踴之。

明年入都。同里蔡小石先生。何青士農部。交游最密。亦多倡和。既遭亂。棲秀州。藏書盡失。偶以青蚨三百。得詞律佳本。遂日事吟弄。從此因緣涉獵。或作或輟。甲申以後。與彭瑟軒太守多同日值。今比部許君鶴巢閣讀王君幼霞亦皆擅倚聲。賡和益多。幼霞尤痴耆拙詞。見卽懷之。戊子。瑟軒出守南寧。諄屬同人無棄此樂。寄書多附以近作。且寄清俸。屬哀刻。幼霞方有刊宋詞之役。遽取所弄。悉梓之。亟尼之。已無及。從此播惡叢垢。不可名言矣。初侍金先生。首熟碧山齊天樂一闋。吟諷既熟。作輒倚之。於諸名家。又篤耆碧山。諸君詞皆有名。遂僭以碧澗自張其編。露氣之下。被者爲澗。以是爲碧山之唾餘可也。爲中仙之藥轉可也。若以爲花外嗣音。則不敢也。光緒庚寅冬。江寧端木埰自志。

跋

光緒庚寅秋日。彭瑟軒前輩郵寄薇省同聲集。屬付梓人。並以年丈子疇先生詞。甄采無多。屬加摭輯。因取篋中所藏。悉爲編入。先生不欲以文人自見。矧在倚聲。而此集又其倚聲之百一。讀者以爲醴泉一勺可也。臨桂王鵬運識。



碧澹詞

江寧端木埰子晴

疏影 和幼霞

虛窗翠撲。正遠風薦爽。雲退空谷。浣卻塵襟。相對忘言。清暉恣飲涼綠。斜陽澹入西山色。似朵朵。夫容青簇。倚畫闌。把酒臨風。待祓旅愁千斛。迴憶平生壯志。素心共訴與。無限根觸。一樣蒹葭。何處伊人。秋聲漸滿林麓。尊前幾許纏綿意。鎮寫入。新詞珠玉。祇自慚。才盡江郎。怎和引商高曲。

水調歌頭 辛巳中秋即事

三五月明夜。秋色最清時。卻教人意惆悵。向夕雨如絲。漫說浮雲深處。安得浮雲捲去。千里共清暉。有酒鎮慵把。空對暝煙低。到深夜。瑩鏡彩。透書幃。問天何故。今夕偏令月來遲。應厭人間弦筦。特藉氛昏遮滿。鎮與俗相違。直待萬緣寂。來慰素心期。大江東去。烈婦尤氏。奉天民家女。夫狡而貪。迫以倚門投井。全節幼霞閣讀。

屬同人共賦

傷哉貧也。教人世，多少須眉無色。留得乾坤清氣在，輸與茅檐弱息。玉琢心堅，金將膽鑄，豈受凡情迫。寒泉深處，定知含笑相卽。從此身作完人，心無遺憾，也終全清白。幾輩峨眉冠方講學，都被金夫沈溺。荆布家風，蓬蒿生長，那藉詩書力。管彤焜燿，遠哉豐鎬遺澤。

揚州慢 懷平山堂舊游

虛檻延薰，曲闌縈翠，往年勝地曾經。俯平臺綠繞，正灌木交榮。有無數、家山入畫，過江相送，排闥青青。敞珠櫳嵐翠，飛來渾不勝情。故鄉離久，悵如今、都冷漚盟。慨斷梗飄萍，天涯荏苒，雙鬢添星。且喜同來穉子，弦歌處，秀挹階庭。念何時歸去，青山重聽書聲。

長亭怨慢 傷故交也

痛銷盡，當時吟侶。五十年間，不堪洄溯。許遠忠忱，曼卿風義，見肝腑。佚才同甫，同患

難披誠慤。把酒仲文賢。更贏得。超然天趣。北去。盡風流雲散。喜挹夏侯襟度。師資  
鮑叔。更薺苕。南豐遇。到此日。淚灑西州。愴都向。瓊樓歸去。算別有新知。思舊彌深。悽  
楚。

石湖仙 讀曾文正師家書敬跋

擎天鼇柱。是崧嶽降神。匡我皇路。須識我熙朝。盡深仁。滋培布濩。天心歆眷。俾首倡。  
楚湘才武。艱苦看拊循。瘁盡譙羽。家書彌益質實。是家庭。諄誠告語。制勝根原。還  
在精勤忠恕。百戰勳名。百城疆圉。後人看取。曾說與。精兵那藉西旅。師不喜洋槍。致  
沉圖爵帥。書有云。眞美人不爭珠翠。眞書家不甚爭筆墨。眞能戰。又豈在多洋槍。恐  
亂我湘軍。樸實本色。

暗香 春深之後新綠驟長野。塍籬落間作種種。香氣非草非華。歷夏徂秋。芬  
馥未已。用暗香調寫之。

翠陰如沐。趁檜籬數轉。芳塍環曲。種種妙香。不辨蘅蕪與熏陸。清味才通鼻觀。渾疑

入諸天香國。又恰似遠水深山。蘭意澹空谷。芬郁。傍翠麓。恰豔掃晚華。粉膩新竹。露溥雲綠。襟袖過時染清馥。還勝春風絢爛。偏媚此閒中。幽獨。待采采歸去也。不盈一掬。

疏影 夏夜深坐涼月滿階林影在地用疏影調寫之

中庭地白。愛翠陰悄悄。如伴淒寂。靜裏相看。疑有松香。天風吹墮瑤席。清暉荏苒將人近。鎮寫出、秋心無迹。笑畫堂、酒綠燈紅。辜負天街涼色。還記絺衣掛處。半林白露下。光浸蘿薜。俯拾何緣。仰睇凌虛。纖雲浣盡空碧。無端隱約翻鴉點。又落葉、漸添蕭槭。定有人、起賦秋聲。響答暗蛩苔隙。

惜紅衣 和瑟軒卽代答柬

樹冷斜陽。階旋隕籜。最憐秋色。造訪良朋。新知待奇析。壚頭貰酒。更邂逅高陽詞客。將夕。還迂老彭。學旗亭畫壁。新尊與絜。舊譜重繙。清歌韻金石。周姜既往。古樂渺難識。待燭瓣香同拜。欲擬令辰重擇。念故鄉秋潦。愁煞集鴻中澤。瑟軒欲就。暖辰祀

白石老仙非白石誕辰也事緣僕起誼不敢當且時方聞河圯鄭州淮左數郡尙無  
確耗岌岌有波及之憂敝鄉雖在江外然切鄰猶一家也故肯以爲辭

徵招 秋山

商森一夜千林掃。廬山早呈真面。悴綠帶斜陽。恁蒼涼平遠。莫霞天外捲。但留得、夕  
煙村畔。數點歸鴉。一行新雁。碧天晴晚。堪羨野人家。幽巖際。荆扉悄。扇雙扇。爲問  
入山蹊。繞籬根一綫。菊花開欲遍。好吩咐。白衣如願。酒盞送。趁取悠然。共翠嵐齊見。

秋宵吟 本意

雨初收。日向晚。漸喜浮雲都捲。垂楊外。看一碧澄澄。莫天青遠。露將濃。月未滿。靜裏  
新蛩吟緩。簾痕漾。正爽逐風生。嫩涼秋淺。乍近書燈。趁此夕。芸編自展。破除塵慮。  
漑洗閒愁。至樂在墳典。薇露香新浣。一室蕭然。千古到眼。澹無言。領取清芬。忘卻更  
纒過四轉。

淒涼犯 鬼語

漆燈暈綠。悲聲起，幽宮一味淒寂。夜臺睡穩，何緣更露，塵中聲迹。泉扃悄聞。想也念，人間故戚。鎮伶俜，驚風怯影，霜葉共蕭槭。淒絕荒墳畔，月澹棠梨，雨昏松櫪。翠樓書閣，賸如今，土華凝碧。待訪天親，又朝市、滄桑幾歷。悄嗚咽，泣繞斷梗，伴夜蟀。

翠樓吟

賦龍樹院看山樓

綠飲春疇。紅酣晚日，簾衣盡捲高處。金城千丈拓，喜朝爽，全消氛霧。清尊芳醕，對樹碧無塵。山青當戶，千觴舉。好風吹入，嫩涼添許。幾度相伴詞仙，有儁才鴻筆，倚闌容與。秋來應更好，又千頃，寒蘆飛絮。西山環護。送天末歸鴻，霞邊孤鶩。斜陽莫更勞明月，照人歸路。

湘月

白石創此名，因湘江泛月實，卽念奴嬌也。採十三歲時從韓介孫師讀

因講湘靈鼓瑟詩，告以英皇事，心敬而悲之。是年冬仲月明如晝，夢至一處

水天一碧，明月千里，有神女風裳水佩，踏波而行。厥後此景時在心目，童叟

無知亦不解，所以故但覺馨絜之氣，可以上通三靈，下卻百邪，迨弱冠讀楚

詞見湘君諸篇愈益嚮往五十年矣茲心不易今老矣愧未能以其芳馨之性發而爲事功有所裨於世茲和白石湘月詞適與之合遂緬述之

水天澄碧見風裳霧帔飛步清景爲想神娥游歷處渺渺湖光如鏡淚灑斑筠聲傳拊瑟月照江波冷兒時嚮往夢魂欲訪仙境茲後誦法靈均澧蘭沅芷對遺編生敬老去何裨空贏得皎皎茲心清淨但值涼宵青天皓月便欲前身證何時真箇聽來搏拊新詠

一萼紅 乙酉人日幼霞閣讀招作清游徧歷城西南諸刹晚更招鶴巢共飲同人相約和石帚調先是甲申人日君尙留滯大梁會填此調奉懷歲星既周舊雨重聚撫今思昔快與感俱仍填此志喜卽呈兩君政和

憶年時對金盤簇燕良久隔天涯燕樹淒迷嵩雲迢遞緘札空寫相思那曾料今年春好把吟袂剛及看梅期佛火青邊夕陽紅際攜手同歸歸去更勞投轄又吟朋遠近芳酒同持新月當階華燈欲試堪慰昨歲傷離便堪傲幽吟杜老望西蜀空寄

草堂詩。快對尊前劇談。忘卻歸遲。

洞仙歌 和瑟軒水仙

湘皋翠冷。正靈妃歸去。遺下金釵照芳渚。抱仙根，恰又多謝華神。親種出、一種珠明玉嫋。盈盈涔浦外。羅襪凌波。堪與棗華共寒素。生性厭繁華。白石清泉。剛留得、僊人同住。更問取、春風幾時來。但冷月荒煙。悄然無語。

醉翁操 東坡此詞純乎天籟幼安一斲罕聞嗣音瑟老忽填此見示披吟累

日病榻支離。荒燈拂曙。萬籟瀟寂。殘月半天。率意倚聲。不知涕泗之交集也。於今。升沈天心。久難謎。須暗幽人靜中。澄虛襟。看它風雨蕭森。煙滿林。世態恁巖嶽。一任紛錯商與參。素心寄處。三尺鳴琴。素心快處。明月空山翠陰。山蒼蒼兮千尋。月娟娟兮宵深。幽蘭香被岑。茲焉爲知音。此外渺難禁。豁然長嘯鸞鶴吟。

金縷曲 洪雲軒屬題垂釣圖

獨對平江靜。藉一竿、苔磯坐隱。綠楊幽境。豈爲臨淵興羨久。憑把翠綸閒整。祇自寫、



濠梁逸性。領取春風。它日事。拂珊瑚。直上金鼇頂。爭便許。老煙艇。生平也。託漁樵。興。還念取。博桑碧處。滄溟萬頃。龍伯而今憑怒少。都說海天澄鏡。又爭奈。吞舟還勁。安得磻溪人再起。翦長鯨。頓使寰瀛淨。天下樂。爲君慶。

掃華游 和碧山詠綠陰二首

曉煙翠冪。悵幾日春歸。賸紅如掃。斷垣半繞。愛新筠膩粉。長成清篠。我道青青。卻比花時更好。翻用元句鎮幽悄。看滿徑碧雲。惟聽啼鳥。春院深閉了。早謝卻車塵。看華人到。露華潤曉。有松香帶雨。柳絲縈棹。映入晴波。恰又新萍繡沼。稱游眺。襯幽蹊。更憐芳草。

槿籬數折。愛曲徑穿林。碧痕疑暝。篆煙颺鼎。對惜惜翠幄。一簾清影。古黛連雲。恰正朱陽晝永。澹炎景。看秀色染衣襟。袖生冷。風過香滿徑。正杜若蘼蕪。衆芳爭迸。正堪試茗。有清暉沁入。俗腸都淨。仲蔚庭前。一任煙榛露梗。萬緣屏。更眠琴月。明人靜。

浣溪紗 雨後卽景待幼霞不至

綠樹陰濃鎖翠煙。小庭清潤雨餘天。繞階初息溜涓涓。有約不來人欲倦。喜晴相噪鵲爭喧。趁涼移坐小窗前。

滿江紅 岳忠武王書出師表和幼霞

野寺荒燈聽颯颯。秋風驚乍。想儒將風流灑落。戎機整暇。異世同符伊並呂。齊聲合擬騷和雅。待評論三代下人材。無三也。同赤手支傾廈。軍聲震撼屋瓦。痛衰朝恥恨一般難灑。無命關張紛去已。並時浚檜何爲者。對崇祠古墨想英姿。淚傾瀉。

解語華 端居卽景幼霞謂此調好而數日不見過倚此速之

窗涵淨綠樹藹濃青。炎景如年永。萬緣都靜。高槐際。賸有數蟬淒哽。簾櫳颯影。又金鴨篆煙初冷。深坐時。幾縷清風吹透蕉衫清。斜照遲遲度嶺。漸幽軒暑退。涼思堪迎。翠煙將暝。東林外。飛上半輪明鏡。清暉飮頷。望良友。來同觴詠。渾未來。自掩柴關。餐勝惟新茗。

喜遷鶯 題陳次亮駕部新居

炎曦方酷。喜款徑到來。涼生庭綠。石瘦皴雲。林深障日。一徑翠陰成幄。小軒淨無塵事。風颭簾痕如縠。坐對久。覺清光浣盡。俗塵千斛。清福堪健羨。此地寄居。大好添松竹。碧潤茶香。青涵墨彩。領取天機清淑。倦來北窗高臥。夢破涼蟾瑩玉。舊栖託。更巢痕宛在。結鄰重卜。

疏影 連夜臥月欲寫其清境未能也

清暉沁骨。對一窗顯彩。凡想俱祓。天上人間。一樣無塵。知心但有明月。虛窗不礙空明色。遍枕簟。澄于冰雪。捲翠帷。盡息銀燈。看到漏聲都歇。還怕荒雞唱曉。漸催碧漢轉。金鏡西沒。萬籟無聲。萬念皆空。相思那更天末。當前一片娟娟影。攝夢想。都歸瑤闕。更灑然。涼透孤衾。又近素秋時節。

催雪 寒雲

斜日韜光。疏樹淡影。天水低迷若一。早倦鳥歸飛。亂鴉盤急。應爲天公玉戲。展步障。先收晴空碧。野亭小竚。峭風如削。莫寒增劇。蕭瑟萬籟寂。祇遙空似暝。冷光凝白。

料今夜素娥。斂將銀魄。贏得空明映照。皎玉樹，倩添棊華色。待釀作，匝宇祥雲，不負萬家祈澤。

金縷曲 得瑟軒海上書卻寄

一自行旌整。渾愁向、津亭訊訪。旅人行逕。縱使平安朝夕報。怎解離愁千頃。況蹤跡，萍蓬難定。千里營魂隨夜月。伴君行，共照清湘影。如曩日，共薇省。昨宵遠耗風前聽。有元龍，殷勤說與。一緘遙贈。滬上春潮天樣闊。三度來看海鏡。待料理，章江歸艇。鄉夢圓時家慶滿。振先鞭，直過衡陽嶺。堪拭目，看新政。

相見歡 次均和瑟軒四首

頻年杯酒懽然。醉如棉。愁煞一麾，遄去晚秋天。留難住。年將暮。策先鞭。願祝斯行，

一路樂安眠。答瑟兄

寒蘆花影蕭然。似飛棉。正是蛩吟，葉落早秋天。須留住。簾櫳暮。釋歸鞭。今夜虛堂，待月不須眠。憶龍樹院游

夢迴衣冷淒然。待裝棉。共命伽陵，長別隔人天。它鄉住。傷遲莫。怯歸鞭。歸也徒看，明月照孤眠。悼懷

萬家生計蕭然。未裝棉。欲賦東人杼柚，籲蒼天。哀鴻住。秋風莫。幸停鞭。鞭撻窮時，變作枕戈眠。憂時

菩薩蠻 十六夜月大好獨坐至四更卽事書適

中庭夜色清於水。玉輪高揭天心裏。月白露華生。秋蛩時一聲。空階和月坐。坐久渾忘我。涼思澹蕭蕭。悄然雙白貓。

解語華 幼霞屬和卽再詠龍樹寺雅集

畦連雉堞。路繞蛇盤。人入蘆中去。未收殘雨。驅車處。都似野塘鷗鷺。虛窗共俯。愛千頃。綠煙涼沍。飛畫觴。同酌芳醕。清氣餐空宇。還爲荷華獻壽。想紅衣青蓋。香遍南浦。碧雲凝露。紛相賞。誰識箇中心苦。移根淨土。要世界。熏成蘭杜。休但憐。嬌臉凝霞。冠羣芳仙譜。

惜紅衣 本意卽和鶴巢

座擁牟尼舟乘太乙。妙香清福。爲問前因。由來是仙佛。離塵上品。憐濁世無端淪辱。幽獨。紅豔素馨。稱靈均奇服。銀塘瀉影。瑤露流甘。伊人正如玉。孤芳自遠。極浦晚煙綠。爲問此生知己。但有畹蘭修竹。共一汀涼月。祛盡俗塵千斛。

摸魚兒 奉和鶴丈題觀漁圖事則追寫平時昆弟知交江口快啖鱗魚往事

也舊游如夢人老緇塵回溯墮歡可勝棖觸

泛輕舸。一汀春綠。斜陽紅浸芳沚。當鮓雋味。江鄉勝。新筍晚華天氣。漁唱起。看幾度乘潮。網下空明裏。時鮮上水。笑鱸美。松江鱖肥。桃浪對此。那堪擬。漁家地。掩映垂楊翠葦。停橈負販爭市。漁翁白首。煙波際。偏愛老饕風味。相見喜。不論價青錢。拋趁銀鱗起。歸舟又樣。早潑醋。搗薑。炊杭煮酒。人醉短篷底。

慶清朝 丁亥展重三日同鶴巢幼霞龍樹寺補禊歸飲酒樓同拈此解

淺草鋪茵。平波漾麴。翠痕新上簾衣。虛窗靜俯。娛人多少。清暉。恰正候過百六。雅游

須莫負芳菲。披襟對嫩紅穉綠。一片生機。休道永和禊事。便舞雩風浴。人對清沂。高情未讓。素心如此。應希餐盡野香秀色。吟魂拌與蝶俱飛。斜陽去。更須留待。明月同歸。

慶春宮 花朝日鶴老招游龍樹寺晚飲酒家並招幼霞芋亭

紅孕庭柯。青含隄柳。北堂殘雪都消。細數番風。商量春色。二分剛到花朝。雅人深致。趁佳日。良朋更邀。竭來舊侶。中仙詞筆。太白吟豪。虛窗靜俯平皋。繞郭西山。蒼翠堪招。耕鑿熙熙。晴光冉冉。野田生菜初挑。古槐垂蔭。又春色。新添嫩條。斜陽歸去。更把清尊。香醉黃嬌。

又 仲春望日同人公拜

岳忠武王廟十四夜詣廟齋宿月明如晝敬賦一

解

澗碧銷雲。空青耀采。一輪高揭重霄。清入虛襟。明如素抱。皎然塵念都消。靜聆更漏。漸攙入。高風樹梢。閒庭深竚。如水清暉。相對終宵。當年報國焦勞。臣節光明。天日

同昭。簾外秋光。雲邊夜色。也曾看月無慆。繞階行處。聽秋蟀。瑤琴倦調。千秋如見。今月曾經照影征袍。

百字令 和幼霞自題四十歲帶笠小照

清標玉立。況門高通德。齒當強仕。翠蔭庭槐。綿世澤。鳴鳳丹山萬里。奉筆中臺。分麾上路。指顧風雲起。出其餘緒。足當吾輩千億。漫惜哀樂中年。休論絲竹。文字堪娛戲。歎老嗟卑。渾未合。片語爲君介祉。吏部精勤。希文憂樂。好作它山砥。煙波帶笠。功成徐遂初志。

又 和芋亭

氛眠催暝。想陰陰一片。水村山郭。爲憶荒園籬落靜。醞釀古梅新萼。峭冷侵幃。晴陽斂樹。坐覺鷗裘薄。旅愁如結。最宜同酌杯杓。輸與臥雪袁安。衡門悄掩。選韻閒中樂。我亦豪情同訪戴。剡水高懷如昨。擬撰良辰。還招勝侶。芳酒開朱閣。瓣香前哲。簞聲重倚飛鶴。



又 南泊觀荷

水天一碧。藹清芬遍滿。大千世界。涼翠嫣紅相媚嫵。任是黃筌難畫。赤日炎歊。黃塵濁汚。屏出香天外。休誇解語。鎮宜無語相對。此際宜有靈僊。銖衣玉佩。宛向中央在。我欲招攜塵外侶。獨夜停琴靜待。月曉風清。簾空簟冷。淨綠涵瀟灑。刺舟花底。飽餐珠露千琲。

綠意 十汐海觀荷醺飲

清暉鏡拭。擁翠雲渺瀾。涼沁空色。萬綠田田。露重風輕。遠香飛入瑤席。高朋沈瀝。欣同志更壽祝。祠宗千億。是日爲鶴老補祝。況座中羣彥汪洋。儼泛五湖歸舶。何物催租敗興。恨無牡鞠火。噤盡蠅蠅。還俯虛櫺。雲影華香。一刹煩襟冰滌。人生樂事。知音聚。漫惆悵。萍蹤南北。又晚霞添助詩情。柳外斷紅涵碧。

綺羅香 讀詩孫新詞累幅用致欽遲

夏玉成音。裁雲練色。妙造詞家上乘。源水桃華。那復世間蹊徑。正堪擬。初日夫容。有

天然翠香紅映。怕古人、須讓今人。詞壇拔幟到三影。憐君清況似我。何日遂初堪賦。買山錢賸。一斛松醪。一椀乳華新茗。趁江鄉、蒹美鱸肥。更湘水、月明煙淨。便與君、終夜賡醕。共乘煙外艇。

滿庭芳 共夔笙詞話奉贈

勤學如君。於今有幾。愛好真自天然。抗心希古。磨琢倍精研。不惜秋燈翦盡。要紙上、字字平安。卽此是、聖賢心法。三絕記章編。狂言。方自愧。傾蠡酌海。測管窺天。轉殷勤爲語。佩若蘭荃。不擇涓流盡受。看溟渤、吞納千川。年華健。仔肩萬事。渾不爲吟楡。

金縷曲 寄懷瑟軒

別緒縈懷抱。念近來、安和眠食。嬌嬰樂笑。蝸角蠅頭何足論。且自心存古道。想治郡、風猷清峭。保赤經綸推愛子。坐春臺、萬姓爭欣禱。爭頌贊。使君好。愛憎毀譽休爭較。一任取、高牙大幟。不堪同調。共有天家司牧寄。我自冰淵勵操。公論在、蠻華犵鳥。待得甘棠歌四溢。看神君、氣與秋天杳。須不學、宦途巧。

秋宵吟 秋夜聞蟋蟀感賦

小窗幽。漏滴靜。淡碧銀河韜影。蛩聲急。似寄語秋人。寫將清景。繞苔階。咽翠梗。四壁蕭蕭。悽哽。開簾望。正片月西傾。數星光炯。坐倚青燈。悵此夕。商音漸警。衆芳將盡。落葉興悲。滿地露華冷。涼籟喧金井。念取無衣。秋夢頓醒。待將心。訴與蒼冥。天闕雲隔夜正永。

鶯啼序 和夔笙均中秋日憶江亭舊游書感

秋光際天薦爽。祓愁懷萬緒。恰又逢、佳節中秋。滿城歌管喧處。我自愛、冷吟閒醉。游蹤嬾入繁華去。有翛然松下清齋。柳陰芳渚。便擬招邀。獻侶載酒。料知音定許。江亭路。韋曲城南。碧蘆深處。延佇。湖中央。汀洲浩渺。伴幽興。鶯漚容與。漸忘卻。九陌車聲。抗塵勞苦。縈紆一徑。極目蕭蕭。萬華飛雪絮。恣洄溯。激潭遠浦。莫靄蒼莽。霞綺還明。月華新吐。煙空露冷。平皋一碧。隔城飛入。青山色。快娛游。勝地真天付。歸鴉噪暝。晚炊散入千林。振策欲去猶駐。蕭條浪迹。更不須愁。怕老天又妒。任揮灑。吟榭

共擘。醉墨分題。慷慨淋漓。寫將幽悵。檀槽按撥。金尊行酒。歡場前事成幻影。問吟豪、  
還似當年否。玉龍吹裂西風。無恨悲涼。爲憐舊雨。

戚氏 次屯田均

已涼天。無邊清氣入庭軒。碧隕疏桐。翠餘纖草。潤晴煙。蕭然。揜荆關。野華紅綠短籬  
閒。秋蘭數朵香韻。教人渾似在空山。山意幽迥。斜陽千樹。石泉雨後潺湲。又風高落  
木。商意淒緊。天籟爭喧。涼思漸促。凋年殘暑盡洗。新爽愛凭闌。銀塘外。白蓮猶賸。  
淨植娟娟。更纏綿。垂楊浥露猶堪。瘦影尙舞欄前。桂華又吐。露冷山馨。芳事還許重  
延。無那寒蛩急。中宵促織。頓減清歡。爲警無衣。卒歲弄機梭。砧杵韻相連。卻欣多  
稼如雲。萬家早穫。此樂真何限。祓愁懷。莫慢教縈絆。盼庭樹。蒼翠怡顏。更數叢黃菊  
禁寒。綻金英。渾不怕霜殘。正重陽近。開尊酌月。未忍酣眠。

水調歌頭

庚辰嘉平十九祝東坡先生生日同幼霞閣讀伯謙內翰

皇宋有夫子。天與宰衡材。卓哉仁祖明聖才。爲子孫培。況值元豐天子。每讀先生文

字輒自嘆奇才。爾日儻登用。韓范許同儕。恨羣小爭忌嫉。肆擠排。海南人去從此。南渡禍胚胎。已恨當時擊掙。更有腐儒襲謬。身後毀猶來。異代執鞭慕。釀酒有餘哀。

霓裳中序第一 丁亥九月偕瑟軒憩江亭秋向盡矣蒼葭黃葉閒村氓皆熙

熙斂穫身勞心閒兩人望而樂之各填此解一闕

城南近韋曲。路入蒹葭青斷續。休藉雅琴怨筑。天籟送聲。何須絲竹。晴皋潤綠。看野人、家在槃軸。斜陽外、一蹊亂葉。宛轉到深谷。芬馥。半籬黃菊。任野鶴、閒雲往復。溪邊來去路熟。十畝閒桑。五斗收粟。素心來共宿。有快意、新詩互讀。清尊對、溪堂松下。夜氣皎寒玉。

一萼紅 人日苦寒和石帚調

喜春來。卻寒威轉冽。春氣那會回。瓶凍添瑩。爐熏失暝。霜氣還是皚皚。斷橋外、栖鴉知樹。帶寒景、新綠杏難催。廿四番風。蕭寥芳訊。何處探梅。老去詩情更澀。悵漂萍蹤迹。中酒襟懷。香醕斟椒。辛盤翦韭。行樂都付兒儕。又恰是、祥雲尙祕。想玉饌、猶是

薦清齋。待到天心釀和。重醉金杯。

齊天樂 十六夜對月

虛堂夜色涼於水。人天一時都靜。玉露初寒。絲雲盡洗。寫出秋容明靚。空青萬頃。讓一鏡高懸。九霄風定。浩翠澄暉。星河匝宇澹無影。乾坤清氣幾許。被孤光盡攝。鎔就金餅。灌入芳襟。剎來沆瀣。爭許塵心不淨。苔階翠冷。恁同抱秋心。一蛩幽哽。共我終宵。那辭蓮漏永。

又 甲申守歲有感

萬家香靄騰金闕。餘寒釀成春意。爆竹催年。銘椒獻歲。又是陽和將至。流光逝水。悵催老英雄。者般容易。後飲屠蘇。有人猶抱少年志。平生豪氣未減。記蕭齋讀月。長劍孤倚。碧海屠鯨。青田飼鶴。少日心情空記。新來更喜。幸留得兒時。夜燈書味。爲問棊華。可容同調比。

又 憶松

小庭深院無塵夢。堂前四松交蔭。黛影擎雲。青陰漏月。滿地霜華寒浸。濤聲到枕。聽子落空階。幽人未寢。賢主多情。叩門相就更呼飲。傷心當日勝友。到重來散盡。清淚交裊。任是虬姿。依然無恙。廡下梁春難賃。西州路稔。便灑泣羊曇也。成衰甚。待問山童。那堪門巷審。已酉秋杪。移居陸靜軒年丈退園小屋。三楹庭列四松。清風寒月幽靜特甚。丈及雨生同年並二三同人。每乘夜月相過呼酒。淪茗極一時之樂。踰年遽歸。留滯南中不至者五稔。丙辰再入。丈喬梓俱下世。酒人星散。別業已屬它人。四松舊地。遂無從過問矣。庚戌國恤。沈文忠公移居園中。相與比屋。爲題四松堂額。前年雨生嗣子健卿農部移居時。猶及見之。

又 見棗

舊居重過添悽惋。斜陽半天將暮。直幹捎雲。寒柯壓屋。爲指幽人居處。秋光院宇。記朱實離離。飽餐朝露。幾載睽離。扶疏還幸更如故。當年食貧奉母。憶安巢穩。託賢主歡聚。翠釜蒸來。璠麋和入。曾喜慈顏下箸。星霜易序。正風木銜哀。又傷瓊樹。故地

重經不堪零淚語。槐銜舊居子禾總靈餘屋也。自壬戌回京文端師留居此屋十年。壬申奉諱南歸始別去。庭有小棗初僅細幹蒙茸荊榛閒友人傅用霖已操斧欲伐。僕護而存之。踰年騰上遽成小樹直幹挺然獨出檐際文端師戲謂似主。孤直不倚愧其言不敢答也。

又 紙窗新糊明潔可愛自題一闕

雪晴翻覺寒威厲。青燈颭搖孤影。敗葉鳴風。疏櫺漏月。篝火微溫難勝。凝塵驟屏。愛繭紙新糊。素光澄鏡。一任庭前。狂猋捲地晚來勁。婆娑終日坐對。恰斜陽送暖。午夢初醒。簾押文犀。香留睡鴨。棐几纖埃俱淨。涼蟾夜冷。更映入幽輝。玉壺同瑩。我本心清。顚然彌自省。

又 追憶新安山水憬然有作

宣城入去春如錦。千山杜鵑紅映。翠挹琴溪。青環箬嶺。步步引人入勝。蒼松冠嶺。更雲棧凌虛。石亭當徑。浣盡塵襟。不須禪悅已心定。陵陽修路漸坦。望江頭九子。依



約靈境。峯嵌招提。溪通略約。曲曲晴漪如鏡。泉扃翠冷。想明月中宵。萬峯青靜。定有真靈。此閒參內景。

又蘭

一從香祖培根遠。東皇劇憐芳意。紉重璫瑤。移來蕙蒨。總是華王一氣。精英秀起。要仙露流丹。月華激水。極意滋涵。可容蜂蝶近根柢。香心天與粹美。願花旛左右。添種蘅芷。素蕊娟妍。紅心嬌小。莫道天工容易。清芬竟體。漸世界熏成。舊時春事。譜就猗蘭。古音相對理。

又子石兄爲畫扇以山中老僧見擬殊不敢當歸來填此用致愧詞

危峯棧巖藏幽洞。蒼雲壓來當頂。枯樹龍拏。懸厓虎落。終古曾無人徑。山空晝靜。祇澗路巉巖。石泉聲冷。草蔓苔荒。一龕寥寂萬緣屏。枯禪於此坐老。儘華香葉落。年歲安省。身外都忘。塵中也適。了了菩提初證。真如自領。看月到天心。一般清淨。願我何人。敢希無上等。

又 秋陰

峭風吹斂斜陽色。疏林黯收殘照。羃歷生寒。低迷做暝。一徑煙籠翠篠。歸鴉恁早。看潤護花魂。露香蘭笑。也似春來。綠章憑向上清告。江湖秋水正闊。有溟濛遠影。鴻雁初到。釀作愁霖。催將落木。滿目氛昏難掃。黃華瘦了。鎮慵捲疏簾。翠樓人悄。付與莎邊。暗蛩吟到曉。

又 秋氣

夜堂風露清於水。驚心又逢秋令。蒲柳雕零。蛩螿怨抑。寫出無邊淒緊。蓮更漸永。喜書味重親。小窗燈影。寂歷松陰。滿庭涼思鶴初警。秋心無限感觸。倚雕闌靜對。明月孤炯。莽莽驚沙。蕭蕭落木。千里關河路迴。霜風送冷。最念取無衣。萬家悽哽。悄不成暝。暗催宵夢醒。

又 秋光

碧天吹老金風色。氛昏一時收淨。莫靄催晴。朝曦滅赫。秋在桐陰竹徑。空青夜迴。更

銀漢無聲。月明如鏡。翠袖生寒。倚闌人怯露華冷。柴門臨水半啓。恰稻華香送。秋稼千頃。紅葉溪橋。黃華籬落。又是重陽節近。斜陽半嶺。對極目澄鮮。更添游興。爲語幽人。更移煙外艇。

又 秋籟

勁風初應清商律。三千大千吹滿。亂葉敲窗。幽蛩繞砌。頓把羅衣催換。新涼驟轉。正蓮漏更長。月輪天半。棖觸秋懷。讀書聲裏一燈翦。閒階添送爽氣。聽琤琮欄鐸。宮徵都變。戍鼓宵嚴。悲笳莫急。譜出征夫哀怨。天涯歲晚。想風雨關山。勞歌道遠。漫倚金尊。畫堂喧翠管。

又 涼夕寄懷幼霞

小窗虛幌明於晝。幽棲別饒佳勝。斜漢流天。纖雲讓月。三五流星耿耿。苔階翠冷。又風颭流螢。一燈青映。漸有蛩吟。悄然秋意出莎徑。更籌聽過四轉。鎮澄思息慮。宛入禪定。萬籟無聲。三霄自碧。一味新涼初迎。甘芳沁茗。早浣盡塵襟。太虛同淨。爲想

詞仙素心應共領。

又 十三夜月

萬緣祛盡心如水。孤光一輪亭午。淡極逾明。清中更媚。倍覺精華四吐。蒼涼院宇。儘高與天游。悄無人處。默坐澄觀。世閒娛樂總蠲去。瀟閒情味正永。是平生至樂。仙界真趣。碧海迢迢。青天夜夜。映澈無邊風露。蜺旌翠羽。記同步煙霄。舊時儔侶。定也憐予。俗塵還寄旅。

又 戲賀半塘老人納婦吉

阿翁地位談何易。居然一朝修證。並不癡聾。真能覆育。幾日劬勞交迸。娛將暮景。看佳婦佳兒。玉蘭輝映。好繼清芬。添香紅袖伴高詠。書城相對萬卷。比金籬燕翼。風味須勝。綠竹生孫。含飴待弄。從此老人名稱。華堂晝靜。更養潔南陔。阿婆無病。爲祝來今。滿家都順境。

又 咫尺園白牡丹二首

藐姑仙子空凡豔。寒梅那堪同調。國色無塵。天香濯露。璀璨銀燈環照。瓊姿麗曉。想  
明月前身。淨因修到。獨立娟娟。滿城朱紫。總堪笑。唐宮芳事。記取愛根培淨土。種  
借瑤島。亭接沈香。衣裁素錦。曲譜霓裳。新教春寒退了。有出浴真妃。雪膚爭皎。帶笑  
看來。玉顏相對好。  
妙香不受微塵涴。天仙化人遊戲。羣玉山頭。瑤臺月下。一種神姿明粹。姚黃魏紫。儻  
對影風前。總慚形穢。不染鉛華。澹然相向。有真契。靈均芳思正遠。洎盤新浴罷。留  
取昭質。雪瑩仙肌。蓮胎佛性。不是人間富貴。繁華夢裏。有清白流芬。更貽孫子。待結  
同心。素蘭香近水。

又 曉過龍樹寺。遂命酒小酌。呈同人。

小樓頻送斜陽色。清游更期朝爽。露氣初收。嵐光欲活。朵朵夫容列障。晴暉漸上。更  
清挹飛藍。潤融涵絳。爲想巖扃。雨餘千疊。石泉響。開尊欣共勝友。奈闌珊滿目。春  
事堪悵。花落無言。雲陰蔽日。幾許傷心醞釀。煙蘿共往。便尋得桃源。萬重青嶂。怎隔

閒愁不教縈夢想。

又

採自丙辰入都館壽陽師宅琴尊唱和藏稿甚富逮壬申奉諱倉卒出京盡失之偶檢書篋于敗紙中得師和東坡滿庭芳詞喜極而悲俯仰廿年往事增感哀吟一闋亦如杜老追酬蜀州作也

一從灑遍西州淚。詩壇痛深知己。寶墨留存。新篇什襲。又爲歸裝遺棄。沈埋故紙。拌趙璧難還。楚弓長畀。散帙重逢。天人應共大歡喜。還思當日倡和。半憂時念亂。蒿目兵事。幸挽天河。終摧大樹。指張忠武公愴絕將軍故壘。沈瀾未已。更問字人遙。悼深蘭芷。指祁生友慎迸淚幽吟。不堪還念起。

又 題陳小農戶部烈婦隋氏傳

女貞全節方成孝。新臺豈堪重詠。潔養承顏。投繯矢烈。心似寒泉古井。慈闈聽請。更小妹幽閒。代開妝鏡。就義從容。嶮然難淬志先定。齊芳如此未易。有今年奏讞。祁氏堪並。老諄狐綏。賢媛婺潔。鳩酒傾杯求暝。淫威更逞。藉霜刃鋒銛。潔將強橫。義絕

非親那容將弑等。隋氏兇人舅欲犯以非禮百計不從。死于母家。將死母妹皆助之。救梳盥沐。從容就義。祁氏□□人亦舅屢犯之。已仰藥死。家人救甦。舅復力犯之。爲氏所宮。而斃。刑部雖當以緩決。然死者淫凶。瀆倫恩義。並絕不得以翁媳論。且氏已就死一次。直邀寬典可也。

又 送蓉生出令樂陽

一鞭晴雪關山路。驪歌驟添愁緒。壯歲功名巖疆保障。拭目看君此去。殷勤訴與。有涸轍頽魴。共思甘雨。幾輩紛紜。可憐民莫向誰訴。先朝長駕遠撫。翠華臨幸。日恩洽垓宇。地拱神京。天臨大漠。中外屏藩要處。時巡待舉。願載道循聲。奉迎鑾輅。幸與窮黎轉將春氣煦。

又 喜幼霞來並呈瑟軒鶴巢

屋梁明月頻年夢。迴闌幾番愁倚。落葉悲秋。長條墮劫。南鄰柳色。每以懷人。今夏突被翦伐。心甚惡之也。心悸斯人顛頽。征塵未洗。喜一笑相逢。夕陽煙翠。大斗浮餘。世

閒如許快心事。新居還更不遠。又天街共踏。寒月如水。許渾詩情。彭宣絲竹。併作當筵懽醉。清心妙理。況道味醅醅。近來增嫩。進步竿頭。素心人倍喜。

又 月夜坐太清觀

畫樓歌管春如夢。幽人獨游塵外。碧宇高寒。紅牆寂靜。天與清涼詩界。中天翠彩。喜風露無聲。玉輪高掛。領略清暉。浣將靈府。倍瀟灑。休嫌芳訊過晚。任千紅萬紫。著意雕繪。飛蓋追隨。羽觴豪飲。爭似冷吟閒對。孤光離海。早不許繁華。污他精采。爲問仙娥。素心應未改。

又 新涼

嫩涼天氣清於水。空青浣將雲影。宿靄全收。高風送爽。吹落梧桐金井。明河夜耿。聽檻外蜚聲。漸饒淒警。怪得宵來。薄寒微透。被池冷。登臨方好縱目。奈冷吟閒醉。誰共幽興。松柏山香。蒹葭水碧。秋色無邊清淨。蕭齋自領。祇清透蘭襟。爽添蘿徑。更喜書燈。近來初夜永。



又 薄莫經米市胡同青士舊居也。棖觸往事填此寄懷。

一聲彈指分今昔。光陰卅年飛度。舊雨蕭寥。晨星錯落。往事不堪回溯。前塵細數。幸  
矍鑠靈光。巋然如故。人海抽身。歸航安穩。片帆渡。蘇隄春事正好。羨湖山管領。風  
月佳處。玉筵徵歌。金尊酌酒。爲問歡悰幾許。天涯倦旅。但訴與離愁。已堪悽楚。那更  
津橋。杜鵑聲又苦。

又 龍樹院卽景

軟風遲日催芳信。生機遠騰林表。碧岫生雲。蒼巖過雨。渲出山容似笑。春分過了。漸  
綠繡平疇。翠融新潦。抱甕人來。野田風景尙熙皞。虛窗高處四敞。恰清暉入座。嵐  
影飛到。興洽無言。翛然有悟。坐久惟聞啼鳥。池塘夢好。似秀句神移。乍吟春草。好趁  
遨頭。莫教春事老。

又 丙戌端午以角黍新茶祀屈子敬賦

左徒風節千秋重。湘山悄焉高詠。玉琢精神。蘭熏氣質。衆醉中間獨醒。丹心自靖。與

殷代三仁。後先輝映。若問同時。祇應鄒嶧可相並。離騷衣被萬古。視風詩小雅。應許驂靳。香草兒時。鴻裁曠代。妙契偏從孤冷。清芬薦茗。料巖潔泉甘。定符貞性。更展遺編。綠窗娛晝靜。

又 鶴丈退直車行。淖中觸穢致疾。倚此見示。根觸予懷。悽然增感。依調奉答。一從天遣紅塵謫。閣浮那會清淨。穢迹難持。汚流似海。鬱盡蘭心蕙性。中宵自省。祇明月青松。萬山深徑。獨抱瑤琴。夜深彈與鬼神聽。前身依約記取。向瓊樓玉宇。丹竈金鼎。露下銖衣。霜凝佩璫。鶴背泠泠風冷。離塵要猛。待覓箇幽栖。共君觴詠。指日秋來。快乘煙外艇。

又 新秋始涼。煩溽如洗。天高月明。萬象澄寂。獨夜深坐。怡然自得。倚呈鶴丈霞棣

新秋又值新晴後。天容倍饒澄瑩。露氣涵空。風威送爽。萬象虛含清淨。初涼未冷。正簾影搖波。扇紈將屏。久坐空廊。數螢明滅乍栖定。銅壺宵漏漸轉。愛中庭地白。圓

月飛鏡。瘦不勝秋。疏還賸綠。一樹垂楊低映。喧來更靜。又匝宇鳴蟲。紡紗聲競。拌與  
暝遲。儘醺清夜永。秋蟲似蠶。翠碧可愛。吾鄉名紡紗婆。

又 前人有言。牽牛象農事。織女象婦功。七月田功粗畢。女工正殷。天象亦寓  
民事也。六朝以來。多寫作兒女情態。慢神甚矣。丁亥七夕。偶與瑟軒論此事。  
倚此糾之。

一從豳雅陳民事。天工也。垂星彩。稼始牽牛。衣成織女。光照銀河兩界。秋新候改。正  
嘉穀初登。授衣將屆。春耜秋梭。歲功於此隱交代。神靈焉有配偶。藉唐宮夜語。誣  
蠆真宰。附會星期。描撫月夕。比作人間懽愛。機窗淚灑。又十萬天錢。要償婚債。綺語  
文人。懽除休更待。

執鞭欣慕平生志。眉山大蘇風采。浩氣孤行。忠規讜論。列宿來從上界。窮通詎改。看  
隨遇安恬。瘴鄉親屆。大筆淋漓。光芒雄視冠千代。新安何事致毀。記昭陵品論。才  
合鈞宰。塞上軍容。湖邊柳色。到處都留遺愛。襟懷澹灑。更畫雪堂深。坐銷逋債。儻代

荆公。太平堪遠待。按曠丈此均凡十許疊篋中僅存元唱及此並失題目故附列前作後

又 新晴致爽秋色佳哉詞以寫之

嫩晴天色秋容靚。清光最宜晨起。宿露滋苔。朝陽映樹。空外蔚藍無際。疏林帶水。愛收潦涵青。遠煙凝紫。畫裏溪山。數峯相對轉蒼翠。蕭齋時更靜坐。有簾櫳納爽。圖史祛睡。老圃松涼。疏籬竹揜。人在黃華香裏。商飈到耳。又衣想裝棉。扇悲藏笥。珍重分陰。漫將春共擬。右畫

莫天初覺斜陽速。疏林晚煙旋起。玉宇澄暉。絲雲斂影。浣出長空清翠。寒蛻未已。又落葉紛紛。亂敲窗紙。飽飯黃昏。晚菘新稻足珍味。西風吹處漸老。夜堂人坐久。清絕秋氣。簾護華香。砧催木葉。又近重陽節至。中庭似水。有明月當階。暗蛩吟砌。點檢青編。短檠書味美。右夜

透簾秋氣涼于水。虛堂悄然人定。露白三更。燈青一穗。匝宇商聲漸勁。空階夜靜。正青潤桐陰。翠深苔徑。聽徹蕭蕭。豆華開處最清境。幽人籬落半掩。愛金猊薦爽。銀漢高耿。夢醒香衾。聲攙落葉。明月中天懸鏡。關山候冷。早砧杵千家。一時催應。伴我秋吟。更消蓮漏永。

又 中秋後一日太虛游龍井之日也見坡公書事生平酷愛此篇丙戌中秋後一日月明如晝想太虛游夕亦無以過之既小楷書坡文一通復倚此闕極致賞心

太虛作記曾茲夕。探幽快乘清興。皓月中天。秋光似水。路入風篁支徑。山空夜靜。愛行路松香。漱來泉冷。流水聲中。隔林依約度疏磬。今宵風景未減。只蕭齋寂坐。塵念都屏。蘭紙書成。蟾光透入。淨几明窗相映。盈盈照影。想此月清暉。古人同領。問月何如。一般清味永。

又 臘月二日安徽館公讌余獨逃席坐子山亭寒趣甚美縱筆寫之是日鶴

巢亦至未能拉之同領獨享爲愧

軟紅深處淹塵夢。胸襟久疏山水。瘦石尋蹊。空亭貯軟。小築也饒幽致。危闌自倚。喜  
愛日留暄。古松凝翠。碧沼紅樓。宛然人在畫圖裏。西南亭榭更美。映垂楊一樹。鴉  
點栖止。落葉雖空。長條無恙。搖曳已含春意。欣欣對此。祇吟侶偕來。未同流憩。獨享  
滋慚。短歌還自矢。

又 同鶴巢幼霞集四印齋錢瑟軒倚此代柬

幾年同曝薇垣值。風流快從觴詠。潭水桃華。幽山桂樹。那更深情逸性。離懷驟警。況  
取次春風。一麾先秉。怕是它時。不勝怊悵此情景。多君風義近古。有中臺寶笈。招  
共刪訂。挾漢分章。承雲奏雅。羊鶴還愁不競。清言快領。趁明月猶圓。碧天澄鏡。四印  
齋中。一尊相共請。

又 鶴丈招飲賦謝

虎侯高誼何肫摯。相逢更邀同醉。畫壁旗亭。鋪醕麪部。今日誰同逸致。杯深釀旨。又

勝侶招攜。鴉歌閒肄。玉璫傾餘。夜窗銀燭。藹清氣。尊前還共訂譜。榕皋舊什。工尺堪比。鄧尉尋秋。天平攬勝。昨夢依稀猶記。瓊英照水。待共結精廬。萬椽華裏。月媚春酣。翠尊偕泛蟻。

又 六月初七日陳筱農兄招讀石刻岳忠武王手書奏草王建儲之請紫陽深詆之以爲干越取死曩卽不謂然今見全事始末乃知金人欲立宋後於中原則南中將不可復用兵故請建儲以伐其謀此乃兵機非朝政也敬賦

一闋

昭陵遺澤深如海。金劉詎堪成事。異想天開。神姦甚閒。用到殷餘夏肄。宗英另峙。要沮我兵威。礙茲同氣。監以凶渠。柄操強敵自伊始。惟王忠略冠代。伐謀資廟算。儲嗣先植。素志醞卿。青宮詔謁。帝亦驩然無忌。兵權在己。論忘盡嫌疑。愈徵純粹。爲國精忠。古今誰更比。儲位既定。帝遣忠武往見孝宗於資善堂。且曰。此卿素志也。可見王之純忠。帝亦鑒之。薛弼之言。顯係後來增竄。

又 初十之夕言歸寓齋勞轍暫停風月清寂飯罷浴竟坐月中庭怡然有作  
雨餘天色清於洗。勞生暫逢休暇。院靜初扃。簾空乍捲。草草疏殮餐罷。冷然善也。正  
新月澄宵。好風清夏。一枕迎涼。蕉衫竹簟共瀟灑。連朝甘澍徧滿。想郊原潤浥。新  
綠橫野。靜裏生機。閒中樂趣。寫入沈沈良夜。將暝未捨。恰萬籟無聲。一檠才灺。怎得  
知音。竭來杯共把。

又 仲秋七日游萬柳堂卽事

碧雲天色涵秋氣。清光澹將莫景。禾黍風香。蒹葭露飽。路繞溪塍一徑。塵囂盡屏。早  
煙外鐘聲。引人清聽。乍款禪扉。舊游重與雪泥證。山僧還更好客。要相期月夕。掃  
榻相迎。病骨才蘇。勞生久倦。身世還如萍梗。深情快領。幸分我蒲團。佛燈青映。大好  
同參。石泉心共冷。

又 仲秋十八日天宇澄霽涼風颯然偶訪霞棣值鶴老亦在偕至江亭景物  
清嫩凭闌遠眺得意忘言晚過酒家卽席拈此



碧天新爽來無際。清暉引人游眺。送雁風高。藏蟬蔭減。寫出秋容漸老。葭深路窄。笑薄笨驅來。穩如舟小。勝地重尋。雪泥仿佛認鴻爪。凭闌時縱遠目。愛西山霽景。依舊青繞。樹老含蒼。窗虛吸翠。秀色餐餘都飽。重陽近了。問佳節登高。幾人同調。爲問歡場。那如閒處好。

又 戊子九月十九日獨游萬柳堂登文昌閣俯視澗道低縈泉扃幽敞雖荒煙蔓草園林陳迹了然可數前游鹵莽未見及也聖祖仁皇帝御題拈花禪寺額懸中殿大悲閣上主僧龍法奉其八十四齡老母居寺中耕鑿睢盱不解應醅殊可敬愛卽事紀懷

御書樓畔東南去。高亭翼然孤迥。雉堞周環。鷗波俯鑑。約略園林蹊徑。依然畫境。想花嶼支筇。柳潭漾艇。更喜璇題。倬雲天藻尙輝映。而今熙皞歷久。愛山僧樸遯。還事溫清。磴道同攀。雲堂小憩。坐覺山光悅性。斜陽半嶺。正落葉黃深。古松青冷。便有塵襟。也隨秋氣靜。

又 秋向盡矣。苦雨釀寒。客窗枯坐。百感交集。漫成一闋。

冷雲低。羃簾櫳影。秋陰釀來何驟。昨尙爽晴。細不成絲。輕如散麴。作弄霜威。儻懣霏霏住否。正落葉聲中。暗蛩暗後。夢醒空齋。峭寒清逼。瑣窗透。侵尋時序。逝水記良宵。迓客。剛翦春韭。翠減宮槐。華開野菊。又是授衣時候。相如病久。對枯樹黃疏。夜燈青瘦。羨到栖鴉。卜居渾未有。時急覓移寓

又 題夔笙詞卷

寂寥南宋諸公去。餘音更會誰嗣。蕙性緘愁。蘭馨織韻。快讀金荃新製。南州秀起。羨滌筆湘江。綺霞爭麗。婉變風情。玉田同世。席須避。瓊樓千古妙語。祇坡仙按譜。餘事而已。桂海英靈。榕門里閉。那便雕蟲自喜。丹山萬里。有名世文章。救時經濟。轉瞬華天。玉樓聲共倚。

又 演東坡書意

歲華如水流。難住。凋年又看行盡。做冷風酸。禁寒雨細。到耳淒然幾陣。幽窗睡穩。愛

紙帳虛明。素光瑩粉。屋小於舟。添來竹瓦翠筠潤。青燈如豆。靜對喜觀書老眼。細字堪近。時復相於。此閒領略。佳趣醺醺隨分。梅華數本。待持贈無由。祇通芳訊。獨享慚余。愧君還自哂。

又 跋夔笙詞

綵毫香浣銀河水。清才定從天賦。麗藻霞舒。英詞月豔。脫盡人間凡語。游心太古。更一字推敲。夜燈紅處。欬唾珠璣。錦囊應讓此佳句。論文還記往訓。吉祥資後福。何事淒楚。絢爛才華。崢嶸綺歲。忍毀號寒咽露。君當記取。待獻納論思。玉階仙署。莫把商聲。浼將吟思苦。

又 幼霞鶴巢詩孫同泛南湖聯吟買醉未嘗召我也事後更以詞夸我豈復可恕當待秋中月滿花香更共觴我倚此檝之

舊游如夢南湖路。華閒也會檣棹。桂楫偕游。松醪共醉。君輩今番吟眺。如何忘了。有善飯廉頗。也堪同調。一榻清風。恁般偏我已堪惱。相夸還更示我。把聯吟秀句。取

次齋到。字裏華香。行閒酒氣。險把衰翁薰倒。秋光正好。趁月曉風清。更偕華笑。補過心虔。買舟須要早。

又 貓

客窗瀟寂來相伴。嬌憨最饒天趣。細草偷銜。霜毛靜舐。銷得閒愁幾度。華陰正午。更一綫金睛。綠雲深處。妒到香孩。榻邊餉睡也應許。山房深護萬卷。策勳堪弟。一何用熏鼠。晝飽溪魚。宵眠翠毯。慧黠真如解語。殷勤問取。念洞口仙哥。幾時仙去。屋角喧騰。又隨春氣煦。

又 仲秋十一日偶過四印齋。夔笙亦至。主人投轄挽留。並招鶴巢把酒論文。竟夕歡聚。明日卻寄一篇用致感悃。

主人好客。渾成癖。傾談頓教留住。勝日瀟閒。良朋邂逅。取次壺觴獻侶。招邀致語。要不負秋光。嫩涼庭宇。深巷斜陽。一絨芳訊早飛去。良宵風月大好。看欣然命駕。還載清醕。翠罍浮餘。紅牙拍遍。論到移換宮羽。芸香太古。愧好榻酣眠。俗塵相污。夢醒西窗。玉輪剛正午。

東詞

鷓鴣

公身

堂

運



周星譽（道光六——光緒一〇）

字昀叔。一字叔雲。河南祥符人。寓居浙江山陰。道光庚戌進士。改庶吉士。由編修累遷至兩廣鹽運使。兼署廣東按察使。少有高譽。兼擅詩畫。昆季八人。並負清才。家居日。與李慈銘。王星誠等結益社。詩酒酬和。見者以天際真人目之。

# 序

古詩皆入樂。流極爲填詞。宋世朝廟鉅制。多用此體。應天長瑞鶴仙之譜。亦朱鷺翁離矣。士不稽古。目爲小道。烏睹六義之遺乎。六義首風。必優柔而善入。則填詞爲近。屈曲其旨。故長短其言。窈眇其音。而繁麗其色。充厥量者。代不數人。中州周叔雲。抗手竹林之游。躡足承明之選。辭章澹雅。而好深沈之思。沈詩任筆。兼善者。眇海內推許。于君無閒。東漚詞二卷。多其少作。白石稼軒。去人不遠。予嘆挹其辭。泠泠纍纍。若鳴雜佩。卽之如爾。尋焉益遐。非夫雲霞奇意。山水清音也哉。可謂充其量已。叔雲制作才。朝廟正誦之選也。而賦物緣情。風人遺則。于其填詞。遇之。張皋文所爲。欲與詩賦之流同類。而風誦之也。癸亥長至。譚儀仲儀敍。





東鷗草堂詞

祥符周星譽叔雲

秋千索 壬寅七月初十夜雨有憶

桃笙簟滑啼痕溼。金井外、幾聲秋蟀。雨緊燈花墮瘦紅。記今夜、剛初十。沈郎減盡相思骨。況又是、影雙人隻。一院蕉陰似那時。少了箇、朦朧月。

清平樂 甲辰正月出蘇州城作

金鋪望杳。翠被生寒早。十里高城雲際小。都把愁兒砌了。樽前一醉天涯。教人夢斷窗紗。想煞東風庭院。月痕黃鎖梅花。

賀新郎 詠物分題得女兒酒

一見心都醉。笑偏如、錢塘蘇小。鄉親原是。剛趁釀花天氣好。釀出春秋滋味。稱貯向、銷金帳裏。記得蘭陵曾有箇。與盧家、少婦同名字。荷鍤者、爲卿死。女兒亭外沽春地。正江村、美人嚶碧。夫人李紫。有客金貂初聘得。領略溫柔如此。看捧出、纖纖玉指。

壓倒梨花三百輩。祇當爐、嬌面差相似。酣臥也。海棠底。

踏莎行 丙午春日卽事

珠幙閒垂。銀屏慵展。櫻桃斗帳金鳧暖。綠楊池館閉春陰。卷簾人比東風嬾。眉葉青銷。靨花紅斂。纖腰打疊游絲軟。慊慊病過海棠時。一身都被春愁管。

水龍吟 文之沐潤兄拈此調爲人題乙未亭燕月圖雄俊可喜因效其體賦

此並踵原韻同許夢西譜

蒼然片月飛來。酒波都向青天卷。舉杯一笑。東南如此。且聽簫管。七百年前。黃樓吹笛。風流未遠。看萬荷香裏。魚龍跌宕。似睥睨。江山宴。千載猿愁鶴怨。把湖波。傾來重浣。紅裙烏帽。古今多少。星飛雲亂。海樣秋光。不判一醉。流年潛換。待明朝散了。皁鞵雙腳。又黃埃滿。

虞美人 題王雙喜女郎梅花雙鵲紈扇同夢西作三闋

退紅簾外香雲曉。啼得春都笑。鵲兒還比箇人癡。喚起綠窗殘夢說相思。泥金喜

字偷描徧。畫出聲聲豔。渠儂怎道忒多情。便是玉梅花也學雙身。

### 萬里春

雙栖畫裏。更雙聲同倚。盡將來、寫入蟾蜍。問雙心圓未。無限相思意。把青梅、西州重寄。道甚時、卻扇花前看那人雙髻。

### 浣溪紗

跔跔輕寒度畫樓。重簾如夢鵲聲柔。落梅雙笛韻蘇州。葉角花梢題徧了。新詞密密寫銀鈎。更無些地著春愁。

### 念奴嬌

題夢西詞卽效其體

垂虹背上把君詞。一唱萬楓都笑。七十二峯眉底綠。擲得全湖杯小。天上瑤笙。人間牙板。聽此都暗了。老龍水底。捉來爲譜長調。何事脫卻緇袍。菰蘆醉臥。人共江山老。閒煞斫鯨屠鱷手。只辦瑠花鏤草。千古詞魂。迸來指上。拍得青天覺。蒼茫此意。江南兒女誰曉。

虞美人 月夜聞簫

苔陰露氣濛濛地。人影和花膩。久拋舊事不思量。爲甚今宵心上恁悽涼。紅簫一曲風簾底。吹得春魂起。莫教容易說回腸。月也被他愁作酒般黃。

水調歌頭 對月同夢西

陡覺亂峯活。一白立垂虹。老蟾今夜饒煞。跌入酒杯中。醉裏不知天遠。但見酒光月氣。倒卷溼鴻濛。起拍萬花醒。爲我舞長風。薊門酒。蘇臺柳。廣陵鐘。馬頭只有明月。逐我走西東。送了騎鯨人去。更向一千年後。照此兩吟蟲。夢墮鏡湖綠。洗手弄芙蓉。

邁陂塘 題吳江倪又香秀才寶鍵白門秋柳填詞圖

最惺惺。六朝煙柳。生來便恁愁楚。玉簫吹軟秋魂影。揉作半天風絮。絲幾許。怎不綰離人。但綰離情住。記他歸路。認一桁斜陽。亂鴉聲裏。紅過莫愁去。待說起。門巷綠陰前度。回頭有甚情緒。酒邊香誓燈邊夢。除是楊枝能譜。天肯否。天肯借柔條。穩把雙栖護。斷腸誰訴。賸丁字簾前。西風瘦燕。嗚咽唱金縷。

洞仙歌

繡柔收了。正雨絲初歇。七里香塵熨颿碧。看綠楊陰外。樓閣溟濛。是多少、春睡初醒時節。犀帷催喚起。餽眼慵揉。剗襪蛤蜊向人立。瓊瑤遞完時。低項回身。傍娘坐、恁般羞澀。又小婢、催人去梳頭。向鏡裏流眸。驀然偷瞥。

呵鈿縮翠。坐棗花簾底。華鈿斜簪小雅髻。想妝成力怯。換了鸞衫。停半晌、纔見盈盈扶起。問名佯不說。淺笑低聲。暗裏牽衣教娘替。眾畔坐隨肩。道是知情。卻徧又、恁憨憨地。也忒煞、難猜箇人心。笑事事朦朧。者般年紀。深深笑語。膩細桃花影。削哺金泥護春暝。看珠燈出玖。錦匣藏疆。卻難得、隨意猜來都準。起身鬆繡屣。瑣步伶仃。釵尾丫蘭顫難禁。怯醉泥秋斂。親蘸豪犀。替重抵、牡丹雙鬢。似欲向、郎言又還停。但小靨緋紅。可憐光景。

荼蘼風軟。散閒愁無數。吹送青鳧到花步。算鴛鴦卅六。排作郵籤。好細與、記箇相思程譜。吳江至蘇計三十六里。尋春三度也。永福橋西。門閉枇杷舊時路。小隔又生

疏道罷勝常。更沒些離情低訴。但佯笑、兜鞋倚娘邊。問梅雨連宵。別來寒否。

卓金車子。接么娘來早。鸚鵡銀籠隔花報。聽纖纖繡屨。纔近胡梯。驀一陣。抹麗濃香先到。進房攏袖立。瘦蝶腰身。寫上紅簾影都俏。側坐錦墩邊。女伴喁喁。盡背地贊伊嬌小。看悄撚羅巾。不擡頭。怎比在家時。更矜持了。

猜花輸後。露些些嬌惰。怯飲瓊蘇繭眉鎖。把銀蕉殘酒。笑倩郎分。消受這。一抹口脂紅。宛雁箏擗義甲。唱罷迴簧。豔歌名蓮箭沈沈。月西殘。席散點紗燈。臨去殷勤。問明日。郎還來麼。正風露。街心夜涼時。囑換了輕容。下樓方可。

吳綃三尺。屑輕煤初畫。錦髻瓊題恁姚冶。只花般性格。藕樣聰明。描不出。留待填詞人寫。翻香么令豔。細字紅蠶。鳳紙烏絲替親界。譜上女兒青。偷拍鞋尖。低唱向黃樞花下。好宜愛。重薰喚真真。辦一片誠心。向伊深拜。

閒情新賦。把靈犀一點。寫入香羅白團扇。好羞時低障。浴後輕攏。長傍着。小小桃花入面。橫塘重寄與。滿握冰蟾。比似華年一分欠。畫裏說春秋。紅錦窠溫。反輸與翠

禽雙占。倘長得，隨伊鏡臺邊。便掃地添香，也都情願。  
離腸一寸，化萬千紅豆。底事花前又分手。便不會春去，已是無憀。況又到，深院月黃  
時候。玉鵝衾底夢，酒雨香雲，薄福蕭郎怎消受。無計贖珍珠，待說成名，可知道，甚  
時能穀。便微倖，雙棲也生愁。看半搦弓腰，恁般纖瘦。  
江湖載酒，徧青衫塵積。玉笛聲中過三七。道漂零杜牧，慣解傷春，原不爲，歌扇酒旗  
悽悵。惺惺還惜惜，儂自憐花。此意何曾要花識。一霎畫屏前，香夢迷離。儘後日，思  
量無益。待提起，重來又傷心。怕門巷斜陽，落紅如雪。

柳梢青 初秋泊嘉興有懷

回首悽然。松陵城郭，一路寒蟬。藕葉圍涼，蘋花搖暝，人在秋邊。相思昨夜樽前。酒  
醒後、疏楊暮煙。對月心情，阻風滋味，又過今年。

虞美人 九月十六日夜泊雙橋橋去嘉興六十里

扁舟秋入嘉興路。夢逐回波去。斷腸名字說雙橋。消受單衾孤燭，又今宵。  
松陰暗

轉篷窗悄。霜重溪風曉。亂蟲聲緊凍絲絲。剛是酒醒人睡月黃時。

浪淘沙 五更枕上聞雨又作

酒醒夜迢迢。睡又無聊。五更月暗雨如潮。瘦盡黃花秋不管。儘著蕭蕭。金鈿小羅幃。紅蠟孤燒。黃昏庭院鎖芭蕉。還記那時聽不得。何況今宵。

虞美人 九月十七日泊嘉興時將由楓涇入滬不經吳門矣感賦此解

聽風病酒秋江路。笛怨縈花步。湖名空自號鴛鴦。怎不替流歡夢到橫塘。水西驛下舟重繫。樓閣斜陽裏。蕭蕭紅柏亂栖雅。可是小橋東去那人家。

金縷曲 得素生兄灝孫下第書鬱鬱累日被酒臥羅預館中夢得下字一叶

就枕上足成此解寄之

風雨虛堂夜。起舞向、荒雞聲裏。仰天而咤。潦倒功名憑一字。說甚奇才董賈。想獨對、孤燈寒燄。負米艱難原我分。痛黃金、減盡文章價。看短劍、淚盈把。諸公競走長安馬。誰送爾、青衫衰柳。騎驢歸也。悽絕當年捫蝨語。道只我知君者。笑麟閣、鳳池都假。



三萬六千沈醉後。好同營。生壙梅花下。腸斷句。夢中寫。

鷓鴣天 席上有伎持寫柳障子乞題口占應之

青眼窺人漫自妍。黃金拋得買華年。惺忪秋思難瞞水。作弄春光但借煙。嘶馬地。坐鶯天。長亭回首更悽然。西風一例逢搖落。未必靈和勝外邊。

浣溪紗 落燈後二日維舟蟠溪新橋水風凍煙山雨釀雪孤榜翦燭愴懷舊

遊漫賦此解

繫榜蟠門薄霧收。水楊風軟曉星流。臨溪窗閣看梳頭。癸卯七月自練水歸越泊舟新橋所見如此。忽漫思量成往事。可堪漂泊助新愁。梅花細雨過蘇州。

清平樂 正月十八日舟中對月有懷

篷窗人悄。寒意生如草。月與離人同一稿。都比前宵瘦了。擁衾嬾炙銀燈。自家和影溫存。容易黃昏挨過。明朝還有黃昏。

金縷曲 泮塘旅次阻雨題壁卽寄南中兄弟

明日花朝矣。尙兀是風風雨雨。把人愁死。破屋荒雞孤燭暗。打疊一衾鄉思。賸布被。悵儂獨自。想見故園燈火夜。向花前。暖酒談遊子。待說起。怎生睡。騎驢十載長安市。笑依舊。青衫短劍。勞人身世。早歲功名都道福。贏得漂零如此。須信道。年華彈指。種菜箸書當早計。問金門。射策干何事。再來者。有如水。

青玉案

春夜宿貽經書屋有懷

花梢細雨惜惜過。早夜靜。重門鎖。纔上燈時人已臥。淒涼天氣。淒涼庭院。著箇淒涼我。一簾苔霧鶯啼破。兀悄地。偎衾坐。曉月上牆桐影綫。今宵莫說。已經無夢。便有如何作。

滿庭芳

春試後小病數日始起至小園行散紅雨霏夕綠陰釀寒怨別傷春

益增無俚

春逐鶯歸。人如蝶瘦。恁恁負了流年。藥爐香靜。扶病到花前。門掩東風人去。者殘紅。還有誰憐。賸垂柳。恹恹似我。和雪壓秋千。深閨當此夕。紅簾押月。紫佩橫煙。想燈

屏扶枕。愁聽啼鶯。千萬今宵早睡。好相尋。夢裏憑肩。可能倩。胭脂將淚。飛向那人邊。

翠樓吟

十三夜對月有憶寄王嘯篁丁藍叔

鎖了重門。碧梧疏處。湘簾夜深猶卷。露雅棲定後。只秋興、竹聲撩亂。單衫小扇。想花  
景吹笙。那家庭院。無人伴。冷清清地。回廊兜轉。腸斷。滿地蕉陰。靠紅闌幾摺。和誰  
同看。蘇家潭上路。正小曲、幽坊月暗。桂堂南畔。閒刻襪香街。甚時重見。無眠慣。燈窗  
數盡。玉河新雁。

西子妝

東陶琴子

溼翠黏衫。涼紅暈燭。秋在畫簾疏處。病懷已是怕黃昏。更禁他、者宵風雨。西窗人去。  
冷落了、梧桐一樹。鎮蕭蕭向殘更。訴我恁時情緒。愁無語。閒畫鑪香。寫就懷人句。  
高城只在雁聲中。又溟溟、黑雲遮住。思君何許。記十里、蘆花江路。泥秋衾、待把夢兒  
重作。

浪淘沙

又見月當頭。大好清游。浮生何事費閒愁。貧到酒錢無一箇。也過中秋。銀漢拍天流。桂子香浮。醉腰銅笛喚沙鷗。三百年來無此樂。羽服黃樓。

念奴嬌 病起書懷柬一二故人用玉田客中寄友韻

黃花近也。嘆年年、病臥茂陵秋雨。杯酒西風身世感。對此茫茫誰語。十口雞豚。一官牛馬。家國終何補。江關搖落。庾郎新賦枯樹。眼見下涇田荒。灤西屋破。百事都非故。衣食一身猶未辦。何況文章千古。種麥東坡。煮葵西崦。生計憑商取。雲門笑指。此中大有佳處。時遊雲門

沁園春 送陶海琴遊吳門

把酒淒然。歌行路難。奉君一觴。嘆成名鄧禹。笑人寂寂。言愁衛玠。對此茫茫。狗肆奇材。馬坊賤客。潦落中年亦可傷。愁無語。又孤飄落木。吹夢錢唐。鬢絲新點吳霜。有落魄樊川十載狂。向要離冢上。澆他熱淚。伍胥塘畔。浣爾愁腸。白雁關河。黃華風雨。定上蘇臺一望鄉。休回首。道六朝煙樹。一半斜陽。

浪淘沙

六曲小屏山。杏子單衫。笙囊如水玉。雙燕和人同不睡。商略春寒。香霧溼雲鬢。迢遞慵彈。重門深鎖。牆裏梨花。花上月。花底闌干。

邁陂塘

春晚坐寓園桃花下寫懷

下湘簾。綠濠濠處。涼雲漸送春暝。小桃紅煞。斜陽裏。閃得蝶魂無定。風又緊。看碎糝燕支。繡筒春愁影。蠻紗香靜。恁負手尋花。扶頭中酒。又做去年病。蘭閨裏。也有一株湘錦。橫枝正嵌窗鏡。者時料已開成雪。都與茜裙爭靚。離夢醒。恐一桁珠闌。閒煞無人凭。將愁和悶。好寫上銀箋。倩他燕子。寄箇斷腸信。

金縷曲

丁未春試落第將歸南中瀕行杜五樓同年鳳溥以扇索畫置行篋

中久未得報。皋月八日泊舟廣陵。纖月依人。涼煙熨夢。聞鄰舫擲笛聲。曼音淒語。根觸旅懷。因呼燈寫墨梅一枝。並倚此解寄之。安倩吹笙雙髻坐向蘋華香裏歌也。

垂柳揚州驛。又客裏、忽忽過了。落梅時節。一縷春魂和月瘦。揉作笛中波折。看此夕、孤篷江北。自碾冰華和別淚。寫相思、寄與天涯客。酸楚意、問誰識。東風兩度長安陌。算賸有、殘香似我。一般飄泊。那倩玉籠雙翠羽。細把者情重說。笑減盡、青衫愁骨。君見此花如見我。道大家、風味清寒絕。珍重此、數行墨。

邁陂塘

下第南歸謁文之兄滬上夢西招飲并賦永遇樂詞命雛鬢歌以侑

酒卽席寫懷

恁恩恩、槐花夢醒。天涯人又歸去。漂零滋味嘗都慣。說甚青衫遲暮。須醉舞。便海樣黃金、買得春回否。壯懷休訴。且醉臥花邊。接羅倒戴。把酒酌飛絮。新詞就。分付雛鬢細譜。江南腸斷狂鑄。琵琶彈得花都怨。只有江雲寒語。君看取。看煙柳斜陽、盡是愁來處。歸心正苦。把今夜樽前。一襟秋淚。飛做越谿雨。

又

同人也是園觀荷夢西邀和此調既歸久思未屬夜分不寐聞雨聲蕭然

因就枕上成此時夢西有吳門之行予亦將還山陰

便朝朝。花邊載酒。還能消幾歌舞。鬧紅已較頭番減。何況又添離緒。愁絕處。道水閣風簾。人去花誰主。殘香無數。但萬綠濃邊。涼雲如夢。一鷺共秋語。欹枕裏。寂寞疏燈窗戶。暗蟲偏傍人絮。客心還比花憔悴。禁得者宵風雨。腸斷句。待讀與花聽。又怕花悽楚。問花能否。化一縷秋魂。盈盈煙際。隨我渡江去。

永遇樂

登丹鳳樓望黃浦懷陳忠愍公同夢西素生兄樓在滬城東北女牆

上宋淳熙閒立

放眼東南。蒼茫萬感。奔赴欄底。斗大孤城。當年曾此。笳鼓屯千騎。劫灰飛盡。怒潮如雪。猶卷三軍痛淚。滿江頭。陳雲團黑。蛟龍敢嚙殘壘。登臨狂客。高歌散髮。喚得英魂都起。天意倘教。欲平此虜。肯令將軍死。只今回首。笙歌依舊。一片殘山賸水。傷心處。青天無語。夕陽千里。

念奴嬌

初十夜得素生泰安旅次書賦寄

尺書飛到。訝秋聲、滿紙淒人心魄。客裏思親兼憶弟。極目吳天空闊。荒店聞雞。亂山

躍馬落日孤城黑。艱難行路。青衫搵淚都赤。可奈負米長貧。讀書最賤。受盡天磨折。想爾高歌燕市上。劍斫唾壺紅缺。落木關河。西風碓杵。一片歸心裂。不知今夜長安多少明月。

又 十二夜陪月村先生登長洲廡東小閣看月時江北諸郡縣大水卽事拈

前調寫感

月吾問汝。照幾家。歡讌幾家漂泊。剗盡吳山千萬疊。放眼大江南北。雞犬荒涼。魚龍跋扈。烟樹長淮黑。戟門深處。此時歌舞如織。可笑王粲窮愁。賈生痛哭。何補匡時策。但得昇平溫飽過。說甚杜陵契稷。臥看諸公。龍驤虎步。隻手回天劫。腐儒無用。登樓且醉江月。

又 十四夜乘月至三多橋酒樓是舊與虞卿飲處日月幾何歡游不再賦以

哭之

河山滿目。暮驚心。又到黃公壚側。腹痛一杯遙酌汝。不暖秋墳愁骨。世更誰容。天胡



此醉特造龍蛇阨。西州重過馬。搗撞處都折。尚記跂腳狂呼。濡頭泥飲。醉舞參軍。鶻歷歷都如前日事。詎料竟成長別。萬種消沈。一身潦倒。淚盡西家笛。爲君惆悵。夜臺可有明月。

又十六夜對月讀湖海樓詞輒題其後

髯乎堪恨。占詞名。一代竟無其匹。早歲紅牙添韻事。傳唱六宮都徹。宰相衣冠。黨人子弟。老作梁園客。功名五十馬。周久已頭白。知否二百年來。替人屬我。來與公爭席。白寫江南腸斷句。恨少紫雲擡笛。餘子徒勞。此才不易。鹿角誰當折。花前清嘯。詩魂飛下寒月。

蝶戀花 九月初二夜雨過垂虹橋書感同夢西

細雨悵悵篷背滴。篷底羈人。自展單衾褶。夢又不成燈又黑。亂雅聲裏天如墨。似酒濃愁無處說。待倩雙鴻。遠向天涯覓。橋外楊花橋下客。可憐一樣傷漂泊。

醉花陰 初三夜泊石門縣微霽見月同夢西

吹笛語兒城下路。颿卸明湖樹。城上月濛濛。城下垂楊。尙溼前朝雨。自檢麝囊燈  
畔覷。費盡閒情緒。無賴是秋鴻。但寫人人。不寫人何處。

采桑子 舟夜雜憶寄閨人

一更抵死催儂去。纔別湘屏。又上吳舲。搖過垂虹卻四更。掩篷臥聽松陵雨。熨徧  
羅衾。不放天明。愁要尋人夢避人。

前年聽雨雙橋下。病酒懨懨。悶譜香絃。疏柳殘燈傍曉天。今宵聽雨雙橋下。依舊  
無眠。陡憶從前。孤燭單衾又一年。丙午九月曾泊此遇雨有斷腸名字說雙橋消受  
單衾孤燭又今宵之句

紅閨只恨蘭宵短。卸了殘妝。倚遍迴廊。月在櫻桃樹底黃。可憐此夕篷窗宿。費盡  
思量。挨徧淒涼。不信離家夜便長。

連宵只是心情惡。孤榜寒燈。睡思瞢騰。紅葉聲中到石門。想他對坐紅窗下。繡幙

沈沈。私語殘更。此際蕭郎睡未曾。

憶江南 重九日泊舟虎林水窗無俚戲與夢西追憶舊游漫賦十解

重九節。十載住吳門。花舫虎邱擔菊市。簪籃獅巷買糕人。此景最關心。  
重九節。記得客常山。樂墓草黃羣犢健。趙祠樹黑怒雕寒。落日井陘關。  
重九節。記住保陽城。都市黃羊蒸玉鼓。津門紫蟹糝金橙。風味醉騰騰。  
重九節。記得住蟠門。紅柏晚風深巷笛。黃花細雨矮窗燈。小院對牀人。  
重九節。記返越谿邊。十里青山堆稻路。一湖纖月賣菱船。畫出暮秋天。  
重九節。記得住燕京。一騎泥金朝看榜。兩行銀燭夜調箏。裘馬五陵人。  
重九節。記泊孟吳音。作雨城時。山榭葉圍詞老宅。水荳花瘦女郎祠。吹笛雨絲絲。  
重九節。記得在山塘。水閣月晴歌板脆。畫船風細繡鞋香。鬢鞞菊釵黃。  
重九節。記得滬城宵。翠鉦簾櫳鸚鵡。珠燈樓閣鷓鴣簫。夜夜醉紅橋。上海地名。  
重九節。今夜泊杭州。閒搯綠根思往事。自揩紅葉砌鄉愁。擁被一篷秋。

南鄉子 舟夜寄閨人

客榜又天涯。翠被鄉愁一倍賒。生怕東風攔夢住。瞞他。侵曉偷隨燕到家。愁憶小窗紗。寶幔沈沈玉篆斜。月又無聊人又睡。寒些。門掩紅梨一樹花。

祝英臺近 孤館積陰獨居無作黃子芾孝廉增祿持曉風殘月圖便面屬題

爰賦此詞以攄歸思

暗潮生。纖月暝。解榜越江口。脈脈新愁。堆上短亭柳。有人玉笛聲中。羅衾如水。者歸夢。比鶯還瘦。正傷憊。道是芳草吳天。何處重回首。燭冷香溫。滋味儘消受。可憐落盡桃花。春寒孤館。怎捱得。酒醒時候。

菩薩蠻 春夜不寐

單衾春冷無人覷。心情只是恹恹地。費盡睡工夫。思多夢轉無。看看窗紙白。矧了花梢月。酒醒曉鶯時。者愁除枕知。

洞仙歌 東園夏潦後花竹池臺半就荒圯秋日偶坐魯舍見牆角秋海棠一

叢含露將放賦此誌感

銀紗窗子。漬苔痕都壞。幾摺雕闌斷猶在。者淒清池館。花也慵開。便開了。料得也無人戴。柔腸無可斷。脈脈西風。減盡當時舊腰帶。一桁小迴廊。病蝶飛來。怎瘦得。更無聊賴。又滿地。蕉陰夕陽時。悄負手沈吟。退紅簾外。

水調歌頭

吳門旅夜雨寄懷季貺

星詒

積暝動江郭。秋色滿吳宮。冥冥萬家樓閣。都在雁聲中。此際天涯夜雨。多少聯牀兄弟。袂被暖西風。用坡公語。獨客耿無寐。枕手聽疏鐘。溫玉茗。燕銀葉。興都慵。打窗簌簌如語。冷翠下疏桐。想得木犀花底。獨展陳編消夜。簾閃一燈紅。念此感寥落。歸思落烏篷。

齊天樂

秋日曲池看芙蓉地本明陳海樵別墅後歸安定梁氏故相國文定

公第也

斷橋衰柳荒寒外。來尋舊家池館。粉堞欹苔。文窗鎖荔。寂寞無人尋翫。芙蓉開徧。看影寫銀塘。香支珊檻。凝立西風。重提往事更腸斷。當年花底高會。有錦袍銀燭。翠

裙羅扇。綠野琴樽。烏衣門第。都是此花曾見。如今誰管。任冷月疏煙。做伊秋怨。獨客青衫。落紅和淚滿。

臺城路 上元後一夕雨次丹陽小病賦寄閨人

不多時候窗兒黑。雨聲又催人起。欹枕搜香。背燈絮影。只是悶懨懨地。怎生調理者。小極心情。薄寒天氣。新舊啼痕多。應斲了舊鴛被。料他玉窗今夜。鎮低鬢促坐。細梅花底。麝帕傳柑。猩茸纏繭。不似年時歡喜。剪刀聲裏。也多分黃昏。一般無睡。對搭春纖。把郵程暗計。

金縷曲 孫杉麓慶咸同年下第將游汴中索畫梅一幀爲別并題其上

歡笑真無幾。纔聽得、流鶯聲老。故人行矣。一幅緗枝和淚寫。多少酒邊深意。也不分、空山拋棄。獨立自矜顏色好。怎春風、輸與閒桃李。襟上淚。甚時洗。人生榮落何須計。君看我、鮎魚上竹。冷官滋味。藥省蘭臺吾不願。薄宦廿年而已。但及早、買田鄉里。他日白頭湖上路。好同來、結屋梅花底。鷗鷺約。倩花記。

祝英臺近 上海舟次

擘鸞釵。寒麝炷。說也甚情緒。雙槳蘋香。又到斷腸處。可堪花外潮生。柳邊月落。驀記起。別時言語。恨千縷。好與倩箇幺鶯。殷勤替採取。料得妝臺。長是翠眉聚。問他一抹高城。攔將人住。可攔得。夢魂來去。

熨愁痕。尋夢跡。待撇怎生撇。記得年時。扶病送時節。可憐微雪重門。呢人和淚。卻剛是。仲冬廿七。鎮淒切。何日一舸春江。來迎小桃葉。翠羽珠鈿。重把舊盟結。儘判折了浮名。櫻桃花底。消受箇。半生憐惜。

鷓鴣天 自奉賢道南橋至葉謝口數十里廬舍幽曠水木明瑟慨然有卜居

之志雜寫小詞六調歸示季子使讀之恍然如與僕同遊也五月二十六日  
路入南橋客思閒。水鄉風景畫圖間。密蘆繞屋渾疑海。老樹遮門便當山。一路皆無山。波似鏡。岸如環。清溪曲折小舟還。歸人暗識村前路。逢著垂楊便轉彎。

港子東邊阿那家。籬根白槿亂開花。病翁縛篾籬籬新竹。村女分筐焙早茶。溪百折。

路三叉。潮回淺草漾明沙。牛亭靠水無人語。長日松陰響水車。  
一種陂塘綠可憐。板橋低亞不通船。蘋花淺水初鳴蛤。槐葉濃陰尙等蟬。  
日如年。誰家水閣枕溪烟。蠡窗半拓湖風裏。短榻茶香正午眠。  
水枕拋書睡味長。溪行半晌少村莊。前灣知有人家近。一徑風來豆粥香。  
樹支牆。午雞聲裏綠陰涼。開門怪底兒童鬧。門外枇杷一樹黃。  
夏至江村正好嬉。老紅生翠一川迷。田娘箬帽分秧去。鄉客泥船載草歸。  
水禽啼。日斜官路過人稀。一陂野葛花如雪。蚱蜢蜻蜓歷亂飛。  
紅蓼梢頭漲碧波。黃瓜涼粉一舟拏。菱雞掠食衝門出。花犬隨人泅水過。  
午煙拖。橋陰密密轉松蘿。趁墟人散村扉掩。一路書聲竹裏多。  
宵雨歇。

浣溪紗

篷底燒香獨賦詩。青蘆葉上雨來遲。玉鵝衾薄酒醒時。  
約錦屏知。不多時別更相思。  
的的歡期銀燭見。依依歸



湘月 玉簪花同素生季貺

青娥試手。翦秋痕洗出。幾棱寒玉。十丈瑤階清似水。飛下仙鬢鈿雀。碾得烟鬆。搓將月軟。一搦冰華綠。湘奩覲處。纖纖新樣難學。果然光暈珠翹。香欹晶枕。影禪瓊枝弱。風露誰家庭院裏。鬧掃殘妝初浴。拾翠人歸。墮釵聲定。驀記年時約。搔頭慵整。夜涼簾外花落。

慶清朝慢 癸丑醉司命日雪後晨起坐東鷗書堂同陳九經歷在心家弟季

貺試茶分韻

饑鶴拳苔凍禽墮竹。虛堂似水無人。裏頭兀坐。夜來殘雪微晴。一卷楞嚴轉罷。黃梅花禪小窗陰。垂簾處。蒲團軟美。松火通明。試約西鄰陳九。趁閒時料理。湯社茶經。寒香石銚。騰騰細煮松聲。未要玉纖輕捧。一壺春綠養詩心。憑相笑。淺斟低唱。負了銷金。

疏影 童二樹先生墨梅

雲。皴。月。灑。乍。墨。花。孕。出。春。影。都。亞。縞。袂。青。裙。一。搦。東。風。盈。盈。玉。骨。堪。把。鬢。雅。樵。悴。胡。沙。遠。腸。斷。宮。人。初。嫁。卻。似。儂。入。洛。緇。塵。空。使。素。衣。侵。惹。坐。憶。西。園。俊。侶。悵。吟。社。散。後。遺。事。難。話。先生與商寶意太守劉豹君明經輩結社號西園十子重展冰華卷裏詩。魂。應。共。寒。香。飛。下。蕭。齋。殘。雪。氈。側。且。細。對。畫。叉。吟。寫。暮。冷。紅。梢。破。蘆。簾。牆。角。野。梅。開。也。

鷗

運



夢

詞

劉履芬（道光七——光緒五）

字彥清。號泖生。浙江江山人。以佐幕勞。致補用知府。  
充蘇州書局提調。攝嘉定知縣。縣民有爲臺憲捕殺  
者。知冤不能掾。因大慟自刎死。工詩詞。文亦淵雅雄  
厚。有古紅梅閣集。

鷓鴣夢詞

江山劉履芬彥清

浣溪沙

淺碧陂塘水蹙羅。麴塵香裏柳痕搓。醉人風味近簾波。  
啼鳥意闌催曙早。賣花情重報春多。昨宵有雨奈愁何。

水龍吟 自題寫秋心館圖

暮雲低掩文窗。薜蘿隨處宜秋色。閒階小雨，垂花門下，一燈明滅。蟀不成吟，蟬猶餘唱，勾人怨切。更江鄉冷峭，白蘋風起，都併作愁來跡。  
路到蓬山又隔。費平章、長楊賦出。牆東斷夢，城西闌夜，綺懷消歇。俊眼橫波，華年流水，從今怕說。判輕衫短帽，含情絮絮，老梁園客。

摸魚子 寄高茶菴司馬

繞柴門，幾株楊柳，江村光景如許。芳華轉眼憐蕭瑟，況是落英無數。津吏鼓，卻抵死

催儂。放槩吳淞路。涼蛩替訴。又煮茗場空。采菱曲老。尙念舊人否。風塵夢。澈底春蠶未悟。歡游中有悲苦。秋心好寫秋難寫。一半待君分與。儂正住。在水調歌聲、水閣魂銷處。西窗夜雨。賸杵冷霜前。鐘停月下。悄聽斷鴻語。

虞美人

沈沈裹著衾兒睡。是夢難成寐。曉禽啼醒海棠魂。惟有有情人解、與溫存。芳姿那段堪描畫。最好妝梳乍。簸錢年紀束綾歌。算說千金一刻、不曾多。

洞僊歌

乙卯北行答宋浣花茂才贈別

停舟問雨。碎芭蕉心未。不比尋常在家裏。任空江、載了多少閒鷗。春草外、恨字從新寫起。艣枝雙趁去。怪煞馮夷。只管風波湧平地。借酒與愁商。夢若能成。有戀戀、餘香枕底。等一點青天雁南飛。也抵得山中故人來矣。

霜葉飛

一鞭吟悄。穿城進、今年偏是秋早。初涼恰可換征衣。正月低星曉。漫數說、吳山景好。

不如身抵僊瓊島。況五朵雲開。也許有香痕。酒痕添做詩料。猶記翠墨書裙。鸞枝  
卻扇。萬千愁語嫌少。鞦韆架底阿誰家。見綠鬢欹倒。怕隔歲。青桐暗老。夜歸重寫懷  
人草。便落魄江湖去。兩字平安。寄聲相告。

憶舊游

寄答陳曼壽廣文

記扶菱雨碧。浣蓼波紅。逸興涼秋。爲怕添離思。避津亭一里。繫住行舟。片言解開愁  
抱。芳杜證清修。甚草草心期。飄飄淚影。西子湖頭。前游負儂約。耐小病從容。穩睡  
香篝。暗憶登高去。有霜禽欲下。冷面含羞。酒邊苦無聊賴。金印話封侯。倩壁月梧窗。  
憑他夢識宵恨留。

卜算子

丙辰南下夕宿南沙河讀秣陵硯芬女史丙申題壁詩吁蛛網半銷

麝煤不滅一片傷心不堪說起也

燈背夜情孤。牆腳春愁重。十二年如水樣過。不盡分飛痛。孤行一千里小膽偏粗遠  
別十二年狂夫不諒詩序中句 郎似豆花驄。妾似桐花鳳。但想夫憐到白頭。勝作

鈞天夢。

長亭怨 秦淮枯柳和孫月坡茂才

又風裏楊花吹緊。斷送當場。六朝金粉。便鬪腰肢。小蠻非復舊丰韻。暮笳聲慘。扶荔院。芳菲盡。不待訴飄零。早耐了。寒鴉如陣。消損。記清秋蕩槳。淚眼隔窗相引。黃驄曲好事留得。永豐春訊。任想到。柳宿光中有天語。殷殷垂問。等夜泊歌闌。同說離人長恨。

疏影 殘菊

淒霜碎月。看湘簾窳地。秋意端的。幾處關山。斷續疏砧。剛換數聲啼鴉。東籬俊侶還依舊。只賭酒。旗亭先歇。正小園。晚景偏多。付與敗香零葉。離恨何時再訴。有人乍病起。初試弓屨。畢竟厭厭。下了苔階。不是那番嬌靨。尋思去歲重陽好。儘醉把。茱萸愁絕。怕夜深。檢點冰奩。已壞襪鴛裙蝶。

浣溪沙



蜥蜴門屏。蛺蝶階。一雙纖手理金釵。十三箏語幾時諧。紫鳳偷窺描黛鏡。紅蝠催  
辦踏青鞋。曉風吹夢又秦淮。

摸魚子

雁聲天外遠。鷗語夢中尋。此葉香士明府道芬題余秋心圖句也。丁

巳復將入都。黃孝侯太史銍爲作鷗夢圖以寄水鄉秋思。題寄香士津門。

半江風。水蒨花好。驕人容色都麗。蘭橈載爾。心魂悄。蹤跡鷺邊能記。儂去未。已飽喫  
蒹葭。預作休官計。新愁兩地。但掬淚黃鑪。論心白社。奉檄爲親喜。行裝少。故物青  
氈料理。箏塵猶帶香氣。長亭夾路驚鄉夢。隔斷越吳頭尾。儂去矣。買一箇疲驢。要解  
尋詩味。歡場有幾。恰醉裏偷閒。茶餘絮別。冷伴趁秋霽。

齊天樂

孫月坡茂才贈詞有惜別之意。賦答卽題其聽鶻詞後。

廬山面目。湘波影。前塵不勝淒楚。露近蜚單。雲遙雁瘦。迎得桃根同住。荒雞夜午。只  
喚起歸心。板橋秋雨。泥唱雙鬢。載將簫管那邊去。垂楊慣知惜別。庾郎青鬢老。誰  
問枯樹。夢怕愁分。眉綠酒放醒也。模糊儂汝。離蹤四五。況到處兵戈。暮年詞賦。恰有

新詩。翦燈人寄與。

惜秋華 秋夜病中不寐

四顧蒼茫。聽潺潺漏下。三更初轉。曲檻弄風。風醒夢魂。吹倦吟懷。瘦不禁秋。賸砌角。湘花埋怨。宵短悄微雲。一抹征鴻聲換。重把寄書看。已冰心冷透。鑪灰香篆。蘇雨瘦階。飄落翠鈿零亂。黃姑也苦家貧。況拔宅飛昇。雞犬腸斷。茜窗陰。天涯路遠。

菩薩蠻

星期怕說紅生頰。偎娘故意翻鍼帖。葉底聽流鶯。一聲低一聲。燕支酣夢醉。瓊樹迴環翠。好與下朱簾。清歌昔昔鹽。霞光歷亂桃花影。銅瓶綆短僊源冷。藕孔剖絲開。賺他胡蝶來。羅衣涼到骨。恰爲初三月。不到玉梅時。休描女字枝。

一行涼雁橫秋碧。西山猶有憐人色。摺起月華裙。幅中多畫雲。丁丁欵了鳥。鸞使何時到。金井夜啼鴉。無心數落花。

歡來新曲黃金縷。浪將歡語傳鸚鵡。此事十年前。菱花別一天。綠窗尋舊約。鎖斷雙魚鑰。錯說醉時容。離愁如酒濃。

金縷曲

火樹星橋閉。又新春、燒燈過了。歲時游記。鏡卜歡聲都聽盡。裙帶生生送喜。料一別、鬢偏腰細。暗地增憐儂孤負。儘單牀、各辨孤眠味。愁與病、倩誰替。離心不合東君寄。只頻添、惺忪把酒。自家調理。禁暖禁寒儂知得。今夜驂鸞月底。將息好、千金身體。陌上花開征人遠。數歸鴉、莫更南枝倚。望不到、路千里。

鎖窗寒 秋海棠

敗蝶吟香。癡蛩佇語。半侵牆角。三生替恨。忍待斷腸人覺。淚霏霏、粉勻露搓。六州鑄出相思錯。怪玉烟欲化。湘痕輕卷。竟迷歸著。收卻閒簾幕。縱病酒眠遲。莫燒畫燭。垂絲影老。尙許瑤階漂泊。怕蹉跎、梅聘未來。西風又報霜信惡。趁妝臺、綵勝翻新。豔色從伊學。

浣溪沙 春倦圖幀

冰簟平鋪日影遲。鬢雲無力壓花枝。和風倦倚繡欄時。  
心字香燒酬薄命。眉痕春  
皺託微詞。休將好夢與人知。

滿江紅 齊玉溪茂才瀟湖漁隱圖

蘆荻蕭蕭容幾箇。千秋漁父。問倦客。心情誰是。不如歸去。豪士要除湖海氣。釣徒祇  
合烟波住。入荆溪。原有寓公山。催雙舻。休再說。聞雞舞。休再結。盟鷗侶。愛推篷風  
日。落篷烟雨。報國難平西子怨。浮家試喚樵青語。待暮潮。聲裏急回船。忘更鼓。

高陽臺

抱柳鴉枯。偎花蝶老。荒庭月子彎彎。三九時光。和愁扶上屏山。宿醒料沒秋知覺。問  
何人。解唱刀環。怪鄰家。笛裏偷聲。怨曲新翻。香塵盼斷青絲鞵。賸蘭姨影怯。梅弟  
魂單。訴恨孤燈。憐儂長鉞空彈。尺書難託游鱗寄。倩冰輝。分照雲鬢。又敲窗。病葉欺  
人。做冷更番。

眉嫵 河東君小像

問春時紅豆。曲裏青燕。何處寄憑弔。小劫滄桑淚。傳神筆。風流誰寫遺稿。絳雲夢悄。  
恁阜紗。欹側偏好。薄游事。七夕歡期訂。比牛女盟早。修到雙星天巧。東林點將錄。  
以牧齋配天巧星爲定情詩出。郎意顛倒。自惜驚鴻影。柳原姓楊。自號影憐。茸城路。  
匆匆誰送歸棹。絮飛燕老。又故宮無限衰草。把夫壻長憐。釵釧卸對妝笑。

蝶戀花

綵筆銀屏題未滿。訴盡鸚哥。卻怪鶯啼緩。隔著深深窗幾扇。斜陽徧地無人管。行  
到中庭芳草短。杏子衫輕。自把珠簾捲。去也爭知春近遠。梨花似說瓊魂怨。  
幾日游蜂飛絮趁。乍見生憐。憔悴春人鬢。過後韶華如玉蕩。朱顏不似當時俊。道  
是愁多蛾淚損。別夢依依。雙頰添朝暈。開到醺醺風有信。奈他燕子歸無準。  
芍藥樽開三月暮。一曲琵琶。演出將離譜。除卻神僊無洞府。啼鶻何苦催人去。畫  
徧苔文釵半股。怕說登樓。簌簌連宵雨。銀燭初銷天欲曙。斷魂祇在閒庭戶。

翡翠樓臺銀漢隔。剗地罡風界破啼痕碧。翻酒羅巾和淚溼。連枝化作殷紅色。生  
怕雙鬢吹怨笛。一晌遮攔隱語分蓮萼。孔雀東南無處覓。鴛鴦千百從渠隻。

玲瓏四犯 十刹海觀荷和張松坪詞部德容韻

萍泊生涯許片席中分。鷗國餘地。一水娟娟。清澈軟紅塵裏。行處細柳平橋。早領略。  
鷺汀涼意。問夜來風露新霽。消息汜人知未。大隄飛絮。卿能記。訴纏綿。玉溫香膩。  
憐儂憶汝朝雲怨。得藕同心締。憑仗豔曲訴愁。有不少東西魚戲。又暮鴉飛去。宮樹  
外鐘聲起。

長亭怨 送人南旋

看游子。天涯羈旅。誤我功名。賺人遲暮。未到臨分。早經飛夢潞河樹。墜歡難續。收拾  
起。空中語。不寐數更籌。但畫角。嗚嗚來去。無緒。歎牀金易盡。賸有鬢絲如故。今宵  
月冷。問明夜。聽風何處。更莫說。拂面花多。早贏得。嬋娟相妒。好日對篷窗。閒寫悲秋  
詩句。

南歌子

膽比梅花小。眉如柳葉彎。曲屏風外卽長干。兜起鳳鞋，行路本來難。箏弱冰遮扇，窗疏月墜丸。不知何事轉心酸。只揀纖纖梅子，插螺鬢。

疏影 寄孫月坡茂才並題乞食圖

開襟話月。甚河橋別後，愁緒難說。隔了黃河，隔了青山，還隔幾層煙堞。曾經伍相祠邊過，問可有、吹簫人識。儘耐他、路鬼挪揄，東郭祭餘分得。一樣歌場點拍，折腰五斗米，空寫殘帖。落葉征袍，強擘吟箋，和入九城笳笛。巢痕不信朱門改，只燕子、驚心爲客。算故鄉、大好湖山，商略草堂資乞。

瑤臺第一層 舒鐵雲先生西陽修月劇本己未春題

賴有僊蟾能作主，清輝徹夜同。一輪香滿，一彎眉曲，冰液雲容。不周山觸倒，未了緣，缺陷重重。補天手，倩吳郎揮斧，斤運生風。馮空桂枝攀得，隔簾密語兩心通。怕他偷笛霓裳法曲，錯記丁冬。漫尋靈藥去，歎鍊石難補愁紅。化工工願當頭長是，七寶

玲瓏。

金縷曲 題蔣劍人茂才敦復碧山白雲草窗竹屋填詞圖並以寄懷

畫箇閒庭宇。四周圍、疏疏密密。幾重雲樹。排闥晴峯將綠送。安樂行窩小住。添一幅、瀟湘琴趣。好竹山連清夢愜。掣鯨波、又作中流舞。家國恨、了無補。大江東下征塵苦。莽回頭、雙聲紙閣。君又有紙閣雙聲圖。寸心千古。稽首楞嚴僊十種。卷中句、供養香花領取。判獨向、僧廬聽雨。嘯鳳孫郎今不見。月坡茂才鬱輪袍。莫更逢人賭。愁黯澹。歲華暮。

浣溪沙

昨夜銀荷燼未灰。雲屏九疊沒人來。銅環鎖卻一層開。聞說青山能解笑。重傾綠海與傳杯。斑駁真見陌頭歸。

月下笛 庚申中秋

織雨如塵。綃雲入畫。舊歡都杳。笙歌縱好。負他鶯燕多少。雕鞍繡轂芳蹤斷。但一杵



疏鐘破曉。向黃金臺底。年年別有。倦游情抱。寒早。鄉音報。恁寄得梅花。更無書到。雙修願了。客愁多付秋草。青霜匣劍橫空掣。恨短髮、窺人易老。判撇卻、月兒高長伴歸鴻夢繞。

疏影

鶯花滿目。甚風風雨雨。春意綿邈。算不分明。輕暖輕寒。天氣困人如昨。梧桐瘦損琅玕碧。肯忘卻、三生鸞鵲。便夢中、語笑無多也。逐曉雲吹落。階下青棠早發。合歡話故事。酸淚盈掬。任爾輕分。願作牽牛。莫作無情張角。南朝自古傷心地。寫不盡、蘭成哀曲。怕夜窗、又對銀燈。聽到一聲風鶴。

點絳脣

影事休提。素娥長作勞人伴。玉關春遠。白雪桃花捲。花下蒼苔。花外東風軟。歡愁判。翠樽誰勸。盡日鶯千轉。

憶舊游 題玉叔弟郎峯耕釣卷子

是鳴榔款夕。倚杖貪晴。百事消除。寥落家鄉夢。記溪山深處。有箇吾廬。舊時數間茅屋。今日想荒蕪。任歲歲情牽。翛翛境好。且讓樵漁。何如買田住。繞丙舍門邊。親蒔園蔬。勘破儒冠誤。對三峯無恙。中隔菰蒲。小船趁人搖去。收過一冬租。儻憶我行程。連天雨雪剛跨驢。

長亭怨 辛酉出都留別同人

歎銷盡、間關輪鐵。碧草蘆溝。短長程接。已是離亭。忍教攜手話離別。少年裘馬。春夢斷、無從說。一一數歸舟。數不了、千帆雲葉。孤子。望江南不遠。只有五更殘月。荒烟冷戍。又聽徧、子規啼血。最苦是、翠管湘娥。怕蘭蕙芳情都歇。便約定秋期。杯酒譚心難必。

又 津門客次留別同人

又重把、離情勾起。一碧平隄。片帆搖曳。歎息飛鴻。北風淒緊住無計。暗塵生硯。真悔索長安米。禿盡黑貂裘。恨只恨、花銷英氣。歸矣。料空山瘦鶴。那得饋貧糧寄。天寒

獨守笑昏夜。乞憐貂尾。悄囑與、鼓瑟湘靈。要推倒、魚龍騰沸。更淚滴琴尊。相見悲歌聲裏。

虞美人

鸞蛾不似從前盛。微響釵頭玉。絲絲垂柳縮春心。只恐郎來、沒處教郎尋。高唐風月巫山雨。夢也無憑據。夢魂昨在柳梢頭。一角夕陽盡處、是紅樓。

鎖窗寒 海上雨夕

燕語歡疏。鳩呼睡起。日長烟潤。吳娘暮雨。換得那時雙鬢。憶銅街夜分慣聽。落紅隔苑悲茵溷。歎半生奔走。歌離弔夢。帶圍寬盡。歸信。今朝準。恁故劍難逢。彩鸞寫韻。寒衣線跡。細把濤痕重認。又階蛩牆蟀。覩人玉容掩抑。珠淚搵。算無家別後誰知不。獨江南恨。

金縷曲

四海萍蹤倦。判年來、籌薪數米。綠蛾緘怨。侍婢並無珠可賣。一帶炊烟散亂。又補屋、

牽蘿相勸。且喜生歸貧亦好。破征裘、尙抵黃綿暖。蕉雨急。夜將半。霜笳作響繁華換。儘傷懷、玉簫奏徹。玉驄嘶斷。苦說牛衣還對泣。艾炙瓜噴莫管。任拍徧、欄干無算。便不彈琴清興在。捲簾櫳、消得春風腕。腸九折。輓轡轉。

菩薩蠻

鴛鴦卅六回文錦。水精簾底獨兒寢。翠袖兩蛾眉。弄妝初出帷。貼胸金鏡子。蟲蝕相思字。持比月重圓。羅裾生暮寒。

長亭怨

漫回首、漂蓬零絮。如此江山。可憐鞞鼓。冷冷清清。夜燈相對鎮無語。瑣窗人靜。長記說、聽秋艣。宿雁起沙灘。算一樣、銜蘆辛苦。東去。問烏衣巷口。舊約夢邊樽俎。微波弄影。悄難覓、莫愁眉嫵。有幾許、敗葉疏林。怕歸燕、尋巢都誤。只世外冰娥。能共高寒終古。

揚州慢

荒苑螢涼。廢宮狐叫。舊情莫問秋鈿。悄瓊花一樹也。淚落無言。廣陵散。天風絕響。二分明月。何日圓全。黯楊枝殘劫。灰飛揚子江邊。玉人去後。又簫聲吹到吟箋。縱膽怯屠龍。身輕跨鶴。虛賦春妍。二十四橋歡夢。低頭數。往事成煙。怕麤蕪顏色。青青猶是當年。

摸魚子

潘麟生博士西湖餞秋圖壬戌秋補題

畫中山。畫中重見。迎人鷗鷺俱笑。百錢租得瓜皮艇。隨意六橋游到。秋正好。恰桂子荷花。十里香風繞。兜鍪戴了。又戰血星星。知心落落。不是舊鴻爪。登臨處。空牘殘鐘夕照。江亭離笛吹老。南都縱有詞仙在。極目馬塍荒草。君莫道。道走徧蘇隄。無處堪吟嘯。寒螿自弔。歎白馬潮迴。紅羊劫苦。闌夜語淒悄。

臨江僊

自有天然真本色。生成絕世風華。新鞋繡鳳鬢堆鴉。眼波流故故。眉意透些些。好事無端拋撇久。可人除是秦嘉。天台新種紫薇花。重逢剛一笑。得意飯胡麻。

見說鄰家諸女伴。輕裾賭踏春陽。明河隔處抵紅牆。不成驚蛺蝶。獨是繡鴛鴦。滿地飛花情脈脈。隨風吹過西廂。塔鈴無賴說郎當。料應憐宋玉。錯擬嫁王昌。繡戶閒扃金屈戌。愁心分付裙腰。台歡如夢恨如潮。幾生修正果。百結播情苗。自惜餘春留錦帳。須知此福難消。落梅風裏苦相邀。玉樓今夜月。雙照淚痕拋。三十種眠都入拍。酒邊教按銀箏。抱來秋影太玲峴。花香紅有韻。露重碧無聲。莫倚多時能顧曲。誤人偏是聰明。推開寶雁不知情。雕梁雙燕子。替與說零星。

轆轤金井

翠衾空對隔紗櫺。悄聽夜街更鼓。了了鄉心。甚勞勞。緇素歌成白苧。抵不過。荳梢情語。綽約花魂。迷離月影。將人留住。啼鴉再休怨訴。算今生願作。太平農圃。露葉風枝。已三分塵土。秋聲萬戶。又添得。幾家碓杵。買箇輕舟。明朝背卻江流西去。

淒涼犯

題徐芍欄孝廉翹五月落梅圖圖爲悼亡作

桐欹柳側。初寒起。孤吟不耐淒寂。聽烏樹近。分鸞夢遠。半庭春日。霜花暗惜。又三弄。

江城玉笛。締良緣。空牀錦瑟。錯認未歸客。無奈黃昏後。酒澀燈青。淚濃窗黑。畫樓紙帳。替招魂。雨聲千滴。解說酸心。有枝上、雙禽記得。倦開奩。月冷夜淺。鬢影隔。

浣溪沙

淚滴鉛華臉斷紅。淡妝人瘦小芙蓉。宵寒愁聽一窗鐘。魚妾緘音波撇尾。蟲娘按曲月填胸。偏儂惆悵畫欄東。

齊天樂 馬江香女史畫蝶冊

王孫又綠南園草。芳春百年彈指。鶯背偷偎。蠶心苦抱。裙褶金泥初試。翩翩鳳子也。逗作風狂。惱人情思。薄袂深涼。墜釵中寫可憐字。傳家更添一絕。別開句染法。林下清致。蒜押輕懸。蕙纖細劃。愁說秋娘身世。虞山雋事。恁月柳無聲。玉臺詩史。柳如是。有月隄煙柳圖見郭麐靈芬館集碧海青天返魂香在紙。

金縷曲 吳仲宣漕帥家盱眙之三界咸豐戊午賊陷滁州家室奔走戚里相

從者千百家自漕帥開府袁江逆燄漸平先後依助返邑作飛鴻歸鴻二圖

以紀往事各題一解

滿幅流民影。似監門、圖中血淚。上通天聽。暘雨偏災。開殺運。匝地狂烽四迸。從此作、無家蓬梗。兒女同舟。親戚共更荒荒。月色霜風勁。諸苦惱。付前定。桃源悔不維烟艇。武陵人。今番再到。避秦僊境。蓑笠琴書都棄卻。留得冤禽並命。待隻手、乾坤重整。一昔團圓非幸事。問蟲沙、猿鶴歸何等。含恨意。有誰省。

黍谷春回早。喜聯翩、中興郭李。大功成了。洗出光華新日月。萬里櫟鎗淨掃。有涕淚、盈襟重倒。邱壠松楸摧伐盡。已多年、麥飯無人弔。憑落日。送歸鳥。鄉園此際生歡笑。比平分、廉泉買得。義田都好。第一東南山不改。宋人題盱眙山曰東南第一山。秀色餐人欲飽。看縷縷、炊烟添到。天意初晴烏犢健。試新編、戶口贏虛表。耕與讀。永相保。

菩薩蠻

平蕪妒煞羅裙袴。臨風素手暉桃面。花氣隔牆聞。攔人內外分。並頭雙翠羽。只待



拈鍼去。繡線總成單。淚痕斑斑復斑。

### 長亭怨

好時節、家家梅雨。幾點殘鴉。欲飛還住。寂寞吳宮。綠楊低襯亂紅舞。客程都倦。憔悴煞、沾泥絮。絮化賸空枝。歎做出、秋風由汝。延佇。憶清樽送別。珍重玉鬢香霧。興亡不管。總輸與、隔溪商女。便等到、杜牧重來。已無復、枇杷門戶。借舊日青驄。閒說淒涼情緒。

### 二郎神

幾番喚起。僊夢穩、碧梧窗下。怪的的蘭情。冬冬蓮漏。添了聲聲鐵馬。任是春光如何向。已綠葉、成陰初夏。休暗溢鏡潮。嬌顰簾月。草痕偷畫。多謝。青廬待闕。鴛鴦新社。記眼角深盟。鬢梢款語。兜過薔薇半架。團扇低遮。單衣小立。長說去年元夜。又看到。真箇天游。載得粉兒歸也。

### 浣溪沙

手捲重簾換夾衣。曲廊西畔夢雲非。絕無人處見依稀。密約誤經鸚鵡喚，離魂料託鷓鴣飛。棟花風裏綠陰肥。

洞僊歌 雨中望惠山借楊見山都轉

雙螺翠聳倚船窗。清看潑墨雲低寫生絹。是真歸，莫再辜負山靈。明日好，結箇青鞋游伴。待儂攜酒去。白塔紅牆，醉了偏忘借池館。試品竹鑪茶，第二泉清，早撲下，緇塵一半。怪恁地無緣訂鷓鴣盟。蕩片片蘋花，細風吹亂。

高陽臺

影寫桐心，英餐菊尾，驚人老圃秋容。晚節生香，吳霜點上飛蓬。淩波又到橫塘路，有斜陽，都是殘紅。恁當初，花落花開，不與今同。瓊枝一例歸瑤劫，枉金鈴十萬，託付東風。強展顰蛾，愁雲鎖定眉峯。崔徽卷裏應消瘦，爲眞珠，密字塵封。儘良辰，好景無多，莫放杯空。

玉京秋

陸贄香廣文鐵，有騎省之成詞以唁之

歸槩急。秋魂雁驚醒。夢酸刀尺。玳押波平。玉釭燄炮。冰絃么澀。天上人間恨起。總難  
忘。三五時節。兩情切。舊巢雙燕。似會知得。鑄淚黃金休說。痛倉皇。扁舟泛宅。竹碎  
窗紗。芸銷盞粉。香拋瑤冊。越水吳山。有幾處。安穩相依鷓鴣。暗追憶。緣會他生未必。

菩薩蠻

輕紈畫作乘鸞影。黃鸝宛轉來三請。隔巷走香車。拂鞭楊白花。交枝金窸窣。好語  
冰絲續。殘醉怯空房。虛分上下牀。潮來自理春江楫。行雲飛處山重疊。夢裏恰相逢。生憎雨又風。卷施狂不死。好在  
無心事。果合住瓊樓。迎歸何處舟。

摸魚子

寄譚仲修孝廉獻

最沈吟。覓歌賒醉。籠燈題扇相許。文章不用西風哭。判送畫眉人去。鴛夢阻。怎十載  
南冠。應點蘭臺鼓。從頭記取。怪雨聽瀟瀟。花飛緩緩。獨在異鄉住。湖隄畔。冷落垂  
楊幾樹。孤山梅鶴哀訴。開天恨事憑誰道。箏雁一行低語。秋已暮。怕小小門邊。寶馬

無尋處。歸家更苦。料著破征衫。燻殘短燭。又寫斷腸句。

徵招

鄧尉梅花爲吳中勝境。枯坐病榻。不克往游。輒寫慢聲以寄遐感。

芒鞋竹杖探幽勝。偏儂與花無分。妒爾借蒲團。占盈盈芳信。翠禽眠未穩。怕容易、孟婆風緊。中酒驅寒。試燈消夜。片時偕隱。休問一枝開。冰霜劫、紅羅舊亭難認。雪海  
暗香空。已風懷刪盡。石湖簫語俊。有環佩、月邊來近。請重訂、後約嬉春。看牡丹期準。

詞 霞

運 筆



川 花 隱



李慈銘（道光九——光緒二〇）

字悉伯。號蕁客。浙江會稽人。光緒庚辰進士。官山西道監察御史。數上封事。不避權要。生平手不釋卷。俱見于日記。精思閱覽。尤致力於史。詩文負重名。已刻者爲湖塘林館文鈔。白華絳跗閣詩集。著述甚多。此其百之一耳。

自序

今天下之學未墜者其詞乎。蓋其道卑下其語輕弱。儂薄之士多好之。公卿大夫稍耆風雅者。又喜其近乎俳優諂諛。而稱重獎借。漸相模倣。於是上下靡然。以爲天下之不必讀書而工者。莫此若也。上之可以結歡貴要。爲曳裙吐茵之媒。下之可以說閨襜狎歌舞。采蘭贈芍。爲蹇修之具。酒邊花間。人爲一集。而世之變遂日亟。詞之雅道亦遂以亡。嗚呼。余所見世之人。蓋有喜爲淫豔側媚之詞。而所行務與之稱者。然則人之自託於文章。可不慎歟。予少不解此。其始爲之也。在道光庚戌。蓋較他所箸爲最後。其所作亦於山水間爲多。乙卯冬。嘗刪定爲一編。名曰松下集。自後作更稀。至間歲不得一二。入都以後。行事乖迕。精神流漂。感觸益多。篇什稍富。蓋美人香草之旨。所不免矣。士友傳寫。遂在人口。惡事千里。君子所羞。知我者以爲展禽阮籍。則可耳。鈔此編者。所以志予過也。同治壬戌四月。霞川花隱生自序。

霞川者。越地水名。而李氏世居其側者也。越西門外爲迎恩橋。下爲直河。古運河也。

東距姚江。西距錢江。而自迎恩橋西至高橋。凡五里。曰霞川。高橋以東。有邨曰霞頭。左爲青田湖。右爲大樹港。而迎恩橋之北。別爲橫河。橫河直河之間。予家焉。蓋自有明。迄今。歷十一世。五百餘年。田宅相望。不見兵火。至去年辛酉九月。粵賊陷紹。而故里盡焚。家藏困學樓書萬卷。無一存者。所爲松下集者。亦已化焦土之一塵矣。豈天之欲大吾學。而不欲以無謂之文字留於世耶。抑命之奇蹇者。雖無用之文。亦必使其泯焉無所見耶。豈以其技之不足以悅人。故爲之藏拙。而欲其求工於兒女子之所爲耶。是皆不可知也。則此編也。他日之傳與不傳。又不可得而知也。夫子之爲此。蓋亦在有意無意之間。而能必造物之去留哉。然則世人之愛憎。又烏所用其心也。題曰霞川花隱詞者。志無一日去其鄉也。霞川平直演迤。無幽深渺瀰之觀。其地衝要。雜闐闐。無他可稱。而川之兩旁。居人頗植桃李。春時花開。舟行其間。遠山映發。烟水瀾漫。每至晨霏夕暝之際。立紅橋上望之。層絳間素。迤邐若霞。蓋閒居之樂。歌詩之興。水邊林下。斯時爲多矣。故以自號。兼以名詞云。蒨客又書。



霞川花隱詞

會稽李慈銘菴客

浣溪紗

睡燕鑪香鼻午絲。碾茶聲裏捲簾遲。等閒又過日長時。  
棋局閒尋飛絮點，風箏兜折小桃枝。當年何事解相思。

少年遊 甲寅春日養疴柯山蘿菴僧院

暖風遲日杖藜輕。挂酒且閒行。山家桑柘溪橋楊柳，隨處聽啼鶯。  
歸來笑撚花枝嗅。茶榻午煙清。禪房似水香鑪鵲尾，剛對淨名經。

買陂塘 甲寅三月十五日別蘿菴將遊武林日莫下山桃花落盡徘徊渡口

爲賦此詞

但恁恁、蒲團一覺。仙源非復前度。亂紅飛盡清谿暗，誰與斜陽爲主。  
春又莫。問樹上流鶯，經幾閒風雨。畫船自渡。祇那日門前，依依流水，嗚咽學人語。  
還記得、倩影盈

盈載路。蝶裙鈿朶無數。斷腸只有花能解。費盡酒邊詩句。嗟我誤。悔不向花間、荷鍤同春住。明朝甚處。待載得香魂、蘇家墳畔。吹笛蹋青去。

金縷曲

杭州寓樓阻雨不得遊湖上

笛裏尋春起。恁恁江東客到。落花天氣。水樣年華塵樣事。汗漫湖山能幾。況蠟屐、漸難料理。十載蘇隄楊柳約。問鬢鬢、今日撩人未。攀折處、可儂意。朝來幾徧闌干倚。惱無端、煙孱雨困。和愁難寄。芳草西南湖寺路。應盼青絲游騎。誰與說、春歸容易。把酒無聊尋燕子。訴東風、不解儂來意。還暗祝、明朝霽。

聲聲慢

武林遊蔣氏廢園

牆垂薜荔。砌上莓苔。愁痕剛界朱欄。杏白梨紅。次第做盡春寒。曲池抱階如鏡。問何人、照影窗前。斜陽地、指茸茸翠草、曾閣秋千。我本傷春狂客。趁蝶簾燕戶。鈿隊箏筵。載酒遲來。花間誰擘蠻箋。紅樓只今已改。覓殘題、猶在屏山。歸去晚、聽東風盈路

杜鵑。

行香子 四月侍太夫人過湖塘邨欲結小園居之賦此見志

十里平山。十里平川。更平林萬綠參天。水邊樓閣。屋後園田。擬買鷗磯。買雲嶂。買漁船。處處流泉。市斷橋連。羨邨居何啻登仙。幾時奉母。築舍花前。好看斜陽。看飛瀑。看炊煙。

百字令 秋日讀史

中年到也。歎封侯骨相。奇零如此。熱血一腔何處灑。日飲亡何而已。落水三公墜車。僕射早冷人間齒。先生休矣。雖佳何與人事。可惜濁酒牢騷。短衣歷落。又是東風起。百歲胸懷行不得。寂寂虛生斯世。勛業羊頭。文章牛後。短盡英雄氣。古今邱貉。一編且對青史。

沁園春 被酒感事

醜酒峯巔。四顧蒼茫。黃塵漲天。正花門入衛。縱橫部曲。蒲類駐泊。慘淡樓船。礮火金山。陣雲鐵甕。回首留都問罪年。感今昔。想淮陽畫像。尙動凌煙。布衣夢繞刀環。奈

日日從人射虎還。笑馬侯已老。偏當曳落。檀公善走。屢擁先零。捫蝨憑陵。彈箏睥睨。江左如卿孰比肩。銜杯外。只斜陽衰草。滿眼關山。

水龍吟 乙卯春日坐後圃柳下作

小園徧是楊花。濛濛做盡東風色。幾回茗芋。雨絲如夢。已過寒食。選石安琴。芟枝布几。暫消遲日。看細桃落處。苔錢滿地。剛繡出。春秋跡。可歎年年華髮。且連朝。玉缸狼藉。溪唇挑菜。牆頭度饌。漫通殘客。一覺斜陽。風前酒醒。解衣吹笛。又黃昏近也。梨花月底。襯闌干雪。

鳳凰臺上憶吹簫 七夕坐雨有憶

葉墮初鴻。花留宿蝶。巫雲低擁屏山。恁銀河化淚。灑徧人天。偏是流螢有意。入疏簾。猶覓花鈿。更宵靜。玉窗風觸。時響箏絃。當年倩黃姑作證。瓣一炷心香。蘭夜同燃。奈星橋烏鵲。不會傳箋。獨自鍼樓扶病。更無人相倚。慙慙。但長守。斷絲蛛合。誰與纏綿。

賀新涼 柬王平子病起

誰喚天公醉。嘆人間、徧遭白眼。鬼猶如此。駭絕玉棺還未下。爭說巫陽行矣。君病劇時有傳已死者。欲鏟盡窮途名字。便是王嘉償債畢。問去來、何與癡兒事。此間樂。恐非是。年來我亦工逃死。正通天、赤章奏醮。緋衣休至。君本靈芝宮裏客。隔水猶呼時未。君姓字俱與王安國同。故用靈芝宮夢遊事。算暫讓仙家十賚。忽地秋風迴服鳥。再從頭、料理千秋計。書到日、爲予起。

春從天上來 秋日強酒

咄咄書囚。問麴部諸賢。肯與吾游。登山臨水。儘意綢繆。人生作達都休。縱杜康焦革。能消得、幾斛窮愁。只朝朝、待壚邊換酒。未辦貂裘。漫道沙場食肉。便醉鄉論賞。李廣難侯。樹下匏壺。菊間癭杓。曹騰直過今秋。更蒹蕘鱸膾。付樵青、點檢廚羞。任兒曹、惜吾家僕射。勿築糟邱。

沁園春 乙卯秋夜落一當脣牙是相家所忌者賦此解嘲

牙爾何爲。唇吻之間。誰來抵巇。記免懷學語。常膠香餌。成童毀齒。屢繫輕絲。拾慧難防。笑人易冷。深悔年來。欠護持。金剛壞。便因風咳唾。珠玉參差。兒曹莫道吾衰。正開竇容君出入時。祇未經漱石。礪先難忍。倘逢罵賊。嚼竟何施。蔗滓功勞。齋根身世。未報紅綾已若斯。從今世。但投梭善避。不廢歌詩。

買陂塘 丙辰二月初二日感舊

驀今朝。仲春初二。玉晨重見瑤侶。鈿蟬細蜨。新梳削。回首那人風度。青鳥去。看碧落高寒。又恐嬌難住。夢雲慣阻。記夜雨重門。畫堂燈畔。雙髻唱金縷。東風驟。吹墮瓊華如許。秦臺零落珠樹。小庭香霧。回廊月。都是舊經行處。花底語。問花上流鶯。也爲儂淒楚。鳳笙漫譜。指柳下闌干。共伊凭後。十載冑飛絮。

蝶戀花 丙辰花朝小雨

豆蔻梢頭春一寸。些子柔紅。生被朝煙困。碧玉年華都未省。家家先下黃鸝聘。夢雨連番花噤痒。水樣輕寒。伴喚緗桃醒。簾外鑪香扶採勝。綠窗人語東風近。

掃花遊。花時諸同人約爲雲門之游。滯雨成旬。春光半矣。山中芳信。眷焉於

懷與玉井同賦

冶春百五。過幾度東風。杏衫寒峭。雨聲易老。恁苔紋點絮。畫成吟稿。綠瘦鑪烟。窳地  
簾垂夢悄。燕歸早。待宿醉醒時。花落多少。烟約今未杳。但蠟屐商量。可堪芳草。更  
移鏡棹。認溪光寺影。潑青如瀑。澀盡啼鵑。知有山桃怨曉。溼雲掃。鎮支筇。晉時斜照。

浣溪紗 丙辰清明微雨

寫戶蛛羅。鏤細塵。紅闌到處近流鶯。絲絲暮雨玉簫聲。柳絮慣飛連日暖。桃花嬌  
助一分晴。閒調鸚鵡過清明。

虞美人 新河孤館聽雨

黃梅一例纖纖雨。分外添淒楚。泥衾絮煞一燈嬌。不信人間。還有可憐宵。更兒捱  
盡人誰共。揀得都無夢。雨聲斷續枕邊聽。依約紅蕙。簾底打棋聲。

浪淘沙

往事慣消魂。銀甲金尊。蛛絲應罩舊題痕。孤館簾垂燈上早。雨到江邨。夢裏暫溫存。祇欠分明。花陰燕子鎖重門。兩地酒醒香燼後。一樣黃昏。

水調歌頭

蕭山丁藍叔屬題大碧山館圖

山色不知處。出郭便蒼然。柳陰遮斷塵境。久住合成仙。更割菴湖半頃。蕩得吟樓如水。人影碧于烟。倚鏡和瑤笛。擘脯奏冰絃。坐鷗磯。租鶴逕。買漁船。相攜裙帽。蘭夜圍燭鬪蠻箋。但有名花照眼。拚盡千鍾蘸甲。沈醉紫雲筵。藍叔有侍姬能琵琶。願畧玉山吏。日掃露明軒。

又 秋日期子九蓮士夜泛東浦訪澈凡上人

秋色自來去。終古不知愁。江邨今夜明月。肯爲酒人留。但掃蒼苔黃葉。準備滄波一葦。左右挈洪浮。喚起守門鶴。來戲玉山頭。陳遵卒譜死。徐孺葆衣病。阿平王平子。游。更堪西笑。長安汨沒海中鷗。周雪鷗時官戶部。屈指卅年狂客。剩此薜衣松衲。點綴鑑湖秋。鐘磬夜深寂。吹笛下寒流。



采桑子 丁巳秋夕

西風猛撼疏窗夢。窗外鈴聲。鈴外蛩聲。併作新秋一夜聽。枕函低映羅幃月。香是前身。烟是前因。人共熏鑪過一生。

水龍吟 丁巳中秋夜風雨橫甚賦此寄悶

百年如此今宵。猜誰力挽銀河住。長空一白。萬聲都噤。截天風雨。斗大蟾宮。魚龍翻動。波濤秋怒。恁奔雷戰夕。癡雲遏曉。看長劍。青虹吐。慘黯初鴻。征路。問天涯。弄珠何處。人間一霎。排風吹浪。廣寒知否。可惜江山。不會照出。悲歡離聚。祇葫蘆尊酒。蒼茫獨夜。喚冰夷舞。

瀟湘逢故人 寄孟調汴中

梁王臺上。有西風倦旅。彈鋏銜盃。一日幾徘徊。恁俠客侯朱。狎客鄒枚。千秋巷陌。問斜陽。一例蒿萊。祇人說。寒林歸燕。信陵門下飛來。應還憶。滄海畔。正西臯。故山猿鳥爭猜。孟調有西臯山居圖嘗自號楸臯秋色更番催。又菊散霜疏。楓綻烟開。紗巾

漉酒喚雙鬢。賣褥安排。風雲感，千人甚事。檝船滿載菱回。

洞仙歌 戊午春日置酒柯山七星巖賞桃花偕周菽雲編修孫蓮士助教陳

珊士庶常同賦

翠雲缺處。有花光紅沁。青玉重門鎖芳訊。更經壇日靜。藥徑烟深。流水裏。依約棋聲人影。瀛州攜俊侶。暫探仙源。多恐秦人笑相問。酒後俯危闌。香絮濛濛。暮雲外。玉笙吹醒。恁窄地。東風妒細桃。又添得人間。素塵一寸。

臺城路 往時湖南山桃李最盛去冬大雪居人多斧作薪今春花事遂爾稀

寂籬邊屋背寥落可憐爲賦此解

碧陰悄悄重谿側。嘶春玉鬮來又。山角蕪青。畦稜絮白。頓失亂紅吹繡。流鶯去後。賸燕子泥牆。清明嘶守。記取門前一枝曾寫翠釵溜。人生容易感舊。疊東風萬恨。都付絲柳。流水香消。題詩人老。淚滿當年羅袖。花還怨否。看名士傾城。總難回首。一例將愁。夕陽芳草瘦。

梅子黃時雨。連雨帶人幽窗理。坐念西偏山水烟翠正濃。安得釣筒茶具搖

漾。鬢絲絮雪間也。賦此柬同人。

餽釘陰晴。乍中酒醒時。愁思如許。又倦柳千絲。做成烟雨。不信天涯今日裏。昏昏都  
是垂簾過。鳩啼苦。竹粉翠樓斜照猶駐。爲語傷春舊侶。恁薇壺練帶。消得朝暮。看  
邨瀑如潮。林霏疑霧。好借一蓑湖上去。短篷綠罨鷗波路。山無數。冷光潑青詩句。

醉花陰 戊午初秋

藥銚絲絲烟一暈。攪得鑪香嫩。移燭枕函邊。六六燈屏。著徧相思影。剗襪怯侵瑤  
沓冷。銀箭推更永。箇樣可憐宵。斗帳低垂。人共鷓鴣醒。

南鄉子 新秋夜涼時有風雨疏衾夢斷占得此解

水樣夢初醒。半穉燈花瘦不青。索性起吹燈燼落。惜惜。綠映虛幃屋角星。病骨忒  
伶俜。一摺吟魂熨繡衾。窗外又聽疏雨過。泠泠。聲滿風前九子鈴。

南歌子

蓮子星前碧。蕉心雨裏紅。天涯不礙五更風。可是淒涼，一樣到伊儂。淚漬恨涼攢。愁多替夢重。便成睡去也匆匆。索性疏鐘斜月，各惺忪。

洞仙歌 武林湖樓書見

湖光千尺。接翠樓天半。楊柳疏疏映窗扇。暮迴欄低亞。釵影纒分。剛省識。花裏捲簾人面。橫塘曾幾過。道是無情。怎得含嬌遞錫眼。淺笑不禁癡。略要回身。又壓臂、羞攙雙釧。鎮羅袖、長垂幾生修。羨一抹疏紅。夕陽珊檻。

謁金門 己未春晚舟行吳淞江中

江上道。臨水畫樓春早。遲日養蠶簾影悄。隔簾聞語笑。朝暮蒲帆征棹。愁見殢人芳草。烟陌青青同一稿。夕陽無處好。

祝英臺近 莫春遊嚠城秦氏小山園

綺廊疏。芳徑轉。樓閣淺深見。迤邐珠簾。多半隔花捲。殢人一曲朱闌。是誰頻倚。恁沾袖。餘香猶暖。恨春晚。回首檀板金尊。年前幾歡宴。題榜風流。還問舊家燕。園額爲

王烟客太常所書更憐臨水紗窗。楊花堆雪。正閒煞。嫩晴庭院。

青玉案 吳門朱氏歌樓夜飲聽雨

金閨門外春江路。只慣送、離人去。誰分征帆今夜住。小樓紅燭。畫簾檀炷。來聽櫻桃雨。鈿箏繡瓊催頻數。酒醒歌闌又天曙。一晌貪歡能幾許。醑醑金帳。鬢蟬香度。後日思量處。

浣溪紗

鳳尾香羅薄幾重。用玉溪語。柳綿一搭繡牀東。並肩人語玉釵風。粉指印勻笙葉碧。口脂吹上笛衣紅。一年春過夢游中。

貂裘換酒 京邸被酒感賦

作計吾歸矣。算長安、衣冠物望。如斯而已。擾擾一羣烏白頸。妄語便爲名士。祇君輩、姓名難記。但覺逢人都不識。更天涯、何處尋知己。我與我周旋耳。此間無地堪沈醉。便當年、虎賁驕卒。至今餘幾。柴棘胸中三斗許。觸處卽生芒刺。總事事、不如人意。

絳灌無文隨陸武。要何如。銅雀臺前伎。誰健者。令公喜。

滿江紅 燕中感事

落日荒臺。憑誰信。黃金無恙。空指說。頽垣蔓草。郭隗門巷。都邑祇今游俠少。風雲要與悲歌抗。更單衣。短布拜秋郊。荆高塚。盧龍塞。何蒼莽。桑乾水。常還往。祇匈奴牧馬。誰堪乘障。贊普頗申和地議。賢王自擇防秋將。笑書生。不及羽林兒。封侯相。

買陂塘 庚申閏三月八日招庭芷叔雲豫庭子恂雪甌珊士卣香慈仁寺賞

花時江南軍事甚急。孤踪偶侶。羈愁未瘳。對酒傷春。因賦此解。

鎮消魂。故園烽火。天涯猶惜春晚。客懷無賴。尋花醉。寂寞自來僧院。禪榻畔。但破帽茸衫。留得高陽伴。鳳城漸暖。任清磬聲邊。花開花落。容易鬢絲換。江南恨。提起東風腸斷。馬頭飛絮零亂。王孫已是無歸路。說甚閒關鶯燕。花莫管。便唱煞銅鞮。那有金樽勸。飄零自怨。祇倚徧闌干。長安芳草。依舊夕陽滿。

臺城路 長安春夜雨聲達旦枕畔蕭騷殊有山居淒瑟之況愴然賦此

夜來孤館無眠慣。雨聲更催天曙。著戶簾開。敲窗燭暗。儘把閒愁來絮。離情幾許。祇枕淚衾重。自家將護。指徧蓮更。暗中寫就斷腸句。分明故鄉怨緒。恁文園善病。誰遣羈旅。可憶年時。空階點滴。不似者番淒楚。夢兒歸去。問畫尺聲中。今宵涼否。燕子簷花。記儂燈畔語。

滿庭芳

庚申閏清明日客中扶病小游坊曲聞月下歌聲棖觸舊懷含悽成

詠憶自辛丑閏後再逢今日廿年夢影三月愁根懣往傷今殊難自己耳

啼鳩留春。游絲惹夢。天涯又閏清明。夜涼人靜。獨向六街行。月裏幽坊如畫。那門邊。低度歌聲。問誰傍、尊前擲笛。還似訴儂情。廿年前舊恨。柳枝共挽。私語調鶯。驀東風回首。獨自飄零。料得小窗今夜。映梨花。一樹冥冥。可能把、斷腸詩句。月下念教聽。

少年游

春夜偕友人醉行月下作

簫聲深巷月華勝。水到處。少人行。青漆門邊。丁香似雪。低照粉牆陰。共君側帽天街上。風露近三更。歸夢紅橋。琵琶畫舫。山影柳冥冥。

買陂塘 題潘味琴桐陰待月圖

鎮悄悄、嫩涼庭院。月痕黃到金井。碧桐商略風廊語，占得幾分秋影。蘭夜靜。恁水樣階陰，剛要疏幰襯。茶香漸近。想理罷冰絃，綠雲搖夢，秋外藕花醒。年時事，回首青鸞瑤訊。紅蠻深瑣妝鏡。琴心鬢影都何許，零落舊絲銀綆。休更問。賸盃曲闌干，閒煞無人凭。畫中暗省。辨水口從君，苧衫藤簟，來共鷺鷥聽。

百字令 辛酉清明日同珊士子恂已蘭飲花下用稼軒韻

故園何處。又清明芳草，斷腸時節。病裏東風吹夢去，曉枕醒來猶怯。洞口桃花，樓頭楊柳，事事成輕別。啼鶻難到，傷心誰替儂說。猶有兄弟天涯，茸鞢瘦馬，莫放春三月。斷句酒邊還寄與，花葉從頭親疊。羅帕兜香，銀屏熨影，薄福拚教折。明年今日，尊前重認華髮。

洞仙歌 辛酉三月三日卽事

春來蹤跡，正殢花慵酒。客裏閒情恁拖逗。記昏黃門巷，三月初三，剛恰似，楊柳藏鴉



時候。銷魂誰見得。背解羅襦。燭影金釵鬢邊溜。人定翠幃香。小枕單衫。偏稱得。箇儂消瘦。聽簾外。東風又三更。願人共梨花。一春廝守。

臨江仙 春日病起理詠花下忽忽竟晝賦此貽人

一枕宿醒鶯喚覺。起來扶病閒行。游絲闌外午風輕。羅衫人影薄。偏傍小桃明。三十餘年如夢裏。春來春去多情。夕陽又傍短牆陰。隔牆花缺處。微有捲簾聲。

浪淘沙 晚坐花下讀書作

柳外日西斜。半臂涼些。花陰多上綠窗紗。讀罷道書人正倦。閒數歸鴉。短鬢惜年華。別恨偏賒。春深遊客倍思家。花落年年長病酒。何況天涯。

憶桃源慢 星齋少宰屬題桃花紅煞釣人居畫冊七字少宰舊句也

新水魚牀。小風鷗幔。依約花深處。斜陽門巷。都與流鶯分住。門外檝頭船子過。聽打隔花敲鼓。青山前面。橋通路轉。剛宜一角垂楊補。更漁娃。紅裙裹鴨。爭唱侍郎佳句。可堪重問江南。恁春來。頓迷前度。舊家谿上。誰認紅泥小戶。還恐仙源無處避。零

落千重烟樹。雨蓑吹笛。晴磯結網。幾時重作花間主。待商量。帛槌茶臼。畫裏從公歸去。

望江南 清明憶鄉居風景雜成六解

清明憶。老屋傍霞川。十里酒香邨店笛。半城花影估人船。水閣枕書眠。  
清明憶。晴日跨湖橋。堰下田家分翠麥。柳邊亭子上紅簫。到處好停橈。  
清明憶。風景最湖塘。新水暖香浮筍市。亂山晴翠落魚牀。斜日酒旗黃。  
清明憶。小隱在柯山。豆莢灣頭攜榼渡。桃花水口抱琴還。暫伴鷺鷥閒。  
清明憶。謝墅步頭船。翠管銀鬢楊柳海。畫簾團扇麗人天。花壓錦帆偏。  
清明憶。來往鑑湖中。笠影輕衫紅杏雨。茶烟小艇綠鬢風。回首恁匆匆。

蘇幕遮 題家書後

燕銜泥。風落絮。如此關山。夢怯都難度。三載飄零春又去。但見春歸。那有儂歸路。  
望吳書。尋越樹。臨水登高。總是傷心處。落照平蕪天又暮。門外鴉啼。不爲愁人住。

溼鴛綃。寒麝炷。一樣今宵。拋卻春三五。別後月圓知幾度。不信天涯。猶有團圓處。卜金錢。裁尺素。鵲語燈花。總是無憑據。五月江城書到否。擁髻開絨。一枕黃梅雨。

浣溪紗

睡起慵教貼翠鈿。日長啼鳥奈何天。客中花落又今年。眉語金尊新燭底。鬢香團扇小風前。薄情贏得暫時憐。側側輕寒護臂紗。梳妝纔妥上香車。小紅簾外卽天涯。憔悴一春常惜別。歸來無賴問桃花。日長何況更思家。

南哥子

裙衩文鴛窄。釵梁粉蝶嬌。纔離眼底已魂消。難道忍心撇過。又今宵。佩響侵銀箔。鑪薰度紫綃。月斜花徑路迢迢。如此思量。魃地忒無聊。

人月圓

懨懨小病垂簾地。倚枕怯春寒。月明燈炧。花陰無賴。還上闌干。麝巾暗解。螺杯偷

遞。一晌追歡。霧濃香細。銀屏刻襪。何日同看。

虞美人

今年恁地人蕉萃。病裏春如醉。午陰孤館夢回時。疏幔茶烟、剛襯雨絲絲。添衣量藥無人顧。花底憑誰訴。客中燕子自無情。那解替人憐惜、到飄零。

滿江紅 初夏夜涼翦燈有憶同珊士賦

一翦紅蘼。倩誰寫、銀鈎團扇。還記得、蠻紗窗下。那回初見。眉葉黛勻新恨淺。鬢花香著春醒暖。恁畫中、小劇鏡中癡。東風短。瑤璫寄、空相券。珠彊約、翻成怨。奈夢隨春去。鈿衫人遠。翠檻雲深鸚母睡。繡屏香重狸奴嬾。祇粉巾、留得唾脂痕。星前看。

又 和珊士寄吳門舊眷

曉枕啼鶯。剛夢到、謝家庭院。聽簾底、歌塵一縷。鈿簫低喚。鈴索語通香篆細。鞦韆影隔東風軟。正緗桃、花底教鸚哥。春愁淺。蕭郎鬢、年年換。真珠字、題都徧。恁新詞琢就。相思難遣。懷裏綠筠重疊淚。奩中紅豆團圓餓。又鯉魚、風信到江南。傳楸慣。

又 夜涼如水。纖月隔窗。擁枕無眠。追歡拾恨。疊韻有寄。

悄悄簾櫳。恰深掩。猩屏六扇。算除了。鬢花釵燕。更無人見。鈿枕偎偏。腮印薄。玉衾睡重。鞋香暖。指銀荷。畫蠟刻宵深。春紅短。辜俊約。重門券。貽雜佩。芳皋怨。祇溫存。一晌博山煙遠。豔月粉。蓋胡蝶夢。東風皂莢。青驪嬾。恁綺錢。如水映春星。誰同看。

又 近以牡丹畫扇寄人。珊士和予扇字韻爲媵。再疊前韻。

第一東風。最宜稱。鏤金羅扇。應記取。香盟密誓。是花親見。障頰剛侵。霞暈薄。上頭替護。雲鬢暖。更夢中。彩筆寄相思。瑤槭短。重錦帳。情天券。雕玉佩。芳年怨。恁冰蟾掩映。額黃山遠。小院輕兜。香絮滿。畫欄閒弄。游絲嬾。待近前。兩字問鴛鴦。從頭看。

又 三疊前韻有寄

簾底銀葢。剛新試。單衫輕扇。偏不許。晝長人寂。暫時相見。寶甃睡。獨梅子落。粉屏乳燕。楊花暖。更小窗。低映畫蟬紗。芭蕉短。尋漢佩。芳蘅券。留宓枕。叢蘭怨。恁章臺走馬。水重山遠。腰瘦畫裙聲更細。鬢慵鈿額妝都嬾。記紗廚。隱臥繡芙蓉。移燈看。

又 美人鞋尖戲同珊士菽雲鬪韻作

些子雙鴛。剛墮地。猩紅初染。偏略透。人前消息。牡丹芽淺。半黍細沾檀點溼。一絲輕熨。莎痕軟。但鳳頭。依約畫裙邊。時遮掩。看小立。閒庭院。纔半吐。情何限。似端相。鸚舌。被伊偷翦。點曲錯疑紅豆落。蹴毬但見真珠顫。便將他。春筍比纖纖。誰還欠。

百字令

壬戌清明風雨淒杳。援筆寫此寄故園弟妹

客中風雨。又淒涼。過了清明寒食。小屋荒燈。扶病坐。形影暫相憐惜。水市笙簫。山廚餽粥。故國三年別。杜鵑難到。夜深何處啼血。愁絕海北孤兒。江南老母。兩地無消息。更念松楸先壟在。濁酒一杯誰滴。冷月山花。天涯魂夢。應有歸時節。長飢弟妹。今朝知倍悽憶。

金縷曲

送珊士由海道入浙尋親二首

看爾揚鞭去。正愁人。東風滿目。亂花狂絮。故國蒼茫天萬里。不辨越山何處。更碣海波濤洶怒。嚙兇磨牙。鮫舐齧。但隻身。掉臂游行過。忠孝事。待君補。最憐少日傷孤。

露。耐荒寒，苧燈齋粥。半生艱苦。贏得科名酬母教。衣錦暫時團聚。詎轉足、便迷歸路。薄宦未成家。陷賊。負高堂。總被微名誤。穿壘走。涕如雨。慈亦窮民耳。廿年來、孤兒寡母。艱難生計。舊產池陽都割盡。乞食淒涼京邸。更慟絕、橫流鄉里。宗族千人家。八口。盡倉黃。乞命干戈裏。天地酷。有如此。與君己丑生同歲。數衣冠。崔盧中表。舊家門第。等是飄零傷亂客。說甚成名難易。只腸斷、今朝分袂。泥首馬前無別語。但思親、淚血煩歸寄。生死託君行矣。

菩薩蠻

癸亥中和正逢春社韶晝漸永思鄉轉深矣

社風正值中和節。故園天末無消息。歸夢柳絲絲。水鄉春淺時。年華愁易謝。又報春分也。記得綺窗前。玉簫新燕天。

漁家傲

乞星齋侍郎畫湖塘邨居圖

東望山陰何處是。用放翁語。兩年轉側干戈裏。夜夜夢歸家。萬里。柯谿涖。柴門白髮攜兄弟。舊隱湖塘誰得似。林嵐都對門前水。旅篋青山無一紙。從公計。漁莊畫我

承平事。

百字令 癸亥花朝

入春幾日。又恩恩分得韶光剛半。病裏每愁佳節過。何況天涯羈怨。帳構餘香。羅巾殘墨。零落無人管。東風歸去。故園重問鶯燕。時越郡新復那見此際江南。澹烟微雨。玉笛吹都徧。彈指十年重疊恨。偏到今朝淒斷。韓冬郎詩每遇百花生日日未曾淒斷是今朝。絳蠟桃花。綠紈金蝶。可惜閒庭院。秋千牆角。夜來明月。撩亂。

青玉案 癸亥花朝後一日春寒尚峭夕蟾已妍計後二日又是清明矣綺朝

冷節併在茲宵離緒閒懷一時都觸更倚短燭琢此新聲恨未得雙髻吹笙  
十葱擲笛也

花朝寒食偏相遇。只難遣、人離緒。燕子宵長誰與度。剩脂鈿合。斷金裙帶。題徧傷心句。聽殘玉笛無歸路。卻恐屏山易春暮。月上重門香一縷。梨花欄角。綠絃風細。簾影深深處。



念奴嬌 癸亥寒食岑旅病眠熨夢添衣淒然有憶不止天上人間之感也  
廿年前事。正銀屏鶯語，嬉春時節。壓鬢熏香都貼妥。替掩畫羅裙褶。翠幌分香，玉奩吹絮。一晌難輕別。打簾剛出，新妝鸚鵡能說。欣看臨水朱門，映門楊柳，柳下船如月。小扇低箏同載去。十里人家寒食。酒榼桃花，鈿囊燕子，霎是成追憶。舊歡如夢，睡絨襟上猶溼。

滿庭芳 海棠花下作

淡日簾櫳。嫩寒庭院，深情問有誰知。宿醒初解，綉纈上花枝。約略靚妝人影，點春渦，半暈燕支。朱門側，闌干倚徧，無地寄相思。芳期。今又過，猩屏掩恨，茸屐絨詩。正紅窗睡重，燕子歸遲。斜搭秋千畫索，傍花陰，閒裊游絲。黃昏近，茜紗銀燭，更是惱人時。

阮郎歸

陌頭長憶蹋青期。湘裙春草齊。鈿車停處夕陽低。鷓鴣金繡衣。瑤笛趁，翠嬰攜。風光歸路迷。門前花落又成蹊。誰家郎馬蹄。

鷓鴣天

柳眼朦朧醒曉烟。亂頭模樣不禁憐。燕來商略垂簾地。鶯語丁寧上笛天。思往事，畫欄前。玉爐寒閣水沈烟。小梅殘燭紅窗雨。中酒心情又一年。

減字木蘭花 四首

余家自亂後移居柯山。巖壑清深。益縈寢夢。偶拈四解。以寓越吟。黃鵠不飛。白鷗有約。旅窗展誦。曷禁魂銷。

柯山西去。第五橋邊芳草路。山下人家。長日松風度麥花。鴛鴦渡口。十頃湖光全上柳。畫舫斜陽。團扇風前一水香。

柯山南畔。最愛綠蘿行脚院。三面花光。一面湖光襯夕陽。閒攜茶具。巖下清泉親手注。盡日鶯啼。閒覆僧窗一局棋。

柯山向北。隱隱雲藏巖下屋。洞口桃紅。春在溪聲石影中。遶籬調鶴。月磴雲亭隨處樂。林斷橋開。更約觀魚渡水來。

柯山東道。埭上人家臨水好。曲曲朱欄。低映垂陽幾轉灣。陳灣丁港。小艇時時乘月上。十里吹簫。直度烟波涼網橋。涼網橋跨魯墟大湖自柯山返西郊必出此橋陳灣丁港皆村名

壺中天 夏日乞星齋少宰畫柯巖消暑圖

壺中舊隱。有丹巖翠嶂。遮斷塵境。山下林亭亭下水。隔水別開鷗徑。映竹彈棋。刷苔品石。秋滿紗巾影。山前何有。藕花菱葉千頃。正好瘦策扶親。團蕉挈弟。瓜果盈盤釘。坐到梧桐涼月上。更理冰絃夜詠。輕裂蘿裳。長安回首。眇斷青猿信。乞公渲筆。溪聲畫裏堪聽。

瀟瀟雨 立秋後夜聽雨譜此

疏衾扶。薄病問宵來。何事做淒清。恁簾前點滴。庭槐砌竹。絮盡更更。帶入還家短夢。枕畔尙分明。爭傍羈人耳。分外多情。爲想鄉居此際。縱牀穿屋漏。也得同聽。更銀河絡角。涼訊到瑤京。幾時山榭歸築。就瓜區臨水結柴荆。西窗燭砌。拌菱芡。領略秋

聲。

月華清 秋末寄懷山左某廉訪自行營還歷城

歷下霜清。灤源秋老。剛逢笳鼓還部。燕寢簾開。笑對青山眉嫵。駐行旌、蘿徑調緩。按小隊、薈洲挈鷺。容與正鵲華紅葉。待君題句。憶否長安羈旅。祇經箏凝塵。酒瓢敲雨。千騎聯翩。羨煞東方伴侶。儘思量、橘社蒨鄉。還料理、笛家簫譜。延佇望雲藍先寄。薊門烟樹。

貂裘換酒 癸亥送竈戲作

爆竹闌填起。又家家、花餉粘馬髻。神行矣。局促春明。常寄食。五載一瓢而已。總不見、釜魚甑米。絕倒平津成久客。祇闌干、苜蓿煩料理。彈鋏送爲君禮。年時最憶家園裏。簇團圓、生盆綵勝。母妻兄弟。釘座湯圓同拜祝。百歲清門風味。吾家舊例祀竈有湯圓。驀回首、烽傳鄉里。指日定攜如願返。結山廚、小賃梅花地。親壓酒。君須醉。時有

買妾之議

東風第一枝 甲子先元旦四日立春是日子生日也賦此自壽

甲子春開庚寅吾降東風四日先到舊居誰問弧懸吉讖漫傳鵲報毬仗燈圍已誤  
卻雕青年少祇賺人三韭春盤供得庾郎長咬看貼燕黏雞競巧又共占一年佳  
兆幾時歸壽高堂醉舞漁衫袞袞青山眷屬話繞屋梅花開早付風情竹屐雙鬢雪  
裏煮茶同老

玲瓏四犯 春夜過舊院感逝

淡月幽坊又繡墨丁簾鈿額相映第一門前還認舊時燈影惆悵麝冷重篝恁去後  
更無人憑只晚風猶在梨花嘶守綠窗春靜余辛酉三月三日詞云聽門外東風又  
三更願人共梨花一春嘶守蓋爲今日讖也

記會同倚紅芙鏡怪年來一樣消損

犀幃睡起殘妝重替掠牡丹雙鬢誰遣別後生疏奈彩雲易沈鸞訊一更甚時重渡銀  
河消受眼前嗔恨指去年七夕事

點絳脣

小院回廊。擡頭驀被檀郎見。鳳鞞驚掩。略把裙花展。  
熟意生情。盡在星星眼。欄陰轉。杏衫紅淺。人近東風遠。

浣溪紗四首

手疊紅箋報玉郎。日長無那理殘妝。慳慳瘦損過時光。  
鏡檻花沾蝶篆重。繡簾風逗燕泥香。干卿甚事費思量。

畫格屏山六扇齊。妝成凝坐只彈棋。繡檀熏罷又添衣。  
蝴蝶自來還自去。薔薇架上日頻移。一春長是翠眉低。

暖日紗窗倦繡天。繡牀閒伴玉狸眠。鬢欹一面卸花鈿。  
睡起無人春更寂。沈沈簾影閣鑪烟。忽看鬪鵲墮簾前。

斜插犀翹鳳尾釵。衣香暗度玉窗來。生憎一桁畫簾垂。  
漠漠樹陰鋪小院。悒悒欄曲上蒼苔。斜陽立盡又徘徊。

長亭怨慢 初夏懷故山寄慎齋并示春明里中諸子

又回首。故園春盡。銀棟添香。翠篋勻粉。小築梅湖。慎齋居山陰後。梅湖鏡中終日。對山影。閒門水到。還時上。背篷圓艇。十字蘋邊。應盼斷。鯉魚風信。重省。軟紅塵裏客。誰似舊游疏俊。琴心酒賦。總是歸期無準。便綠陰肯待行人。怕青子。滿枝難認。更瓢笠年年。忍負晚花餘筍。

金縷曲 送德夫樞出都

六載長安邸。共晨昏。淒涼蛩駟。賤貧兄弟。折臂斷支經九險。相慰惟君而已。正努力。各營歸計。誰分百年雞黍約。竟蒼黃。訣別窮途裏。來世誓。可能記。一棺寂寞城南地。幸相逢。季方捧檄。令原風義。君弟鵬以鹽官入都。引見在君沒前二十日也。轉盼雙羸馱樵去。慟絕素旌千里。問形影。從今誰寄。慘淡國門皋復出。鎮悲風寒日蕭蕭起。算此日。真歸矣。

念奴嬌 乙丑清明夜飲賓秋館時予將南歸矣醉後和幼安韻

病懷無賴。又歸期。耽誤禁煙時節。黯黯輕陰留薄醉。羅袖夜來寒怯。燭底新妝。尊前

私語。一日都難別。東風心事。流鶯多半能說。還記昔歲初逢。小庭今夜。正映濛濛月。彈指桃花回昨夢。恨事眉頭重疊。燕子光陰。杜鵑鄉里。愁把垂楊折。相憐南望。吳山天際如髮。

蝶戀花

春晚過寓舍南園和六一韻

寂歷園亭閒幾許。驀地東風。一霎花無數。淚點年年無覓處。平蕪綠徧傷心路。數日不來春又暮。病酒耽香。料理和愁住。牆外人家聞笑語。夕陽獨下西牆去。

桂枝香

家山甚處。又畫舫夕陽。沿岸簫鼓。開盡緗桃粉李。菜花盈路。鬢絲綠徧湔裙水。問盈盈、鷗波誰主。幾時料理。漁蓑蠟屐。燕簾鶯戶。歎一霎、清明穀雨。正扶病將愁難遣。孤旅。兩日東風。添得黃昏淒楚。曲衣賭曲金臺側。算了卻、傷春情緒。玉荷燈下。暫時消受。映樽低語。

一枝花

莫春連日東風甚惡臥病寡悰賦此寄人



小別成耽閣。叵耐連宵風惡。海棠開幾日，又吹落。酒榼箏囊，辜負嬉春約。閒煞斑駁。絡燕子歸來，爲誰搖動鈴索。鑄就黃金錯。長是年年歡薄。舞裙歌扇底，恁飄泊。一樣燈前，獨自尊前寂寞。吹徹梅花角。陣陣餘寒，曉來都在簾幕。

貂裘換酒

春中得故人孫子九書具言亂後三子天沒貧不自存惟以歌詩

自娛窮老兼述徐州判虔復暎血賊庭魯明經燮元闔門灰燼愴懷舊昔遂異幽明靜夜多思重復循覽泫然難已寫以此章

一紙從頭讀。正燈前、東風猛撼，狂花盈屋。差喜故人猶健在，留得空山歌哭。還苦耐、吟詩窮獨。覆卵傾巢都不計，祇虛名、抵死爭殘局。期老享文章福。城南當日同追逐。最難忘、徐公風貌，魯生高躅。嚼舌堂堂傳罵賊，恨血千秋埋綠。更慘絕、橫流湛族。憔悴儒冠差不負，問斯人、九地誰能贖。還忍聽、山陽曲。

秋波媚

玉驄慣憶鳳城東。春事夢雲中。無端拋撇，昨宵微雨，今夜狂風。多愁多病還多別，

歸計況匆匆。今年花落。明年花發。知復誰同。

琴調相思引

側側輕寒到被池。玉鳧煙重卷簾遲。有誰憐惜。捱病過花時。燕子泥香消永日。綠楊風軟見游絲。小欄紅煞。無地著相思。

洞仙歌

雨中飲滬上王氏犀禪閣聽殷姬度曲追感舊游

舊游如夢。又墜鞭扶路。爛熳江湖暫歸去。認春申城郭。楊柳溟濛。剛恰是。簾幙家家梅雨。金尊停幾日。重問當筵。到處流鶯換前度。花裏小分樓。屏格玲瓏。還淺試。春蔥絃柱。問曲裏。瀟瀟幾時休。記檀板銀燈。那回情緒。

鷓鴣天

王菽畦觀晉山陰道上圖四首

春到山陰湖水生。游人爭愛鏡中行。茶煙楊柳千家雨。燕子桃花十日晴。蘭渚酒。禹祠鶯。放翁禹祠詩萬人歌吹早鶯天。不堪風景憶承平。畫船簫鼓嬉春返。一路樓臺直到城。

夏裏山陰總是秋。清涼五月足句留。亂蟬古木多藏寺。曲水修篁半結樓。村落靜。野塘幽。藕花多處便停舟。披衿別有風前思。閒向桑陰看飼牛。

秋後山陰事事宜。湖山清瘦最宜詩。白蘋風細分漁火。紅樹煙疏颭酒旗。菱罨錯。蓼灘敲。放船偏愛夕陽遲。江村雁到黃花滿。正是人家打稻時。

冬日山陰景物殊。寒鴉流水稱蕭疏。千巖霜月傳僧磬。萬樹梅花壓釣鱸。商茗器。貯風鑪。泖湖生計未全輸。醉披風帽寒谿夜。重繪君家雪權圖。君將以督運事離越。

近松江

買陂塘 丙寅初夏過湖塘村卜居魏氏東宅憶自丙辰之冬買村東王氏屋不果今十年矣山貲未成水雲終負悵然譜此情見乎辭

認湖西。岸花如繡。畫船重繫橋畔。籬門六枳深深啓。竹裏翠樓低見。簾半捲。剛借得。鄰牆綠樹分巢燕。亞欄倚徧。看無限青山。喜留吟客。爭把黛眉展。幽栖遂。魏野書堂何忝。囊空終是虛願。東村更有池亭約。回首碧雲零亂。猿鶴怨。恁十載江湖未結。

鷗波券。買鄰暫緩。且記取。雛桃待長過我。來共玉山眷。

壺中天 爲季弟題耕煙山水畫幅

谿藤小幅認湖脣。石罅結就茆屋。屋下芭蕉三百本。養得一湖生綠。藥逕分苗。秫田賦采。閒聽松邊瀑。櫂船歸也。兩翁相對如鵠。堪歎賃廡年年。漂流海燕。誰寄脩椽宿。少日連牀風雨夢。白首幾時重續。花裏馴鷗。葦間射鴨。此樂今生足。且留圖畫。湖山共證清福。

臺城路

戊辰十月自武昌返滬。瀆訪汪氏西橋喜遇武林諸故人聽曲而別

錦帆乍卸松滋雪。驕驄又穿吳樹。鈿陌停觴。津亭打鼓。猶記別時情緒。屏山暫阻。問珠履筵前。幾吟鸚鵡。笑撚梅花。翠簾不隔夢雲路。天涯況逢俊侶。傾囊爭賭曲。消受眉嫵。扇約鑪薰。釵圍鬢影。憐取眼前羈旅。纔停雁柱。趁燭燼香殘。墜鞦歸去。莫忘尊前。畫樓今夜雨。

卜算子

杏纈襯蟬紗。金匣深深護。睡重香濃忍俊時。盡在無言處。珊瑚枕引芙蓉。轉側郎知否。記取燈殘欲曙天。帳外纖纖雨。

慶清朝 己巳夏日訪曉湖壽勝山居留宿

矮樹敲橋。清谿繞屋。山居鎮日恹恹。閒攬小艇。敲門驚起幽禽。笑指故人歸也。竹梧留得一庭陰。清蔭外。亂書堆架。簾影沈沈。漫憶薄田下泮。羨長貧奉母。樂事堪尋。楊梅熟後。山鳥催送林檎。醉裏不知賓主。簷花細雨。一燈深。燈花落。暗聞松子。時墮琴聲。

南浦 辛未初秋爲吳碩卿水部題潞河話別圖卽送其挈眷還吳門

秋色滿江關。倦金門。又報五湖船具。楊柳鳳河濱。柔絲裊。偏是征帆難住。涼颺忍俊。短篷斜趁新鴻度。回首觚棱天際夢。都付莫雲芳樹。共看水部歸裝。祇琴囊畫卷。煙霞伴侶。山影到閒庭。湘簾底。消受鬢香眉嫵。蘋花一槩。載詩還訪桃根去。料得西窗同翦燭。卻話薊門風雨。碩卿將卜筮吳中。

疏影 題顧南雅通政爲姬人所作紅梅小幅用白石元韻

瓊窗倚玉。有畫眉小筆。脂暈凝宿。試拂輕綃。約略朝酣。一枝豔對修竹。紅珠帳外消魂影。剛淺照、花南香北。好黛螺、宮史重修。持慰點妝人獨。想是端居草廬。茜衫正捧研。嬌鞦鬢綠。且緩朝天。爲拾殘絨。點綴春風蘿屋。須知老去冰霜性。未肯換、小紅新曲。只賸將、絳雪飛丹。留作喜神妍幅。

甘州 題董峴樵兵備粉東老屋校書圖兼送之官隴右

榜粉陰、拓地結精廬。人在畫中居。自平津罷館。屋舊爲儀徵太傅。秦華雙碑館。垂簾據几。重見江都。閒煞綠陰清晝。長照滿牀書。細勘丹青筆。好趁窗虛。課罷奚童掃葉。更妃豨聲病。校付清娛。兵備近輯集韻編雅。皆取雙聲疊均字。有姬人知書問青編粉指。賭記幾回輸。怎催人、擁麾萬里。向隴雲、頻夢樹扶疏。兵備先由翰林出。巡甘涼。今又有鞏秦之命歸來早。乙藜吹火。再領蓬壺。

菩薩蠻 爲潘星翁題月季花折蘭枝摺扇

蕊黃浥露秋心吐。燕支點綴梢頭雨。壓鬢一枝鮮。花紅月又圓。攜來香滿袖。晝靜微吟候。白髮自風流。好花長聚頭。

望海潮

秋日偕明越諸子夜飲錢唐江袁氏舟中達曙而散賦此解

涼風移暑。微雲催夕。籃輦小駐江程。斜日畫船。開窗並處。鬢絲亂點蜻蜓。臨水晚妝明。正蓑衫小扇。相鬪輕盈。笑約青山。桂花香裏待潮生。當筵夜按秦箏。又金尊款月。銀燭搖星。襟上淚痕。釵邊鬢影。年來受盡飄零。戍鼓已三更。聽隔江吹簫。烟柳冥冥。酒醒香殘。爲誰扶夢到重城。

高陽臺

辛未夏五送計偕諸子還里

絳蠟凝榴。香絲卷絮。滿天梅雨初飄。潞水盈盈。故人爭趁歸橈。客中已自傷搖落。況河梁、把袂魂消。只相思、月墮空牆。酒醒荒郊。山陰此日真如畫。有林霏兩岸。水綠平橋。扇影衣香。蘋風十里吹簫。啼鶉歇後聞啼鴉。怎歸心、不溯江潮。漫登臨、夕照金臺。冷落前朝。

湘春夜月 孫彥清孝廉見予舊製樂府秋夢舟觀兩闋各題一闋以贈京邸

雨夜棖觸舊愁賦此自懺并柬彥清

又天涯。暮窗疏雨瀟瀟。忍把舊恨新愁。都付與檀槽。誰分淚痕羅帕。自玉容人去。溼到今朝。只夢中指點荒墳。弔鳩。暗戶懸蛸。何堪更憶。枇杷舊巷。涼月單宵。鬢影淒涼。應只對空牀塵積。破屋燈搖。沈郎老矣。憾人天。綺語都消。算贏得向長安倦旅。重翻恨譜。添謔無聊。

御街行 早秋邸夜風雨中作

長安秋色來無際。雁未到、蟲吟砌。淒清庭院葉聲中。偏攪初涼天氣。孤燈搖幌。亂書堆案。一桁簾垂地。飄零作客三千里。願鬢影、人憔悴。空階點滴雨聲寒。領略貧家滋味。滿湖菱角。繞門荷葉。何日尋歸計。

臨江仙 秋日晚涼坐庭下讀書有懷曉湖浦江官舍

滿院槐陰風簌簌。卷簾紅日西斜。竹鑪矮几自煎茶。一杯甜井水。雙盞海棠花。書



卷丹黃從校畢。南天閒數歸鴉。碧雲長自繞山衙。豆香慈母饌。瓜熟冷官家。

又 以團扇畫放翁小象詒少宰潘星齋先生

團扇家家圖畫在。蕭然海鶴風姿。夢隨鐵騎醉吟詩。三山臨水宅。萬里拂雲祠。老  
輩風流今似昔。烟霞遙訂心知。江南秋及杖藜時。綠蓑菰米艇。烏帽菊花籬。

臺城路 秋夜偕周子千水部允丞農部幼翹解元贈舊歌者

十年扶醉金門路。秋風又吹萍梗。絳蠟圍尊。銀衿貯月。重話舊游清俊。筵前漫省。看  
零落何堪。半凋青鬢。怕說更深。畫簾斜墮桂花影。江南燕歸未準。天涯芳草遠。誰  
寄愁信。廋賦傭金。清歌換米。同是隨人消損。商量舊飲。待種樹招鶯。借他清蔭。只恐  
年年。露寒鴉占穩。

菩薩蠻 題王子常同年桃花潭水圖卽送其還台州

春風人面桃花樹。春江直送行人去。花落又經秋。有人長倚樓。歸舟爭認得。家住  
清潭側。潭水隔年春。桃花仍傍人。

長亭怨慢 慰香濤歲莫悼亡

正春到。椒盤吟絮。官燭搖紅。玉堂雕戶。忽自釵分。斷雲天際。渺何處。舊時鸞鏡。誰並倚。花雙樹。只留得鴛鴦。忍更話。青紅歡聚。日暮。認空房履迹。點點香塵堪數。君新移居。寫成虛位。對遺挂。商量眉語。最苦是。爆竹闌填。怕膽怯。犀簾無主。應倍記。年前擁髻春旛風度。

憶舊游 癸酉燕九節大風獨出西便門游白雲觀謁長春真人象用玉田大

都長春宮韻

恁茸衫款段。獨訪元都。日澹沙晴。休說長生事。但丹霞竈冷。烟裊旛青。天風猛撼鈴鐸。燭亂露壇星。祇玉格金函。玲瓏霧閣。深瑣層清。藏經閣。以有游女不及登。西游幾經歲。又幾劫開皇。鶴化無聲。記得蓬萊境。便雪山冰海。花樹都春。何況帝城佳氣。闌苑接仙禽。還日極斜陽。林尖寺塔銜暮雲。觀之前面即天寧寺

探春慢 春夜尙寒月色奪畫盆中水仙花盛開於波黎窗下映月觀之香豔

清發姑射仙人冰雪姿無此綺絕也

葉蟲春織苞團玉潔。醞得冰心如許。吹氣難勝。扶頭有恨。小試凌波微步。不識東風態。祇忍俊、天寒無語。也應獨立消魂。人間何事塵污。可是前生瑤侶。恁量水添香。換他眉嫵。暫啓重簾。綺錢低映。留得銀蟾來駐。還惜亭亭影。怕清絕、無人爲主。歷歷星霜。持裙莫便歸去。

東風第一枝 去春寓庭新栽紅杏二株經年未抽一條以爲枯矣二月中旬

忽著花滿樹老榦密英有團雲流雪之觀月夜賞詠其下香色雙絕徘徊風露倚以曼聲鐵骨冰心不令老梅獨擅耳

日暖雲邊春來天上。杏花開到庭院。甚時宮樣添栽。便把流光輕換。瓊軒並立。恰占得、東風剛半。鎮記取、老榦孤擎。不許鬧紅零亂。最愛是、月明宵暖。認積雪、滿枝香散。襯他一抹銀牆。依約烟橫霧澹。紅窗吹簫。都不似、梅花哀怨。待畫出、綺影簾前。長傍玳梁雙燕。

臺城路 癸酉上巳謝麀伯編修招同庭芷游慈仁寺登毗盧閣憶自庚申閏

三月偕庭芷宴集於此冉冉十四年矣

鳳城西畔前朝寺。禊春又聯吟侶。松合香臺。草侵荒殿。撩亂風旛鈴語。杏花過雨。正藍子搖紅。丁香含素。庭院深深。磬聲不隔燕鶯路。藏雲洞。今在否。登臨孤閣。迴難寄愁處。柳綠蘆溝。雲開薊鎮。依舊青山無數。悲歌倦旅。看禪榻茶烟。鬢絲如許。好片斜陽。暮鐘催客去。

瑣窗寒 聽事前植垂柳一株。裊那可愛。春暄滿窗。玩之終日。回風披拂。亦足

當小蠻一舞也

約略腰支。剛應夢醒。漢宮春曉。柔條幾日。踈地便侵芳草。問章臺。爲誰相思。趁時碧玉年華好。想朦朧嬌眼。未曾省識。西風斜炤。生小。雙蛾掃。怎怯怯。遙來恨絲縈繞。學舞纔能。見說尊前人老。記年時。鶯燕故園。青青未折春已杳。但從今。寄祝東風。證取成陰早。

高陽臺 柬鄭盦侍郎尋城西海棠之約

瓊島春深。液池波暖。晴陽正麗。花甄宮漏聲中。幾回暗度華年。碧桃丹杏參差過。漸風翻紅藥階前。趁微吟、退直鳴珂。滿袖鑪烟。纔看扈蹕紅雲輦。又三天侍宴。壽寓開筵。明日上萬壽節。仙樂琳琅。也會夢到鷗邊。果駟酒榼城西路。掩叢林、十畝花妍。莫辜他、錦幄猩屏。曾約銀箋。

長亭怨 朱肯夫侍讀屬題其婦翁錢曉庭大令聚朝所畫花卉小冊是庚申

三月挈其女朱宜人卿藻避亂山中。因以寓廬景物圖付左芬肯夫追感墜

絃益懷傳。研爲譜。此曲略寫悲懷。

恁重檢、玉函佳事。粉指痕留。露華猶溼。老輩風流。傳家畫本。媵丹碧。大令爲籀石後人。漫驚烽火。攜嬌女。山居蕭瑟。竹屐練裙。曾侍硯芸箋親擘。愁說。堦鄉回首處。鶯脰淚波堪挹。種松人去。便雪裏。穠桃都折。付蕭郎。采筆相思。重證取。花紅圓月。況看蘭筍森森。仍是綠陰時節。所畫有松竹蘭筍木筆芍藥及雪裏桃花。又有題句云屋

西舊種數竿竹喜見春來新筍生爲語兒曹休掘取日長留得午陰清

滿庭芳 莫春再偕肯夫游慈仁寺坐丁香花下適吳清卿編修顧緝庭工部

亦各攜茶具來遂同席地至晚而散賦柬肯夫

風漾游絲雨晴芳草聯騎重款禪關碧桃纔過紅綻海棠鮮猶有丁香似雪斜陽外  
占盡春妍經行徧廊空人寂雛鵲鬪花前蕭然僧幾箇垂簾掃地靜炷鑪烟且訪  
鐘林下選石雲邊難得江南吟客松風裏來聽茶煎還相約綠陰如幄清簟枕書眠

清平樂 春晚日同陳芟聲戶部蔡備丞刑部兩同年招集極樂寺賞海棠酒

畢同游可園二首

年年春事西直門前寺一路衣香隨蝶至不辨人叢花氣枝枝紅豔消魂相攜翠  
管金尊一霎綠楊風起倚欄獨數春痕

河橋南畔朱邸無人管舞榭歌樓全不辨好箇秋千庭院碧廊一帶闌迴沿流樹  
轉山開聽罷江南蛙鼓鬢風滿袖歸來

賣花聲 登可園山閣看西山作

檻外綠漫漫。烟樹回環。夕陽依舊滿西山。萬戶千門無覓處。寂寞春還。無語獨凭闌。舊事堪歎。龍舟猶繫綠楊灣。鳳吹宸游天上去。流水人間。

摸魚兒

後二日鄭盦再招集極樂寺鄭盦言庚申之歲寓直澄懷屢來游燕

花事之盛亦非今比因取其意譜之

又垂鞭。高粱橋畔。玉泉如帶低繞。翠華當日巡行處。夾輦復生春草。龍尾道。應倍憶。銀緋散直尋春早。寶花壓帽。看玉勒驄嘶。朱衣吏引。日伴翠尊倒。當年事。佛日紅霞環抱。霜華千樹凝曉。海腥一自翻西極。樓閣五雲俱渺。花亦老。便種得。天桃穠李都年少。題詩再到。願滿挹天羹。長攜蓮炬。來問豔妝炤。

又 偕孝達磨伯諸子自極樂寺游可園時孝達悼亡予亦見去年知識中有

夫婦相值於此者其人旋亦有分釵之感因賦其意柬孝達

甚恩恩。一年春老。海棠開徧琳宇。廣庭十畝紅霞隊。交倚翠簾珠戶。能幾度。消受得。

金尊銀燭傷春句。畫欄斷處。有一樹垂楊。恰當花缺。爲我盡情舞。循流水。還憶舊  
經行路。香車寶馬同駐。屨痕釵影分明在。偏是落英無數。鶯燕去。祇贏得。枝頭猶帶  
前年雨。閒愁漫訴。且再問荒園。綺窗塵網。賸有斷釵否。

翠樓吟

同年宗室盛伯希孝廉昱肅恭親王曾孫協揆文愨公孫也家有園

亭極勝其閨人及令妹皆能詩初夏招賞牡丹裴回欄檻豔情欲語賦此贈  
之

曲檻留春華軒敞。夏當年朱邸分賜。香塵隨步逕。還隨處。雕欄堪倚。小山纖峙。又飛  
閣流丹。迴廊縈翠。重簾底。綠楊垂處。亂花橫砌。最愛千朵嬌紅。似絳旛朱節。舞鸞  
飛墜。天風環佩響。更深院。沈沈歌吹。豔情誰寄。正鈿匣裁詩。金鳧添麝。人微醉。錦屏  
雙影。折枝橫髻。

瑤臺聚八仙

癸酉閏六月寓齋新植海棠重作華甚盛賦此紀之

正是池荷紅過後。滿院綠樹陰濃。離離吐蕊。忽地數到珍叢。伏雨闌風剛幾度。又催



他、香夢惺忪。好相逢。瑤臺舊侶。釵朵玲瓏。長門當日別後。恁燒殘畫燭。苦憶歡悰。淚浥銀箋。訴天心事誰同。黃金買賦何用。但重與、添香話漢宮。猩簾護。願月圓長閨。花好長紅。

臨江仙

潘紱庭丈以寓齋海棠重開賦詞見寄依韻奉酬

春夢枝頭重喚覺。睡情又近黃昏。綠陰如幄靜當門。風擎羅扇豔。月傍玉釵溫。曉起冰肌和露拭。茜紅褪後還存。晚妝依舊點脂痕。幾回攜燭看。生恐再離魂。

琵琶仙

用白石元韻有明州妓委身陳姓牙郎爲適所嫌構之幾死某比部

者新納吳姬與之有連以計脫之寓書於余將爲紫雲之贈作此戲柬

夢覺銀屏彩雲已。寄與定情花葉。誰分開了。金籠啼妝已愁絕。重料理、嫁時鸞鏡。還怕聽、曉窗鷓鴣。紅淚封綃。青裙舉碓。舊恨休說。恁天風、吹入闌干。正老去相如病時節。猶勝龍邱獅吼。賣門前茗莢。須燭下、梅花妝罷。報佳客、一甌清雪。寄語燕燕紅樓。鈿車催別。

摸魚兒 題雲門茗花春雨樓詞卽送其還夷陵

最消魂。綺叢蘭芷。東風都化紅豆。暮江蕭瑟彈來慣。終古楚天長瘦。三峽口。更禁得、深篔簹。日啼猿狖。清吟曼奏。擬喚起湘靈。大招騷屈。同聽玉龍吼。長安邸。汗漫相逢盃酒。淚痕仍滿衫袖。蘋花老盡春波綠。盪得遠峯眉皺。君怨否。君不見。天涯芳草。今依舊。玉驄去又。休更譜商音。吹成恨雨。溼徧薊門柳。

念奴嬌 題陶子緝蘭當詞

鏡湖八百。把輕煙軟翠。盪成詞境。玉笛一聲雲外起。吹得鴛鴦都醒。鈿枕盟香。珊瑚奩。偎月。總是詩禪影。風情何似。露痕涼墮花頂。一自春水悠然。碧山老去。零落閒金粉。牙板銅琶都歇絕。寂寞魚龍誰聽。試譜冰絃。徧傳蓮女。唱徹江天迴。苧蘿谿上。萬峯同鬪妝靚。

臨江仙 爲子緝題桐枝畫扇

一院秋燈初過雨。月兒檐際纖纖。桐枝斜斲玉階前。暗聞風葉響。人影隔疏簾。剛

是轆轤金井歇。夜深還動箏絃。微雲清露乍涼天。畫闌閒似水。梧子落誰邊。

醉花陰 陶少篔同年招同仲修匡伯紫泉令弟子縝夏夜飲花下作

小院秋燈光乍定。露溼瑤階冷。香篆隔窗紗。團扇風前。人與花相並。晶盤瓜果筵前釘。又漏聲催飲。莫道暫時歡。杯底銀河。剛度涼蟾影。

一萼紅 舊乞潘星齋侍郎畫沅江秋思圖寄意瀟湘實傷遲莫今年春試風

影多奇。湘瑟無靈。焦桐已爨。恨蹇脩之無力。怨醜媒之不良。偶逐吳歛。少延楚思。語擁楫以無歡。懷采蘋而何已。星丈復爲作菱花秋水圖。因以曼聲譜之。微波脈脈。孤鴻冥冥。不徒江上峯青之感也。

記年時。試凌波步履。常自惜春遲。雁去西風。猿啼夜月。幽恨傳徧江籬。漸開到。紅蘭碧芷。費幾許。花葉琢新詩。露白舟空。峯青霧擁。那解相思。腸斷懊儂重唱。祇瀟湘意淺。不繫鬢絲。綠樹辜簾。黃金解佩。心事都怕人知。忍偷換。珍珠密約。便緘淚。何處更通辭。賸有菱花鏡中。畫取空枝。

高陽臺 詠李花

琢雪輸妍。裁冰比潔。路人爭說丰姿。上苑遙來。玉顏獨冠芳時。東風幾日無消息。惹  
昭陽、夕炤參差。況禁他、杜宇啼殘。燕子歸遲。纖桃稚杏紛相笑。奈輕英力弱。亂逐  
游絲。不信傾城。無言換取空枝。還應戀續笙歌夢。便山中、落盡誰知。問能消、幾度凭  
欄。幾度題詩。

長亭怨慢 雨夜和子緝寄懷詞均岑旅抄歡同此蕭索子緝閒情無寄託興

騷蘭然予愁則更深矣

正扶病、疏衾偎冷。綠淨房櫳。溼雲催暝。雨滴空階。暗聞蛩語、共秋醒。獨兒閒趁、還猛  
觸、煎茶鼎。待檢點銀荷。怕蠟淚、前宵紅賸。最恨。是黃昏燕子。芳訊傳來無定。湘簾  
咫尺。攢撩亂、一闌花影。便玉笛、訴盡相思。祇屏底、更無人聽。更莫憶瑤璫。緘札是他  
會省。

百字令 乞胡石查戶部畫湖塘邨居圖用金風亭長索曹秋岳畫竹垞圖韻

故園蕪盡。便輕齋歸去。依然飄泊。舊揀牽舡終隱地。頭白團焦誰託。隔岸千山。長隄十里。大縱漁樵樂。稻田如繡。映林多少村落。最愛西跨湖橋。峯回水裏。丹翠供斟酌。爲畫吾廬深竹底。小綴風欄雲幙。春至桃花。秋來楓樹。隨意施丘壑。賀祠紅處。酒旗斜颭樓角。

解語花

子縝小住春明。屢尋歡隊。初以琵琶佐飲。眷眄桐郎。近中微嗔。移情

雲侶。適持所繪香草靈嬉小冊。屬題其中。託興蘭荃。寓言柘舞。騷情客感。殆不自勝。爲賦此解。寫之浪蕊。迷離微波。綵邈非寄懷於翠被。祇觸淚於青衫。楊柳曩愁。櫻桃新寵。亦復誰能遣此也。

湘簾鬪影。翠管留春。恨譜翻都徧。殢人星眼。無言處。不比往時相見。檀槽自暖。弄嬌小。乍彈還倦。知幾時。桐葉秋風。暗替團團扇。聽取清歌宛轉。覓微雲山外。離緒難遣。蕙心清淺。無由託。一例亂紅波捲。珠塵夢短。問何處。露華能戀。應共收。碎佩叢鈴。寫入騷蘭怨。

十六字令

戲題蘭當所寄吳姬小景四幀人各得一闋

羅袖難勝怯自扶。熏香坐。嬌極未拋書。顧阿男

翩。豈惹梢頭碧玉年。妝纔竟。小扇立花前。顧愛寶

穠。袿被矜嚴舊院風。宜平視。繡褥隱芙蓉。黎惠蘭

嬌。斜倚妝臺鞞翠翹。簪花笑。紅袖若爲招。陸翠鳳

國香 乙亥暮春極樂寺看海棠

輦路琳宮。又猩屏錦幄。爭鬪妝濃。多情內家羅綺。來繞珍叢。天上霓裳已換。問沈香、誰被恩醲。傷心舊時話。寂寞連昌。玉樹青蔥。翠華停幾度。倏珠塵霧捲。長信都空。嬌鶯雛燕。無數盡泣鵑紅。獨擅昭陽第一。倚雕闌。愁對春風。休提夢中事。細仗珠燈。合隊花驄。

臨江仙 新種緋桃一樹試花正妍薄霧冑之宛然愁絕夜來風雨眷焉於懷

賦此寫之

落盡櫻桃飛盡絮。晚花一樹穠新。薄陰低眷小窗晴。似憐春老。來試靚妝明。轉罷輕雷飄罷雨。滿階芳草多情。夜來風信近三更。暗凝紅淚。誰與伴明星。

陌上花 久病客中忽夢所憶前塵宛在語之甚悲寫以曼聲譜以楚徵不自

知其愁絕也

穗燈夢膩。無端相見。淚痕凝袖。影事烟空。依約訴來如舊。鈿蟬仍試新妝好。只有黛眉微瘦。尙相憐老去。惜離傷逝。萬千倜傥。斷腸癡絕語。檀欒願得。生小花紅人壽。鬪草歸來。長傍畫堂春晝。卅年幾慟人閒世。還問玉簫生否。詎纏絲未化。夜臺塵鏡。斷香還守。

綺羅香 鄭盦齋中盆蘭作並蒂花賦詩索和爲填此解

萼紫雙含。苞香對坼。生小盈盈相並。不鬪春風。空谷自商幽恨。經宿雨。笑齒齊芬。背明月。禪鬢同影。是何時。雙寫湘靈。夢回依約。淚痕凝。芳華知有誰惜。喜河陽種就。同心堪證。宮體南朝。風貌侍中剛稱。提舊事。並照金蓮。記佳讖。綴行瑤笥。試簪髻。定

卜宜男。玉窗人暗省。

臨江仙 極樂寺佛殿前有梨花一樹大幾蔭畝落花滿院蘭當茗樓皆有詞

賦此和之

寂寂琳宮長晝。玉梨一樹晴妍。不知春恨幾經年。爲誰開又落。夕磬曉鐘邊。過盡  
扶肩女伴。繡襟一樣低穿。飛來難得上花鈿。願留纖屣印。芳迹有人憐。

錦堂春 丙子端午

灼灼榴苞吐火。猗猗桃竹流霞。春風不管人憔悴。點綴滿庭花。五十顛毛如許。三  
千歸路猶賒。不知明歲蒲觴底。芳事屬誰家。

渡江雲 重午晚陰偕諸子登龍樹寺看山樓佳序難逢芳情多眷感時傷老

渺渺余懷

雲容天澹澹。葦痕風影。都上寺西樓。遠山青萬疊。是處斜陽。來與掛簾鉤。雛楊細草。  
又今年、綠徧瀛洲。偏未許、玉容花貌。深處盪蓮舟。凝眸。高城望極。點點宮鴉。正晚



鐘時候。還認取。欄干遙倚。壓鬢紅榴。單衫小扇分明在。祇錦箋、難寄珠彙。歸騎杳憑誰繫住閒愁。

長亭怨

雲門見眎新譜蕙蘭芳引感滇南李叔寶庶常所眷也綺情多觸言哀已深庶常子同年曾識之蓮花寺館選假歸抵黔而歿作此哀之并調雲

門

恁彈出、夜絃清怨。湘水巫雲譜成淒絕。淚溼青衫。寄情空自費花葉。碧梧吟罷。還憐惜芳蘭未歇。可憶紅樓吹玉茗。東風如雪。雲門有茗花春雨樓詞。愁說昔年蕭寺見風貌蓮花無別。蓬山路近看纓佩尊前親結。怎滇池啼到紅鵲。便夢斷竹王殘月。祇應羅袖黃昏。猶記舊時橫篴。

買陂塘

夏日偕諸子十刹海觀荷飲於一曲湖樓望瓊島景山烟樹迷濛苑牆繚繞水田風葉事事宜人譜此以堅看花之約

展簾前。翠雲千頃。田田荷葉飛舞。鳳城西袞盈盈水。臨水樓臺無數。天際路。看百道

紅牆。徧鎖宮中樹。笙歌散去。祇玉輦苔封。錦帆塵歇。傾盡掌盤路。凌波近。綽約瓊華島嶼。景山撩亂雅語。妝臺莫話遼金事。一霎夕陽紅過。能幾度。待擁檝人來。同向花間住。闌干倚處。指夾岸垂楊。蒼烟忽斷。飛渡液池鷺。

水調歌頭

伯寅侍郎饋洞庭碧螺春新茗賦謝

誰摘碧天色。點入小龍團。太湖萬頃雲水。渲染幾經年。應是露華春曉。多少漁娘眉翠。滴向鏡臺邊。采采筠籠去。還道黛螺圓。龍井潔。武夷潤。芥山鮮。瓷甌銀盃同滌。三美一齊兼。時有惠風徐至。贏得嫩香盈抱。綠唾上衣妍。想見蓬壺境。清繞御鑪烟。

高陽臺

閏五月十六夜聽雨和雲門並柬子縝

榴火添句。槐陰送夏。月圓纔上初弦。蓮漏聲中。無端瘦到茶烟。夜深一例瀟瀟雨。祇淒涼、獨自燈邊。況消魂、數盡流螢。聽徧啼鴉。隔簾花影。知誰惜。儘無言。烟裏泣。損紅娟。聞說銀屏。近來也蹙眉山。卻看湘篔簹。盈盈淚。總無情。爭忍輕眠。眇星河。玉雁飛時。還與傳箋。

尉遲杯 子縝招飲桐花館聽琵琶賦此調之且辭芳勺

桐陰靜。又悄地、小扇穿花徑。遲遲玉漏聲中。消受紗窗雙影。檀槽倦抱。撥損銀篋。有誰省。祇橫牀、約略如人。認來紅淚猶凝。多情翠鳥銜箋。長辜負金樽。小榼同飲。月色雲香相牽惹。偏愛看、銖衣嬾整。從春去、懨懨病後。便強啟雅青。怕對鏡。訴相思、夜雨燈前。玉鳧孤守烟冷。

臨江仙 夏晚讀書庭下花竹靜妍均有塵外翛然之意

一陣簾前疏雨過。夕陽樓閣晴妍。小安筆硯晚風前。柳絲低拂地。蕉影半遮簾。團扇單衫都稱意。不須紗帽閒眠。靜看庭際颺茶烟。綠陰中斷處。紅試晚花天。

蹋莎行 羊禊盃孫彥清約十刹海觀荷以病不欲往賦此柬諸君卽用子縝

茗樓禊盃彥清影字之叶

曉露清流。午風香靜。翠盤低擁花千柄。柳陰一帶淺紅闌。日斜過盡香車影。辜卻前游。新添酒病。畫船無意窺妝鏡。秋風蝦菜小亭西。待看明月空潭定。

又 卽事同雲門再用影字叶

快雨新收。嫩泥香潤。絳河明照銅街靜。小車油壁夜深來。瘳鞦痕在青苔徑。小褪蕉衫。虛堂涼沁。惜花人惜花同病。悄攜銀燭照紗窗。畫簾微漾茶烟影。

又 同人期飲天王寺塔射山房小極不往賦此柬諸君再疊影字叶

小隊清游。鳳城西近。古松涼合禪關靜。院深日午不逢人。畫旛風過花間磬。相約攜尊。偏耽薄病。料應裙屐穿香徑。翠簾剛對綠陰開。扇光輕渡西山影。

滿庭芳 汝翼邀同仲彝子縝雲門禔盃弢夫飲蕙蘭室徵笛選歌子縝雲門

賦此解余亦和之

新月當簾。微風生樹。繡勒同逐香車。韓潭西去。燈影記蘇家。難得蓬瀛俊侶。商量到。銀勺紅牙。偏容我。坐頭白髮。移近一枝花。周遮。屏鏡側。分飄羅袂。小疊蠻鞦。更掩扇清歌。嬌倚窗紗。笛裏分明舊恨。瀟湘水。不到天涯。空贏得。青衫老淚。重與灑琵琶。

青衫溼

湘江終古傷心淚。長自發紅蘭。鶯聲啼老。鵲聲化去。零落誰看。鈿車催至。冰甌銀燭。半日追歡。馮唐霜鬢。何戡病骨。同此長安。

南柯子 和蘭當茗樓并示仲彝弢夫

病久香都減。愁多夢轉加。秋深寒蛭獨無家。風露簾前。分與一叢花。灑淚和盃洗。含顰借燭遮。清歌一曲換年華。何況聽歌。人亦滯天涯。

雨霖鈴 夏夜坐月同茗樓感舊言愁欲愁且喚奈何矣

蛩聲初咽。正尊前話。竹下涼夕。回頭恨事如水。相憐倦旅。傷心愁說。等是巫山一現。奈雲散愁結。望隱約。天上銀河。淺淺情瀾幾時竭。瑤華分是傷摧折。更難堪。未落人先別。秋千院落何處。螢火點。晚花如雪。鏡破珠沈。一樣紅箋。芳訊都絕。祇夢裏。還道相思。淚滿羅襟月。

賀新郎 爲伯寅侍郎題羅兩峯當場出醜圖圖中爲毛延壽丑脚十人皆元人院本中事也

展卷呼之起。便迎人、低眉柔骨。百般神似。不分丹青神妙筆。變相都成非是。算鬼趣、直窮到此。袍笏當場宜活現。奈破衫、多半妝窮子。真與假、有誰記。筆頭粉墨談何易。要包羅、太行三峽。眼中心底。莫道當前真出醜。占盡人間頭地。且漫問、王侯餓隸。袞袞相逢皆此輩。祇笑啼、暫戴猴冠耳。誰竟識、真羞恥。

渡江雲

子緝雲門賦此解記十刹海之游皆託興芳華結情巾舄將離恨袞

未落悲秋雨窗誦之有烟水迷離之感因爲繼和然余愁則更深矣

宮牆斜抱處。盈盈一水。蓮葉與天齊。幾家樓閣好。隱隱垂簾。偏映綠楊隄。香車滿路。怎凌波、怯到湖西。煩喚取、紅裙盪槳。窄舫就烟棲。依稀。笙歌小隊。翠罽銀燈。有鴛鴦能記。誰爲拭盤心。露點鉛淚都迷。傍花莫怨汀洲冷。怕秋深、難覓紅衣。擗醉臥。月明自占鷗磯。

月下篋

爲羊禔盦題花谿漁篋圖卷

流水桃花。除非別有洞天深處。層林略約。鬢鬚青山峽川路。花谿在海寧州州之山

水以峽石鎖爲最亦稱峽川禪壺州人也年年谿水春來長辦舴艋全家穩住祇新  
詞琢就眠香擲篴翠蛾閒譜烟侶今何許望天際汀洲漸驚鷗鷺漁蓑典否幾時  
收柂歸去臨風一弄滄浪曲早拍醒緋霞萬樹待掃團篷又怕輕紅墜雨

金縷曲

闌干和汪小竹詞借子緝雲門同作

庭院深深處。恁低徊、輕紅一抹，把愁圍住。人影亭亭嫌半掩，況隔花叢無數。更倒映、  
紗窗如霧。盃曲迴廊烟繚繞，算句留、能有多時否。斜日影自來去。當年並倚花陰  
語。指身邊、重重卍字。箇儂心緒。回首凝塵飛絮迹，難辨畫裙金縷。只略有、啼痕堪據。  
便是欵斜那平忍換，怕餘香、猶發經時雨。羅袖底、斷魂路。

永遇樂

聞歌感舊

紗幌銀屏。今宵還醉，花影深處。釘坐淺香，纏衿芷老，總是傷心侶。當年風調，絲囊羽  
扇，問有幾人能語。祇筵前、盈盈畫燭，淚痕爲我偷注。一時鶯燕，恁爭持羅帶，題徧  
傷春好句。誰分而今，白頭蕭颯，難賣黃門賦。只餘橫篴，米家歌裏，略記貞元風度。還

愁問、簾前月色，尙如舊否。

相見歡 冬夜有贈

香車剛見簾開。整鬢釵。留得半庭殘雪，印弓鞋。

端詳覷。低聲訴。暈紅腮。知道竹間

煎茗，爲誰來。

年來徧顧花叢。總成空。虛負三生，胡蝶幾番風。

偏相惱。韋郎老。恁怱怱。待約梅開，

雙笑鏡臺中。

賀新郎

冬夜偕匡伯弢夫仲彝飲菱香室賦贈錢郎兼悼傅生

燭下人如月。又當筵、倚衿吳語，暗香初接。一樣秋人纏繇意，分手俄成愁絕。記隔夜，瑤笙吹徹。花葉團團屏象曲，更金尊、互勸歌迴雪。雙袖底，酒痕熱。同看鶯燕開簾出。驀回頭、紅菱照眼，玉枝先折。猶有蛾眉留人住，爲我明珠承睫。祇一霎，溫存須惜。典盡貂裘那作計，恐人間、容易芳華歇。休更憶，北鄰筵。

又 題雲門茗花春雨樓填詞圖



家在巫雲曲。更那堪、蕙情蘭抱。楚天人獨。屈子騷根三千載。悱惻靈芽能續。且莫怨、衫痕凋綠。湘水芳魂招未得。又黃陵、泣斷瑤妃竹。歌迸急。素絃促。知君心似彈棋局。憶三生、香階剗襪。定情銀燭。綠綺徽寒。鳳寡淚洗明珠盈斛。便錦裏、回文誰讀。一角紅樓春如夢。祇東風、歲歲花吹玉。多少恨。認橫幅。

揚州慢

同年王弼夫水部薄游邗上有碧玉之眷約登第後迎之別後三年

未遂斯願弼夫一日夢至蜀岡春人宛在乞題其額爲書如此江山四字而寤乃續綠楊春夢圖以紀其事屬余題詞

宛轉青山。畫欄紅處。並肩暗締香盟。有花間姊妹。證鈿合深情。恁妝鏡、芙蓉暫掩。翠簾珊檻。猶自藏鶯。漸橋邊明月。春風吹老簫聲。夢中彩筆。認蕭郎、重到江亭。祇鸚鵡評來。驪駒唱去。偏自分明。寄語玉樓紅杏。休重誤、陌上香塵。望垂楊城郭。凝眉都待泥金。

瀟湘夜雨

春將盡矣雨聲蕭瑟入夜彌繁燈下倚此柬弼夫熨夢懷人知有

同感也

開徧茶蘼。飛殘榆莢。送春已自無聊。黃昏無奈雨瀟瀟。愁更炤。菱花雙影。看半臂。寒到今朝。偏長是。朱闌愛凭。倦禫雲翹。紅箋纔去。果騶宛轉。馱得人嬌。暫俛他翠袖。容易香銷。拚一晌。溫存軟語。銀燈下。懶炙瓊簫。重簾外。春泥浣屣。花葉莫輕招。

南浦 連宵苦雨倚燭小眠賦此寄雲門子縝子宜文冲諸子寺廬

簾重雨垂垂。到黃昏。又是晴期無準。微醉更添衣。重篝膩。先到江南梅信。扶頭睡味。殢人依舊年時病。多恐銀荷燈炤處。閒了水晶雙枕。夢中還問紅樓。祇紗窗似霧。琴絃微潤。燕子不歸來。歲蕤瑣。斜閣闌干秋影。空階點滴。漏聲遙隔重門靜。爲想禪牀同聽客。凋得幾絲青鬢。

露華 京師天寧寺有綠牡丹一株間歲作花今春開時往觀不待則前一日

爲朱邸移去矣

琳宮最憶。有鹿女銜來。分外嬌絕。借與露華。輕把黛螺微拂。似曾綠萼初開。換了玉

環標格。留仙住。回頭暗看。唾痕凝碧。春風幾度相識。祇倚徧闌干。誰忍攀摘。賦就睡妝偏漏。宓妃消息。帶顰轉入朱門。可比墜樓顏色。燈影下。何時翠蛾重出。

漢宮春

春晚徧訪白紙坊諸寺觀金章宗李宸妃象不得

舊事金源記。明昌多暇。會創瓊華。昭陽豔稱第一。長駐輦車。環肥略似。炤團圓。明月爭差。看一樣。宸妃仙李。玉魚應笑南家。遺象同留蕭寺。勝青城北去。零落龍沙。滄桑幾回。過劫閒。數宮鴉。闍黎徧問。遜蓮臺。猶奉袈裟。明孝定李太后九蓮菩薩象今在城外慈壽寺其重摹本今在慈仁寺孝純劉太后象今猶供奉長椿寺中披袈裟僧帽有兩幅惆悵是春風依舊卷簾處處楊花。

滿江紅

詠晚霞

淺淺晴天。拖逗出。絳霄花影。正日暖。天孫繡罷。嬾收雲錦。綠樹接邊紅欲禫。鳳城銜處。明逾靚。更額黃。無限夕陽山西南映。江上思。誰相證。山外意。何時盡。似端相人面。醉波微暈。錦帶書從天半寄。紫羅巾欲風前贈。祇消魂。能得幾時看。明河近。

玉漏遲

傍花蓮漏滴。疏窗曲檻。句留涼夕。下了香車。相見倍相憐惜。生恨明燈宛變。似偏照、深紅羞靨。還轉向、銀屏影底。倩伊偷隔。自從繫定紅絲。恁密見疏逢。暗添華髮。似此多情。翻悔那回相識。拚得青衫化淚。總不換天涯輕別。團扇底。私語怕教人說。

三株媚

夏夕借秋。蒨飲霞芬室。

鑪烟歌扇裊。又花間招攜。金尊頻倒。翠管筵前。正袖霞低拂。鏡菱偷照。背了銀荷衫。暗並、端相嬌小。水樣湘簾。偏借銀蟾。映人雙笑。惆悵年時懷抱。看舊眷新嬌。一般風調。密字珍珠。算酒邊心事。抵伊多少。白髮催人。償幾度、蛾眉低掃。但願歡紅愁翠。相依未老。

解語花

庭中千葉石榴雙花並蒂上。又出重臺一花賦。此索同人和。

猩英細簇。絳瓣勻敷。紺萼雙趺展。乍分還斂。薰風裏。相倚又相遮掩。重臺更豔。認高處、五雲穠顛。是甚時、蠟鳳三珠。齊向枝頭見。可似尹邢。婉孌。又身輕掌上。來舞飛

燕。朝酣深淺。紅裙並，偏讓暗擡嬌面。芳心數點。還密意，如人旋轉。長願深翠朱旛，不作飛紅怨。

珍珠簾

霞芬以茉莉徧綴秋蔭，所書團扇風香襲袖，露顆沾衣，密意重重，芳心脈脈，采蘭贈若，非所云聞解佩緘璫方斯，詎遠惆悵之結情見乎辭。

是誰琢就珍珠蕊。靈苞含多少，溫存深意。恰到半開時，又素馨如醉。見說琳宮新采得，便暗取、荷囊深繫。偷寄。恁背人低數，相思何事。偏傳小扇輕紈，配綽約簪花瓊瑤，勻綴。卅喜算團圓，看細排心字。比似丁香猶款密，好結取、從頭盟誓。休棄。使金篋緘香，見時長記。

雙雙燕

自題秋江菱榜晚霞時圖意

滲金艇子，趁青幔風前，載愁容與。山光鬢影，同鬪鏡中眉嫵。纔聽柔聲雁櫓，已漸入、淺歌深處。多情畹晚紅霞，半帶寒烟汀渚。延佇。蘅皋日暮。託淺淺微波，暗通心愫。沅江香歇，來共水荳花語。消得斜陽幾度。又撩亂、天邊孤鶩。何時約定紅闌，看足五

湖風雨。

新雁過妝樓

初秋既望皎月澄霄涼思滿懷悄然有憶不自知其言哀已深

也

玉宇澄空。初涼地、秋聲漸到梧桐。小庭夜靜，愁緒碎攪吟蛩。翠地闌干誰共倚，亂螢飛度竹間風。恁怱怱。絳河舊影，來約新鴻。爭知星期乍過，怎鈿簫翠管，取次成空。謝家池畔，香霧自上簾櫳。清暉暗憐玉臂，怕重到、鍼樓疑夢中。星星鬢，便鞞鬢如故，妝鏡羞同。

月邊嬌

前調既成幽深以怨因賦此闋柬弢夫卽譜弢夫今日書中語也然

曲終調苦意更深矣

雨過天街，早鈿陌新涼。紅箋傳信，畫屏烟細，珠燈露泫，翻襯月邊人靚。鸞檣雁柱，借慢撚，句留花影。晶簾隔處，暫記取，香肩低並。似聞扇底鶯聲，夜來還憶舊游輕俊。茂陵人老，長門賦斷，零落字中金粉。吟腰瘦盡，問甚處，霓裳堪聽。徘徊桂樹，祇露盤

承冷。

壽樓春 初秋連夕偕諸子飲豐樓作此以紀一時人地恨不得倩菱人霞侶

擷笛歌之也

聽深秋鳴蟬。漸催人暮靄。風露初娟。尙有尋春仙侶。共馳華箋。珠市口。燈街前。認酒旗。青樓高懸。又鬢影清尊。桂薰畫燭。花惹一庭烟。人生幾開芳筵。況文園賣賦。難換金錢。那得朱顏長駐。素蟾長圓。菱鏡小。霞衣鮮。漫揣量。卿憐儂憐。要休忘連宵。雙雙玉人團扇邊。

金菊對芙蓉 丁丑九月十二日寓齋燒燈對菊邀同人小集作展重陽之飲

並招秋濛霞芬兩郎卽送少篋入粵子宜赴閩同弢夫作

紅葉初酣。黃花未老。銀燈小駐秋光。約飄蓬俊侶。再展重陽。玉釭怕炤年來影。問鬢邊。添幾新霜。征鴻過盡。且聽漏滴。閒領茶香。還愛眼底吳妝。正相依翠袖。同倚絲囊。縱貪歡一晌。也勝尋常。簾前此去天涯路。早西風。瘳隔垂楊。明年今夕。嶺雲萬里。

何限思量。

解連環 酒邊感賦贈霞芬

暮寒催勁。認青帘挂處。小車潛等。看素手、暗啓風簾。正眉翠含顰。臉紅低暈。萬種溫存。旖旎到、銀荷燈影。更嫣然笑指。潑豔金尊。炤人斯並。悲歡舊情漫省。漸中年耗去。壯懷消盡。問底事、未了愁根。把零句么絃。細搜幽恨。自指星星。更幾度、相依青鬢。倩羅衿、爲花替拭。淚痕怕損。

賣花聲 七夕後二夜燭下作是夕加丑立秋

人靜畫簾低。銅鴨烟微。雨聲纔過碧簷西。先見一繩銀漢影。涼到生衣。秋信是耶非。蓮漏聲稀。芭蕉剛與綠窗齊。添了豆花紅一桁。添箇螢飛。

霓裳中序第一 秋曉聞寒鴉聲便覺歲暮催人霜雪將集賦此寄興

屏山嬾未展。夢覺瀟湘秋漸遠。纔報妝樓過雁。又嘹唳帶星。寒鴉天半。西風尙緩。問碧雲、何事催趲。天涯路、爲誰舊約。破曉送淒怨。剛斷。涼蟬幽咽。祇客裏、雕梁塵掩。



歸期難問去燕。想故里荒邨。斜陽何限。昭陽能幾見。便做弄、憑高數點。林枝借、未飄紅葉。忍自召霜霰。

貂裘換酒。戊寅十二月二十七日余五十初度先夕姬侍輩爲治具作暖裘

筵賦詞兩闕示之

百歲平分了。謾相傳、南人衰易。此年難到。更有蕭家天子語。各半東西相禱。祇未食、長生茶蓼。人鬼擠排終不去。有黃齋、百甕供人咬。憂患窟。此中老。生來百藥都愁天。記當年、瑤環就塾。未離懷抱。歷盡人間千萬劫。轉眼頭顱都皓。祇賸取、形單自弔。今日杯盤紅燭影。算三生、留得枯禪稿。歸去也。故山好。余前身爲天台國清寺僧且作團圓計。有蓬頭、翹風房老。恭心獠婢。使指浣衣萱草輩。銀鹿青猿差備。爭進食、欲令公喜。雪樣餈餅花樣肉。更黃雞、玉麵淘來膩。京雒食。故鄉味。練裳藎篋都搜抵。勝相嘲、影妻椅妾。乏人料理。祇念白頭花燭伴。獨自牽蘿鄉里。愧割肉、東方難寄。比似買臣差不惡。便從公、餓死寧相棄。下牀答百年禮。

百字令 五十生日鮑敦夫曾聖與楊斯大羊敦叔朱蓉生陶子縝何達夫殷

萼庭諸君枉過張燈夜飲霞芬爲之左鱗酒釀花穠陶然一醉卽席賦此

瘳年前度喜冬暄回暖春風催律。小試燈屏圍絳蠟。照徧梅花如雪。白髮龐眉。兒童指點。卅載填詞客。斯人猶在。東方遊戲還劇。漫道鑄錯郎潛。三朝京輦。幾醉閒花月。同輩少年偏見愛。來作靈均生日。更喜尊前一枝瑤樹。綽約依人立。笑它坡老。紫裘誇煞吹笛。

百字令

戊寅除夕風雪大寒歲事甚窘賦此自遣

繞牀逋券。任扃門高臥。雪花如掌。到晚粃盆光影裏。又見先生無恙。裹飯荷苞。籠薪筠筥。山侶能相餉。臘筵纔罷。牆頭還度佳釀。自數五十今朝。但除童幼。盡作謬臺長。滄海翻流家再破。此老依然強項。爆竹聲中。撚髭吟罷。靜待黃雞唱。茸裘風帽。明年新試攜杖。

滿庭芳

己卯閏三月三日小雨微晴偕辛楣敦夫子縝游慈仁寺坐欒枝花

下返憶庚申舊事。悵然有作。索諸君蘇。

花醒餘寒。柳蘇絲雨。閨春留作重三。倦游詞客。芳序恨長淹。爲約微壺俊侶。鳳城畔。閒趁珂驂。輕陰裏。朱牆一抹。松影轉幢南。那堪思往事。廿年再禊。曾款精藍。問咸豐朝士。幾共言談。二字用世說。晉朝賢。洛水事。惆悵僧貧。樹老。一株雪。猶炤春衫。憑高望。斜陽燕麥。無恙是晴嵐。

一萼紅 庭中海棠一樹。今年作花甚繁。比日多陰。紅萼可愛。夕風大起。恐有所損。先倚曼聲臨之。

傍西牆。有猩棠一樹。含意上金堂。珊綴珍叢。脂勻粉朵。未許蜂蝶輕狂。看取次。將開復斂。似避人。嬌面怕端詳。散點朝霞。輕籠細雨。略逗斜陽。應記幾年栽就。比摩挲稚女。錦帶低量。纔整搔頭。凝羞暈頰。尙怯輕洩春光。鎮贏得。回眸一笑。襯纖妍。垂柳萬絲長。只恐開時遇風。翻損紅妝。

三部樂

庚辰初夏春明待榜舊侶俊集官事多閒偕禔盦諸君會浙中五科

同年於文昌歌院合樂選舞錦簇雲團玉漏屢添玳筵未能亦計偕之勝事  
期集之美談儻入撫言定傳韻賞賦此紀事并調禔盃

京輦餘韶倩細仗錦裝更開花國畫闌深院難得珍叢都集約珂里仙侶霓裳趁綺  
尊共醉鈿板低拍部頭進點柘鼓清歌爭發羊車幾催密字有押衙阜帽代傳花  
葉儘教語留紫燕隊排銀鶻恁伊州一時舞徹紅燭底都忘墜月珠繞翠匣防擁髻  
燈背愁絕。

換巢鸞鳳 調蕩城

客裏歡娛恁縈情錦瑟舊恨明珠雷塘春去盡霞嶠月來孤金箏吹換小單于勸人  
眼前相依玉壺銀河淺問幾日鵲橋偷渡延竚燈幾炷車轉細雷人帶黃梅雨鈿  
扇風輕練裙香並消受垂簾低語爭道秦青舊風流泥人無恙靈和樹應猜防屢聲  
來鶯燕知處。

燭影搖紅 庚辰生日鄭盃尙書饋香積饌遂斟昔酒與鮑銀子編修夜飲借

花枝作酒籌賦此寄尙書並柬鏡子

冬尾三朝。歲筵未辦。椒花頌。蓬門猶說是懸弧。白髮扶殘夢。剛聽維尼噪棟。報尙書。銅槃饌擁。袖薰朝罷。禪侶分餐。催箋傳送。破磨齋餘。蜜梅香護。經簾重。便思一醉泥金貂。笑發牀頭盞。燭蕊銀荷。綴鳳倩雙花。金尊對捧。願從今後。繡袞漁蓑。翠蛾長共。

臨江仙 是日酒次懷雲門保陽

五十二人霜在鬢。我生又過今年。貫裘一醉也陶然。畫蟬紗隱燭。藥玉酒行船。那有後堂絲竹事。暫看花影便娟。舉杯今夕憶彭宣。戟門嚴臘鼓。霜劍拂吳箋。

一枝春 辛巳正月晦日密雪入夜時久苦晴竹宮太一齋禱甚虔賦此誌瑞

暖入春旛。乍東風、蕙轉冰成酥雨。湘梅過了。又亂霏香霧。琳宮磬度。正金籙、玉晨宵御。應豔道、瑤草琪花。近覆醮壇鷓鷯。如聞秀郊人語。笑聲來勝似。燈期簫鼓。鱗鱗翠瓦。漸造玉簷瓊宇。涼蟾借取。訝窗近、夜珠來處。還自檢、銀燭風簾。細商詞句。

賣花聲 詠楊花

睡起靜啼鴉。新綠窗紗。午風剛颭樹陰斜。瞥見卷簾晴日影。滿院楊花。茵席任交加。莫更闌遮。東風此去又天涯。記取今年深樹底。今日吾家。

臨江仙 四月望日坐月藤花月

又是夏初今夕望。月黃剛上羅衿。夜涼誰與伴眠琴。簾前香澹澹。風外漏沈沈。手種朱藤新滿架。綠扶花影深深。幾年鄉夢在山陰。誰知今夜月。別自有山林。

朝中措

一年無事爲花忙。贏得幾春光。賣到街頭紅藥。鎮看綠樹陰長。桃先桃後。二月先

開者山桃夏小正正月地桃則華傳曰地桃山桃也都人尙呼之南中罕見爾正謂之樞桃三月開者爲晚桃都中呼碧桃花尤穠豔多千葉者此是桃之正名詩云桃之夭夭月令之桃始華皆是也潘岳閒居賦云三桃表櫻胡之別謂今晚桃及櫻桃胡桃爲三不數山桃也梅棠杏李次第丁香。爲問先生日曆。只餘花事平章。

清平樂

雨餘天氣。槐影垂簾地。楊柳深深籠翠几。紅藥一枝簪髻。茶烟細裊游絲。鳥啼日上階時。花下劇棋纔了。炷香又和新詞。

錦堂春

庭院雀行悄悄。闌干樹影重重。狸奴睡足花枝午。閒撲柳絲風。細數枝頭青子。趁人扇底飛蟲。嫩羅新試輕衫影。傍著小榴紅。

清平樂 題江南初夏仕女圖

玉鳧烟炷。已到花陰午。嬾向鴛鴦尋繡譜。且教金籠鸚鵡。薰衣熨盡都慵。棋殘還理絲桐。多少迎梅舊事。明窗一桁紗中。

天香 詠夜來香此花蓋出自閩粵海外不知本何名葉似款冬而稍長枝弱

蔓生花五出嫩綠無蕊而香甚摘之再宿則爲澹黃香亦差減幽香清遠似佛手柑似桂亦似蘭非抹麗珠蘭等所能儷也其色似林檎似碧柰亦似新

茗芽其香終日夕不散。非似夜合花晚香玉止。以夜香厥品最上。稱名未宜。因以詠之。

勻翦青羅。細烘翠纈。繁英嫩蘸秋水。合是昭陽。點成碧唾。漫把夜來相字。沁檀孕麝。任抹麗。濃香都避。晨比芳蘭。滴露宵疑。蜜梅含綺。剛宜綠閨幽事。映窗紗。緩調螺子。碎簇鈿釵。梁上幾莖蔥指。纔妬眉梢摘黛。更一宿星星。頰黃似。恰道新涼。偷薰翠被。

玉漏遲

暗蛩啼近牖。沈沈漸覺。池添宮漏。纔卷桃笙。已道枕函冰透。不奈天街旅橐。碎打得。秋心僂俶。燈似豆。空階夜雨。悵悵來又。回頭五十三年。消幾曲清歌。幾壺醇酒。白髮紅顏。事事總成孤負。天際輕陰未散。早過了。斜陽時候。歸去否。青山也如人瘦。

賀新涼

辛巳閏七夕。自甲寅至此二十七年矣。是日直雨。臥病寄感彌深。兩度蘭秋首。恁家家。更番鬪樣。釘盤瓜鏤。共祝新歡相連愛。今歲穿絨果又。看淺淺。



銀河如舊。漫道兩回歸信準。問人間、置曆天知否。勞隔水、竚望久。填河莫訴維尼瘦。數從頭、星期幾閏。翠橋重構。二十七年雲烟過。憑月朱欄已朽。況吉慶、栽花羅袖。休說白頭無巧乞。便韶年、樂事何曾有。還臥聽、雨中漏。

宴清都

辛巳臘月望夜偕同鄉翰院鳳池諸公飲朱霞精舍然燈睹月將旦

立春

綺幔籠雕檻。晶屏隔、蜜梅花下香淺。金鑪麝火煎茶細語。暗催壺箭。當頭璧月還滿。問今歲、尊前幾見。況畫廊、兩兩華燈。媚紅剛映人面。回眸又是春來。旛搖綵。蠅釵簇珠燕。遙知鏡裏銀蟾對影。黛眉先展。分明語近香遠。更玉筍、藏鉤送暖。莫管它、錦帳蘭熏。消停翠琰。

送入我門來

王逸梧祭酒母鮑太夫人高下就養望切含飴一日見左浣香

女史所績明妃抱子圖兒白如瓠甚喜之命祭酒徵題詞余亦念深暮難因譜此調當張仙禱祝同識宜男也

蓮炬千行。花釵九樹。蓬瀛壽母堂開。燕燕嬌飛。新傍荔紅栽。似聞舞綵銀尊側。有仕女屏風十幅裁。啓金萱笑口。佳兒如雪。幾日投懷。休道漢宮畫錯。燕支恁時種就。珠玉盈胎。繞膝名王。郭落錦韞毳。須知大鼻黠王種。有龍鳳丰姿虎豹才。趁東風爆竹。磊棋弄蠟。送入門來。

浪淘沙

可園倚山新起。臨水迴廊一帶數折。作一亭大有江南畫意。

一帶小屏山。斜倚池南。水紅亭子繞池灣。隨意風廊三十六。隨意鉤簾。新種柳毵毵。綠上雕檐。柳絲疏處小桃酣。可惜無人攜畫扇。倚遍闌干。

小重山

出游諸寺歸看。寓庭花樹便娟可愛。賦此自慰。

題徧長安諸寺詩。一春常恐道負花時。馬啼歸趁夕陽遲。閒門閉。紅煞小桃枝。花外柳垂垂。莫捎花便落。數苔墀。更攜紅燭拂蛛絲。殷勤意。頭白有誰知。

點絳脣

兩日輕陰。柳花如織。寫以小詞。

過了花時。垂楊滿院飛晴雪。綠陰如翬。點點東風跡。午夢初回。卻道餘寒積。茶煙

直。湘波簾隙。暫放斜陽碧。

柳梢青 春暮讀書藤花柳陰下卽事

滿院朱藤。一庭垂柳。同做花穠。小設方牀。略安橫几。前後東風。攤書閒對珠叢。看墜莢。時時點紅。乍換青編。又疑粉指。印滿行中。

解蹀躞 壬午三月三十夜飲霞芬家餞春

又是一年春盡。蘭夜尋歌館。綺窗圍坐。分曹賭銀盞。取次密語藏鉤。願連一握纖荑。搦來長暖。玳筵畔。常怕鬢絲人見。輕紈約歌扇。斷紅雙臉。還留好花看。漫道禁住鐘聲。奈他紅燭尊前。比春還短。

臨江仙 詠案頭盆魚

徑尺方盆圍作沼。汲泉小蓄。鯈魚翠痕。略借荇絲鋪。兩三文石錯。隨地見蓬壺。戲捉柳花浮水面。閒看逐隊。噉嗎空中游影。自如如。須知魚與我。同此一江湖。

減字木蘭花 初夏卽事

榆錢飛老。過了花時。人事少。嫩炷都梁。風過書籤自在香。綠陰新雨。閒校丹經。消日午。佳墨勻研。莫放楊花入畫簾。

臨江仙 癸未除夕作

翠柏紅梅圍小坐。歲筵未是全貧。蠟鵝花下燭如銀。釵符金勝。又見一家春。自寫好宜祛百病。非官非隱閒身。屠蘇醉醒已三更。一聲雞唱。五十六年人。

浪淘沙 甲申花朝病中飲霞芬室

紅繡上花梢。柳漸垂縹。暫辭藥裏理金焦。又見白頭扶杖出。沽酒旗招。簾影卷紅綃。月妬燈嬌。人生能醉幾良宵。記取甲申春二月。第一花朝。

翠樓吟 丁亥六月六日酷暑中游十刹海飲酒家池亭鄰有榮氏樓窗檻靚

深人影如畫賦此紀之

炎景停空。翠波滄暑。明湖一曲圓抱。環隄都是樹。帶來岸。朱門多少。藕花開了。占三面朱闌。與花回繞。青帘裊。綺筵尊底。萬紅齊笑。更愛牆外東鄰。隱高樓天半。文窗

窈窕。綠楊搖曳處。恰掩映、釵橫了鳥。靚妝雙照。儘羅扇兜香。遞風都好。花光杪。茜紗衫子。夕陽紅到。

臺城路 丁亥觀蓮節過金鼇玉蝀橋看荷花

苑牆斜抱離宮樹。樓臺多少雲裏。太液平分。飛虹高跨。兩岸芰荷無際。丹霄尺咫。正萬柄搖紅。十洲含綺。鳳輦時來。五銖衣帶御香細。當年聽徹宮漏。便蓬瀛魚鳥也識。延企小殿芙蓉。夾城松栝。盡戴翠華佳氣。垂楊凝峙。恰上映山亭。臨烟水。倚徧闌干。暮雲瓊島起。

小重山令 峭寒雨止落花如雪餘霞澹映小窗轉明念明日寒食矣賦此寄


感

微雪疏疏下鳳城。今年寒較甚。近清明。小桃花落撲簾旌。東風峭。偏倚柳青青。雨過澹霞生。攤書貪一晌。小窗晴。鳥啼頻。勸曳筇行。花如舊。頭白去年人。

高陽臺 辛卯清明後二日微陰綺畫小園花事初濃傍晚倚闌淺吟薄醉爲

賦此解棖觸彌深

蜀錦桃緋。湘羅柳碧。紫丁香動參差。消幾番寒。東風展盡芳菲。尋春祇盼清明到。到清明、能再多時。算句留、自擘蠻箋、自熨新詞。天涯總少流鶯信。但鴉啼鵲噪、略解相思。況是雕梁。難容燕子栖遲。東闌倚盡斜陽影。有誰憐、鬢已成絲。對芳尊、萬種溫存。祇有花知。



中華民國柒拾捌年陸月廿日贈



國家圖書館



000797743